目录

【卷二十一】	2
【卷二十二】	20
【卷二十三】	42
【卷二十四】	62
【卷二十五】	85
【卷二十六】	102
【卷二十七】	123
【卷二十八】	149
【卷二十九】	168
【卷三十】	182
【卷三十一】	192
【卷三十二】	218
【卷三十三】	237
【卷三十四】	258
【卷三十五】	279
【卷三十六】	298
【卷三十七】	324
【卷三十八】	349
【卷三十九】	372
【卷四十】	393

【卷二十一】

金之俊

金之俊,字彦章,一字岂凡,吴江人。明万历己未进士,历官兵部侍郎。入国朝,官至 中和殿大学士,加太傅兼太子太傅。谥文通。有《息斋集》。

苦雨

暗云障晓窗,急雨奔泉注。衢巷倏成川,马牛争蹇步。阴雾瀰远天,亭午常疑暮。欹栋 醉欲倾,颓垣平可渡。雏雀失巢檐,湿萤依草住。市民愁露居,乡农苦徵赋。圣主正忧勤, 天心似余怒。厥咎有攸司,衰庸敢自恕。

冬日扈从南苑即事

南苑銮舆驻,西山肃队迎。晚霞浮紫气,归猎竞寒声。幕火繁星杂,林霜玉漏清。衰颓 靡寸补,梦寐亦怔营。

冬十月从狩阅武恭纪

晓漏初传雕辇动,千官导引羽林翔。风旗扇翼移山足,雪铠腾波浴日光。漫说军容从细柳,亲瞻圣武试长杨。威行万里应无敌,伫息鲸吹奠海疆。

王铎

王铎,字觉斯,孟津人。明天启壬戌进士,累官礼部尚书。入国朝,仍原官。谥文安。 有《拟山园诗集》。

独寐

春风惠然来,照此素帷光。欲寐不成寐,如有深徬徨。虎豹虽已远,风波在故乡。骨肉 屡轗轲,生死能不伤。欲归难为归,欲济河无梁。红颜谁可保,遭遇亦何尝。江皋花渐开, 灵鸟鸣西墙。远游竟何事,祇以搅我肠。耿耿天为曙,缄泪拥衣裳。

送雪帆之秦

秦云飞旧日,求定果何如。城郭新时少,豺狼乱后多。豳人邻绝塞,陶穴蹙黄河。谏草如无隐,临流许放歌。

贺九寺

树合若无路,傍寻有寺通。远鸦翻夕景,一雁压春风。石面雷批壑,松腰水掣空。凭栏 疑日月,不似楚吴中。 故园

转眼天寒气不齐,归心安敢说羁栖。故园墙北开梅蕊,几日河南罢鼓鼙。邙岭扑天余石马,巩云裹雪暗龙谿。新兵闻道三秦胜,次第兴师扫蒺藜。

近望牛头寺

汉西郊野望牛头,滚滚寒云万顷流。钟磬不关兴败事,藤萝犹挂古今秋。人从山气低秦岫,水带军声别阆州。割据雄图忧后日,夕阳无语下寒丘。

与昆山三弟鑨

河边垂柳正依依,念子娄江心欲飞。年老弟兄难久别,田间庐舍好同归。人随蛮土乡音变,路过神隄巩树齐。酿秫须谋日日醉,乾坤何物换渔矶。

送客入延绥

秦山东接太行山,山外黄河天际还。绿树连云看不尽,雁声飞过玉门关。

往会亭

篱落萧条野屋贫, 荒凉冷日起风尘。如何树树秾花发, 三月城边不见春。

李元鼎

李元鼎,字吉甫,号梅公,吉水人。明天启壬戌进士,历官光禄少卿。入国朝,官至兵部右侍郎。有《石园全集》。

和王铁山少司空

长隄漠漠散荒烟,满路寒鸦噪野田。世事波涛舟楫外,中原涕泪酒杯前。关河梦断残归 鹤,霄汉星回冷丽娟。何处笳音催晚角,牙旗猎猎水云边。

同邑有友人过访寓舍授以二诗依韵答之

栖讬湖漘鸟梦迟,且因文酒共支颐。蟫慵墨沈餐鸡跖,蛛隐荷衫傲鹿皮。戎马歌残孤剑 在,风霜字挟一筇随。山中甲子余空老,惭说柴桑纪义熙。

时艰未易赋岩阿,采采芙蓉覆短蓑。话到家山稽客远,帆吹桑海故人过。潭深钴鉧啼元 豹,月落潇湘冷翠蛾。望望枌榆堪结社,扁舟何日醉烟萝。

五夜余澹心涂次尾及同乡诸兄招饮河房时大雨如注经宵不歇醉归走笔记之

插艾怜时序,衔杯共友朋。可堪今夜雨,偏妒一年镫。舫静歌声邈,波喧岸影增。天涯 萍聚处,痛饮记吾曾。

灌瓦研诗余家有古研,得之金陵老友薛更生,其世藏也。研形五瓣若梅花,色如金粟藏经纸,中边血斑翡翠隐起,似出土铜,叩之作金玉声。细腻发墨,亦奇珍矣。相传为灌婴庙瓦,洪容斋守赣时获于雩庙。左池窾为《研铭》以章之,语载《续笔》中。辛丑秋日,余偶游雩阳,考郡邑志益信。志云:"研重十斤,

刓阙两角,其光沛然,色正黄。"余研光色则同,但厚止二寸许,重不及十之一二。岂 后人剖而成器,不止余之一研邪?

梅花研久伴镫青,金质黄流范古硎。汉代何人寻灌垒,雩阳有志纪洪铭。方之铜雀歌钟远,润以玉蜍战血荧。珍重传家供翰墨,毋烦端歙斫山灵。

有客

有客谈遗事,殷勤问往年。情飞沧海外,泪落夜镫前。荒塞闻鹦鹉,空山泣杜鹃。一尊 聊取醉,身世总茫然。

宋权

宋权,字元平,号雨恭,又号梁园,商丘人。明天启乙丑进士。入国朝,官至国史院大学士。赠少保兼太子太保,谥文康。有《白华堂诗》。

野宿

曲水浮天际,孤村傍废城。农人星卜夜,荒寺磬为更。渔火当空乱,风泉入暮清。欣然 如有讬,不复念长征。

同郭夔一饮北固山

萧瑟秋声涧壑哀,他乡扶病且登台。不知老树何年有,但见长江镇日来。四海烽烟还逆 旅,一樽风雨暂徘徊。故人邂逅非容易,烂醉无妨卧碧苔。

刘正宗

刘正宗,字宪石,安丘人。明崇祯戊辰进士,由推官行取授编修。入国朝,授国史院编修,官至文华殿大学士。有《御墨楼诗集》。

在昔

在昔登舟日,鬓发如黑丝。解缆西塘侧,繁霜入镜垂。岂其苦奔波,有怀空自知。川谷远无梁,虎豹踞路歧。惊魂怵难定,梦里返江涯。心折饱忧畏,骇浪复无时。回首顿三秋, 电光阅弈棋。朝来驱羸马,春风面上吹。履穿厌冰雪,又看芳树枝。宁不思远道,远道力已 疲。既老休徵逐,往事安可追。晓日鸣乳鸠,燕语影差池。大化本无停,物理遂所私。古有 赤松游,高踪慕茹芝。

济上行

百鸟皆有巢,群动各有匹。艰虞生不辰,满目一凄恻。有客济上来,为我述荡析。势累 鬻道旁,云是捷功得。初但贵红颜,后乃空原隰。红颜供余欢,老稚获赎直。百年生聚地, 千里瀰荆棘。朝廷望拊循,吁嗟谁失职。同是血气伦,不许恋蓬荜。苌楚古有谣,相对付啾唧。非无东陵资,安堵正深壁。每读《舂陵行》,泪落沾胸臆。眼前旌旗红,又向春明出。 所愿念疮痍,无使生相失。

和天宁寺浮图歌

高标突兀撑霄碧,西俯昆仑东碣石。电光过眼阅大千,咫尺换尽长安陌。无风铃铎乍传声,半夜萧萧龙象行。盘空孤鹤栖复惊,下瞰蚁垤日纵横。寺中老僧去还来,佛灯寂寂照青苔。

老妇行

东家老妇垂白发,樵爨无力余病骨。岂复有意斗蛾眉,坐守深闺费岁月。却忆当年初嫁时,含羞对镜理胭脂。但愿同心不重色,肯学桃李信风吹。宁知此意竟难明,时移岁换天无情。翠翘珠襦尽零落,闺中甘逐众人行。自解悲欢随所遇,红颜自古草头露。只今幸无入宫妒,裙布钗荆亦已足。愿将锦瑟与瑶琴,一时并写《白头吟》。寂寂空房恐虚度,敢道人新不如故。

对镜叹

少年对镜颜色好,衰年对镜颜色老。镜里容光能几时,回头绿鬓成枯槁。开匣莫拂镜上尘,镜明空见白头早。亦知白头不可黑,有时白头不可得。窗前槿花换朝荣,日暮临风已无色。寄语少年速为欢,他日欢场徒恻恻。百金刀环明月辉,千金骏马黄金勒。章台杨柳饶春风,醉来光动玉台侧。不见老翁空叹息。

玉芝宫对雪呈诸同官学士

苍茫雪色澹遥空,隐几长吟兴未穷。别殿不闻来翠辇,六花犹自舞东风。依依苑柳添丝软,寂寂炉灰近酒红。珥笔几人歌瑞霭,调高属和愧衰翁。

初度日客过

长安逐队又三年,此日秋光亦可怜。诗酒有情禁白发,风尘无恙剩青毡。浮云过眼千峰 矗,良夜当杯片月悬。莫道乡心惊旅梦,兴衰曾见海为田。

胡世安

胡世安,字菊潭,井研人。明崇祯戍辰进士,官詹事府少詹事。入国朝,官至秘书院大 学士,加少师兼太子太师。有《秀岩集》。

嘉州留别子弟辈

旋车风鹤际,别舸露葭前。今夕称游子,春光忆隔年。莱庭怀舞彩,衡赋欠《归田》。 饕禄非吾事,殷勤北雁传。

同雷伯石朱廉水宏善寺观海棠

精蓝丛灌隐南村,双树还堪止世尊。地僻且能辞俗驾,春深犹有未醒魂。攒红玉界铢衣缬,浮白云窠醉颊浑。谁是前身拈笑侣,乱香飘缀不留痕。

张文光

张文光,字谯明,祥符人。明崇祯戊辰进士。入国朝,由知县历官江南池太道副使。有《斗斋诗选》。

南高峰

赤城萦树巅,横互扪山腹。悬崖多外拓,侧下深根覆。苔乾积流痕,怅望疑溅瀑。阴黑 古龙眠,风涛牛石屋。吾欲假巨灵,一洗寒山玉。雷雨封天门,永言断凡俗。

宿柳塘

群鸦飞渐少,驱车投山阿。茅屋映棕榈,夕阳影婆娑。霜枫无片叶,倒挂青青萝。夜深山更幽,门外喧谁何。天地方流血,得非战鬼多。细听乃人声,县官自催科。挥鞭凌石齿,俨如雷霆过。孑遗无定魂,相视涕滂沱。

过青州

海月云根吐,烟林马首平。千年争战地,万里旅人行。红叶分秋色,黄花耐客情。岂无 倾倒意,不敢问青城。

观音阁

孤鸟下云间,长松昼掩关。定香醒习梦,清磬落空山。天地客同老,古今僧自闲。徘徊归径晚,林月白漫漫。

冬日载酒慰赵锦帆去国

作令书千卷,为郎酒一觚。浮沉经幻梦,老大误微躯。河水连天白,嵩峰拔地孤。中原 仍我辈,何用泣穷途。 仕路人难定,忧深梦亦劳。主恩原海岳,吏议析秋毫。月滉鱼龙卧,云寒雁鹜高。蹉跎 宁足问,吾道本萧骚。

客叹张衡老,人推赵胜先。每逢花对饮,便觉酒忘年。作宦心原苦,《归田赋》莫传。 汉家新气运,沦落几才贤。

送季天中秋日东行

千山落日淡高旻,万里秋风促去轮。自是圣朝无阙事,何妨天末有孤臣。霜侵列戍猿声 急,云卷平沙月影新。我亦梧桐花下客,至今魂梦愧斯人。

送彭禹峰补楚中监司

剖玉荆山孤月明,和歌燕市万人惊。交情雨雪犹分袂,时事西南未罢兵。锁钥初归周太保,行囊仍似鲁诸生。当年割据浑如梦,暇日桃源试一行。

湖雨登毗卢阁示僧

辰钟疑有老龙听,岩壑阴阴聚百灵。云卷浪纹微带绿,雨蒸山气不分青。瞿昙古刹金轮绣,神禹荒祠铁锁腥。莲社花开容我否,好将明月对清泠。

后妇行

春华未及实一旦遭风雨。离披愧松柏,徒然怨泥土。霞彩灿桑榆,莫能蔽村坞。鸳鸯七十二,贱妾亦为伍。遂充君下陈,宠爱良难数。戚施共燕婉,展转惭无补。偃蹇任侍儿,殷勤通保母。区区自束缚,郁郁不得语。献君一杯酒,愿君千万寿。宁为薄命妾,难为再醮妇。敢告后来人,初心安可负。

闻僧话浙东山水

白日销兵气,青山无废兴。风雷归禹穴,星月出严陵。峭壁遥悬水,长松半挂藤。休粮山自好,定力服高僧。

江干雪望同玉甲饮

雪积潮门二月寒,江天万里昼漫漫。云深鸥鸟迷沙树,水静渔舟泊晚滩。桑海他年空涕 泪,风尘吾党尚弹冠。春光未老梅花瘦,怅望高空醉倚栏。

饮泗州谯楼

回合山光入望虚,淹留杯酒意何如。云深古木藏金刹,雨过诸陵冷玉鱼。楚国久传烽火地,汉家谁上《治安书》。可怜河畔青青草,白露西风鸿雁呼。

酬彭燕又

流莺绕树午阴清,好客临门旧有名。百战中原高壁垒,十年东海少逢迎。吹残夜色怜羌管,销尽南薰付论衡。几度读君春草句,萧萧风雨晚潮生。

殷岳

殷岳,字宗山,号伯岩,鸡泽人。明崇祯庚午举人。入国朝,官睢宁知县。有《留耕草 堂诗》。

读史

冒顿纵鸣镝,何有乎妇翁。齐虏穷计画,和亲苟弥缝。白登帝胆落,事急聊相从。官家 屈体貌,四国少颜容。贻谟累风俗,边鄙讵偃弓。若淮阴而在,不当歌《大风》。

人言父子亲,安知不为虎,猛兽惜其雏,步步生咻噢。汉武好神仙,方士正旁午。志虑既回惘,谗夫耦二五。齿牙之为猾,荼毒于楛砮。隶臣衔尊命,两官无靖士。以子盗父兵,苟图脱罪罟。九服无逃命,望思亦何补。

霜雪何将将,日月皎光明。钩弋不可活,奉车托微诚。以是藐诸孤,一旦寄阿衡。朝旧 擢纯笃,揽辔见澄清。帝星惊流电,桐宫覆典刑。公孙病已立,草木亦知名。世运惟轗轲, 幸济以忠贞。妻孥怙烜赫,得失苦纵横。祸福有所常,操存舍则亡。

圣人无常家,一龙而一蛇。仲举奖王室,名贤蔚东华。相与张天纲,抗节触奸邪。当时 王路险,骀衔覆奔车。庶几无道愚,踣顿贻咨嗟。

乱门不可过,惧以伤吾行。乱世不可入,惧以戕吾生。袁闳悯先祚,睹变于未萌。萧然 对环堵,独立遗世情。弟昆竞骄僣,与时争权衡。甘为所凡愚,囊括守其贞。渐冉十八载, 行者无埋名。

太阿不在掌,神气积苦窳。周德既已衰,子孤失其叙。群雄横意气,鼎隧启纳侮。玉步犹未改,王章尚撑柱。胡然晋大夫,一旦荐茅土。葛藟庇本根,况乃纵寻斧。名器苟不存,其他安足数。

礼者国之维,民者载舟水。暴秦虎狼威,流血被九轨。侈功盖泰皇,一家天下始。猛气 陨沙丘,难从一夫起。七庙堕飞烟,旦暮殄宗祀。亡秦楚三户,弧矢安足恃。

数云驾飞龙,真人屈群力。扶义西入秦,始定三章约。众争走金宝,何独收图籍。一军惊大将,关东可传檄。借箸请前筹,讵复有遗策。宽大帝王模,要在识人杰。一增不能用,叱咤徒虚喝。

仲事家人产,阿濞老农儿。福与祸相倚,泽麋蒙虎皮。江湖错襟带,俨尔锡介圭。盐铁即山海,为问自何谁。不思庇本根,乃欲披其枝。孽匪降自天,六竖同蚩蚩。衅虽由博局,几杖失之慈。

谋国如搏虎, 啑血满朝市。衣裳自颠倒, 于错安足耻。袁丝炙毂輠, 魏其狃风旨。条候 真将军, 自兹多积毁。嗟哉天下事, 认真亦徒尔。

唯则可定国,妇愿亦何极。一子为天王,一子分桐叶。宠宴隆私恩,误信千秋约。牧犊不顾车,盍旦翻日月。福薄不知载,陨身竟何益。

革心舞干羽,革面血标杵。汉武勤远略,八荒无宁处。郊祀歌天马,祖祢诧宫吕。夺我燕支山,庸有利乎女。夜郎贾蒟酱,间使出深阻。靡敝忧鬼神,四庙无余祜。轮台下尺书,不者亡秦绪。终汉无外扰,尚论所节取。无德易以亡,圣言久沦胥。

周公负成王,弗陵践天子。高卑既已陈,旦夕遵涂轨。小人追丧躯,截趾而適履。刺侯 生衅隙,上书恣诋毁。将军谢免冠,少帝烛奸诡。墙茨不可扫,妇人定足恃。

远略不可勤, 众狄不可速。老臣数军宝, 遂上便宜策。留屯饬武备, 居民并田作。罢骑 省度支, 致穀著威德。羌众以崩离, 我师过枕席。当时讼盈庭, 便支多勾棘。如彼九牛尾, 度越乌从测。

伏波天下士,遨游而择主。真人崛东方,阔达符高祖。既见一乃心,披帷筹二虏。聚米 为山谷,指画同目睹。八区寻大定,奇坊勒铜柱。后世讼神人,谭言中绳矩。古道不可期, 宵人哗市虎。

太姒殊风轨,徽音不可属。伏波有小女,亹亹多仪则。正位长椒宫,揲然加谨肃。裳衣大练裙。无所于缘饰。建初爵诸舅,危言念倾覆。乐以贵人下,知于身取节。先臣遗家训,天姓光竹帛。维先之以善,后乃报其德。

道隐礼为基,世乱圣人生。仲尼驾奔车,谁复睹未萌。延熹皇路仄,雕琢名士倾。购募同寇敌,使出车交并。号咷日月黑,搒掠血肉横。柏伤竹亦枯,岁寒失坚贞。当时箕颍滨,可尚光遗荣。

孤贵易失和,露才亦濒危。当时贤智过,抗棱长风规。载祸日相饷,几令无孑遗。林宗 步高衢,尚志不繁词。敬遇贵贱士,壹之以坦夷。明哲保其身,可奉以为师。

登岱

石蹬蹑高危,仰见日观峰。赤丸涌沧海,星河淡遥空。天鸡发先唱,声落野鸡中。俯视 群山巅,风色初冥濛。

十载上太华,春仲陟嵩高。希夷梦未觉,子晋笙嘐刁。平眺西南云,軿车列旌旄。升慈 玉女堂,劳之以香醪。

徂徕列前楹,济漯溁衣带。众山皆俯伏,俨如朝王会。明堂不可复,汉秦失骄汰。惜矣 大夫松,徒增后人慨。

客官渡除夕咏怀

世故纆牵长,御之无其道。我非好贫贱,禽鹿终悦草。担簦縻岁华,幽谷穷探讨。古人于隐沦,称心以自保。

程正揆

程正揆,初名正葵,字端伯,号鞠陵,孝感人。明崇祯辛未进士,历官尚宝司卿。入国朝,授光禄寺丞,累迁工部侍郎。有《青溪遗稿》。

己亥江行

百战蕲黄地,扁舟江汉平。老人谈旧事,故鬼哭新城。波转渔灯曲,天垂鹤影横。年年沙草碧,又听杜鹃声。

夕照薰荒草,浮云暗上流。渔人归解网,暝客竞摇舟。风雨晚偏急,江湖老自幽。孤情 忘夜寐,酒盏与诗筹。

竟日西风老,从看白发新。一旬方见月,四海几归人。赤羽膏民血,青原哭鬼磷。十年 高杀气,尚有未称臣。

题画

闲情不可住,一往上孤亭。行云非草草,贞石自惺惺。雁寄将来信,山留不了青。彼吟 泽畔者,辛苦作《骚》经。

题看山图

自买青山自看山,鸟飞倦翼不知还。天心难挽迁流事,我法姑存淡远间。怀古空林虚夜月,怜人落叶逐清潺。风尘暂息一回首,几个能消此日闲。

题画

绝壁倒飞千尺雪,偃松高卧一溪风。谁家好傍此间住,定是青溪无事翁。

戴明说

戴明说,字道默,号岩荦,沧州人。明崇祯甲戌进士。入国朝,官至户部尚书。有《定圃诗集》。

西沽

长风摇海气,日在大河西。诗老惊驼背,途穷妒雁泥。柳营村牧避,桃口晓沙迷。谁寄文房梦,河间认旧溪。

题王西樵年丈小像

鹿砦今将问,能封草径无。岳摇惊句老,月定爱禅枯。尔我千秋外,曹刘一代孤。平山 遗落照,莫误洗桐图。

赵开心

赵开心,字灵伯,一字洞门,长沙人。明崇祯甲戌进士,官御史。入国朝,官至总督仓 场户部侍郎,加工部尚书。

山行即事

历遍崎岖径,峰峦总不群。马惊穿涧水,树款宿山云。怪鸟名难识,幽花路未分。隔溪 樵子唱,一曲远先闻。

暮春吴园次招同石仲生戴沧州龚芝麓集吴船

不涉风波似隐沦,岸桴今共集贤宾。花飞婪尾知春晚,雪上须眉信老真。几日欲陈休致 疏,百年难得称心人。论交渐觉晨星尽,慷慨杯中不计巡。

李士焜

李士焜,字用积,号又白,任丘人。明崇祯甲戌进士,历官山西河东兵备道副使。入国朝,历官浙江布政使,署巡抚兼漕运总督。有《麟篆斋遗稿》。

答王敬哉宗伯

投闲剩得栖山居,节届朱明麦秀初。花底飞觞千日酒,客来问字一床书。青藜依阁吹光远,白鹤归巢带雨余。高卧北窗聊避俗,何须清梦到华胥。

程康庄

程康庄,字坦如,号昆仑,武乡人。明崇祯乙亥拔贡。入国朝,授镇江通判。

陈壶岚

壶岚旷周旋,十春谋一面。网户倾陈醁,扫径通幽彦。山色栖城头,长河净如练。丘壑 满胸中,浮云岂能眩。

姬相周

姬公方下士,返驾更延宾。登山倚积墨,衣敝不重陈。春城羁旅客,迟暮但经旬。二子 远来谒,翛然同避秦。

申葵衷

申子寒毡破,粗黡逼画屏。迎宾无杂座,赁屋半疏棂。始交若有契,坐久更忘形。独谓 吾诗老,终当讬汗青。

武君十

君十爱栖迟, 衔觞事林壑。俯视尘土腥, 亡簪茹藜藿。关我匪繇天, 板缠聊见薄。剩有 素心人, 同期驭鸾鹤。

陈吾青

吾青既藏辉,裘敝舌亦秃。独念王子房,经天望东哭。当时英雄人,潜闼何太速。不如 饮美酒,逸光向幽独。

庞鸠六

鸠六屣履迎,投辖苦不早。下榻虽未成,所感在怀抱。竹箨时写书,开樽验文章。相契 已忘言,鸿名永为宝。

石泰华

泰华恩感人,豁达吐怀素。累觞求一醉,情神与之赴。顾见日将昳,风尘漭回互。常恐 促欢节,酒向西光妒。

武二酉

二酉富诗书,搴芳眇流辈。蜗舍取厨烟,随阶有余态。共友检农皇,晒药松阴背。卜筑本无尘,丹砂有时配。

刘友光

刘友光,字桂三,攸县人。明崇祯丙子举人。入国朝,官沙河知县,迁行人。有《憩岳堂诗略》、《香山草堂》正、续诸集。

寄旧令朱汉臣

莲勺秦时月,水色碧于玉。中有焚鱼人,临轩濯双足。兰芽宛中央,妙技能刻鹄。溯洄望蒹葭,凄怆乱心曲。我有一亩宫,三径殊局促。君昔抱琴来,亲见山水渌。桑麻蔼轮蹄,箫管转华烛。桑扈讬晨风,翱翔啄我粟。墉壑何萧条,蚕盆亦不浴。丁男鬻已尽,寡妻犹岸狱。安得旧雨来,击鼓洗桎梏。

秋阴寄王山长

一寸心中地,容忧竟万端。树凉蝉命促,虫苦蓼荫寒。蒿里观狐穴,桃花忤钓竿。梦中师竹在,落叶满长干。

寄方密之

家破贫非累,忧深寇未平。避人空下泪,绝口不谈兵。桐向秋辞碧,门临溪转清。月明 思汝别,舞袖遍琴筝。

将入闽寄故人王而农

飘零吾久矣,离乱欲何之。愁绝遥天暮,哀余斫地悲。南音同在耳,西爽独支颐。相见情无限,何能尽所思。

丁景吕南游索书与梅村师闻师连举三子却寄

哀绪三眠柳渐酣,绿经江北更江南。门余三尺淹留雪,野坠同时痛哭簪。贫已无家依独树,春犹遣兴到双柑。门生老去诸儿稚,醉后何人可举篮。

挽画僧采石

黄金锁断薰风起,青草年年面上生。最是春来无限憾,牡丹深处哭王耕。

陈之遴

陈之遴,字彦升,号素庵,海宁人。明崇祯丁丑一甲二名进士。入国朝,授侍读学士, 历官弘文院大学士。有《浮云集》。

高梁篇

高梁桥下春波绿,朱城叆叆衔朝旭。大道东连紫禁开,晴峦西映金隄曲。榆燧千家火乍收,柳丝万缕春初足。龙马银鞍车似水,貂蝉宝盖人如玉。玉人调笑倚余醒,红粉青娥拥出城。新声瑶瑟惟愁和,高揖金鞭不问名。俱攒翠幰红尘喑,共指芳园画阁明。芳园画阁春常羡,绣户璇窗人不见。经年花草任荣凋,一日笙歌恣游宴。桃李枝头日欲斜,云軿今夜宿谁家。十三学舞矜回雪,二八怜春叹落花。落花转眼飘芳甸,且喜芬菲舒未遍。宝带难输松下心,轻纨先送花前面。北地脂开笑靥娇,南都黛发修蛾倩。子夫未入合欢宫,昭仪犹给阳阿院。阳阿车骑日优游,锦障经过尽彻侯。此日莺花娇紫陌,此时弦管满皇州。皇州自昔多豪族,燕台争击荆高筑。任侠宵排紫闼通,冶游朝拥朱轮簇。刘生紫剑剑千金,石氏绿珠珠一斛。中涓骏马大隄头,玉勒雕弓翡翠裘。秦官旧领中车府,汉宫官新拜大长秋。乱抛金弹垂杨外,列坐琼筵绿水周。垂杨绿水淹留久,鸣珂倏忽雷霆吼。声势能移北斗杓,威灵欲喝西山走。张孔纷纷竞拜尘。谁人白眼惟呼酒。呼酒狂挥换赋金,蘋香花雾满高吟。君王已叹凌云气,乐府争传郢雪音。别有伤心春草碧,彩笔红颜两相惜。不见当时堕珥人,难逢前度援琴客。可怜今岁春光早,可惜明年春更好。几度歌钟丹凤城,千回裘马青楼道。歌钟裘马日逡巡,寒食东风万古尘。惟有溶溶桥下水,年年流送御沟春。

春雪篇

长安二月春初好,舒红袅绿青楼道。七成宝帐夜微温,五出霏霏点芳草。斜舞瑶空已半融,薄铺玉戺无须扫。绮树俄添浅素辉,罗衣渐觉轻寒恼。浅素轻寒剧可怜,迷离春望惜春天。低侵春院长兼雨,遥集春山半带烟。入梦每伤莺唤后,怀人多在燕来前。寻芳畏湿莲花步,对景慵联柳絮篇。柳絮浑如荡子情,紫骝当日踏花行。凤凰城里雕轮度,鹦鹉洲边晚棹横。此时见雪还相忆,此际看春转自惊。雪想玉容临宝镜,春随纤手入银筝。春雪春风几朝暮,春花自恋琼台树。妾恨宁如雪易销,君心愿共春常住。冷霰先欺玄菟城,阳和不到黄花戍。夜雪金炉共夕香,春游莫向天涯路。

僧持黄夫子书来盗投诸水

夫子淹梁狱,书邮藉老禅。字珍宜诲盗,言洁合投渊。肝胆蛟龙得,精神鲤雁先。不将 持告密,犹叹胜时贤。

宁远

先子曾持节,贤王复建牙。安危身并系,兴替事空嗟。蔓草埋残堞,阴风卷乱沙。尚传 余部曲,扶义赴京华。

燕京杂诗

幽燕都会历元明,九鼎迁来自旧京。天子待边常自将,通侯出塞几专征。南包百粤开荒 服,东引三齐绕大瀛。谁使金瓯终缺陷,赤眉青犊满都城。

未歌《玉树》已亡陈,不筑阿房亦覆秦。一旅卒然挥白梃,九州强半著黄巾。求为黔首 悲龙种,别有蛾眉辱马尘。痛忆文皇南下日,大廷幽谷尽忠臣。

尽剪诸边贼算深,一宵风雨忽南侵。翻城虎旅元牙爪,揖寇貂珰总腹心。黑眚蚤从三殿 出,黄霾频障九天阴。卜年亦拟齐周历,洛鼎安危匪自今。

中人戚里竞豪华,勋爵重封几世家。十万买春灯市酒,两行照夜玉楼花。忽惊流矢丛丹阙,尚有鸣珂导锦车。玄武冈头霜树色,年年寒食吊群鸦。

神宗中叶久熙康,龙战玄黄在庙堂。从此群公轻国恤,终令剧贼乱天常。八鸾晚出金隄月,五凤秋芜粉堞霜。莫叹簪绅刀俎尽,鼎湖遗憾杳难偿。

烈皇亦是英明后,辛苦兴邦反丧邦。南渡有臣曾死诤,西征无将不生降。鹃枝血洒春宫 六,龙驭魂归夜阙双。差幸孝陵弓剑地,寇氛犹自限长江。

片石才看勒汉铭,几番烽火照彤庭。腹心未见恢河套,肩背何缘割大宁。千帐美人歌夜 月,四郊残鬼哭秋星。高皇颇有都秦意,遗恨当年失地灵。

中书罢省启文渊,阁老仍专宰相权。非少萧曹扶汉日,终如牛李乱唐年。 荒陵石马寒风

里,废沼金凫落月前。行过黄扉长太息,虚将误国恨中涓。

他时旄节总书生,军覆潼关国已倾。造膝主臣徒对泣,同心兵贼久输平。犹驰铁券封诸 将,虚拟铜车指旧京。闻道榆林俱斗死,至今磷火遍荒城。

安定门西旧教场,朱旗玄纛岁翱翱。风云尚想团营壮,狐鼠多从禁旅藏。没马乱蒿迷废垒,惊人斜雁起回冈。霜前北望松楸少,千里平芜落照黄。

芳湖西绕夹城隈,翠辇龙舟昨日来。波黑夜腥秦苑血,风黄秋卷汉宫灰。朱楹系马肥瑶草,锦袖呼鹰下玉台。何处如云行十二,洗妆楼上镜重开。

朱城绣岭接西山,缥缈花宫紫气间。塘上水嬉陈百戏,楼头春望出双鬟。干戈满地天方怒,台榭无人月不还。惟有金鱼池畔路,三春游马暂回环。

秋日偶成

幽燕东北古营州,乱碛惊沙起客愁。万里关山重出塞,一天风雨漫登楼。吟诗每共哀箫 咽,伴老空怜短剑留。昨上荒原醉萸菊,萧森满目故园秋。

度辽车骑几纵横,虎帐龙旂上将营。草木千年含杀气,鼓笳终夜作边声。猩红岭外要荒 尽。鸭绿江边障戍平。闻道公孙曾据险,一时海外自威行。

白露初零玉涂攵葭,商声萧飒动京华。纫兰佩冷三秋客,宴菊杯喧七贵家。深殿凤笙留 素月,芳湖龙舸荡明霞。只今紫塞金风里,才熟东陵五色瓜。

三山遥对凤凰台,台下寒江去不回。霜老白门秋寂寞,月明青盖夜归来。金莲曲院谁人 见,玉树秾花异日开。犹忆乌衣诸贵客,艰难非乏济川才。

人物江东故不群,剑花诗草日纷纷。浅深秋水扁舟月,远近寒山两屐云。《越绝书》探琼笈古,《吴趋歌》送玉杯醺。卧游此际看丘壑,似有松声静夜闻。

扰攘东南战伐余,秦弓归马竟何如。斗牛一夜缠兵气,吴楚同时急羽书。江黑怒鲸嘘浪立,月黄惊雁堕云疏。五湖钓艇今安否,犹自莼鲈兴未虚。

白狼河上望京师,皎月清霜共此时。七萃旌旗长缭绕,三朝剑珮自委蛇。伏波铜柱成功 易,横海戈船献捷疑。南国余黎供上切,输将争恨役车迟。

巑岏古戍倚层丘,冰雪长凝万古愁。天接燕台劳北望,水趋辽海羡西流。三更梦破孤城笛,六月寒生久客裘。醉揽短衣随羽猎,呼鹰驰马一销忧。

胡尔恺

胡尔恺,字石江,长沙人。明崇祯丁丑进士,官太平推官。入国朝,荐举山林隐逸,授 吏科给事中,官至礼部侍郎。有《且耕堂集》。 小孤山

香国浮人境, 岿然绝众援。碧环千浪影, 青立一峰痕。有径堪僧住, 无萝许客扪。相看姑缓棹, 望望人云根。

边大绶

边大绶,字素一,号长白,任丘人。明崇祯己卯举人,官米脂知县。入国朝,历官太原 知府。

过方山

三十年来岁月虚,偶因烽火过禅庐。白云不断人行路,消受松风一夜余。

王岱

王岱,字山长,湘潭人。明崇祯己卯举人。入国朝,官澄海知县。康熙己未,荐举博学鸿词。有《了庵诗集》、《且园近诗》、《浮槎溪上草堂》诸集。

赠汪魏美徐兰生两隐者

西山有灵隐,松桂生岩扉。二老采薇久,十年来市稀。驻颜留黑发,饮憾著麻衣。一倍 悲歌发,斜阳恸哭归。

夜坐

虫语惊寒梦,飒然山夜深。遥镫隔溪隐,残月过庭阴。野哭多新感,林秋识旧音。年来 风物异,不但客伤心。

永州道中示易无画

松影碧摇摇,无风亦自涛。寒花随涧落,细路入峰高。云动低依客,烟深远唱樵。岳青 九面外,此地足诛茅。

寓刘储升江楼

出山犹胜住山幽,为爱君家江上楼。风送岸花粘客袂,雨来烟嶂压行舟。遥峰入幕青无已,野水平天稳不流。独有海翁机事绝,朝看沙鸟暮浮鸥。

孙廷铨

孙廷铨,字道相,别字沚亭,益都人。明崇祯庚辰进士,官抚宁知县,改监纪推官。入 国朝,官至秘书院大学士。谥文定。有《沚亭集》。

秋夜和王似鹤考功

清宵哀角静严更,睥睨高悬列宿明。几日风烟归梦阔,一城砧杵客心惊。黄金难信刘中 垒,白眼堪嗤阮步兵。怅望紫宸朝散后,晚钟时度枕函声。

还山吟

守道在无为,吾自厌吾拙。解佩及兹晨,还山听鸟鴂。世态逐婵媛,进止心欲折。欣此 素商集,缅想缁尘歇。逝将寻旧侣,茅屋阴崖结。暝色下巉岩,苍然立积铁。林深倦鸟集, 谷静涓泉咽。夜凉四山空,云卧逼天阙,扪萝想幽人,弄箫迟山月。

真气荡喧浊,仆仆为形役。一器而众操,安得不速敝。古有避俗翁,神释私其智。感此 偃空山,息机良匪易。朝饭林下曙,夕宿岩中閟。暑气清林峦,洒然出新意。侧思声利途, 惴惴魂犹悸。且逐采芝游,野服安薜荔。

高尔俨

高尔俨,字中孚,号岱舆,静海人。明崇祯庚辰一甲三名进士。入国朝,官至弘文院大 学士。谥文端。

送倪相如先生之任营丘

难将好雨挽干旌,一片浓云似别情。叆叇几层遮望眼,廉纤祇自送春声。渊明禄薄原如 寄,司马才优岂市名。百里可能烦卧治,琅琊从此播余清。

李森先

李森先,字琳枝,号滟石,平度人。明崇祯庚辰进士。入国朝,历官御史。有《椒雨园集》。

游大泽山

九年未上九青巅,清梦时时岩壑前。绝巘芙蓉终不改,幽岩松栝故依然。风驱磵底云归 驶,雨洗峰头月到先。是处色声皆旧侣,狂歌宁禁酒如泉。

立春前一日漫兴

晓梦旅心惊,流莺乍试声。披衣寒尚在,揽镜白初生。游屐郊原满,行吟官舍清。始和 应有令,惟念尔民耕。

鸿雁江干集, 鲸鲵海上稀。波光明宿雾, 花气霭朝晖。济世心徒热, 藏身愿已违。何时 寻旧侣, 携杖向岩扉。

云间余清亭

徙倚官衙月正明,尚余寒柝在高城。空庭积水松阴乱,小阁张镫夜气清。剩有黄花随地满,那堪白发向秋生。故乡海味何曾减,残笑鲈鱼浪得名。

登苏门山啸台

啸法如可学,嵇生病未能。从来君子狱,谁不愧孙登。

梁以樟

梁以樟,字公狄,号鹪林,清苑人。明崇祯庚辰进士,官商丘知县。有《卬否集》。

安东道中

小邑连沧海,耕桑有万家。鹿疃齐麦秀,龙尾护隄沙。要害分秦郡,神功控禹槎。览图 思黑子,建革感星华。

黄云横百里,落日大河隄。谣俗分南北,江山割楚齐。人家蚕月近,海徼卤烟低。膏雨 劳田畯,侁侁服犊犁。

盱眙道中

都梁西下路,云草望中繁。积石甃山郭,孤城抱水村。江峰屋半赭,野火树同髡。汤沐余残邑,难从耆旧论。

清明日雨北奠感怀

飘零华表处,令节忍思家。万井龙蛇雨,三春杜宇花。禁烟犹冀北,宿草已边沙。椒醑南天土,乾坤泪眼遮。

送王于一移家秦邮

雨雪关河路,谁驱妻子行。百年犹念乱,吾道此孤鸣。草木荒中垒,江山老步兵。苍茫 甓湖水,莫辨鼓楇声。

送祈永还山东

独蹇黄河路,风埃赋北征。龙沙团日气,雁阵度兵声。海坞耕烟远,山城哨火横。知君 年正少,终有弃繻情。

西湖杂兴

尺幅西陵地,偏增旅话长。暮笳鸣戍火,晓角动星芒。马饮残湖水,萤飞故苑墙。只余

图画里, 孤笠吊斜阳。

登韬光庵

四山青欲下,众树密难名。时有竹光入,远闻泉水声。鼯抨石子落,猿挂翠微行。对境忘言说,玄情去复生。

白鹿泉

陟险寻源入,危桥石齿连。老梅犹碍日,野鹿不知年。壁绝山精隐,泉甘药草鲜。夕阳 归路滑,人影乱枫前。

与马习仲话有赠

灭烛扪心语,风吹古大河。壮游薪胆尽,兵法鬓毛皤。匹蹇冲春雪,危楼坐绿萝。同裳 人几在,愁听渐离歌。

岁暮望大兄不至

薄暮交游尽,残山老弟昆。漂摇羽尾急,跋涉胫毛存。落叶辞荆树,荒云守蕨根。暂归 犹胜客,敢作故乡论。

于一避乱卢家堡来晤因得闻江上信

念乱忧方大,披荆尔忽来。乍询家室在,初谂甲兵回。海峤风秋劲,芜城门昼开。秣陵 云气好,重上射陵台。

晚宿越城

停轺问土俗,踯躅越王越。古月移前垒,荒风宿鬼兵。燎衣残灶火,击柝远河声。午夜 看星气,晨鸡或肯鸣。

秋日鉴湖留别万履安诸子

贺鉴祠前酒一杯,霜枫千里夕阳回。江山白发归人远,杵臼西风过雁哀。许剑几人同汐 社,埋云无路哭荒台。时违重惜衣冠别,肯使秦庭片铁灰。

集汉阳王怀人亦世邸中

楚水云荒过雁声,檐花细雨落芜城。同裳昔日犹侨札,异国人间几弟兄。梦断衡阳天一握,话残梼杌烛三更。无端翠袖扶残醉,泪湿湘娥未忍倾。

马之瑛

马之瑛,字倩若,号正谊,桐城人。明崇祯庚辰进士,授阳江知县。入国朝,历官兵部 主事。有《秫庄集》。

金陵怀古

建章宫树晚凄凄,木末亭前积甲齐。狎客诗成新绮阁,相公吏散旧沙隄。晋人遗事多江 左,李氏家声坠陇西。冷落狭斜诸女伴,采莲不敢到青谿。

空阶

空阶何所有,露白草虫鸣。只种数竿竹,如兼万籁声。孤烟随鸟起,远树共城平。无限 南楼兴,还愁月不明。

赴邓柬之饮

雪晴方欲出,之子適嘉招。寒烧回芳草,新流及断桥。好游穷楚畦,念乱述吴谣。身世 纷多感,全凭一醉消。

濑水行

诏书重起东山卧,门下何人吊复贺。果然富贵履危机,未许春秋功覆过。侍直才回身忽收,谤言日至因杼投。试看械系同齐虏,漫道声名动右侯。当诛臣罪何辞死,巢破惟愁卵亦毁。鹤唳华亭忆故乡,犬牵上蔡悲公子。上前阴中亦何为,天道神明自有知。枉将削地诛晁错,正为求田杀魏其。请室呼冤犹肮脏,上书谁敢求归葬。愿将尸谏悟君王,桐棺三寸城南圹。

答无可

军府迎降先署状,仰视飞鸿剧惆怅。彦回名士寿偏多,子卿足下归无恙。故国千峰可寄家,兜鍪原不妒袈裟。金陵旧恨空沈锁,宰相新隄自筑沙。国成谁秉邦离析,党祸亦由君子激。林宗何必独仙舟,宾硕谁能共复壁。烽烟几载历江湖,万死全凭佛力扶。游子尚堪依母隐,仇人俱己伏天诛。素心自指井中水,任是波澜风不起。入社何妨有白衣,误人不信皆青史。我亦云林学驾车,风流翻令业因加。为语山灵休见拒,从君还一转莲花。

赠林道生

東帛频颁未敢违,江南客久亦依依。名山有愿还重起。故国无家只暂归。日下旧游多豹 褎,夜中交儆失牛衣。秋风试陟高丘望,城郭犹存待令威。

【卷二十二】

赵进美

赵进美,字嶷叔,一字韫退,号清止,益都人。明崇祯庚辰进士。入国朝,授太常寺博士,历官福建按察使。有《清止阁集》。

笼泉

惆怅溪桥古树凉, 天涯行李岂能忘。已知山意多秋雨, 自听泉声到夕阳。

夏日范泉

清酒遥寻野树香,鹅岩烟后渐苍苍。十年马迹惭幽磬,六月蝉鸣在草堂。雨接泉声摇竹色,云含日气作山光。方塘影暗流萤起,绕坐桐阴引夕凉。

石门

石门寒色夜冥冥,远起渔歌越客听。短棹天涯自惆怅,乱鸦啼过女阳亭。

宿兴安

徙倚庭阶暮,苔衣见履痕。月临官舍小,山带女墙尊。古木寒兼雨,荒城静似村。 天涯伤短发,独坐对虚樽。

赋得枫叶微红近有霜

郭外西风绕岸斜,长林秋静有啼鸦。微寒已入娟娟月,远色初分澹澹霞。千里题书临白雁,重阳疏雨映黄花。洞庭木叶伤心日,寂寞怀人在水涯。

送宋玉叔还莱阳

长安二月东风回,九门如雾凌晨开。莺花得时自婀娜,笳鼓向暮何啾哀。此时重筑黄金台,莱阳宋子天下才。献书至尊赐颜色,穷巷不扫公卿来。干戈自昔有反覆,神物岂合终蒿菜。忆昨飘零逐渔艇,夜火荻花对清影。一身入世常坎坷,二十为文最遒警。怀古萧条拟《过秦》,开樽感慨歌《哀郢》。难同年少登石渠,稍喜词人称画省。意气何如诗崛奇,世情颇厌官孤冷。白日燕市愁风尘,张镫清夜留故人。我昔结发与子友,十年落魄安居陈。江湖扰扰箭满眼,荆棘月暗生飞磷。昭王寝墓群兔走,千岁松柏摧为薪。狐裘贵人光道路,冲泥瘦马何嶙峋。尺书远至妻孥泣,投策欲去僮仆嗔。巢父钓竿不肯住,仿佛夏云开岛树。灵药神山自渺茫,海鸥野老非难遇。绕陌垂杨黄鸟飞,骊歌踟蹰送子归。天涯双鬓愁摇落,海上浊醪无是非。

过卫辉宿废苑

倚棹秋生牧野烟,银床桂树忆当年。中朝弱弟梁王贵,乱岁诗侯卫叔贤。斜日兼葭 寒水动,孤城风雨女墙悬。绕池修竹犹堪赋,无奈啼乌夜烛前。

蔡州行

城头睥睨隐半规,斜日欲下悬瓠池。欹枕忽闻蔡州角,过眼如闪元和旗。忆昔文城夜出甲,监军涕泣大校疑。雪片若掌湿弓剑,传呼问是洄曲儿。功成囊鞬拜道左,绯衣建节导两麾。迎门妇子笑相语,巷犬不吠鸡在埘。天中之山地非远,糵牙百岁生貙罴。亦知赐牛尽赤子,谁令跃马骄王师。古来治民若琴瑟,弦声缓促惟所施。哀乐须臾视覆掌,治世岂必皆轩羲。至今孤城乱后在,鹑衣谁子歌百罹。浮云黯郭孤书啸,颓垣漏屋侵蒿藜。逆旅客过起哀柝,旧畦人归见旅葵。勋名世往终寂寞,文章大笔空留垂。君不见荒草已没丞相庙,后人重刻从事碑。

度庾岭数里山势郁秀松萝蒙蔚怪石嵌空苔绣错出有作

劳役获幽赏,炎荒慰此行。桃花春坞静,松叶石梁清。路逐溪声得,山如人意成。 晚霞生积翠,斜日鸟边明。

述征诗

江势引征樯,山色亦无尽。初阳散惊澜,流云敛余润。泽国旷多愁,谷风微有信。 予棹何容与,来舟横一瞬。群力争乱石,劳歌递远韵。稍觉苍翠移,方悟川途进。揽胜志易 更,目遥行不近。回沿非归程,旅怀安可问。

晓郭下春星,江月闻扣舷。初辞岭海目,遂觉山川妍。宿云丽中椒,回沙灼清涟。 夭夭桃始华,岸鸟鸣柔烟。群动顺嘉辰,我行方沛然。触类异欢戚,道远情屡迁。双桡漾初 日,急濑摇高天。独谣讬遐心,浩荡白鸥前。

橹背指石帆,更进烟际艇。静闻广陵钟,春林悬塔影。城郭殊绮丽,云物自清回。 曲巷萦柔丝,高甍跻朝景。娟娟柳覆陌,濛濛花垂岭。鸟飞山气佳,竹抱溪流永。杂木鸡台 荒,残霞萤苑冷。览迹感逝留,抚运发深省。

露下星未希,鸡鸣何草草。旅梦无端倪,征裳亦颠倒。登岫逐落月,入林惊栖鸟。 野风自萧瑟,陇霞渐缥缈。忽觉马首横,始见龟蒙绕。孤村李花明,茆屋鹊声晓。居人启户 观,慰我万里道。山川易为远,岁月易为老。局促风尘间,安得颜色好。

彭而述

彭而述,字子篯,号禹峰,邓州人。明崇祯庚辰进士。入国朝,历官广西布政使。 有《滇黔》、《燕楚》诸集。

鸡场别石昆圃

迟暮鸡为别,相看更一卮。他乡芳草路,瘴雨落花时。楚国军书满,昆明羽檄驰。 可怜分手处,边月照罗施。

资孔驿

到此黔中尽,山巅两树存。香粳丛废寺,茅屋出孤村。人语华番杂,虫声远近喧。 如何马太史,犹未识昆仑。

永宁州

才过鸡公背,还从象鼻行。云根一寺出,石髓乱溪鸣。岁月金钱费,关河铁马情。 似闻南诏使,庙算欲休兵。

衡藩旧邸宴南将军

又是悲秋日,初筵动旅情。若能为楚舞,何处得秦声。翠羽当轩媚,红妆耀日明。 兴亡成底事,洒泪忽沾缨。

靖州别高将军

琥珀红灯醉眼明,两年把臂靖州城。天涯尊酒留书剑,海内烽尘老弟兄。万里旌旄 犹在望,五溪风雨倍含情。东西咫尺苍梧水,握手还期在此行。

靖江废邸同诸君秋集

无情最是此中山,阅尽王孙只等闲。尚有高台堪命酒,兼逢胜侣一开颜。石鲸薜荔 秋虫出,玉甃梧桐野鸟还。莫向西风增感慨,汉家楼阁暮云间。

王似鹤按察之中州

弓鸣落日帝城边,节镇旌旗出使年。雪苑寒云梁殿阙,朱仙父老宋山川。十年水旱 褰帷里,八郡疮痍画戟前。闻说宣房烦璧马,好从河伯问桑田。

筇竹寺

六诏彫残旧战场,青山无恙一松长。王孙老去荒祠在,颇耐兴亡是夕阳。

李雯

李雯,字舒章,江南华亭人。明崇祯壬午举人。入国朝,官弘文院撰文中书。有《蓼 斋集》。

秋水阁听客弹瑟

阳崖豁秋阴,幽蔼散松柏。高楼起长眺,愁见万里白。有客携鸣琴,叩弦动清碧。 弹作潇湘秋,明湖水空液。帝子眇何居,楚云在层壁。烟长吴王城,高旻壮修翮。凄凄鸿雁 思,清商宕岩泽。

自余杭历于潜道中

晨驾辞阴渚,逶迤见岩丘。芳翠涤余蔼,回沙灼清流。泄云漫方聚,深竹疑晴秋。 岑峦有连蝉,道里无险投。纷袭缅腾蒨,汩瀄摇澄湫。枫楮秀中椒,荈蕨横道周。青苗漾白水,明畴写嵎陬。沧沧水雾滋,娟娟微收。白鸟既轻弱,飞鲦亦缓游。旅人从此涉,景曜俄然遒。余晖满层峰,惆怅靡淹留。

雨中舟次灵岩山

飞雨湿回塘,中林蔼凄爽。高台兰叶稀,玉砌青苔上。仿佛歌吹音,徘徊更兴想。 芳跌长石华,鸣榔动清响。女萝何婵娟,烟虹竟来往。香芜草径深,琴没离思鞅。蟪蛄则已鸣,云窦初未朗。辍棹晒层阿,怀抱深俯仰。

醉月滩怀李白

渐江之水流日夜,素车白马钱塘下。我来新都饮练谿,十日西干水空大。云雷奔起醉月滩,子规五月啼风寒。溪花锦石浩无主,江上月出青枫间。霞散城阳隅,钟鸣兴唐寺。我家太白高阳徒,手绾长风弄清泌。逸气常联青冥中,山高水深异人至。自从烟驾归浔阳,崩沙湿雾何茫茫。披发狂歌亦何有,大隄杨柳随风长。宣平养真不可问,今日云孙来我傍。夜泛彩鹢破澄碧,濯足倒景疑潇湘。中椒摇影古殿赤,石竹细路吹幽香。我行到此步局促,丹丘老翁神不扬。身骑神骥安所適,腰间宝玦谁为光。沙砾犹与人际会,丈夫心事多徬徨。蛟龙潜宅深水府,鱼鳖唼喋浮渔梁。风吟雨号安得辨,但闻流水声琅琅。太白居我前,我生太白后。蟠根万古称同调,胜地同游亦良构。将登天都望匡庐,烟海濛濛凉清昼。朝蹑云中搜白猿,暮援苍藤扪星宿。白兮白兮与我俱,茅龙羽节来徐徐。

大涤山行上黄石斋先生

大涤山南芳草秋,风吹薜荔红泉流。先生讲堂在空翠,明星晓映苍龙湫。中藏宝书石窟幽,武夷仗策凝清眸。裒然述作动天地,山鬼夜叫寒竹愁。九重圣人问金匮,画阁蓬池俨相对。阊阖门开虎豹疑,玉阶云雾当空坠。洞霄弟子伏青蒲,紫阳真人披素肤。长离折翼九苞在,葳蕤四海浮云徂。此时草堂猿鹤呼,紫桂山之隅。会稽以南湘江北,结兰纫蕙心踌躇。须臾雾卷招摇见,下照沧洲满芳甸。素卷朝看太乙宫,鹤书晚下披香殿。玉骨乾坤尚可留,丹心日月悲重见。山上白云昼不封,先生独立青芙蓉。晚出已愁鼙鼓急,时来不畏旌旗红。赤车白马驰山东,乘轺使者来怱怱。愿辞玉杖见天子,莫使苍生望碧空。

感秋

遂有矜秋意,空庭落小凉。晚花浓刺日,病叶堕先霜。爽动宜雕鹗,骄腾问犬羊。 郊原最愁寂,沥酒对苍茫。

四海郁兵气,山川尚有姿。登临及今日,幽滞失良期。不解洛生咏,能吟豪士诗。 闭门聊自卧,乱石迥相宜。

晚意

别墅寒原外,孤亭乱木中。杂霞停暝色,清吹入高桐。村静砧舂急,星严乌雀通。 萧条最无事,间久欲成翁。

秋尽

秋尽江天木叶稀,空林日夕下寒晖。犹余蟋蟀依墙稳,更有苍鹰奉雀归。十月波涛 掩粳稻,北风刀尺问裳衣。壮夫尽落飞蓬后,搔首徘徊立钓矶。

江南霜气老平芜,寒楚苍苍烟月孤。水薄平霞连画角,风高枯柳散城乌。髦头隐见 占三塞,雁翅飘零动五湖。为有荒愁消不得,明镫午夜独虬须。

金镇

金镇,字又镳,号长真,宛平人。明崇祯壬午举人。入国朝,历官江南按察使。有 《清美堂诗集》。

汤阴使院中松石绝佳率尔题壁

每遇山水佳,流连不能已。松间数拳石,嵌空幻奇诡。上有百尺阴,虬幹互攀倚。 我来值炎序,解带凉飙里。苔壁剔题句,前贤信清美。缅想寇氛急,沧桑几城市。独此岿然 存,神物敢亵视。俯仰生远怀,挥杯竟余晷。故山有松泉,直欲褰裳起。

鄗城奉谒魏相国留饮葆石堂赋谢

玉烛调成一疏归,东山丝竹遂初衣。青门容我投元礼,黄阁惟公荐陆机。便许观棋 开别墅,还同把酒对渔矶。此行踯躅千秋陌,吐握于今魏相稀。

渡江至京口作

伐鼓临江放棹行,江云黯黯欲相迎。楼台树压山平出,芦荻风回潮渐生。落日西津 同作客,新年北府又增兵。匡时无计聊舒啸,鸥鹭全能减宦情。

邢州道中经圆津庵

小憩茅龛啜紫茶,雨收十里度平沙。香台初日门扉静,一院红舒夜合花。

红桥

柳岸长桥覆酒家,采莲歌起日初斜。转思十载天中路,风雨南湖发藕花。

陈衍虞

陈衍虞,字园公,海阳人,明崇祯千午举人。入国朝,官平乐知县。有《莲山诗集》。

乙卯生日

黄发披两耳,聪听久已失。住世即百年,刚余二十七。苟非松柏姿,经霜茂难必。 家园伤久离,休影仍蓬荜。乱中驹隙驶,皇览又此日。山友具鸡黍,祝我履旋吉。老夫素支 离,旅食资橡栗。锋镝交四野,埋照苦难密。任运本无心,制龄讵有术。夕照倘未颓,诛藤 缚松笔。

龙隐洞读元祐党人碑

荒郊秋老木萧摵,孤岩幽旷仙灵宅。龙去不知几多年,但余寒湫三百尺。岩中古咏与今题,墨晕劖满不留隙。摩崖破藓见残碑,衮衮诸公列党籍。端履门外已勒名,如何瘴乡也镌石。元祐去今六百秋,姓字了了存点画。中间纵有剥蚀文,依稀犹可想遗迹。山灵不可没奇人,故留奸名显端硕。不然多少断碣半销磨,何故贞珉不泐今犹昔。我来坐卧其下先顶礼,瞻望鸿名如圭璧。可惜石工愧安民,不畏鬼非兼人责。诸老历历应星辰,当年羽士曾避席。不知元长欲欺谁,亲挥毫素面不赤。宋业成灰太师殄,三百八人名犹赫。至今墨客过碑前,指点蔡京笑哑哑。

准提阁夜宿

莲社偶投足,客中兼乱中。云来巢几簟,阁自冷杉松。鸟梦缘铃短,花魂借露红。 懒残何处在,一指汗漫踪。

清障道中

寒山设色翠重重,一片霜林障碧空。雨后人家深竹里,云边僧室乱泉中。逾关未觉 风光异,入国犹闻乡语同。偶逐天风望碧海,沧波万顷去无穷。

秋夜登燕子矶感怀

雾净天高万里秋,巍矶嶪锁江流。山河代异波声在,麋鹿朝游王气收。旧恨何须同 楚泣,雄心且莫问吴钩。月华不管兴亡事,依旧深宵照石头。

孙廷铎

孙廷铎,字道宣,益都人。明崇祯壬午举人。入国朝,官阳江知县。有《说研堂集》。

甲午季夏闭关

性拙畏城市,孤意耽山居。裹粮常苦乏,遂令此愿虚。不耕复不读,悠悠已夏余。 念之怀百忧,中夜步阶除。会心岂在远,奚必厌吾庐。晨起谢亲友,杜门境已舒。入室书盈 箧,可以慰饥劬。忻然遂息肩,俯仰皆自如。竹树拂清暑,蝉声亦萧疏。隔俗即丘壑,何须 慕樵渔。 避暑来柿岩,晨出大峪道。入谷已阴森,数折气益好。岩壑自湛深,水声发幽奥。 十里悉溪中,白石净如扫。临水开柴门,小亭岿新造。风雨忽然来,南山飞悬瀑。暝色淡如秋,炊烟起晚灶。我意方悠然,同伴呼酒到。数杯欢相持,真足寄啸傲。

仲秋晦日同吕仲英王协一张斗文饮西阜薄暮口占

涉溪寒策卫,日入远山空。樽酒秋香里,班荆落叶中。星云平野黑,镫火暗烟红。 携手新桥上,萧然向晚风。

申符庶常宅守岁分韵得十五咸

升沈何处问巫咸,客里光阴似过帆。晚景惟堪随野老,梦魂那复著朝衫。岁除回首家千里,周甲斋心偈一函。冷暖自知还自问,近来荆棘已全芟。

江有溶

江有溶,字汇伯,一字谷尚,长沙人。明崇祯壬午副榜贡生。入国朝,官湘乡教谕。 有《勿躁集》。

山居

郊原雨足静蓬扉,许放山林老布衣。地隔市城过客少,尘封笔砚答书稀。棋当敛局 知高下,鸟惯窥檐说是非。消受竹篱根处稳,去年春尽尚迟归。

青泉白石坐忘机,新整茅庐待燕飞。时事急如春雨下,名心懒似洞云归。才疏寡合身先退,年少能文事已非。安稳何须频握粟,猜嫌不到薜萝衣。

陈名夏

陈名夏,字百史,溧阳人。明崇祯癸未一甲三名进士,授修撰兼都给事中。入国朝,官至大学士。有《石云居集》。

五子咏•滇南唐大宋

苍山不可极,英特应地符。弱冠讬豪素,足迹凌寰区。旁皇恣冥探,谐笑归吾庐。 岂怨知者寡,灌园道有余。

五子咏•桐山方密之

方生天下士,踔厉青云端。独袂挥众言,河汉下飞湍。宣籁匹金石,文陛相盘桓。 一朝黄鹄举,流盼伤羽翰。

五子咏•沛县阎古古

歌台大风起,儿童吟乐章。逶迤数千纪,作者称登堂。正声破淫哇,取材齐《柏梁》。 男儿意气重,醉卧多尤伤。

五子咏•吴江沈元子

布衣颇不贱,视我隐侯裔。三箧暗能诵,贵游争交知。山川助贫窭,乃欲安蒿藜。 岁暮长安道,著书新满帷。

五子咏•滇南苍雪

侧闻演象教,乃在吴门山。日夕咏四始,策足开心颜。家逾一万里,天空鸟飞还。 同予念唐子,惨澹禅灯间。

西洋汤道未先生来

一日两命驾,过我松亭前。执手慰老颜,不若人相怜。沧海十万里,来任天官篇。 占象见端委,告君忧未然。忠爱性不移,直谏意益坚。贾谊遇汉文,《治安书》可传。公为 太史令,洛下诚并贤。翻愧畴昔交,势利多扳缘。愿从学道术,寡营成大年。

福宁州城外即事慰袁生

书生携我城外山,童仆举火何其难。流萤入户光自照,蟋蟀在床鸣不闹。予家既破牛马走,世上饥寒无不有。何人共此患难中,与君且醉重阳酒。孔融既逝宾客稀,丈夫熟视何所为。素秋零落色不瘁,纷纷轻薄皆小儿。我欲歌,听者疑。我重泣,如绠縻。以此叹息无古道,千载相思在管鲍。

郊坛恭纪

霄汉星悬卤薄飞,泰坛爟火候龙衣。连钱苑马齐金勒,作阵宫乌历翠微。日景吹葭 寒谷暖,云光绕仗羽林围。侍臣恭赋横汾祀,群望黄舆紫陌归。

至睢州有感

寒山凄绝暮烟斜,旧日村原见几家。草长甫田惊宿雉,人稀落木乱啼鸦。畏兵相避 真如火,携友长征未有涯。夙慕中原文献地,到来拂面起尘沙。

梁清标

梁清标,字玉立,一字苍岩,号棠村,正定人。明崇祯癸未进士,改庶吉士。入国朝,官至保和殿大学士。有《蕉林集》。

题新安刘孝子卷

上谷节义乡,异人称辈出。容城有两贤,高名掩白日。流风今未衰,闾巷多可述。

忆昔过范阳,懿德喧街术。烈女动鬼神,庭葩改素质。臧获护主丧,万里有始卒。稚儿牵母裳,风雨来々。今复闻刘子,孝诚何专一。举刃血沾濡,忘身疗母疾。避人嫌钓名,天地为萧瑟。奇行虽不经,至性岂恒匹。古远俗日偷,畴能全天秩。卓矣追前贤,后先并崒嵂。垂范千万年,炳烺良史笔。

渔阳老将行

渔阳重镇临边隅,将军燕颔赤虬须。少小结发事行阵,弯弓自请当单于。军中行酒青油幕,马上穿杨金仆姑。养士家财能立散,摧锋遍体无完肤。将军胆略古无两,逐北直取封侯赏。大小身经数百战,九边形势如指掌。报主濒死沙场中,论功欲绘凌烟上。岂知岁月空蹉跎,将军已老双鬓皤。内外一家方罢战,毳帐满地驱明驼。边备不修闲士马,归来小猎南山阿。猿臂无力射猛虎,雄心卧看浮云过。宝刀既卖宾客散,柴门反闭张雀罗。幽州健儿夜吹角,梦魂犹绕白狼河。

李园行

西直门外清泉流,李园钜丽甲皇州。苑内潺湲疏碧沼,天际窈窕开朱楼。锦堂绣幕列钟鼎,曲房密室鸣箜篌。戚畹生当全盛世,张筵招客多贵游。十五妖姬伺后阁,千金騕褭罗前头。珠履称觞金凿落,牙樯载酒木兰舟。胜赏四时欢不改,花落花开春常在。已分风月为主人,岂料桑田变沧海。予来系马门前树,寂寂池塘锁烟雾。不见当年歌舞人,春雨秋霜自朝暮。画栋欹斜落燕巢,芰荷零乱眠鸥鹭。殷勤但见白发翁,自言少小居园中。主人华贵拥金穴,为园钜万泥沙同。奇石移来俨幽壑,飞桥夭矫如长虹。芙蕖香满槐庭月,水阁凉生杨柳风。行乐几时宾客散,往事欻忽云烟空。池不种荷惟种稻,年年输税归王宫。吁嗟老翁何愚蒙,盛衰自昔犹转蓬。君不见石家金谷谁为主,丞相平泉亦尘土。李君李君昔何雄,慷慨相看泪如雨。

蕉林书室歌

主人疏放麋鹿性,小筑茆茨爱幽靓。地偏偶结陶潜庐,客至暂开蒋诩径。种蕉阴阴如绿天,北窗长日疑小年。攒茎抽叶布清影,赤日障蔽空堂寒。倚槛数竿竹,仿佛潇湘浦。秋晚畦流漠漠云,夜凉帘卷声声雨。主人乐此长闭关,檐花如绮图书闲。当门不种钩衣草,入室频移幽谷兰。车马九衢任杂遝,坐拥万卷心悠然。焚香偃仰复何事,萧飒志在沧洲间。尘壒纷纷安所极,独上元龙楼百尺。自笑平生与世违,且对蕉林共晨夕。出门波涛滚滚来,仰视浮云兴太息。

初夏斋中

轻阴细雨响庭柯,开径唯应二仲过。蕉影上窗新筍直,蛛丝垂户落花多。焚香自信 无机事,退食宁能废啸歌。门外尽教尘十丈,坐销白日似山阿。

画眉

绿窗唤醒梦于于,清昼雕笼婉转呼。淡扫偏嫌螺黛染,晓妆偷取远山图。合德入宫 为薄眉,号"远山黛"。不须好句驯鹦鹉,绝胜佳人唱《鹧鸪》。想像当年京兆笔,赵家姊妹 妒还无。

过顺德感怀郡故赵国,有婴、臼、豫让遗迹。沙河县,北宋文贞公墓在焉,余少时曾过此。

名城犹忆少年游,此日寒烟朔雁秋。桑柘依然怜故苑,河山无恙壮邢州。一身生死 孤儿在,千古艰难国士酬。唐相丰碑遥可望,西风萧瑟起松楸。

彭蠡湖

彭蠡湖边落照低,大孤山下草凄凄。烟峦庐岳新飞瀑,庙貌康郎旧鼓鼙。皎月影翻 鸿雁阵,黄芦寒听鹧鸪啼。云帆一片风催客,何处东林问虎溪。

游飞来寺黄帝二子居此,又有归猿洞、定心泉。

帝子云栖去不回,短筇今见石堂开。虚岩鸣磬潮音回,客路凭阑暮景催。风雨光中 珠殿出,藤萝阴里玉环来。定心泉水悬千尺,为乞清泠露一杯。

汤阴拜武穆祠

万古悲凉地,徘徊夕照中。河山余涕泪,寝庙动秋风。夜雨旌旗出,晴沙战垒空。 白头诸父老,指点说英雄。

过椒山先生墓

曾读遗书叹直臣,遥阡极望更沾巾。一身生死留天地,两疏淋漓泣鬼神。鸟集墓门 名不恭,鹤归华表恨如新。行行立马秋风急,杯酒何年荐涧蘋。

送宝臣舅氏之任临洮

寒风猎猎木棉裘,燕领书生赋远游。歧路一尊河朔泪,夕阳万里陇云愁。函关夜雪鸣鸡度,洮水春冰绕塞流。惜别酒杯须更进,男儿壮事在吴钩。

寄德滋弟

行行牛角挂农书, 雨后村田晚自锄。客至一樽秋露下, 烹葵剥枣事何如。

数椽十亩更何求,酒满樽罍月满楼。庑下妻孥频举案,西风人醉稻花秋。

徐河桥

解鞍忆昔坐桥头,数见徐河清浅流。今日重过双鬓白,澹烟疏柳一天秋。

旅梦

梦中家岫碧于簪, 儿女团圞话正酣。津吏唤人斜月落, 不知身在古淮南。

寄赠维扬萧灵曦

墙东避世卧江村,隐几翛然对酒樽。邗上荷衣今散客,兰陵华胄旧王孙。烟云自绕 沧洲笔,车辙多停薜荔门。为写蕉林惊绝技,安能把臂与同论。

维扬宗梅岑寄余诗扇赋此寄谢

修竹东原澹夕晖,阳春独唱和偏希。风流先代名才子,落拓淮南有布衣。好我远投 青玉案,避人长掩白云扉。通家十载劳魂梦,缩地何由问钓矶。梅岑为方城先生后人。

九日

岁岁登高处,凭阑此复同。客情秋色里,世事乱云中。坛影连残照,汀沙起断鸿。 天南频极目,燧火至今红。

蓟门道中

晨驱清客思,春墅峭寒时。雨气涵危岭,花梢媚短篱。绕田村水活,隔岸柳阴移。 不断山云出,徘徊马去迟。

杜立德

杜立德,字纯一,宝坻人。明崇祯癸未进士。入国朝,授中书科中书,官至保和殿 大学士,加少傅兼太子太傅。谥文端。有《太傅诗选》。

有所思

故人经岁别,怅望久无音。坞隐江村小,烟迷树色深。疏风吹绮幕,新月上瑶琴。 静里相思极,何时惬素襟。

成克巩

成克巩,字子固,号青坛,大名人。明崇祯癸未进士,改庶吉士。入国朝,授检讨,官至秘书院大学士,加少傅兼太子太傅。有《清慎堂集》。

修素园

第后园林依水湾,城隈雉堞带烟鬟。幽谿鹤步苔痕静,深树云留鸟语闲。昼锦重霑 新雨露,天章分映旧湖山。花晨月夕优游处,手泽书香俯仰间。

姚文然

姚文然,字若侯,号龙怀,桐城人。崇祯癸未进士,改庶吉士。入国朝,复以荐授 庶吉士,改给事中,官至刑部尚书。谥端恪。有《姚端恪公诗集》。

忆邵村

生别已肠裂,生聚更呜咽。兄弟四五人,尽倚寒边月。双亲亦从行,眼暗发垂雪。甘旨弗能供,菽水艰一啜。老兄素滑稽,诙谐能中节。舞衣百结余,戏作老莱跌。破彼万古愁,赚此片晷悦。穷边大孝心,事与前贤别。苦地无闲身,预恐炊薪缺。荷斧笑辞亲,上山泪流血。

死苦一朝毕,生苦浩茫茫。怀乡与惜别,身外总不遑。昼饥望昼短,夜寒苦夜长。 边夜一晨昏,海水三为桑。回首造物恩,豢尔四十霜。生平悲歌心,百思无一当。七尺未遽 朽,万苦听所将。其中有真人,冲然广莫乡。弦望自有时,北斗低复昂。万一金鸡鸣,甘霖 洒大荒。

入山

积雨喜微霁,箯舆便出城。绿深山径合,白涨野桥平。近竹烟初上,穿林犬故迎。 半年成契阔,深负买山情。

朱鼎延

朱鼎延,字嵩若,平阴人。明崇祯癸未进士。入国朝,授礼部主事,官至工部尚书。 有《知年集》、《蘧未庵集》。

初秋登楼

东来岱色入苍茫,望里烟岚接太行。远浦平沙栖雁鹜,高原落日下牛羊。庾公月底 躭清兴,王粲楼头忆故乡。况是满城碪杵急,风凄万户客愁长。

胡统虞

胡统虞,字孝绪,号此庵,武陵人。明崇祯癸未进士,改庶吉士。入国朝,授检讨,官至秘书院大学士,降秘书院学士。

渡沅水

滩浅声如泻,人行逐影流。歇鞍休病马,掬水戏浮鸥。野渡横西岸,江关截上游。 莫言乡国远,襟带在扁舟。

刘肇国

刘肇国,字阮仙,潜江人。明崇祯癸未进士,改庶吉士。入国朝,历官内阁学士。

有《茭湄诗集》。

夜雨同六弟作

淡泊存吾素,羁栖何所营。春山随意老,细雨带愁生。归雁难成队,饥乌不定声。 联床惟手足,和泪对镫檠。

白胤谦

白胤谦,字子益,号东谷,阳城人。明崇祯癸未进士,改庶吉士。入国朝,授检讨,官至刑部尚书,降通政使。有《东谷》、《归庸》、《桑榆》等集。

述乱

先皇御天宇,圣德靡不周。英谋乘末造,百职嗟未修。贼凶祸竟烈,率士戴同仇。宫车不忍听,社稷沦浮沤。鸱张窥宝箓,逆毒播神州。三光黯失色,五岳撑齐愁。万乘东方来,自天降貔貅。一鼓克关甸,长驱抵燕幽。电扫欻雷崩,群孽载奄刘。八荒幸弛愤,九庙亦濯羞。吊伐协天机,仁义匪弓矛。嗟晋越西鄙,实维冲贼喉。封豕又巢穴,歇遽释兜鍪。跨河遂收崤,不啻触蚁丘。元憝稽天诛,长瞻血泪流。

湖南纪行

我行洞庭野,言瞻祝融岫。乾坤再混辟,惨澹干戈后。破艇渡清湘,四望无耕耨。 村屋尽毁余,蒿莱殖禽兽。沙边三闾庙,无人垂橘柚。山鬼护幽忠,仿佛存遗构。当时贼献 祸, 封劓遍老幼。顷诧湘艇人, 拳臂缺其右。独手抗一舟, 悍勇亦难又。路长仆夫瘁, 迫暮 巾车逗。依然等七尺,胡令肩驰骤。念兹每战战,德凉惧颠仆。巴南驿罢最,处处悬空厩。 卒三代马一,甘心贱骨肉。哑笑畜翻贵,漫忝五行秀。南方土性湿,皇天复时漏。踉跄日半 百,但觅孤烟僦。枵腹晓侵星,腰斧行担糗。自匪奉役徒,敢与豺虎斗。力微仗药饵,客有 青囊副。隄防祛瘴虫,未惜形骸瘦。忆在金闺内,朝朝手纳袖。宠骄良自孽,辛劬分焉疚。 幸历天地宽,睹闻谢局陋。南土位正离,物采官孔富。揽兹裔荒苦,稍悉民瘼透。圣图乐广 大,入版号错绣。本原戒土满,远近法殊守。横额自前代,更创冀蠲宥。况以勤百粤,诛求 到猿狖。万里运大木,楚材讵即凑。曷怪绥怀地,飘忽长群寇。人文关区化,剖格宜宏售。 庶用奖奔踶,渐摩归辐辏。长沙迁谪场,亲朋一眉皱。褰帷逾轸星,讶过鸿毛簉。岂闻衣白 客,乞隐烟霞旧。居然斗筲器,旷世典亲遘。怀中尺一简,至尊御幄授。七十二高峰,奇峻 蟠穷宙。图经第六柱,矻若撑云窦。穹碑篆鸟迹,诘屈不可读。灵官都岳麓,侐閟栖仁寿。 百王礼一致,虔穆承孚祐。三光益晶辉,八埏息斥堠。修文诎乱萌,太平观俎豆。惮缩旅灊 岑,初知汉武谬。孤孱竭四牡,蹇蹇遑宵昼。方当诣酃永,严坛朝二后。结束振归策,玉阶 效奔奏。

幸喜大同逆帅姜瓖授首。

幸喜云中捷,元凶已受诛。神功收不战,仁泽到无辜。草窃终难久,余氛会一苏。 有家见天日,歌舞遍山隅。

赠吴骏公先生

先辈名高四海宗,帝乡华发此相逢。即看日下人如鹤,共倚天边气是龙。双阙露凝仙子掌,十洲云拥大夫松。上林羽猎谁能赋,顾问应沾圣泽浓。

山行追旧游

千尺崖间挂古松,泉声无恙答山钟。游人指引松间路,踏破苍云数十重。

即事效韩昌黎体

昔日司空舍,高真列上仙。今朝司寇馆,顽陋谢前贤。石室抛残灶,绳床觅旧毡。 遗风相接处,清白类家传。

六月一日羲风楼作客岁此日请告发都门。

玉阶搔首罢朝天,茅屋衔恩已一年。引分无能酬造化,扪怀犹畏负林泉。当空台阁 攒朝爽,隔水菑畬弄夕烟。大喜成康风化治,终堪安稳北窗眠。

谿行

习习轻风透袷衣,闲行不畏目光微。一听流水心期足,随意落花高下飞。

寄赠宋玉叔观察署中

按节重为万里行,云山到处客愁轻。漫夸宋玉才难并,解识文翁化早成。玉垒晴开 翡翠色,锦江月落子规声。少陵佳句从来惯,莫倚能兼吏隐名。

李呈祥

李呈祥,字其旋,又字吉津,霑化人。明崇祯癸未进士,改庶吉士。入国朝,授编修,历官詹事府少詹事兼侍讲学士。有《东村集》。

香岩阁

九顶露莲萼,千岩转逼窄。凿空绣紫苔,冰乳垂滴沥。青松紧如拳,怒虬蹲绝壁。 佛阁驾百船,凌空飞崒嵂。仰盻天一痕,欲前足不力。禅榻杳无人,云洞遂深阗。钟鸣川谷 幽,霜清寒月夕。崖崩古殿摧,庭虚落叶积。秀从恒岳分,路向台山陟。祀典既迁移,精灵 岂久寂。檀施见经营,静侣还驻锡。岳灵绛节朝,大士灯光白。游者坚道心,万古清凉宅。

野望

端居绝物役,晨炊饱藜羹。微风动远树,坦步及春晴。耳目入寥廓,天地但空明。 群动各自適,众音相和鸣。自注:"飞不羡走,饮不羡啄,此其適也。前者唱予,后者随之, 此其和也。"

墙阴有残雪,非与朝阳争。老松无别态,气至理亦荣。飞鸟凭双翼,忽与云烟并。 千峰岂我隔,孤杖果何情。

晚归

未许闲无事,栖栖薄暮行。云归青嶂合,日落紫烟横。岁晚身为客,寒深雪满城。 柴门常不掩,地旷月先明。

瀛洲亭见白鹦鹉

白燕何时去未回,瀛洲亭上雪衣来。天高鹤驭秋风便,地近龙楼日色开。影向玉堂清自照,心依雕槛静无猜。笙簧知尔能传语,好记南山万寿杯。

赠季天中给练

绝塞秋深万树丹,飘然一叶自长安。鸿音渐急晨霜下,客梦初回夜雨寒。别后玉阶 留谏草,穷来函谷有弹冠。《广陵》遗曲今应续,八月涛声袖里看。

高珩

高珩,字葱佩,号念东,淄川人。明崇祯癸未进士。入国朝,官至刑部侍郎。有《栖云阁集》。

清明送客

红蜡烟轻出禁城,天涯也复有清明。佳晨作客风情借,晴日还乡意气生。果下金丸年少去,水边珠被丽人行。读书镫火无劳乞,且喜前村酒旆迎。

感兴

蓟草青莲孝水滨,就中难者宦游身。听莺杜曲谁携酒,走马兰台不当春。几日禁烟 钖粥旧,昨宵微雨杏胎新。年年未识东风面,总为称华解误人。

翻嫌寒食到匆匆,老去情怀渐不同。春事顿抛乡梦外,雨声全在客心中。相争燕蹙 东西水,欲放梅商断续风。最苦冲泥朝凤阙,禁钟才断火城红。

小酌示客

华筵钟鼓马牛风,小酌清谈兴不穷。熟睡忘情兼蝶尽,闲行无意与云同。年光俱向 歌吹换,山水能将哀乐空。返照超然尘壒外,笙箫缥缈大瀛东。

候仙园有感

素壁荧荧醉墨颠,芙蓉花落客凄然。何人分我西州涕,也对清溪叹逝川。

祭告南岳杂诗

行人到武昌,已作半途喜。那识武昌南,烟水五千里。

两岸层层嶂,孤城面面山。横襟凭一叶,睥睨洞庭间。

未入衡州郭, 先见衡州城。城墙垂薜荔, 大抵似巴陵。

绿净不可唾, 此语足千古。天水澹相涵, 中有数声橹。

花放不知名, 稻秀犹能长。芳草隐清流, 但听清流响。

几月舟行久, 今朝倦眼开。万峰飞舞处, 一片大江来。

南岳云中尽, 东流海上忙。他年图画里, 著我在潇湘。

史可程

史可程,字赤豹,号蘧庵,大兴人。明崇祯癸未进士,改庶吉士。有《浮叟诗集》。

广陵先兄阁部墓下作

一抔乾净地,洒血酹孤樽。雁序沦黄土,荪枝乾白门。蛇龙缠日月,箕尾正乾坤。 浩气今何许,空嗟五丈原。

烈风梅岭肃,高会自平山。方拾迷楼烬,谁寻遗镞斑。雨垣颓似蕢,江月晕如环。 披发疑公下,苍茫羽檄间。

大佛谷

万叠千盘势渐增,途穷无复怯崚嶒。偶然穿峡闻人语,虎豹窠中一老僧。

朱嘉徵

朱嘉徵,字岷左,号止溪,海宁人。明崇祯癸未会试副榜。入国朝,官叙州推官。 有《止溪集》。

哀三哀

吾生已足厌,死者未云亡。徐君墓宿草,心许与剑长。初从凤林游,十九二十强。 岳岳青云器,烂烂列星行。时危薄文术,昴毕始启疆。草疏辄痛哭,持身以大纲。朝廷正渴 贤,私门多禁当。有斧空无柯,内圜而枘方。上书同时刖,荆玉夜精光。声价走璠玙,所宝非世良。入洛岂君意,饥驱自旁皇。五十始释褐,因之白玉堂。云中双飞鹤,游止必相将。一鹤凌霄汉,一鹤淹故乡。霄汉忽垂翅,颇令存者伤。庶常徐道力元粲。

龙门后死者,旷世得谈子。终老博士身,义风振闾里。礴卧江山,疏野气味美。薄俗难使真,独负苍生耻。上下数千年,衡断无与比。昭代十六皇,圣德系泰否。兰台空汗青,名山正时纪。较仇鲁鱼编,苴笔董狐史。甲申逢世患,徒步阙廷死。去列幕府雄,气横建业水。仗剑履间关,画河且高垒。责我义公徒,破家存国祀。悔不用公言,偷活沟壑耳。生歌平陵东,丘首高风起。处士谈孺木迁。

郭公文章伯,结交高阳徒。力不胜杯酌,酒盏无时疏。爱客无不可,颜色真敷愉。手捻绿沉管,拍浮锦屠苏。即席赋新藻,寒冰泻玉壶。清欢惬佳夜,芳月带尊虚。百年常对此,泠然三山俱。一从宦达去,捉鼻挥当涂。当涂良不易,福羽随祸枢。郭隗去碣石,韩众凌清都。语默以殊趣,各保千金躯。躯命岂不爱,宦情亦相于。世伪却真骥,铅刀笑湛虑。送君黄花发,哭君春风徂。春风复九日,携酒谁与娱。所以伯牙子,抚琴泪成珠。大行郭彦深濬。

送陈稚升之辽左

寒江细雨春帆没,客子单衣中夜发。腰间长佩双飞龙,怀里时泻千明月。翩翩结束向营州,虎视龙骧燕颔侯。去日草齐扬子岸,归时花满凤凰楼。楼头锦瑟相晚暮,岸上芳尘杂花雾。万里征人不忍看,到处春心迷去住。公子爱客锦驼羹,新诗独傲沧洲情。有时访余三径曲,高下谿梅百遍行。行去行来观不足,趁步飞香坐我屋。真率了无宾主意,感激清风动潭竹。我今老逐众人休,君欲东之辽海头。辽海瀰漫不可极,幼安皂帽空悠悠。悠悠世事同一指,绝塞偷生牖下死。高叫阊阖终无情,不复关君门户事。仰视黄鹄摩天飞,十里五里自徘徊。口欲衔雏不能语,垂翅错莫无东西。英雄失路时则有,青山白云落吾手。出门所向独有身,肯令生平此言负。自古营东海水多,刀镮夜夜映金波。中有双鱼传素书,送君南浦伤如何。

李元御世兄过访念归安陆不果

长成离乱后,相见尔应稀。客况缘愁壮,家山入梦微。荆门天际合,汉水望中非。 旧好犹能识,东陵一布衣。

碧霞院

石幢祇树道人居,踏阁攀林野兴疏。已厌乳乌群噪食,笑看溪鹭暗窥鱼。绿槐垂穗 依僧语,红药分畦对客锄。谁识建章宫里使,输君一衲是樵渔。

入栈溯清江河第一盘

青山意无尽,白云何年封。客行乱云气,起灭千万峰。清江贯其里,溜水清溶溶。 东流还入渭,势下黄河冲。征鸟相背飞,举翮凌僰邛。缄怨讬微波,历乱无春冬。

废丘历陈仓山第九盘

出险至此夷,秦民聿胥宇。废丘见旧屯,陈仓殷积糈。蜀汉相犄角,壮哉此门户。 南山市夜郎,东道连荆楚。猗嗟鼎足雄,益都称天府。今日询遗甿,十不存四五。又复死于 寇,孑遗饱豺虎。废臼贻阿谁,先畴不复土。直视千里道,行客泪如雨。

鸡留坡第二盘

行行不觉远,石路缘溪长。车坂已九折,犹与前溪望。荒哉凤鸟游,宝鸡鸣陈仓。 光景动民人,霸业秦以昌。缥缈空坡上,一绝若流光。我来眷芳节,山风吹杂香。还复理蕙 带,飘然约我裳。

武关第十三盘

武关道益隘,林壑生虚籁。浮云游子情,悠悠卷飞旆。日月如两丸,却行石壁外。 锁钥西南徼,势与函关会。天险不可登,地险自雄大。百年成霸图,大风起丰沛。

田家杂诗

田父班草坐,高话皇初事。迂亦有微尚,不为茧丝计。土地得耕桑,豺虎息狂噬。 循良列上第,流冗鲜淫滞。三日赋冬官,什一输井税。穷乡长鸡豚,乘舆备钧驷。野外少遗 贤,亭落若无吏。

爰居骇钟鼓,山鹿思丰草。人生盖有道,称心故言好。三季事纵横,薄俗任机巧。 上势列牢衡,下董乡三老。放废诗书文,倾身营一饱。高者尚清谭,误国亦非小。世事若虮 虱,爬梳不可了。多谢诸老翁,推襟送怀抱。

立春日过洞庭

腊去城陵驿,风光满洞庭。雪前三楚断,云外九疑青。草色连芳杜,渔歌出晚汀。 天边传使者,移步看春星。

黄牛峡

三朝三暮滩声转,短拍长歌出水齐。白雁书难过梦北,清猿泪不到巴西。江连断峡风威壮,云逐荒台雨色迷。客路不堪搔首伫,黄陵月冷鹧鸪啼。

涉灞水

游人西去蜀, 灞水复东流。宦拙思江总, 辞家已白头。

登数峰阁

数峰古阁面江湖,难浣先臣血泪枯。白走胥涛吞百越,青排楚寨入三吴。新亭旧恨

迷芳渚,夜月春枝冷鹧鸪。此去孝陵松柏路,凭高西望已模糊。

王宏祚

王宏祚,字懋自,号思斋,保山人。明举人,官户部郎中。入国朝,官至兵部尚书,加太子太保。谥端简。有《颐庵诗集》。

送霍鲁斋侍御备兵吴兴

简命鹤溪滨,兰台宠渥新。观风期揽辔,恋阙欲埋轮。山色摇行幰,湖光映吏人。 东南筐篚尽,愿早奏枫宸。

怀乡

六诏烽烟说不真,十年鼙鼓惨滇尘。玉龙金马无家别,铁柱香岩有梦亲。庾信江南 哀作赋,杜陵峡北泪沾巾。关河万里黄云起,渺渺愁予风打蘋。

渡潞河

奉使畿东渡潞河,回看城郭尚崔峨。凌云塔耸浮空影,带月樯飞起素波。粟满千仓 鼯鼠饱,眷流万灶雁鸿歌。独怜民力东南竭,欲起疮痍可奈何。

舟中望金山寺

润州形势郁岧峣, 泊艇朝看四望遥。山拥千峰低日月, 塔悬双照倚云霄。芙蓉楼瞰 银屏渡, 萍蓼沙通铁瓮潮。击楫中流思黯黯, 江南十捷未须骄。

李楷

李楷,字叔则,号岸翁,朝邑人。明举人。入国朝,官宝应知县。

大河

大河流日夜,客心多低徊。不见乘槎去,只教飞浪来。傍有旧龙门,岨峿何壮哉。 大禹不可得,凄凉万古哀。况乎无安澜,鱼龙悲相催。

雪

粒雪飘兼雨,小航冻独迟。江烟流树暗,塔铎语风悲。岸草三军积,村粮万灶移。 休谈鸣镝事,故国怯阽危。

吴市

朝游吴市门, 夕眺太湖云。梅尉已仙去, 龙威不可群。陂塘翔宿鹜, 城郭入斜曛。

壮士专诸里,萧然少见闻。

平章砦

平章砦北大河西,夹岸菁葱草色迷。一片浮云诸徼远,半轮落日万峰低。野香花药随时发,林黑乌鸦向客啼。却怪蛟龙如有意,滔滔直欲灌山溪。

飞壑

一壑非人间,乃在云之半。不知履齿声,却被飞云乱。

芒稻河

雨打小溪舟,闲心那著愁。却嗔溪入海,不许向东流。

读刘蕡传

李唐叶叶富词臣,今日犹传下第文。留得直言为盛事,千秋原不负参军。

海云庵

骥江东郭海云庵,有客来游野兴酣。海气初清秋色动,垂杨晓月似江南。

吴百朋

吴百朋,字锦雯,钱塘人。明举人,官南和知县。有《朴庵集》。

赠宋荔裳

想思五载何由见,屋梁落月疑君面。漫伤玄发忽成丝,无那华年去如箭。忆昔扁舟 吴地游,登高作赋卑曹刘。联镳共入三天竺,把酒还登万岁楼。此时君才殊倜傥,中原屈指 雄心壮。下走萧萧一蒯缑,依刘王粲腾高唱。桃叶渡头乌夜啼,飘零尽室在西溪。弹棋击筑 座上满,玉台春酒山中携。江南江北各奔窜,别后书来长尺半。赠袍每念范睢贫,解骖思济 越石难。世人白眼欺豪贤,黄金不多人不怜。君独慷慨命游侠,丹阳时觅孝廉船。梦日亭边 花似霰,牛渚蟂矶澄匹练。元晖筑室爱青山,太白扬帆恣欢宴。春风杨柳已垂丝,青鞋布袜 到鸠兹。还寻北海孙宾石,应为穷途识赵岐。

潘驯

潘驯,字士雅,贵阳人。明崇祯间举人。入国朝,官蒙自知县。有《出岫草》、《瘦竹亭诗》。

雨止

秋雨愁难霁,新晴亦偶然。万山青楚塞,一鹭白江天。世事浮云外,乡心落照边。 片帆轻似叶,计日到花源。

秋日和李玉庵韵

望中秋色淡,倚槛自依依。渐薄雪难定,将还鸟倦飞。酒狂思旧社,官拙想初衣。却愧陶居士,初来便赋归。

秋晴

每到深秋后,常多积晦天。讵期昨夜雨,散作满林烟。红叶沿溪寺,黄云带郭田。 佳时不易得,暂醉菊花前。

冯如京

冯如京,字修隐,号秋水,代州人。明官永定同知。入国朝,历官广东左布政使。 有《秒水集》。

寄舍弟容

羡尔能辞组,伤吾未拂衣。天涯同寂寞,骨肉几暌违。片月千山静,孤云一雁飞。 何时重载酒,共醉旧柴扉。

哭妹客自广陵来,知吾妹避乱客舟,寇兵将及,遂沈河死。一时惨然,为诗以哭之。 俟悉死事颠末,别传以详。时端月晦日,年在丙戌。

大节甘心死,沉河无一言。寒江流积恨,明月吊孤魂。两岸啼鹃血,千秋怨女冤。 夜风吹冷骨,不复葬家园。

义死终非死,偷生岂是生。猿啼空有泪,鹤梦已无情。江月年年白,秋风夜夜清。 冥台休更怨,湘水此芳名。

春日郊行携子骧作

当年跃马事如何,老去寻芳两鬓皤。夹岸草平连大泽,句山岚影下滹沱。白云澹染春衫湿,黄鸟晴眠古树多。贳酒不因贫病减,呼儿共醉绿茵莎。

赠马大将军援漳凯旋

将军大纛奠南州,麟阁功名万户侯。露布惊摇漳海月,云旗高拂闽山秋。黄金绣甲 三千士,碧玉清歌十二楼。共醉升平无战伐,西风射猎臂青鞲。

和纪伯紫

空明火树九霞天,咳唾珠玑落座前。画省高檠开甲帐,雕窗小饮及丁年。龙身佩影 光惊白,鹤籀繙奇道又玄。此夜谁多金谷酒,漉巾老子欲先眠。

云中感怀

野堞迢迢望戍楼,繁华战后此荒丘。金凫零落孤村梦,石鹤萧条万古愁。寒峡遥看回玉寨,黄云不尽卷沙洲。长歌徙倚增悲感,独洗残碑吊素秋。

【卷二十三】

范文程

范文程,字宪斗,号辉岳,汉军旗人。官至秘书院大学士,加太傅兼太子太师,一等子爵。谥文肃。

卢龙兵备使者张君总戎刘君郡守彭君司理任君邑宰李君备游孤行城置酒清风台有 作

让国清风百世师,阴阴松桧隐空祠。黄农事业应无异,山水萧森自不移。石动鼋鼍 分大壑,城荒乌鹊下高枝。接 同醉花间酒,绝胜襄阳访习池。

孤竹城空隐夕阳,山中笳鼓漫悠扬。穿林闲听松杉韵,隔岭遥闻薇蕨香。漆水波澜 交宛转,滦河岛屿自苍茫。登临宾佐多清兴,长啸高台明月光。

鄂貌图

鄂貌图,字麟阁,一字遇尧,满洲旗人。崇德辛巳举人,历官秘书院学士。有《北 海集》。

九日滇府南楼

来登百尺楼,举目见梁州。山峻环滇海,云低压瘴流。一生常作客,万里共悲秋。 不有尊中酒,难忘六诏愁。

赠客忆乡

万国风尘际,迢迢别雁行。故园春草满,客署晚云凉。梦破三更月,花开两地觞。 归期无定日,空感鬓边霜。

人日

禁城人日物华同,百感何来逐晓风。不解破愁还是酒,谁怜作客已成翁。尊前彩胜

烟尘外,梦里乡园羽檄中。独坐阳和舒啸咏,梅花纸帐夜镫红。

楚泽凯旋和王郡守韵

辰阳十月菊丛芳,策马归来自夜郎。战绩共歌周召虎,经生犹识汉京房。五溪浪静梅将白,二酉烟消酒半黄。截罢长鲸烟水阔,好招鸿雁到潇湘。

卞三元

卞三元,字月华,一字桂林,汉军旗人。崇德辛巳举人,官至云贵总督。有《公余 诗草》。

早发隆德过六盘

客怀苦难昧,归心促邮程。饰马立檐下,晨鸡犹未鸣。跨鞍出郊埤,征鞭不少停。 野犬隔村吠。宿鸦绕树惊。隐隐双林侧,涓涓溪水声。登山不见月,举首已侵星。苍茫云雾 起,良久曙光生。千峰拱翠壁,万壑入川平。忽觉高天际,已忘人世情。

隐者

独有烟霞意,难羁世外身。闲看林际月,漫理手中纶。丛桂成招隐,名山肯让人。 逍遥吾自在,泉石养天真。

平凉有感

泾水秦山接混茫,遥看四野静边防。层云旅雁横秋月,断岭孤猿叫夜霜。百里荆榛 边戍尽,十年戎马塞城荒。残郊败垒无人迹,磷火荧荧散北邙。

刘仪恕

刘仪恕,字推庵,泾阳人。顺治乙酉举人,历官平阳知府。

秋暑

暑积秋仍酷,高天大火流。争传米价涌,况值羽书稠。露绝蝉声细,云空鸟影愁。 犹闻高会客,终夜醉缠头。

马长春

马长春,字三如,安丘人。顺治乙酉举人。有《竹香斋集》。

秋日游沂山观百丈崖瀑布

平明问客路, 涧道有余清。结侣仗轻策, 相将沿壑行。行行近水村, 处处叱牛声。

山田高于屋,牛在屋上耕。冈峦相枕带,峡口片云横。渡峡风泠泠,恍然如再生。何物横空下,两岸不能争。惊波荡峭壁,澎湃势难平。坐久何袅袅,石濑水回萦。水在山之岚,霏微移我情。有僧烟际出,渡水来相迎。莫漫言归去,少焉山月明。

傅以渐

傅以渐,字于磐,号星岩,聊城人。顺治丙戌一甲一名进士,授修撰,官至武英殿 大学士,加少保兼太子太保。有《贞固斋诗集》。

早朝咏炉烟次同院韵

玉殿晨开静羽旗,遥看烟气上彤墀。微升宝鼎分行细,直接晴云散缕迟。旭日乍融 光似篆,晓风欲定霭成丝。清芬想像浮龙衮,仗外千官望自知。

魏裔介

魏裔介,字石生,别号贞庵,又号昆林,柏乡人。顺治丙戌进士,官至太子太傅、 保和殿大学士兼吏部尚书。谥文毅。有《屿舫诗集》。

送王思龄归合肥

长安有客思山桂,挂席秋风潞河汭。边城一雁正高飞,爽气澄霞雨新霁。忆昨承恩 衣绣衣,太仓充溢鼠雀稀。六军白粲满区釜,君王玉馔有光辉。左省高资重廷阙,特简清秩 班卿月。入告我后尽嘉谋,退食委蛇无请谒。江上云山梦里来,知君肝胆几徘徊。金樽满酌 不辞醉,茫然清兴使人哀。君不见八公仙去空山色,濡须之水流不息。功成方可拂衣去,莫到淮南忘蓟北。

过傅掌雷太史晓园

自有沧洲意,潇然三径清。藉花能醉客,坐树不妨莺。著述淹风雨,交游念死生。 浊醪君不惜,一晤一回酲。

送友人白青玉归

故园一片月,相照共生平。俭岁无忧色,山田惟力耕。床头留旧酿,世事尽浮名。 余亦明年去,闲看春草生。

秋怀

秋云冉冉暮,庭草惜青光。雨气留空翠,鸦声落夕阳。摊书鱼蠹老,岸帻酒杯香。 亦有竹林意,何人是古狂。

自安定门旋由水关南望德胜门述目所见

晓巘映朝暾,人家野水村。楼残遗堞立,寺废古钟存。解冻春云漾,呼鹰猎马驯。 干戈息数载,犹有哭声吞。安定、德胜城楼俱为流寇焚,尚未修复。

和纪伯紫

钟山醉老太平春,自与云霞道气亲。三代尚存惟我辈,百年独步见斯人。久居深巷 绝华毂,耻向侯门吐锦茵。高隐从来思济世,殷勤属我作良臣。

李霨

李霨,字景矞,号坦园,高阳人。顺治丙戌进士,改庶吉士,授编修,官至保和殿 大学士。谥文勤。有《心远堂诗集》、《续集》。

枫岭

枫岭与梨岭,南北相拱揖。石脉固潜通,蟠峙各独立。林木互纠纷,乱峰森々。其 巅判闽浙,风土隔邦邑。跻崖俯绝谷,转道仅微级。凌空危桥滑,束涧鸣溜急。负担尽游估, 攀援如蚁集。伤哉营微利,走险讵夙习。下见稻畦人,惊客举蓑笠。驰骛违所性,邅回增忧 悒。

舟发浦城

地形下东南,滩溜如矢疾。客行冲雾雨,扁舟仅客膝。粼粼沙痕高,齿齿石峰密。礌何碍中流,钜细状非一。狭逼惊涛飞,深沸漩涡溢。舟楫巧行避,簸荡神先怵。篙工一失手,势争洪波汩。蔚薈崖卉稠,奔激崖峰崒。駴奇豫初览,烦促厌缕述。乘流怪浮生,坎止私愿毕。

长夏闲居杂兴

淡荡羲皇卧,英雄河朔杯。斯人难复起,古道日尘埃。斗捷山多径,全生木不才。 两端终易剖,决策是归来。

魏象枢

魏象枢,字环溪,号庸斋,晚称寒松老人,蔚州人。顺治丙戌进士,官至邢部尚书。 谥敏果。有《寒松堂集》。

巡行过北平登孤竹堂望夷齐庙有感

孤竹何崔巍,两裔高千古。仰止梦魂间,有怀常欲吐。安得陟山巅,瓣香头一俯。 告我希圣心,难济苍生苦。凛凛对简书,汗下浑如雨。此行负朝廷,愆尤何日补。遥望乞神 灵,相助驱豺虎。滦水自无波,澄清在畿辅。

剥榆歌

黄沙日暮榆关路,烟火尽绝泥寒户。路旁老翁携稚儿,手持短铁剥榆树。我问剥榆何所为,老翁倚马哽咽悲。去岁死蝗前死寇,数十村落无孑遗。苍苍不恤侬衰老,独留余生伴荒草。三日两日乏再饘,不剥榆皮那能饱。榆皮疗我饥,那惜榆无衣。我腹纵不果,宁教我儿肥。嗟呼此榆赡我父若子,日食其皮皮有几。今朝有榆且剥榆,榆尽同来树下死。老翁说罢我心摧,回视君门真万里。

赠乔文衣

数年惊宦海,无日不高吟。冰雪幽人气,琴书侠士心。世情添白发,交谊冷黄金。 留客坐山月,床头话古今。

哭魏昭华先生

昔年乍去身犹健,昨夜空伤万里魂。海上鳄鱼骄白日,庭前鵬鸟下黄昏。遗书暗洒 孤臣血,垂死仍衔故国恩。最是圣朝容直谏,许君骸骨葬平原。

李恒岳妻兄自蔚来访喜而赠之

握手东庄一载余,劳君远过旅人居。晚年难得同心侣,夜话如看太古书。顾我廉名 承义重,于今言路报恩疏。祇应早晚归休去,莫累高贤更拮据。

丁巳元日侍班候贺雪中口占

骨瘦筋衰六十翁,班行犹自缀群公。无才祇觉君恩重,揣分安能国计充。民力艰难 愁鬓里,天心仁爱雪花中。朝家自有真刘晏,早济三军奏捷功。

送汤荆岘学士巡抚下江

秀才任天下,仁者体万物。物逸而我劳,分内不遑惜。昔日侍讲筵,天子重经术。 今日守封疆,帝心特简出。江南风甚嚣,江南民甚绌。维风道先倡,爱民蠹先黜。吾性秉真 刚,无欲谁能屈,但得百姓欢,安问权要怫。余也愧衰残,十弊口难述。临歧赠一言,怀抱 慎忧郁。

十月二日出都承诸公郊饯

去国心难恝,徘徊马首迟。真逢宵旰主,况际太平时。老病天应鉴,行藏世不疑。 二疏千载盛,薄劣又重追。

杨思圣

杨思圣,字犹龙,号雪樵,钜鹿人。顺治丙戌进士,历官四川左布政使。有《且亭 诗》。

寒夜

冬夜凄以长,寂寞绝人境。凉月薄帷幕,荒庭交树影。寥寥寒柝鸣,熊熊孤剑冷。 拥被不成眠,森沈万虑永。早岁乏深智,凌厉思一骋。遂为世网牵,甘心逐蛙黾。人生不百年,哀乐在所领。贫贱各有適,岂必勒钟鼎。愁来忆古人,见机苦不猛。含恨当语谁,泪下如修绠。

卒岁感述

我有长恨端, 迫此岁暮情。朔风吹庭树,寒日照此荆。起坐仰天叹,归鸟飞且鸣。 吾生胡不达,独为世网撄。

冉冉冬日暮,积雪耀林端。负疴卧虚室,慨然念微官。家贫禄复薄,妻孥常苦寒。 况乏济时略,终当归林峦。奈何日徵逐,索米老长安。

出门何所適,落日见西山。回回寸心违,逢人多厚颜。三五谁家儿,传呼大道间。 貂裘控骢马,嚼齧黄金环。出入尚书第,可望不可攀。引领长太息,归来独闭关。

天运有代谢,富贵易汩没。鄙哉何者翁,专欲事虚喝。我闻至人训,真乐在寂寞。 腐鼠良可掷,荣名焉足讬。

酬纪伯紫即送其之晋阳

大江势浩浩,南北错舆舱。往往异人出,结交在一言。我家漳水涯,子居白下门。 素心各有托,意气自孤骞。相逢长安陌,双眼望朝暾。长安多王侯,第宅若云屯。绮筵罗珍食,朱缨驰华轩。宾从纷遝沓,附势如灼薰。静交有吾徒,冥然绝世喧。不就唐生决,肯借金张援。时时顾蓬径,樽酒共讨论。落日登高台,慷慨天为昏。击筑声泪下,重招烈士魂。忽整晋阳驾,贻诗重玙璠。以俪魏给事,无乃非其伦。感君安所赠,此意贵永敦。

送彭燕文旋里兼讯顾伟南

光熹之际龙在野,人文往往归复社,当时陈徐最知名。短衣破帽子尚在,流落谁悲失志人。去岁上策复不遇,怜才难买千金赋。狂歌日沽燕市醪,痛哭屡吊昭王墓。爱我时时肯一过,酒阑击剑客颜酡。人生感激为知己,抒心写意岂有他。送子七月凉风早,莼菜鲈鱼秋正好。到家为问顾伟南,他日相逢漫草草。

赠温献之

相逢涕泪且停挥,城阙萧条梦里微。唯有青山常不改,月明时见鹧鸪飞。

示离指和尚

钟动黄昏山寺秋,白云红树隐沙洲。老僧闲坐心无事,独对门前江水流。

便道过里

归客惭司马,曾无四壁留。残书遗鼠啮,野稼任人收。狂益亲知怪,贫添儿女忧。 那堪行又别,明日是长游。

寄申凫盟

愁思风雨夕,忽漫十年过。曾否狂如旧,将无鬓已皤。君才岂濩落,吾意亦烟萝。 出处谁能识,悲哉两地歌。

喜申凫盟至都门

意外劳相访,秋风人正闲。喜深无一语,惊定始开颜。款款悲霜鬓,迟迟话故山。 长安非昔日,莫畏鹤书还。

不堪今夕会,重忆乱离初。人老干戈里,交存生死余。山川几命驾,涕泪共裁书。 十载还耕约,相看愧鬓疏。

望极燕山暮,相逢感泣多。人间遗玉碗,故物指铜驼。恨血千年碧,龙池永夜波。雄图今已矣,尚有酒徒过。

秋迟有怀

秋城余返照,霜色淡遥峰。落叶空斋掩,萧条闻暮钟。客情随宦减,生事逐年慵。 兀坐迟今夕,怀人何处逢。

送申凫盟并呈殷伯岩

几月依燕寺,萧条客念归。送君怀往路,昨日雪花飞。蓟北连沙戍,漳南老蕨薇。 寄言殷伯子,招隐故心违。

送郭裕九以言事谪归

勿嗟今不用,此去已承恩。朝论归吾党,危言话至尊。风和乡路逼,沙乱帝城昏。 宣室行应诏,宁教老灌园。

山信

岁序冬逾驶,栖迟未得闲。边风吹碣石,大雪满燕关。浊酒堪扶老,黄金岂驻颜。 年年山有信,招隐几时还。

申凫盟自燕中归枉顾晋阳同周茂山喜赋

每共茂山子,论交忆汝贤。忽传燕客信,正及早春天。沙塞听莺渺,官厨漉酒鲜。

相看俱老大,珍重莫言还。

送周茂山归四明

不敢留君住,知君有老亲。门前黄叶树,江上白头人。负米休惭禄,烹葵莫厌贫。 甲兵天地满,何处好为邻。

诮梦

莫问升沈事,空劳旅梦讹。天心存倚伏,吾道本蹉跎。知己青山在,秋风故郡多。 归来真不易,消息定如何。

游百泉次韵

不谓风尘客,相从到百泉。山空疑作雨,林密欲为烟。乱石当樵路,平流散渚田。 薄游堪取醉,好向水亭眠。

夕山秋色暝,潭底幻明霞。白动千岩月,红垂两岸花。断桥通寺径,古木隐人家。 独羡持竿曳,清寒立钓槎。

寄马菽史

忆别嵩山寺,关河隔岁看。归应惭好友,贫岂恋微官。锦树巴江老,梅花铁里寒。 《遂初》犹可赋,不敢贱渔竿。

申凫盟书来为我卜居广平

岂是躭微禄,余心独尔知。全生谋隐拙,多病寄书迟。蜀道频相念,邻居近有期。 风尘逋客久,遮莫北山移。

寄怀傅掌雷

忆在长安驾玉龙,晓园花竹日相从。醉沽兰液居中酒,闲看慈仁寺里松。别久将无伤老大,官狂依旧笑疏慵。只今绝域谁知己,好赋归来卧碧峰。

晚春即事

花落闲庭春事阑,主人长日但加餐。竹间路好披云入,窗里山宜带雨看。半箧残书 留过目,百年衰鬓罢弹冠。萧条莫厌交游冷,逆旅悠悠蜀道难。

泛舟

湘帘雀舫木兰桡,荡漾烟波看渐遥。春水一江吹细浪,青山两岸接平桥。参差玉笛惊流响,潋滟金尊欲上潮。横槊船头多意气,轻风催棹雨潇潇。

题宫紫玄春雨草堂

东掖传经计已疏,归来为筑浣花居。苍山移石供支杖,春树分阴照读书。竹外寻僧 招野艇,雨中留客摘园蔬。荷衣未制吾将老,乘兴何年共结庐。

晚步松花泉亭

倚山新构夕阳亭,石角寒流细欲泠。习静几能闻素濑,探幽谁为补《茶经》。荒嵓啼鸟窥人立,小径芦花隔水扃。迤逦闲来凭眺远,苍烟深处是南屏。

晤魏石生年丈

相见何禁感慨频,应怜拙宦久风尘。身名肯使惭知己,尊酒重来对故人。里巷烟霞还似旧,长安花柳几回新。迢迢又逐征轺发,敢拟高眠伴隐沦。

朱之锡

朱之锡,字梅麓,义乌人。顺治丙戌进士,改庶吉士,授编修,官至河道总督。乾 隆庚子,追封助顺永宁侯。

过七里滩

谢公诗境好,到此意超然。水外疑无地,山中小有天。棹舟时罄折,出峡又规圆。 七里容消遣,石尤风与便。

朱之弼

朱之弼, 字右君, 大兴人。顺治丙戌进士, 官至工部尚书。

闻吴粲叟学使辑匡庐志寄诗索之

闻道匡庐飞盖时,闲寻图籍费周咨。亭皋细酌濂溪水,石室亲摹大禹碑。鲍谢清晖 看振策,白苏逸韵羡摛辞。怜余素有烟霞癖,展卷终期慰所思。

傅维鳞

傅维鳞,字掌雷,灵寿人。顺治丙戌进士,改庶吉士,授编修,官至工部尚书。

过石仲生斋看竹

懒我曾多事,栽松始出阑。怜君青眼共,喜借绿筠看。雨色凝新翠,山光割暮寒。 隔篱才数武,日得醉来观。 渡龙冈河

驱马渡龙冈,初晴波益长。雨多新草绿,秋重远林黄。城郭依沙岸,人家带夕阳。 不须生别叹,犹自在吾乡。

梁清宽

梁清宽。字敷五。正定人。顺治丙戌进士, 官至吏部左侍郎。

睡起

睡起浑无赖,穷愁百事阑。云窥虚牖静,风入小窗寒。拙宦余三径,浮名悔一官。 早知农圃好,长啸向烟峦。

梁清远

梁清远,字葵石,正定人。顺治丙戌进士,官至吏部侍郎。有《祓园集》。

同苍岩公白游城南

清流贯云木,水际有人家。颓径侵芳草,疏篱罥落花。天晴霞散影,野静雁依沙。 景物看如此,行吟日已斜。

秋怀

浑浑斜日照金台,何处啼乌带影来。太液乱流衣带绕,西山晚翠画屏开。中原豺虎 增郊垒,四野归鸿恋草莱。极目关河无限思,漫歌《五噫》有余哀。

艾元徵

艾元徵,字长人,济阳人。顺治丙戌进士,改庶吉士,授检讨,官至刑部尚书。有 《退食》、《槐声》、《留余》集。

庆都道中即事

尧母城荒秋气高,关山马首敢言劳。金门止惜东方朔,洛社谁为左伯桃。诗满奚囊 凭漫灭,蓬堆潘鬓任萧骚。村人近水浑如画,应识轩车逊尔曹。

和坦园相国小台晴望

登临聊尔策方筇,山色初开烟际容。为爱晴岚依弱柳,况闻幽梵发清钟。春风正拂 高低树,冻雪遥连远近峰。寒尽共瞻阳律转,陈诗好与绘劳农。

石申

石申,字仲生,滦州人。顺治丙戌进士,改庶吉士,官至户部侍郎。赠吏部尚书。 有《宝笏堂遗集》。

八月二十六日西山暂归

去去欲无还,幽忧可驻颜。此生贪白业,不死看青山。善友能相共,浮云且自闲。 风尘燕市在,留与鬓毛斑。

秋日同芝麓诸公集黑窑厂分赋

车马纷城阙,寻秋此地偏。路深钟响出,台古烧痕圆。老树侵沙苑,饥鹰猎岁田。 与君期尽醉,休问战争年。

刘鸿儒

刘鸿儒,字鲁一,迁安人。顺治丙戌进士,官至左都御史。有《四留堂集》。

重游龙泉寺

溽暑郁我怀,携朋寻高爽。出城见南山,幽况夙所赏。龙泉久神异,风雨灵泽广。 别来二十年,老健喜重往。密树结层阴,峭壁当沆漭。岈{穴叫}窱入,薜萝分披上。蹑翠陟 其巅,大千指诸掌。法王宝地尊,霞光罗万象。景趣犹如昔,理会顿殊曩。探无悟无极,阅 有谢有攘。临兹诸缘空,耳目余清响。留连恣遐瞩,浩浩神气朗。桃源勿劳思,舍此将焉访。

董笃行

董笃行,字天则,洛阳人。顺治丙戌进士,改庶吉士,官至都察院左副都御史。

云溪观

闲坐瀍水旁,正对龙门口。三井透天光,森若列星斗。钟磬响铮铿,晓日半在柳。 深洞锁寂寥,丹砂炼已久。岭上多闲云,时与白鹤偶。举世重黄金,难易仙人守。仙人去不 还,空余麋鹿友。

王无咎

王无咎,字藉茅,孟津人。顺治丙戌进士,改庶吉士,授编修,历官太常寺卿。有《崝嵘山房诗集》。

忆洛

苍苍云树满关河,百战中原涕泪多。伊阙时通春草梦,平湖乍听采菱歌。天心厌乱 亡荧惑,人意还家眷薜萝。八月潮来江海动,孤舟高卧有渔蓑。 王天眷

王天眷,字龙锡,号鲁源,济宁人。顺治丙戌进士,由行人官至工部侍郎。有《梦 吟集》。

送宋荔裳按察蜀中

法星遥指锦江隈,路入蚕丛鸟道回。万里桥边春驻马,百花潭上夜衔杯。干戈未久 才生聚,井里虽存尚草莱。自是随车多化雨,三巴父老望嘘培。

蓝润

蓝润,初名滋,字凫渚,即墨人。顺治丙戌进士,改庶吉士,授编修,历官湖广布政使。有《聿修堂集》。

草堂落成

新辟茅堂桑柘村,二劳山色落柴门。莓苔满径封尘迹,萝薜缘墙补漏痕。花底营巢 来燕子,林根解箨长龙孙。三间屋外饶余地,自织青蓑学种园。

法若真

法若真,字汉儒,号黄石,一号黄山,胶州人。顺治丙戌进士,改庶吉士,授编修, 历官江南布政使。康熙己未举博学鸿词。有《黄山诗留》。

寄破尘道士

桃源风雪断,不得送鹅来。玉趾留丹灶,金绳换酒杯。山空雏鹤宿,潭隐老龙开。 新种松千晦,商量去镜台。镜台,山名,在胶州东。

诸城黄来公过访谈地理

得君说破紫囊筌,玉斧长挥劈野禅。自是清谈归叔度,非关读画到龙眠。丛峰石色 擎珠蕊,大海潮声乱铁泉。不识山川调药谱,一天风雨护超然。超然台在诸城。

王紫绶

王紫绶,字金章,号蓼航,祥符人。顺治丙戌进士,改庶吉士,历官浙江督粮道布 政司参政。有《咫尺堂诗集》。

送李霖九时由凤翔少参谪汉中

纱笼诗句壁曾留,满目苍凉感旧游。函谷主人关令尹,扶风属吏汉诸侯。莲花云黑

三秦雨,栈道霜红万木秋。梦里不知君去远,更随明月到梁州。

酬张元公中丞自秦抚移豫见怀

八郡诸侯百二同,秦中才罢又天中。河流犹带东西陕,云气忽来大小嵩。梁苑楼台 新挂月,隋隄杨柳细摇风。信陵食客多如许,座左犹云待老翁。

登嵩岳绝顶

独倚中天览大荒,西来秋色更苍苍。日翻木叶红千顷,雨过芙蓉翠几行。玉女寒棂 惟皎月,汉皇辇路满清霜。回看磴道深无际,转欲凌风渡铁梁。

喜孙徵君复归夏峰

月出夏峰空,风高乔木冷。夜来雪色多,门外添人影。

白云不在山, 松顶一巢间。昨夜海风至, 翩翩带鹤还。

旧宫人

旧日常随玉辇游,朝钟暮管夜箜篌。闲来细语繁华事,不尽神宗四十秋。

景阳宫井出云鬟,秦帝衣裳卷不还。碧玉搔头镌赐字,朝来易米到人间。

吕缵祖

吕缵祖,字峻发,号修祉,沧州人。顺治丙戌一甲二名进士,授编修,历官弘文院 侍讲学士。

过僧舍

林端梵影插秋天,正在长流夹岸边。散步莫疑因病酒,偶来非是为逃禅。尘门不禁 贫人履,僧榻偏酣高士眠。檐际松风波底月,久忘身世隔尘烟。

郜焕元

都焕元,字凌玉,号雪岚,长垣人。顺治丙戌进士,历官湖广提学道按察使佥事。 有《猗园存笥稿》。

魏雍伯招游鹿泉诸胜

跨马出西郊,倦眼豁疏放。远景带日斜,清游恣元畅。秋气下苍嵓,空翠殆难状。同行得佳侣,泉石激微尚。行看岩岫舒,坐爱流滤漾。瞻眺韩侯祠,英风飒甲仗。剥藓读残碑,寄兴忽悲壮。回望羽人居,丹栱绝壁上。虚洞有云封,老树为之障。急雨溜层巅,攀烟

遵复嶂。初寻惊奥奇, 径转得平旷。中有龙象藏, 丹碧郁相望。微步惬幽寻, 阴洞何年创。 嵌空入杳窅, 白日划光亮。造化钟灵异, 神工非意匠。累累号连珠, 透辟绝依傍。冰雪泠然 入, 披襟为神王。空亭延翠花, 日暮欣跌宕。生平丘壑心, 对此树高贶。愿得休粮居, 乘风 采瀣沆。

走笔别程伯建

前年别,城之隈。今年别,江之浒。黄鹄高骞野惊翔,苍龙昼立瘦蛟舞。沙洲烟草绿茫茫,棕笠泥鞋九日雨。欧长卿,李云田,偕子同来送别船。别船日暮芙蓉老,满酹清酤问秋昊。相逢意气感须眉,二子不言子更悲。昨日上书不见收,低头幕府终何为。闻君杖策向长安,水落桑乾木叶寒。黄金谁荐中涓马,易水空怜壮士冠。君不见郎官湖上李白游,至今魂魄尚堪留。又不见蓬荆深没楚王台,阴雨啾啾鬼夜哀。登祝融,望吴越。我欲扶筇鼓柁,上八万之天台,探千年之禹穴。安能俯仰随世网,牺牛文身入庙遭羁绁。

夏人叔从禹峰先生为湖南之游

之子湖南去,扁舟意若何。白云衡岳满,青草洞庭多。幕府裁铙曲,迁人依棹歌。 只愁扬子宅,蚤暮少经过。

草檄真能事,从军亦壮游。况逢汉陆贾,同注《晋阳秋》。雨幔临湘浦,风帆近岳楼。赖君传古迹,赋压楚江头。

送姜铁夫南归

白首家无定,青山尔又归。京华词客贱,秋雨故人稀。钟动催霜叶,潮平载夕晖。 鉴湖南月好,为我选渔矶。

申凫盟见访

自枉高人驾,悠然淡旅情。狂真疏礼法,老益厌诗名。万树霜前色,连碪苑外声。 乡心剧岁晚,迟我碧山耕。

访赵锦帆于报国寺解官南归怅然有怀

白首官仍谪,黄河客竟还。春明无故旧,秋色冷乡关。叶落松房定,风吹海月闲。 苏门归倘遂,同钓碧溪湾。

晤张海旭

尚记南奔日,艰危借一舟。孤帆淮浦月,百战岛门秋。身世还青眼,山河竟白头。 草堂尊酒在,万里慰离忧。

寄遯山子

别后俱多难,归来独可怜。兴吟吴苑草,泪尽郢门烟。万事还乡井,孤身历岁年。 白头新赋草,零落竟谁传。

江上逢黄坤五太史

白发承明旧侍臣,天涯沦落晚堪亲。箧中岁月存诗史,世外江湖有钓缗。往事伤心 辞洛日,他乡垂老避秦人。开元朝士君仍在,听到宫词泪满巾。

赴东壑遥望五龙雪色

径行初日千峰上,俯瞰苍烟一郡西。朔塞天连三晋险,晴空雪压五龙低。山腰拾级 樵争入,树杪盘云岛乱啼。万壑乡园吾独往,岭猿溪月待幽栖。

赠彭禹峰先生

扬舲五月下蛮方,醉踏江楼草色长。公子椒兰新七泽,将军裘带旧三湘。君从绛幄 论前辈,我向青云认父行。万里长缨须蚤系,汉家将相本南阳。

赠李将军戍楚

铁衣十载临戎日,尚忆围城转战功。射虎未闻封李广,雕虫犹复困扬雄。千群代马 悲笳里,独戍江湖险塞中。氛祲扶桑忧不细,捷书蚤寄楚天鸿。

王幼舆以近诗见贻即有禹州之游作此奉送兼致怀兵使沈绎堂

闲门尽日补烟萝,竹里逢君有啸歌。一卷诗才传白雪,三春客又渡黄河。风归禹甸山川丽,路入梁园词赋多。好问故人东郡长,楼中《八咏》定如何。

过顺德有怀沧溟先生

中原二子盛当时,历下文章晚更奇。识得峨嵋天半意,黄榆高处自题诗。

领袖宗徐气尚骄,秋生郡阁雁萧萧。文章未老山河在,词客英灵正可招。

王伯勉

王伯勉,字子建,号东皋,汤阴人。顺治丙戌进士,授吏部主事,历官山东道监察 御史。

游香山寺

落日满香山,禅门倍觉闲。莲花疑海上,法雨渺云间。修竹森丹观,流泉汇碧湾。 上方钟欲静,尘虑一时删。

蔡含灵

蔡含灵,字子虚,宁晋人。顺治丙戌进士,历官河南睢成道佥事。

寓斋晚坐

自笑懒成癖,一官今又闲。客疏安用避,门静不须关。睡稳高吟后,凉生落照间。 旷遐诚有分,莫强论时艰。

窦遴奇

窦遴奇,字德迈,号松涛,大名人。顺治丙戌进士,历官江南徽宁广道。有《倚雉 堂集》。

杂兴

構鹰具利爪,攫物厉秋风。使不逢狐兔,亦与凡鸟同。丈夫当无事,何以异凡庸。 边徼忽多故,擐甲效从戎。灵鹊化金印,旗纛建交龙。铭勋膺上赏,晋爵列侯封。平时论豪 杰,管乐亦无功。

仙人

瑶台十二玉兰干,夜半天阶下紫鸾。说是仙人君不信,空留秋色满山寒。

赵宾

赵宾,字锦帆,阳武人。顺治丙戌进士,官刑部主事。有《学易庵诗集》。

后杂兴

日月经天上,光景常新鲜。人生一世内,形状倏变迁。几日红颜子,鸡皮雪盈巅。 所以苦志士,决计在深山。采药袪诸病,服食学神仙。神仙岂易得,无恙尽天年。

散行阅畦蔓,一叶藏一瓜。蕊而不实者,满目炫黄花。方悟古至人,不苟露英华。 隆中抱膝客,棘津卖浆家。

寄怀苏生紫

十载天涯鬓各苍,铜鞮碣石两茫茫。关山不隔怀人梦,夜逐东风度太行。

高玮

高玮,字握之,号绳东,淄川人。顺治丙戌进士,官河间推官。有《留耕堂诗稿》、《南游草》。

和四弟寄龙膺韵

兴尽其如返棹何,牵衣暂乞罢耕蓑。一瓢春酒孤怀壮,万里青山放眼多。岸帻且吟豪士赋,隔墙初奏雪儿歌。风光如此不成醉,辜负新条挂薜萝。

过村居和五弟韵

平桥斜绕小亭西,久不来游路欲迷。泛水落花随石转,冲人燕子到帘低。酒嫌市酿 开邻瓮,壁拂尘封觅旧题。暝色催归留不得,莫嗔枝外子规啼。

题瞻明壁

曲曲溪流处处花,绿杨影里有人家。谁能载酒听春雨,共踏平桥一道斜。

苏宏祖

苏宏祖,字恪甫,汤阴人。顺治丙戌进士,官和顺知县。有《敦朴堂诗集》。

定州道上

潦倒书生兴已阑,何缘好梦到渔竿。冲霄岂是羽毛满,曳尾曾经道路难。侯骨自知 非李广,缺唇今竟补方干。入官先效蛮娘舞,旧样时人不喜看。

谢宾王

谢宾王,字起东,临淄人。顺治丙戌进士,官南康推官。有《兰雪堂集》。

过安庆怀黎天锡

埤堄秋深落木空,十年重听皖江鸿。潮声暝接千峰雨,塔顶高盘万里风。吴楚上游 新组练,中原落日旧艨艟。欲商尊酒同心远,惆怅龙门意未穷。

南昌遇赵宪副韫退

青山小队拥纶巾,华发论兵侍从臣。十载疏传明主纳,天涯宦似故人贫。秋镫乡语 听鸿久,行幄人过问字频。莫望长安多踯躅,邹枚几见画麒麟。

李源

李源,字江余,号星来,德州人。顺治丙戌进士,官河津知县。有《见可园集》。

夏夜

夜月清如洗,冰心话玉壶。竹君千个在,石丈一峰孤。独酌开青眼,微吟撚白须。 故人书昨至,远道忆吾徒。

李浃

李浃,字霖瞻,号陶州,德州人。顺治丙戌进士,官芮城知县。有《陶庵集》。

夏日杂言

长夏敞幽轩,开窗依萝樾。燕寝乐虚明,房廊步曲折。松响风初来,云归雨乍歇。 仰视天宇清,林暝山吐月。月色孤泠泠,素心话高洁。

久雨逢戊晴,戊日雨不止。晻晻阴晦凝,四野连蓄水。秀颖等浮萍,登场禾生耳。 爰轸昏垫情,医疮从兹起。天行岂不若,难参玄化理。怨咨念小人,思艰望君子。

天津

津门连渤海,曲折抱长安。食货喧商市,鱼盐乱钓滩。鼍鸣潮信早,龙过雨声寒。 泼刺银刀重,庖人进脍盘。

叶承宗

叶承宗,字奕绳,号泺湄,历城人。顺治丙戌进士,官临川知县,殉难。有《泺函》。

彭南溟迁泺上

彭生阀阅子,兼之湖海士。意气薄云霄,神情在山水。貌物如有神,不独得其似。 四壁虽萧然,耻以丹青市。自子初临泉上游,香毫冉冉画寒流。叶郎大笑向人说,泺水新来 顾虎头。

赵埠口

长隄密柳板桥连,红蓼花中系钓船。渔父狂歌归酒市,高竿挂网夕阳边。

李鸿勋

李鸿勋,字勤王,号长六,磁州人。顺治丙戌进士,官阳城知县。

过先贤闵子骞故里

数十间茅屋,人传闵子家。秋风吹不断,满地有芦花。

王崇简

王崇简,字敬哉,宛平人。明崇祯癸未进士,顺治丙戌补选内国史院庶吉士,官至礼部尚书。谥文贞。有《青箱堂诗集》。

舒章至

经岁犹然识泪痕,幽怀相向各声吞。惟余悲感心多愧,无复欢娱事可言。勋业漫期 新竹帛,风尘可有旧桃源。天涯兄弟伤摇落,把臂如君今几存。

寄怀梁公狄内弟流寓宝应

念子年来多病侵,鱼潜鸿杳信沉沉。奔腾昔日天涯泪,彫落余生岁晚心。万里风尘 双须短,他乡客梦一镫深。何时携手沧溟去,瓢笠潇潇上翠岑。

寄赠申凫盟

秣陵云扰后,寤寐忆君多。吾道存薇蕨,风尘乱薜萝。遐心栖大麓,清梦越漳河。 何日偕瓢笠,幽嶌听浩歌。

杂怀

疏篱松影拂前除,闭径常回长者车。適意漫劳康乐屐,忘名不著子云书。岁时花月 频沽酒,风雨黄昏独掩庐。最喜诗怀殊健逸,闲吟应可傲樵渔。

岳映斗

岳映斗,字匡六,三原人。明崇祯癸未进士,顺治丙戌补选庶吉士。有《瓠园诗集》。

失卫

忆昔经离乱,以之寄死生。星飞汾水绝,电逸太行平。委曲逢人意,艰辛只自明。 一朝青枥下,风雪怅无情。

抑搔

玉绳宵且尽,昆岫月将韬。古木红云曙,新滩碧浪高。下除寻拄杖,穿径棘围裪。 暂取鸡翁意,聊宽此抑搔。

十亩

闲闲十亩桔槔颠,火映荒篱倦鸟还。畦碧偶惊秋水至,人稀疑数晓星悬。颠狂骨性 由来有,放浪乾坤此地偏。咫尺玉泉登顿少,镜中烟雨海天连。

梁化凤

梁化凤,字翀霄,号沣源,长安人。顺治丙戌武进士,官至江南提督,封三等男。 谥敏壮。

夜雪

六出寒花云外飘,天宫错落撒琼瑶。群鸦乱噪笼烟树,孤鹤频惊带月潮。茅屋一时 成玉宇,曲蹊忽转起银桥。围炉共酌金罍酒,独惜山中有采樵。

刘元镐

刘元镐,字西京,号砚北,南昌人。顺治丙戌举人,官南宁推官。有《蜕庵集》。

商丘道中

行藏真造次,南北道空长。万里今歧路,千家古战场。青磷照落日,白骨伴垂杨。 残角孤城外,乡心正渺茫。

南关山行

九折宁为险,驱车万叠深。虎泉抛石眼,鸟路入云心。日冷林长夕,风骄壑易阴。 商山名利道,奔掷到如今。

李世恪

李世恪,字共人,江陵人。顺治丙戌举人,官凤阳推官。有《谋笑轩诗》。

季春偕诸子散步三鸦寺

风雨连三月,春光强半差。量晴呼好友,冲湿趁桃花。红断钟声接,烟深鸟路斜。 林香吹未歇,机息欲家。

程谹时

程谹时,字声子,号愚谷,天门人。顺治丙戌举人,官南丰知县。有《嘉禾堂》、 《扶柳堂》诸集。

别曾恂如

何忍遽言别, 离情自此深。涧花偏暗淡, 林鸟漫沈吟。一夕山川梦, 十年风雨心。 明朝西去路, 遥指隔高岑。

【卷二十四】

宋琬

宋琬,字玉叔,号荔裳,莱阳人。顺治丁亥进士,户部主事,历官四川按察使。有《安雅堂集》及未刻稿《入蜀集》。

送别俞眉仙归新安

古人为吏惜折腰,今人为吏愁吹毛。渭城小邑大如掌,百家杀尽十家逃。俞侯年少专城居,渭人始得归田庐。郭外行春策病马,壁间退食悬枯鱼。一朝微中考功法,拙宦违时乃承之。妻儿驴背坐复跌,担囊但有琴书压。君家旧在黄山曲,武谿千转清如玉。拂衣长啸山水间,回首风尘真仆仆。五柳门前菊欲黄,布帆高挂蒹葭苍。归去来兮倘相忆,陇雁飞时书数行。

钓台图歌赠马兰台山人

九峻山人聊玩世,伏波将军之苗裔。家在渼陂紫阁间,孤情独与烟霞契。弹筝叩缶本秦声,裂芰为衣皆楚制。儒冠误人几半生,秋风屡雪刘蕡涕。长焚笔砚事丹青,泼墨吮毫称绝艺。横皴酷似黄大痴,细染还宗吴仲圭。近代以来数文沈,嘉隆而后作者谁。山人工意不工似,匠心自出无专师。卢龙山水颇不恶,韩家钓台尤最奇。一峰高入白云里,登楼坐见海沧湄。游人欲绘每束手,譬如写照难须眉。一日坐我悠然堂,解衣礴无人窥。须臾图成挂诸壁,高岩邃谷光参差。瀩澹旋涡渔艇立,窈冥洞口烟萝垂。主人韩生有狂癖,此台自尔高曾贻。见图再拜悲且喜,重之不啻商尊彝。便买贞珉勒山侧,酹酒欲告山灵知。山人此别欲何往,赠汝一枝筇竹杖。避世宜从麋鹿群,结庐高卧仙人掌。宁恤床头妻子饥,要令胸中丘壑长。我今持节越王城,兰渚剡溪恣偃仰。预拂霜绡以待君,一挥欲使群山响。记取雪深一丈时,山人须鼓山阴桨。

送东云雏孝廉

羡尔能高卧,莲华峰下居。青袍双鬓老,黄叶二陵疏。已著《潜夫论》,还陈灾异 书。故人京洛遍,问讯近何如。

寄怀胡苍恒宪副

壮志堪乘障, 浮名悔入关。人疑龙性傲, 官似马曹闲。板屋青羌俗, 柴扉紫逻山。 边城须卫霍, 未许拂衣还。

清水道中

陇阪高无极,清秋望更赊。石林千叠水,板屋几人家。古驿羊酥饭,空山燕麦花。 停骖问耆旧,井税说频加。 发鸠兹陈伯玑欲偕至维扬弗果次采石为别

才买蒲帆指秣陵,青山此日兴堪乘。饥来自笑空仓雀,归去真如脱鞲鹰。荻岸风多摇鹭影,江潮夜落见渔灯。芜城八月枚生笔,欲起观涛病未能。

刘越石闻鸡处

衰柳平沙古渡村,传闻此地舞刘琨。鞭惟祖逖能先著,客有卢谌感旧恩。江左衣冠空北顾,古来天地此中原。鸡声依旧清霜晓,招得并州万里魂。

铜雀台

三台缥缈郁相望,俯眺中原接太行。凤觜香残歌舞散,鱼鳞瓦冷馆池荒。漆镫讵有 千年焰,繐帐空施入尺床。何似金人汾水上,茂陵风雨泣刘郎。

登西岳庙万寿阁

崔巍杰阁玉为寮,白帝离宫倚绛霄。槛外河山三辅小,岩前觞豆百灵朝。明星环珮云来湿,仙掌芙蓉雨欲摇。会御长风凌绝巘,青鸾背上夜吹箫。

登华岳作

独上钩梯览大荒,秦关终古气苍苍。天开阊阖才寻尺,地界雝梁入渺茫。五粒松摇 群帝珮,三浆露挹百神觞。仙人方罫青冥上,更欲凌风度石梁。

松风谡谡步虚声,策杖高寻卫叔卿。星近祠坛光欲堕,月临仙掌夜偏明。扶桑万里 天鸡曙,箭括三更石马鸣。谁信扬雄擅词赋,不将彩笔记层城。

鹦鹉

雕笼万里话征鞍,辛苦何辞行路难。幽阁恰添娇女伴,方音犹作部民看。且分薄俸供粳稻,莫遣春风瘁羽翰。流水陇头相忆否,朔云边月不胜寒。

庚寅狱中感怀

商飙凉劲秋,昊天降霜露。采采孤葵根,展转愁其足。幽兰在庭柯,馨香莫能蠹。 君子谅不惜,零落伤中路。庶事多贸理,人生信所遇。俯仰终古间,谁知龙与蠖。

夸夫竞权势,志士怀荣名,杀身非一端,天道常患盈。汤汤桐柏水,有时浊且清。 羲和无停策,日月东西征。自非空桑子,岂不念所生。宛彼鸣鸠诗,凄恻涕沾缨。

中夜聊假寐,饥鼯啮我耳。拥褐步檐棂,众星粲可指。中有琴鼓声,清商激绿水。 哀弦随悲风,曲终忽变徵。兹音久不作,勿乃邹阳子。沈忧荡精魂,欲诉谁为理。 仆夫橐饘粥,投箸谁能餐。徒隶向我语,庙室西南端。往者杨左辈,预血于此丹。 恍惚阴雨时,绛节翳飞鸾。再拜招其魂,毅气不可干。嗟余亦何为,喟然伤肺肝。

挂剑台

延陵季札贤公子,腰下芙蓉淬秋水。一片心期不忍寒,萧萧陇树虹霓紫。历聘诸侯未反命,鱼肠剚刃王僚死。躬耕三让宗家法,吴邦不受轻如屣。当时列辟尚权谋,剑客纵横仁义否。君臣父子竞相居,《谷风》之刺徒为耳。公子深忧在万古,聊因死友扶人纪。缟纻非无肸与侨,千金独向徐君委。朅来酹酒想遗风,荒台半圮埋寒丛。麒麟寂寞一抔土,谁其树之松柏桐。人言墓草似干将,辘轳镡鼻将无同。三十年来不复甲,枯根或化为蛟龙。水汤汤兮风烈烈,篝火黄昏读残碣。金石有时销,此谊长不灭。君不见交态纷纷等阡陌,任昉门前无吊客。

赠郑汝器歌

近代八分复何有,专家独让莆田叟。莆田宋玨,善八分书。作者纷纷祖唐隶,臃肿支离转粗丑。郑君博物饶天姿,书法遒劲多离奇。老笔纵横森剑戟,尺幅光怪盘蛟螭。大书径尺悬赑屃,仿佛再见峄山碑。家藏图书半秦汉,陈仓石鼓宣王诗。岣嵝传疑夏王禹,之罘篆刻丞相斯。缥缃卷帙各精好,岩搜壑剔将无遗。我来焚香肆展阅,神游三代观鼎彝。主人爱客出斗酒,高斋日午桐阴移。况复髯兄善豪饮,醉挥三百金屈卮。君从壁上观人醉,独踞匡床作奇字。泼墨淋漓四座惊,咫尺苍茫风雨至。昔我持节陇首经。磨洗中郎《郙阁铭》,会将什袭称双绝。置向浮岚暖翠亭。余家藏黄大痴山水,曰《浮岚暖翠图》,因以名亭。

竹罂草堂歌疁城朱松邻,白门濮仲谦,皆以竹器擅名。

君不见练川朱生称绝能,昆刀善刻琅玕青。仙翁对弈辨毫发,美人徙倚何娉婷。石壁巉岩入烟雾,涧水松风似可听。镂玉雕犀安足夸,玻璃可碎牺樽腥。白门濮生亦其亚,大朴不斫开新硎。虬须削尽见龙蜕,轮囷蟠屈鸱夷形。匠心奇创古无有,区区荷锸羞刘伶。妙制流传真者少,何侯得之为异宝。大书深刻作堂额,客至登堂多不晓。我来问名请纵观,锦笥才开称绝倒。黄侔蒸栗缜且坚,润比琼琚兼肉好。何侯啖我烧羊胛,华发临风除白帢。阶列唐昌观里花,栏余甫里先生鸭。美酒元从白堕留,新篘更得青州法。南人不惯北人欢,绳床坐听糟床压。君不见蔡邕笛,千年人去亭名柯。讵若龙钟古节大如斗,真堪一日十摩挲。铜盘绛烛朱颜酡,升君之堂为君歌。年来已厌乌程酿,客中十斛须相饷。沙棠树下牡丹丛,蓓蕾计日应全放。殷勤欲倩好风吹,痛饮还期明月上。预敕双童洗竹罂,待我醉卧青丝障。

赠马南宫参戎

君昔衔命赴临洮,少年意气何雄豪。狐白之裘秦复陶,袴靴首乌孙刀。雪深草浅牵旅獒,手格猛兽如童羔。绿熊赤豹远遁逃,生取苍兕拔其氂。屯田芜没愁耘薅,黄沙碛里飞蓬蒿。金城戍卒饥嗷嗷,翁孙方略徒烦劳。安西都护醉葡萄,诛求络绎穷秋毫。旋从丞相征哀牢,五月渡泸入不毛。苴兰城下血战鏖,蚕丛铁马随猿猱。李广数奇功则高,猿臂不得拥旌旄。长啸归来脱锦袍,黄公酒垆换浊醪。鲈鱼三寸莼可芼,安能俯仰同桔槔。美人环珮逢江皋,感君一曲求凰操。画眉笔染青螺膏,鸲鹆紫砚笺薛涛。调丝未央参翔翱,玉台新咏铿云璈。温柔有乡堪酕醄,何劳锦字贻窦滔。灞陵醉尉空嘈嘈,吴钩夜作蛟龙号。孙卢余孽阻

风{风寿},天威赫怒集征艘。楼船十万声喧嚣,何人为荐公孙敖。鍪弧重绣解弓韬,洗清瘴海为城壕。云台图画鄂与褒,道傍笳鼓惊儿曹。丈夫穷达信所遭。

市驴行

冏伯寺前黄纸下,黔首不得畜匹马。输官者后罪无赦,騄駬骅骝弃中野。走马粪田 史有书,房星天驷光模糊。柴车辚辚鸾哕哕,负轭者谁大宛驹。五陵富儿顾厮养,蹇驴价出 龙媒上。素丝作鞭金络头,骄嘶奋鬣行长楸。

雪夜蘋园听何山人弹琴歌

瑞雪峨峨照金罍,主人置酒临高台。座中有客操绿绮,使我徒御皆心哀。寒风萧飒空堂里,一曲未终栖鸦起。忽疑空山雷雨过,倒挂飞流声齿齿。又如班马之群鸣,千骑万骑行复止。山人本自雍门客,长裾耻向王侯宅。结友偏多侠少场,贫来独有丹青癖。醉时携得虎头笔,满壁云烟峰削戍。生绡高卷洞庭云,彩毫孤映蓬莱日。丝桐笔墨各有神,琴理真从图绘出。水仙海上雾濛濛,《广陵》绝调随春风。弦际何由识今古,胸无丘壑难为工。伊余自叹婴尘鞅,五岳空怀何日往。烦君为鼓一再行,能令宗炳群山响。赵郎善手写金徽,更为变徵泪霑衣。明月疏钟两摇落,满地清霜鸿雁飞。

从军行送王玉门之大梁

有客有客髯而紫,左挟秦弓右吴矢。自言家本关中豪,黄金散尽来江沚。年来倦上仲宣楼,裹粮且访侯嬴里。腰间匕首徐夫人,河上荒祠魏公子。悬知吊古有深愁,慷慨登车不可止。自从盗决黄河奔,大梁未有千家村。烽火但增新战垒,尘沙非复古夷门。短衣聊向将军幕,长剑终酬国士恩。落日驱车临广武,春风试马出轘辕。丈夫佩印乃恒事,安能郁郁老丘樊。王郎顾我深叹息,一见欢如旧相识。此行不但为封侯,人生贵在抒胸臆。江上杨花白雪飞,梁园芳草青袍色。盾鼻犹堪试彩毫,莺声聊为停珠勒。醉后狂歌气若云,军中教战容如墨。春风拂地车斑斑,起看明月览刀镮。平台宾客久零落,至今汴水空潺湲。怜予偃蹇风尘际,年来磬折凋朱颜。已知苦被雕虫误,强弩欲挽不可关。待尔他年分虎竹,相从射雁终南山。

诏狱行

秋官署中有老吏,能说先朝诏狱事。当时国是日纷纭,太阿柄倒归阉寺。天子高居问尚公,公卿标榜排清议。遂有群凶作爪牙,贙虎苍鹰最毛鸷。长乐宫前传片纸,金吾夜半飞缇骑。卫尉将军身姓许,提点官旗北镇抚。谳决惟多王甫欢,累囚欲辩张汤怒。洗垢新悬沈命法,挥毫已入追魂簿。甫闻此阙杀刘陶,旋见西亭尸窦武。白骨交撑裹赭衣,残骸谁敢收黄土。尔曹自谓盘根株,杀人狐媚夸良图。岂知神理有反覆,昊天明明安可诬。神奸脱距竞菹醢,亦有然脐当路衢。长安万姓歌且舞,卖钗鬻钏沽醍醐。海水群飞桑亩移,俯仰乾坤又一时。三君八俊俱尘土,膺滂田窦无坟基。彤管堪嗟《酷吏传》,青苔半蚀党人碑。我今胡为淹此室,圜扉白日啼寒鸱。冤魂欲招不敢出,但闻阴风萧飒中心悲。中心悲,泪盈把。酬酒呼皋陶,皋陶竟喑哑。古来万事难问天,蚕室谁怜汉司马。君不见城上乌啄人,曾不问贤愚。新鬼衔枚向都市,年年寒食声呜呜。

双燕歌

双燕复双燕,去岁春明江上见。今年知我在网罗,飞飞万里来相唁。忽似天涯绝域中,跫然骤得逢亲串。支颐强起暂为欢,抚事哀歌泪如霰。吁嗟我生太荼苦,羽毛摧剥饥肤贱。鸿雁高翔那肯顾,鹡鸰梦断空凝盼。东风夜夜吹归心,故园桃李开应遍。燕兮少留听我语,狱吏虽苛不嗔汝。长安挟弹多少年,汝今衔泥向何处。楚馆吴宫久寂寥,野花烂漫萦遗础。翡翠楼头许暂栖,恐妨思妇梦金闺。荡子从军去不返,年年芳草春萋萋。碧纱窗外霏霏雨,恨杀南飞乌夜啼。

古银槎歌

我有匣中银凿落,碧山山人手所作。背镂至正壬寅字,点画形模今宛若。断节枯根 纷错纠,中有仙人博望侯。衣冠甚古须髯苍,飘飘一似乘孤舟。肘后惜无筇竹杖,袖中或有 安石榴。人言八月泛天汉,支机石畔逢牵牛。奇事流传见图画,炼师何意穷雕锼。当年亲致 汗血马,饱历条支经大夏。安知骨貌久销歇,供人把玩充杯斝。金人已去柏梁台,玉液常霑 白莲社。嗟我瓠落沟断同,潦倒赖尔衰颜红。有酒如渑不称意,欲求仙术寻壶公。跳身此槎 之腹中,穷源再入冯夷宫。为侯改号鸱夷翁。胡为低眉偃蹇在尘世,枕蛟骑虎愁我躬。

夜雨留方尔止宿次日将之宣州

相逢哆落木,此别叹流萤。偃蹇羞郎署,饥寒逐客星。帘光摇竹翠,江雨带帆青。 归日吾能待,新诗满敬亭。

宿摩诃庵

不意能来此,高僧共默然。灯传无尽劫,花有再生缘。幻梦初弦月,微躯小劫年。 画廊松影外,呵壁问诸天。

喜王西樵至湖上

伏枕南屏寺,闻君脱罻罗。翻然具舟楫,及此问烟萝。惊定收双泪,悲来著《九歌》。 惠连新句好,惆怅未同过。

惜别魂犹悸,相逢病欲苏。全身来北寺,留眼看西湖。白社期同往,青山道不孤。 故人曹邺在,吟眺慰穷途。顾菴学士客湖寺。

剡溪道中

昔人乘雪往,而我溯风行。万壑穿云转,孤舟与石争。鱼游寒水见,鸥立夕阳明。 安道留遗宅,寥寥千载名。

和曹顾菴学士湖舟泛雨

荡桨烟初破,回桡雨未收。樵归梅半斧,候暖麦将秋。云气藏山寺,江声抱郡楼。

客怀俱拓落,不但为依刘。

申园同姜如农作

旧与张常侍,同吟《桂树歌》。重来松鼠大,相对渚禽多。花气侵衣袖,茶烟隔薜萝。终焉遂疏懒,白首问渔蓑。

寓侯记原秬园

飘泊仍吴会,凄凉但越吟。乡遥悲去雁,春晚见来禽。老病初携杖,良朋喜盍簪。 娄塘隄上柳,步屟定相寻。

上巳迟三月,是年闺二月。高斋自一家。鱼梁连竹屋,鸡栅缚藤花。万木偏能冷, 群鸥未觉哗。临邛频送酒,莫遣豹奴赊。

未忍辞君去,行行且复淹。酒枪朝尚卧,花箭夜来添。斋中,蕙开极盛,白鸟声相乱,黄鱼价稍廉。东邻如何问,龟策未须占。

检阅故人姜筼筜遗稿泫然有作

宿草萋萋几度春,招魂不返大江滨。安知嗣祖非为福,况有要离可作邻。良友心期 为楚些,孤儿风貌是吴人。西风似翦吹残烛,三复遗文泪满巾。

九日同姜如农王西樵程穆倩诸君登慧光阁饮于竹圃分韵

塞鸿犹未到芜城,载酒登临雨乍晴。山色浅深随夕照,江流日夜变秋声。上方钟磬 疏林满,十里笙歌画舫明。空负黄花羞短鬓,寒衣三浣客心惊。

夏考功先生卅年浅土门人盛珍视卜地葬之以其夫人祔焉余高其义为诗以赠

几年松槚缺经营,负土荒原赖友生。曾赋《国殇》悲翟义,竟无佣保付王成。月明 大鸟来华表,剑合双龙卷素旌。二陆冤魂应共语,云旗风马笑相迎。

罗以献胡去骄将归武陵汉阳小集南园即席分韵

才从双屐探梅萼,忽送孤帆折柳条。唳鹤滩头春欲尽,鹔鹴坡上梦方遥。生徒南郡 悲长笛,词客西京有洞箫。我亦因君动归思,那能长住伯通桥。

重晤李舒章

漠漠阴风吹草菜,故人悲喜更衔杯。竞传河朔陈琳檄,谁念江南庾信哀。避地何如 金马署,伤心莫问柏梁台。蛾眉自昔逢谣诼,嗟尔登高作赋才。

元旦

白项乌啼接曙晖,条风依约满圜扉。非关潘岳为郎拙,自是虞翻与世违。沧海尚悬 逋客泪,清霜宁为贱臣飞。故园鸥鹭应相诮,辜负三春薜荔衣。

送顾勉斋督饷关中

柳色依依边马鸣,故人万里赋西征。汉江旧绕褒斜谷,蜀道新悬骠骑营。碛里梅花春不度,楼中羌笛夜偏清。相看怀抱萧条尽,陇水秦云雁几声。

闻郭辉竹赴难志感

侧身东望独含愁,尺素俄传解我忧。党祸得无惊范母,故人来必是王修。欲投豺虎呼苍昊,肯使钱刀感白头。侠骨未妨频煅炼,若卢扉里醉乡游。

冰雪河梁送汝归,至今乌鹊尚惊飞。未辞羽翮悬弓,何事风波及钓矶。梁狱有书愁 按剑,秦庭几客赋《无衣》。悬知执手还如梦,颜鬓年年半已非。

送徐子九之任麻城

昭丘南望郁苍苍,有客鸣榔过武昌。楚国菁茅初入洛,汉臣词赋旧怀湘。月明挂席 闻鸿雁,秋老登楼见凤凰。若到江南逢小谢,寄言幽梦满池塘。

送何葵如归里

年年作客雁先还,才说归期鬓已斑。落日片帆天际远,那能相送鹤儿山。

漂母祠

楚媪祠边荐白蘋,谁将卮酒酹王孙。千金一饭犹思报,肯负高皇吐哺恩。

舟中见猎犬有感而作

秋水芦花一片明,难同鹰隼共功名。樯边饱饭垂头睡,也似英雄髀肉生。

黄耳传书事不讹,松江高冢尚嵯峨。韩卢烹后功臣死,莫向淮阴祠下过。

癸丑上元游赤壁作

步屎临皋芳草生,断崖千尺夕阳横。赋成《赤壁》人如梦,江到黄州夜有声。雪后 归鸿频代谢,渚边孤鹤自哀鸣。烟波极目凭阑客,载酒还应酹月明。

舟中即事

老作成都客, 飘摇愧卜居。招魂词赋客, 访古岁时书。鸟道王程远, 猿啼乡信疏。

同舟亲串喜,新食武昌鱼。

宜都阻雨入夜始霁自荆门虎牙山而上群峰络绎险怪万状蜀江之奇自此始

舣舟背山郭,寒雨方凄凄。爱此澄江水,色映青玻璃。北岸殊不然,一石五斗泥。 同流判清浊,势与泾渭齐。宵分星汉出,捩柁鸣晨鸡。虎牙既雄亘,荆门不可梯。群峰互方 圆,参差壁与珪。层巅挂飞梁,千仞垂虹蜺。石子何磊磊,往往绝径蹊。榜人半赤脚,重茧 如马蹄。小子但果腹,歌啸忘酸嘶。嗟余怀寸禄,远適瞿唐西。巫山渺安极,巘崿方端倪。 晨夕展游眺,童稚相提携。快哉篷窗内,偃息成幽栖。

泊舟夷陵作

百丈挽孤舟,譬诸御劲敌。黄头运长篙,森然列矛戟。伐鼓以为节,进止有成画。喧呼殷雷霆,鱼龙应辟易。草间觅微路,蜿蜒入山脊。蜀儿夸身手,攀缘类蜥蜴。乘风张素帆,眩目失青壁。蒙茸岩际花,斑驳沙边石。小市闻鱼腥,近郊留虎迹。夷陵楚西门,历年困兵革。黄牛未百里,江流疾如射。云岑莽亏蔽,波涛相委积。芜没明妃村,苍凉屈原宅。景物足留连,畏此简书迫。浩歌对鸥鸟,俯仰悲行役。

南津关即西陵峡。

奋棹入西陵,实惟三峡首。耳目霍然新,乾坤划初剖。巴江万里来,莽莽开户牖。 大禹驱龙蛇,群峰俨趋走。锦屏百叠张,翠壁千寻陡。崖谷异昏明,亭午气如酉。幂历青萝幽,茏葱白云厚。绘事让鸿濛,天然色丹黝。怪石何时崩,雷文辨蝌蚪。长年告中飰,步屟坐林薮。苔荒杖屦危,径仄趾相蹂。抨弓落雉媒,垂纶出鱼舅。挥杯劝吾侪,此乐良非偶。

黄茅滩

群山夹江流,其形如囊橐。缅想太古前,神功劳斧削。直下塞坤维,高空插冥漠。崩浪屡洄漩,层峦迭参错。罨画象楼台,岧峣类城郭。翠含青黛光,白者为粉垩。沿回路已穷,侧转忽开拓。烟际见渔舟,遥遥一秋箨。涉险却恬嬉,胜赏反惊愕。浑似逢异书,披览得约略。行行止三舍,樵爨倚山脚。方音闻鹧鸪,暝色下猱玃。汹汹怒涛哀,凫凫山泉弱。兴来抽短毫,庶几慰飘泊。

捕鱼行

新滩之险天下无,瞿唐以东称畏途。波涛壁立走雷电,下瞰疑是蛟龙都。骤窥澒洞破心胆,坐观笭箵成欢娱。渔人取鱼逐滩响,不劳乌鬼家家养。年年巴蜀雪消时,千百为群鱼大上。歕珠跋扈气成龙,触石惊跳力如象。腾身争欲挟云飞,红鬐翠鬣翻银浪。死生祸福只须臾,早见修鳞出罾网。已困泥沙尾尚摇,半衔苇索头还抢。宁论鲤与鲦鲿,百钱贱买充糇粮。不分流膏兼饲犬,可怜登俎共牴羊。我行见此欲掩鼻,鲍鱼之肆古所伤。落日回舟召亲友,吾侪幸脱鲸鲵口。计日应尝丙穴鱼,为君满酌郫筒酒。

新滩歌

江水远赴瞿唐门,建瓴而下势欲吞。东过秭归峡逾逼,双崖突起如藩垣。神龙在槛虎被缚,自然拏攫还腾奔。巨石中央列戈戟,云霾雨蛰磐孤根。潆洄未肯注东海,朝宗讵识天王尊。天吴九首作窟宅,当年割据哀公孙。老蛟昼号猿夜啸,估客万里伤心魂。疑是共工怒,头触昆仑折天柱。又似樊将军,毛发冲冠皆倒竖。丛祠血食饱淫昏,开凿无人念神禹。岸边林立黄头儿,负戴装囊半村女。攀萝扪葛胜丁男,头上银钗已非古。行旅纷纷学鱼贯,邻船隔舫更相唤。一舟才过万人呼,沙头杂坐忘餐飰。西来艚去如箭,死丧之色人人面。涛声断处即安澜,咫尺分明割乡县。舟人酾酒妻孥喜,历尽惊湍观已止。艰危莫漫数黄牛,鹿角狼头曹桧耳。

戏题督邮争界石

何年攘臂此山头,风俗传闻两督邮。蜀国至今悲杜宇,楚人终是恋鸿沟。沧桑屡换 身安属,朝市频更怒未休。怪事荒唐君莫笑,古来党祸本清流。

天生桥歌

天台石梁百余丈,缥缈丹梯不可上。匡庐瀑布垂云端,银河倒挂千岩间。苎溪之水西北来,发源月窟何雄哉。骊龙正睡老蛟蛰,何人鞭起生风雷。雪山峨峨仆冰柱,冯夷怒击灵鼍鼓。六鳌鼻额高崔巍,溅玉霏珠自吞吐。虹桥横跨出天然,元气浑茫绝斤斧。奔涛忽断咽不流,下穿双穴如咽喉。须臾溃决势莫御,动摇林壑风飕飗。万钧强弩齐注射,骅骝顿制金络头。我来濯缨还洗耳,酌之不异中泠水。猿啼虎啸车马绝,可怜汩没空山里。噫嘻乎!古来贤士轗轲亦如此,必逢困厄声名起。屈子《离骚》马迁《史》,不得其平应尔尔。残月辉辉搅醉眠,犹觉泉声撼窗纸。

李之芳

李之芳,字邺园,武定人。顺治丁亥进士,授推官,官至文华殿大学士。谥文襄。

同施愚山陪祀郊坛

太乙瑶坛接露台,龙旌遥拂翠华来。仙韶细度云门奏,玉殿初明泰畤开。千尺炉烟天外转,九重黻佩月中回。祠官解有登封意,独向《甘泉》拥赋才。

冯溥

冯溥,字孔博,别字易斋,益都人。顺治丁亥进士,官至文华殿大学士。谥文毅。 有《佳山堂诗集》。

行路难

长安豪贵起大屋,日食万钱苦未足。洛阳年少来上书,旁观笑破绛灌腹。昔日信陵 谋孔艰,车骑喧阗老抱关。太史犹记东门里,过者徘徊不忍还,呜呼蹑屩担簦日三喟,人生 报恩会有地。 少年结交意气豪,杯酒欢娱赠宝刀。出门一笑轻其曹,铭钟铸鼎等鸿毛。白日晻暧 不相待,霜刃绣涩沉光彩。无复伏波铜柱勋,空愁薏苡飞书在。呜呼茫茫尘氛无要津,弃繻 破浪属何人。

纫兰不耐久,磨刃空伤手。树锻既不堪,犊鼻亦可丑。丈夫悬弧志四方,焉能跼蹐徒俯首。脂车秣马越太行,自信险阻无制肘。我车脱幅,我马卒{疗者}。前有虺蛇,后有猛虎。将伯无助,困于林莽。咄嗟歌白石,慷慨问青旻。孰知坎壈蓬蒿士,亦有当年稷契臣。

秋日饮酒诗

秋色从西来,吾斋何潇洒。凉飔拂襟袖,老眼作小楷。念此筋力微,自笑如童騃。 又容净远眸,天清暑已解。重曝晏子裘,莫怪侏儒矮。高朋正满座,樽空更须买。取乐少年 同,顿忘吾体惫。况有吹箫人,取材谷之嶰。华灯宜高张,梁尘凫凫摆。不醉未云达,遑恤 旁观骇。试看战士苦,甲披犹重锴。

纪异

己未秋七月,廿八直官廨。震动起重渊,衰老適相邂。初听蛟龙吼,水势涌澎湃。 复拟雷霆怒,击物刀必夬。奔走争一门,汹汹群夺隘。帽脱鲜结缨,袒裼任衣衩。跬步暗前途,举足迷所届。造物胡不仁,或是天地噫。仓猝遘乖异,喘定神尤惫。战慓色各变,相对 不能话。招魂幸得活,倾压分一界。岂是九河复,沟裂分多派。屋覆势连鸡,墙彻溷贵介。 嗟哉土中人,狼藉如填债。上帝降鞠凶,下土横彫察。

贫者束缚去,富室或歌薤。逆旅亲戚绝,惨被蝇蚋嘬。皇仁真浩荡,发帑赈颓坏。 无主敕官瘗,丁宁勤告诫。小人复贪利,木石十倍卖。至今露处多,入室如畏虿。席亦不易 得,妇子衣裳絓。街头灯火繁,团聚浑结砦。凄凉逢阴雨,郑图非所画。灾祥昧其原,夫子 不语怪。俗讹鳌极翻,吾将具十辖。

赠唐济武

折槛焚鱼句独工,参祥学道迹双融。闲来几捆牛腰卷,醉后千村驴背风。小过旧知惟砚北,同人新兴在江东。即今握手春明里,不拟人间问转蓬。

篱菊花繁九月秋,去年有客赋同游。文章海内无双手,公望词林最上头。狎主齐盟 邻友在,揭来燕市酒徒留。蜀笺欲买三千叶,钞取新诗慰老眸。

九日同沈绎堂罗振彝王仲昭吴志伊陈椒峰登善果寺毗卢阁

苍凉霜气未深寒,九日招提倚佛栏。过眼征鸿难并翼,入盘紫蟹且加餐。天龙八部 垂垂老,日月双丸冉冉看。陶谢宾朋欣满座,黄花欲插更弹冠。

芦沟桥行

芦沟之桥走百货, 柴车阻塞断人过。前车脱轭扶牛立, 后车挨帮骑马坐。须臾十车

五车横,千车百车不肯行。日中相望愁日暮,九衢遥瞩走峥嵘。豪贵驰来鞭挞厉,回辕让路开复闭。念子气骄衣裳单,天寒露宿真拙计。都城百雉开九门,九门亦复如云屯。侯家应有车千辆,牛马风尘日月昏。忆昔子针来奔晋,华轩炙毂夹道进。观者惊愕未敢言,雷轰电掣公卿震。富贵事君莫等伦,不见诗咏车辚辚。寄言行役冠裳客,好避驱车独力人。

黄机

黄机,字次辰,号雪台,钱塘人。顺治丁亥进士,改庶吉士,官至文华殿大学士。 谥文僖,有《浥露堂诗文集》。

读欧阳永叔秋声赋有感

执素不盈尺,抚桐何事弦。夜气还太初,杳无尘虑牵。清商入林杪,抱膝忘吾年。 人生感荣辱,而自损其天。闻兹檐外声,乌乎使之然。

和高念东先生六合道中作

寄眼秋光好,停车问所经。回峰藏短径,疏竹掩空亭。稻熟平栖亩,蘋开浅见汀。 蒋山新入望,端为客来青。

王熙

王熙,字子雍,一字胥廷,号慕斋,宛平人。顺治丁亥进士,改庶吉士,授编修,官至保和殿大学士,加太子太傅,进少傅。谥文靖。

少楼冬月

向夕烟消大地平,海洋扶月上瑶京。山河影射千门静,城阙光涵太液清。霜静高旻 流素籁,风微小阁敞新晴。邻钟欲动光初满,萧瑟还惊离别情。

夏日柬章紫仪

思君好亭子,闭户即山林。绕屋清光回,盈阶碧草深。素琴宜静夜,凉月发高吟。 此地疑无暑,微风起夕阴。

紫竹院

紫竹禅关迥,虚亭老树前。槛低花影静,林密鸟声传。钟梵闲清书,池塘遍野泉。 夕阳楼影下,归骑破春烟。

郝维讷

郝维讷,字敏公,霸州人。顺治丁亥进士,官至吏部尚书。谥恭定。

寄题五老峰

庐岳岧峣隐列仙,五峰离立蔚蓝天。玉膏瑶草襟期外,白鹤青牛謦欬边。极目蓬莱惟一气,共餐沆瀣自何年。终期振策三梁上,宾主逢迎意俨然。

任克溥

任克溥, 字海湄, 聊城人。顺治丁亥进士, 授推官, 官至刑部侍郎, 加尚书衔。

游鹊山院赠蹇修上人

偶来寻古寺,雨后得余清。漠漠人烟外,冷然一磬鸣。禅床随处稳,秋草就阶平。 只恐深山去,云霞隔几层。

李敬

李敬,字圣一,号退庵,六合人。顺治丁亥进士,官至刑部侍郎。

天宁洲至六合

纤纤芦上月,历历船中晓。风鸟共一轻,江天相与杳。云归三楚秀,山点六峰小。 滁水回曩游,灵岩发新眺。

孤馆

孤馆多雨色,青苔被阶墀。秋风行半道,玄蝉催高枝。伫立裁锦字,信美将谁思。 空廓易流响,非复堕钗时。盛年不自得,良觌难重期。安得随阳鸟,缄书寄瑶池。

清明泊瓜步阻雨

愁思如芳草,春程不断生。停云连野色,过雨挟江声。瓜步新添水,清明远送行。 强从吴客语,归计羡朱樱。

登岳

寻山有仙骨,出没御天风。历历游观处,苍苍烟雾中。灵芝光可遇,福地脉俱通。 日落予心息,还期铁脚翁。

过武昌

四时常不极,一棹况无涯。击汰天疑路,停桡水是家。危洲行处直,远郭望中斜。 沙势衔山影,波光荡日华。芦明空岸雪,叶乱晚陂霞。稍辨武昌树,初飞梦泽鸦。客愁增湍 驶,楚色满蒹葭。欲访河干叟,林端见古槎。

洞庭望月

好风临湖水,清光不可分。有天涵万象,无地点微云。邻笛声相应,仙舟影绝群。 如何风外雁,偏向夜深闻。

春晚

春晚草萋萋,流莺不住啼。酒醒亭午后,人忆秣陵西。愁绪散还结,月花高复低。 缄情书札在,珍重更封题。

青溪曲

十里青溪半藕花,亭台相向夕阳斜。小姑不解伤心事,夜夜月明来浣纱。

过准提庵用退之韵

桧柏秋阴石路微,荒园草长残蝶飞。老僧学佛兼学圃,豆花雨渍豆叶肥。我来踏穿狮子窟,绳床尘满坐者稀。所须月米才半钵,黄菜扑面劬朝饥。去年屋破雪堆席,今日墙欹风打扉。睡汉世法且不贯,纵施广舌何霏霏。龛前大士漫千劫,门外枯松径十围。随便趺坐即起去,休留棘刺横牵衣。快哉白云如奔马,兀突那复为人鞿。

读水经注忆沿庭

坐倚巴丘俯洞庭,君山一十二峰青。不闻修竹来仙吹,但有孤鸿送客舲。欲辨水天惟北斗,若当风雨即南溟。旧游浩渺如春梦,兀看郦元注《水经》。

宋徵舆

宋徵與,字直方,一字辕文,华亭人。顺治丁亥进士,历官副都御史。有《林屋诗草》。

参军行

檀州军败济南陷,铁骑西山逼云栈。九门辛苦坐公卿,按兵不动有高监。玉堂美人何不平,上书北阙苦论兵。参军新命一朝下,单骑夜出长安城。是时主将卢司马,独将西兵兵力寡。不教国士死黄沙,别遣参军向城下。参军不行司马嗔,参军既行司马陈。北向再拜谢至尊,曰臣象升死国恩。鼓声阗阗军出垒,司马一呼创者起。三万边儿夜合围,孤军虽胜终斗死。朝廷颇轻死事功,翻疑讼疏多雷同。司马精爽久寂寞,参军一官成转蓬。呜呼国家赏罚未可测,归耕匡庐隐亦得。

襄阳曲

襄阳二月花艳时,城头高曳五丈旗。东风一夜动笳鼓,夹城传呼丞相归。红缨金甲光炤日,霜刀乱挥贼争出。仓卒谁辨非官军,满城鼎沸嗟何及。岘山日落黑云重,大隄女儿

哭相送。襄王宫殿野火烧,何人更起猎云梦。

赠张燕客

我来勾践国,结交张公子。华灯夜相迎,痛饮从此始。三尺罗袖红,一尺虬髯紫。紫髯飘飘拂予肩,自言畴昔称少年。西走咸阳北走燕,终南太行相接连。此乡索寞少奇士,风沙万里心茫然。以兹感叹归故乡,黄河千尺流汤汤。河隄蓄水出平地,决之可以沈大梁。黄龙青雀未可测,果然今日成怀襄。酒酣对伎重岸帻,重道当年解音律。琵琶弦索谁第一,武宗供奉查八十。万历季年范昆白,雷轰铁拨今有谁。练川陆曜称杰出,闻君此论多嵚崎。河转星稀未忍归,归来落月屋梁西。卧龙山上乌乱啼。

古意

碧玉堂西红粉楼,长安归思忆凉州。咸阳桥上三年别,回乐峰前万里愁。秦地烟花明月夜,汉家关塞白榆秋。梦魂欲识金微路,应逐交河水北流。

长信草

青青长信草, 无意学逢迎。不厌凄凉地, 春来还自生。

下滩

孤舟泻石滩,双桨下云端。浪涌分花路,涛惊溅雪寒。乱山皆曲向,飞渡怯回看。 千里无诸国,天南自郁盘。

谷应泰

谷应泰,字赓虞,号霖苍,丰润人。顺治丁亥进士,历官浙江按察司佥事、提学道。 有《筑益堂诗集》。

游道场山

丹岑连绝汉,金刹倚晴空。花散珠林雨,松回古殿风。寒烟生树杪,孤磬落云中。 尚有荒亭在,凭轩忆远公。

张坦公先生放鹤亭招饮

春风杨柳尽垂丝,湖海飘零对酒卮。忽忆彭城今夜雨,满庭芳草鹤归迟。

张坦公擢少司空北上

楼船北指少司空,三月江南听去鸿。谋国上书惟贾傅,救时入洛看温公。幸陪禄食旬宣久,怅望莺花去住同。何日皇州春色里,鸣珂紫陌一相逢。

季开生

季开生,字天中,号冠月,泰兴人。顺治己丑进士,历官给事中。有《冠月楼诗》、《出关草》。

关前志别

罪躯幸得主恩全,饯酒萧条转授鞭。奄普滩平鱼阵浅,句离天阔雁行偏。不辞马骨埋边雪,敢惜牛衣卧塞烟。今日玉关无外内,临歧握手莫潸然。

尚阳堡即事

草桥跨涧水粼粼,不厌羊裘把钓纶。每愧野人勤给米,久劳邻媪代炊薪。床前见月家园梦,雪后听鸿兄弟情。消浊却怜诗兴浅,三秋不敢忆鲈莼。

凿冰十丈得泉归,却望千峰白雪围。海岸渔樵生计浅,天涯亲旧过从稀。顽山入屋 霜连枕,秃树当门月上衣。穷旅不堪儿女怨,夜添松火敌寒威。

新烧悬崖净积莎,远随甲骑渡柴河。虎头在客休投笔,鸡肋从军漫荷戈。骨肉书传 辽塞少,林泉话入故园多。边城老将秋霜下,夜半闻笳起自歌。

五云长绕旧皇畿,万里孤臣寄翠微。极塞有山皆北向,重边无水不西归。鸡鸣梦讶 参朝晚,乌哺心伤进膳违。宁惜茕茕沙雁影,阳回未得入关飞。

送左大来先生葬

重关不禁旅魂过,梦里看君渡塞河。白日总悲生事少,黄泉翻羡故人多。荒台啼鸟 围松柏,废苑寒云锁薜萝。未遂首丘须浅葬,好留枯骨待恩波。

洗马桥王三侠君

灵崖北下莽萧萧,旧是单于洗马桥,野槿帖山垂白叶,番河归海逆红潮。共传化日 销兵甲,不厌寒星送使轺。万里天书自西出,吟鞭应叹斗牛遥。

季振官

季振宜,字诜兮,号沧苇,泰兴人。顺治丁亥进士,历官御史。有《静思堂诗稿》。

潼关有感

兴亡非一代,形胜览层楼。渭水千年浊,秦山万里秋。豺狼互吞噬,盗贼化王侯。 邮置无余马,黄华不肯休。

赠白门丁继之

夜夜金陵梦所思,君今犹是故栖枝。杯传烛影人如玉,柳罥波光月似规。白发遗民 翻旧谱,乌衣年少唱新诗。繁华摇落秋无限,木老烟寒总不知。

夜梦亡兄书寄柩前用代酹酒

旷野兽铮铮, 高山石

沧州古刹

齿齿鱼鳞泊客船,浮图倒影水渊渊。嘶风老马斜阳里,茹菜穷僧古佛前。宦海于今 非故我,情田何处问诸天。新声一夜江南笛,落尽明霞月又圆。

蒋超

蒋超,字虎臣,自号华阳山人,金坛人。顺治丁亥一甲三名进士,绶编修。有《绥 庵集》。

文殊院

紫玉屏风敬佛筵,诸峰如笏上青天。偶来山寺空无主,惊起白猿松际眠。

春日郊行有感

糁绿嫣红郭外稠, 花开不待客登楼。穗头鹤发黄扉客, 多少青春是梦游。

金陵旧院

锦绣歌残翠黛尘,楼台已尽曲池湮。荒园一种瓢儿菜,独占秦淮旧日春。

叶封

叶封,字井叔,黄州人。顺治丁亥进士,历官兵马司指挥。康熙己未举博学鸿词, 选授工部主事。有《慕庐诗》。

赠别林蜚伯户部

软尘如海汎溟涬,蜃气楼台眩光景。芸芸朝暮轰喧豗,不问公私蛙鼃黾。九逵车马 轇轕驰,盛者炎炎衰者冷。谁其摆脱萦搅缘,解听晨钟梦魂憬。异哉林子独天挺,身虽酬酢 心自静,曩予彊持手版时,窃怪阔迂太孤鲠。逢君相视笑莫逆,谓能潦倒乐与并。狂吟往返 读且赓,贳酒招寻醉还醒。只应方枘成鉏铻,奚有疏观枉见省。言诗今数新城王,顾谓两生 特清警。一人知己古所难,念此胸怀日耿耿。比来俯仰分升沈,依旧从容泯畦町。俄传布诏 徵儒流,谬叨同举惭公等。天庭掞藻旷代稀,我本空疏君暇整。无如刺绣输倚门,何况撞钟 以寸莛。半生夜堕眢井中,一瞬云过泰山顶。嗟乎六忆勿复歌,聊胜五穷竟靡骋。浮湛郎署 犹避世,拥肿支离直县瘻。侧闻阴盛则变常,杞人之忧更怲怲,喟然归去江湖边,愿忍长饥 决幽屏。淡交屈指宁可多,会面为期几何顷。凤翔千仞鸿亦冥,下眂枋榆乱榛梗。滔滔才水 委逝川,落落吾侪终爱鼎。

嵩阳书院简耿逸菴

荒院重开地,周庐益美轮。吾衰期复古,道在信传人。乔木能无恙,今居必有邻。 回思经始日,仅尔薙荆榛。

虚堂远尘累,乐地几朋来。游息无非学,文章亦见才。经行黄叶下,取次碧筠栽。 仁想惟吾友,清心绝点埃。

初夏乐丛开公以诗见招屡期不果依韵酬简

落花随涧泻红泉,浓树和云覆绿烟。玉版可参惟一味,粒松能种合孤妍。将偷闲日 因过院,见买清风不用钱。惆怅幽期频自失,胜情空忆古人贤。

雨后立秋独由寒谿循路听泉至西山寺即事呈开公

愁霖及稍霁,独往听流泉。莲漏寒谿外,松风古阁边。有山须磊砢,无水不潺湲。 得石披襟坐,澄怀一洒然。

如此泉声好,能禁野兴生。空池收滴沥,危石漱琮琤。逝者从观道,清兮可濯缨。 幽期在林樾,取次上

散步逢秋蚤,寻僧到上方。因之开昼定,喜为煮泉尝。庭草绿随意,岩花红断肠。 淙淙幽涧响,盈耳沃清凉。

摊书临断壑,倚槛近斜曛。为爱鸣寒玉,还因诵碧云。松涛兼淅沥,花梵更缤纷。 输尔闲朝暮,经行坐卧闻。

故兴献帝陵在今安陆府城东,本名松陵山。嘉靖入继大统,封为纯德山,尊曰显陵。

桥陵龙升空剑履,榖林通树非观美。骊山冢底凫雁销,青梧树下麒麟委。郢州城东纯德山,郁郁佳城余废垒。寝殿灰飞华表孤,曲渠泉涩朱门圯。生为藩王殁称帝,松柏无烦向西靡。祇怜拱木已尽摧,犹幸前和未遭毁。缅怀建文与景皇,手握乾符作天子。易名莫获及其身,追王偏能尊既死。当时议论争短长,事久终应定谁是。吁嗟竹简出人世,零落蟾蜍盛滴水。一双玉鱼犹宛然,三重铜棺亦徒尔。为君难保不失势,带剑上丘古如此。遥瞻斜照十三陵,尚护闲云暮山紫。天寿山陵,有敕禁樵牧。

愚山至得王昊庐侍读寓书奉答

虽至名山似谪居,顾瞻清禁引华裾。陈情已遂无遗恨,载笔相传有赐书。人立云端 高独鹤,客来秋晚寄双鱼。风尘却愧非仙骨,枉问丹砂叹久虚。来书称嵩有出山铅,服饵可 以长生, 觅之不得。

洛水怀古

讬怨灵妃赋《感甄》,多情玉枕暗伤神。莫嫌泣豆相煎急,蚤与君王作路人。

任文华

任文华,字联璧,号云潭,新乡人。顺治丁亥进士,官广信推官。有《泽畔吟》、 《东园草》、《繁霜吟》、《清商词》。

白露园

曲槛澄潭侧,泉声晓夜闻。竹烟遮午日,山色织秋雯。池静留孤月,人闲对片云。 沧洲原不远,可许与平分。

李昌垣

李昌垣,字长文,宛平人。顺治丁亥进士,历官侍读学士。

瓜洲

新柳近危城,晴波燕子轻。潮声环郭远,春色渡江明。细草烟中密,高林雨后平。 疏篱临曲岸,小泊听啼莺。

孙宗彝

孙宗彝,字孝则,号虞桥,高邮人。顺治丁亥进士,历官蓟州分巡道副使。有《爱 日堂集》。

焦山

落潮泛舸未逡巡,面面青山似故人。殿阁当年悬日月,海天不夜识金银。有情草树留书舍,无限烟波待钓缗。拂袖直须临绝顶,容城古碣亦嶙峋。

同曹秋岳先生游韬光庵和高忠宪公韵

山水灼真意,高深致有余。栋宇蟠天根,恍蹑洪濛初。流泉渟方池,清风洒前除。遂使冰雪心,迥与尘世疏。小住倦登陟,初地供轩渠。檐楹瞰江海,一气镂清虚。洞庭但浩瀁,岂是仙人居。上有纯阳祠宇。岚色幻今古,蟪蛄鸣春秋。纷埃事徒满,所尚高王侯。岳岳怀古人,正气谁与俦。劲节在天壤,不毁同山丘。何来逸情叟,舒卷千载忧。杖履复舟楫,逍遥继寻幽。好诗藏名山,披读起龙湫。梧冈有凤凰,别浦浮野鸥。名德砺公等,终焉吾所求。风云薄岩壑,悚焉不可留。

张九徵

张九徵,字公选,号湘晓,丹徒人。顺治丁亥进士,官河南提学参议。康熙己未举 博学鸿词。

鹤林寺

昨岁逢僧话竹楼,重来惊见雪盈头。杜鹃花老人天梦,黄鹤山空禾黍秋。壁破字随 风雨去,珠还像借鬼神留。夕阳莫漫催归骑,凉月松风好夜游。

己亥钱驭少移居丹阳

翛然一榻此青丘,卧起三年只小楼。山色愁看霜叶晓,箫声空度凤城秋。武陵避世 何知汉,荆土依人不为刘。最喜一星占处士,丹阳郭是古南州。

安南即事

铁骑昆明道, 戈船粤水西。诸君催转战, 天意罢征鼙。象饮蛮江靖, 鸢飞浪泊低。 须知尺一诏, 不异下金鸡。

杜漺

杜漺,字子濂,别字湄村,滨州人。顺治丁亥进士,历官分守开归道参政。有《湄 湖吟》。

寒夜怨

冻草不可结,树寒枝相依。蛾眉夜分明,愁思不得歧。漏远耳转亲,月落心欲危。孤衾光明灭,照见双凤丝。双凤何熠熠,羽毛立离离。回眸敛精魄,悲来还自持。寝兴忽晻暖,息定意旋移。殷勤结良梦,为寄心相知。

宜陵道中

理枻风雨伺,一榻百愁寄。行役苦留连,坚忍独嘘泪。乱去十余年,生聚尚童稚。修垣成芜丛,稻畦变邮置。况乃海东头,官盐属有司。煮盐烧烟青,蝇利翅可聚。三岁潮不至,儵来何赑屃。直捣范公堤,还卤不毛地。河鱼等烹鲜,田蟹亦骨醉。筑堡备潮汐,古人劳远意。大蛇趋其颠,昂颅待人飤。临窟气欲腥,攀崖指已坠。死水与死蛇,梃刃理勿二。天地莽嗟吁,鬼神纷憔悴。上河颇有秋,翼翼禾垂穗。淫淫冻雨缠,秋阳何时晒。昔称全盛日,东南反者濞。隋屠玄感后,攻战互终始。繁华不在野,灾异恒满志。荒疫踵干戈,谅复关人事。把酒问苍冥,涕泗忽淹鼻。

游天童寺道经育王岭观舍利

古寺饶长烟,隔岭见莽苍。舍利传阿育,西晋迹乃昉。人言一尺塔,光明弥百丈。

宝峰聚楞伽,空谷走魍魉。利宾与大权,俨立森供养。溪水皆西流,汤汤绝尘块。天童似儿 孙,群峰作儿襁。松杉如此屋,更出群峰上。天荒破义兴,密公更雄长。妙音胡寂然,使我 失瞻仰。风雨宿山房,夜闻钟磬响。忽洗百年愁,琉璃见精爽。皎月悬一轮,林杪寄真赏。

阅瓜洲城登大观楼望京口

大观楼外俯嶕峣,江静鱼龙昼寂寥。北固钟声寒出寺,南徐草色绿随潮。天临平渚 疑虚敞,人倚危栏欲动摇。叹息伊娄河上柳,六朝烟雨至今朝。

庚子季秋赠别顾宁人社兄之会稽

都门曾诺共之官,恰比前人解后欢。燕颔数奇天壤少,虎头痴绝古今难。布帆送客情何极,木榻留君计尚宽。一柬间关传小宋,禹陵消息去漫漫。

平山怀古

隋宫旧址尽荒凉,一代繁华怨夕阳。清夜彩春啼鸟寂,红颜黄土野原香。星楼涵日 浮空碧,御道连烟入望长。多少兴亡成底事,年年青草满雷塘。

马鸣萧

马鸣萧,字和銮,号子乾,青县人。顺治丁亥进士,历官工部员外郎。有《惕斋诗草》。

惕斋用东坡韵

四时无休歇,过去那堪数。二气自升降,天地亦何语。独坐望云烟,波鸟时高举。 为怜衰谢人,白发剩几缕。支离叹此身,短筇难为拄。况复人间世,霜雪杂风雨。故园枣栗熟,剥落动盈筥。不定若飞蓬,飘猋欠*>及黄土。隐几澹无营,丘壑倘相许。

野处逢岁稔,延赏因时適。君子不素餐,饘粥犹战栗。微尚夙有心,粒食无陈乞。 肃穆躭松径,烟霞满石室。魂梦颇云安,肯教鱼鸟逸。俯仰易为陈,遑论处与出。寥寥此天 地,语笑或可必。

刘玺

刘玺,字尔符,朝邑人。顺治丁亥进士,官乌程知县。有《镰山集》。

秋日杂诗

读书一万卷,不救苍生穷。借问昔所读,今与石田同。露泠蝉不语,草吟乱百虫。时物自迁变,君子忧忡忡。何以缓斯忧,埋之酒杯中。酒边落清响,不知是秋风。醉咏松竹间,萧洒开心胸。

移居小白村

野居无事洛之干,一杖逍遥任考槃。青玉映筐挑马齿,紫云摇壁斗鸡冠。客登秋阁 生毛羽,山向诗人露肺肝。林静月明高唤酒,又听渔唱过前滩。

市烟隔岸四邻静,南北轮蹄路不通。秋色老添黄雀雨,雁声孤堕白蘋风。少陵诗卷 兀相向,元亮酒壶谁与同。犹喜闲闲张仲在,钓竿长伴荻花中。

缪慧远

缪慧远,字子长,吴县人。顺治丁亥进士,官寿阳知县。有《宁斋诗集》。

有感

湘水桃源欲问津,衣冠处处哭秋旻。宁同白马歼朝士,肯为黄巾赦党人。行泽楚臣 应抱石,上书梁狱几全身。惊心南国添缯缴,解网还邀圣主恩。

烽烟海内尚兵鏖,奋袖论才得尔曹。紫塞重弹白翎雀,金门竞奏《郁轮袍》。苍茫 梦里询蕉鹿,浮拍池中把酒螯。长啸独期千古事,咏怀何必《反离骚》。

忆辽左故人

生归何地更逢君, 兰忌当门自昔云。东洛少年无贾谊, 制科风汉独刘蕡。蕃釐种徙琼花绝, 辽海魂啼杜宇闻。箧里故人封事稿, 雨窗检点泪纷纷。

田茂遇

田茂遇,字楫公,号{髟弗}渊,华亭人。顺治戊子举人,授新城知县,不赴。康熙己未举博学鸿词。有《水西草堂集》。

贫交行

古人不贫才不老,个人贫乃伤怀抱。古人结交重青云,今人弃置同秋草。今古人情何太殊,我来仗剑邯郸道。邯郸城中游侠多,邂逅相逢意气好。腰间脱剑且按歌,尊中有酒复倾倒。上堂拜母下揖嫂,与子缝裳复剥枣。君不见古来英雄不用为佣保,叩角行歌石皓皓。

孤儿行

孤儿啼声何凄然,问汝啼何为?长跪答言,父为南海太守,居官清廉,不枉取一钱。鸣驺吹角,大吏巡边,前导到部势喧然。晨报谒,不得前。夕报谒,不得前。急从贩缯者贳缣百联,献之幕府大不欢。曰此邦旧有百斛珍珠船。大吏朝去境,夕拜笺。守此海邦,另择名贤。乌白鹭黑,上下茫然。父羁南海不得旋,客死归黄泉。儿负嫠母,跋涉山川,乞食路间。望见大吏,鸣驺吹角仍巡边,猗嗟父骨归何年。

李贶

李贶,字君右,号书城,潜江人。顺治戊子举人,官丹徒知县。有《含桃轩诗稿》、《百城烟水集》。

答遐瞩

四月江南花已残,却回来伴子陵竿。室营燕垒归犹客,梦渡江涛险似官。长夏疏篱摇老绿,短衣由槛俯回澜。此中著述浑闲事,偏耐幽人冷眼看。

魏学渠

魏学渠,字子存,号青城,嘉善人。顺治戊子举人,由成都推官历官江西湖西道。 康熙己未举博学鸿词。有《青城山人集》。

游祁氏寓园即忠愍沈渊处。

北望首阳巅,黄云愁欲暮。南溯汨罗水,清光渺难晤。我行陟寓山,哲人想芳素。 冈峦互起伏,兰蕙纷无数。亭榭郁参差,夕霞横古渡。的的渌池荷,飞飞汀洲鹭。孤鸟西北来,哀鸣如有诉。风雨眺高原,慷慨《登楼赋》。之子赴澄潭,客徒悲《薤露》。山鬼披萝立,湘娥倚竹顾。人生不百年,喟然怵先露。

赠叶圣野

厨顾今谁在,相逢倍黯然。西台哭自恸,东海蹈谁怜。靡骋悲天马,衔哀讬杜鹃。 芙蓉照秋水,还上钓鱼船。

燕台感旧

宫阙岧峣夕照开,登临是处重徘徊。一行雁影南天落,万里龙媒北极来。芳草萋迷 埋石鼓,寒风萧瑟上金台。因逢燕市悲歌客,贳酒还听画角哀。

魏允枚

魏允枚,字卜臣,号功父,嘉善人。顺治戊子举人。

寄六弟

作客频年惯,今偏忆故乡。老亲能恤纬,稚子解扶床。梦入清宵短,云看白昼长。 愁心逐江水,日夜下浔阳。

淮上送人归睦州

野渡青青杨柳新, 自怜为客久风尘。送君远向严陵去, 七里涛声落富春。

王永命

王永命,字九如,号劬菴,临汾人。顺治戊子举人,官迁安知县,擢行人。有《有怀堂笔》、《松韵堂笔》、《边工漫记》。

和觉老菊花韵

不寄篱边不系阑,远移香气雨花寒。秋深此日题知己,淡淡烟姿醉里看。

焦贲亨

焦贲亨, 字汝将, 登封人。顺治戊子举人, 官瑞州同知。

观卢岩瀑布放歌

峰回绝壁鬼斧折,凿破天门天汉泄。干崖照耀挂长虹,飞流溅沫喷寒雪。须臾幽壑 风飒飒,吹散游丝四面射。我欲翦之作罗裙,鲛人停梭依岚泣。危磴斑斑绣紫黛,蹑屐扪萝 石龛在。洞花摇落点翠林,悬岩颠松皆生态。隐隐谷口处士庄,盈盈碧水洗石床。载酒酣歌 兴未已,玉女峰头月吐芒。

赵三麒

赵三麒,字乾符。武乡人,顺治戊子举人,官泰州同知。有《似园集》。

夜坐有作

明灯倦修夜,清言谁与晤。虚牖响悲风,寒月出高树。凄凄四野鸿,矫矫云中鹜。 岁月漫迁徂,此生却虚度。归养计未成,徙倚伤迟暮。

听琴

凉风宜晚集,灯火夜堂沉。吴客鼓《兰操》,临风写意深。露桐应下叶,秋鹤欲投 岑。此调久沦寂,闻之开素襟。

衡山

嵯峨南尽楚江天,七十余峰路几千。铜柱挂云堆汉表,祝融看日起山巅。金书玉简 从谁得,石鼓朱陵不似前。极目衡阳千万水,每闻鸿雁一凄然。

毛蕃

毛蕃,字稚宾,嘉善人。顺治戊子副贡。

镜听词

匣中古镜青铜蚀,持向灶前重拂拭。敛衣载拜前致词,夫婿一别无消息。古镜千年 会有神,重问归期真未真。山川险阻虎豹聚,丁宁细向镜中诉。拜罢回头窃自伤,绣带菱花 什袭藏。他时夫婿重相见,更与摩挲祠灶王。

关山月

紫塞秋风劲,黄榆玉露寒。可怜今夜月,还在异乡看。画角声偏惨,刀环梦已阑。 城头回首望,衰草白漫漫。

多宏安

多宏安, 字君修, 号畏庵, 阜城人。拔贡, 历官江西布政使。

石湖

暇日蹑双屐,探幽到水滨。风光梳岸草,莺语醉游人。棹破一天水,花明万树春。 湖山需佐理,丘壑见经纶。

【卷二十五】

吴正治

吴正治,字当世,号赓庵,汉阳人。顺治己丑进士,改庶吉士,授编修,官至武英殿大学士,加太子太傅。谥文僖。

种竹

退食少尘事, 疏篁愜远心。门无俗客到, 时有暮蝉吟。密叶侵阶绿, 幽香入阁深。 那知炎暑厉, 移榻就清阴。

张天植

张天植,字次先,秀水人。顺治己丑一甲三名进士,授编修,官至兵部侍郎。有《北游草》、《湖上偶吟》。

岁暮途中即事

有云依北近,无雁寄南还。野阔孤烟直,村虚独树闲。才名消岁月,穷达半关山。 从古英雄迹,浮沈行路间。

望医无闾山

驱马遥看古岳前,疏林黯黯下寒烟。日衔双塔倾西向,雪拥群峰拱北悬。地发玉膏 开汉土,天垂赤简纪尧年。名山阅尽兴亡事,铁马金戈落照边。

王清

王清,字素修,一字冰壶,号思斋。海丰人。顺治己丑进士,改庶吉士,授编修,官至吏部侍郎。有《留余堂诗稿》。

南镇会稽山

稽山遥接越天低,宛转峰峦路欲迷。青霭常浮秦望北,白云却绕禹陵西。即看修竹 含新雨,无数苍松罨碧溪。真气重重吹不散,神灵自合此中栖。

郝浴

郝浴,字冰涤,又字雪海,复自号复阳,定州人。顺治己丑进士,授刑部主事,官至广西巡抚。有《中山集》。

吊明蜀抚军葆一张公

崇明昔遘乱,明纲犹未委。岂无心膂臣,徵兵及蛇豕。驾驭宁尽乖,天地合疮痏。蜂动翕百蛮,流血殷渝水。灿灿芙蓉城,旦夕将摧圮。公持霜斧出,椎牛誓介士。挞发固有威,忠孝亦有理。遂令执殳众,感激厉廉耻。复城二十七,恢地二千里。至今溪峒中,谈公犹系齿。再有邦彦乱,永宁尽贼垒。公膺节钺来,将卒六千耳。歼灭十万寇,迅若扫浮蚁。距今三十年,蜀运未休否。献逆扬其波,群盗纵横起。强壮膏郊原,老弱委泥滓。鳞鳞万家邑,化作榛与藟。晦晦千顷禾,鞠为稂与秕。浴也叱驭人,志在遵前轨。遗民一何寡,交以生为累。蜀吏一何弱,争以黜为喜。吏民亦人情,致此良有以。师行动以万,邑民百十止。岂暇事耕耘,不足供驱使。况复滇黔间,伏莽丛奸宄。永宁未遽入,渝城师暂已。赖有保宁捷,经略从兹始。公当明祚衰,建竖伟若彼。予当清盛初,匡济仅如此。明明忠荩业,胡为逊君子。丰碑吹作尘,蔓草迷祠址。聊采故老言,题诗付青史。哀哀巴渝人,公在尔不死。

同王无烦游石氏祇园

侧身双树入,花气浣衣裳。不道千年雪,融成百合香。落红嫣小筑,凝翠湿回廊。尚有安巢燕,呢喃问觉王。

金谷分明在,相看作化城。青山如假寐,飞鸟自呼晴。花灿阳春笑,松流大壑声。 幽情谁复憾,况共虎谿行。

刘子壮

刘子壮,字克猷,号稚川,黄冈人。顺治己丑一甲一名进士,授修撰。有《屺思堂

诗集》。

送别次侯学士

风静天高落木悲,轻车羸马望南驰。愧深玉署曾联辔,夕照师门忆共卮。近日文章 谁与语,别来期许慎相思。经过傥遇真英俊,莫惜音书报我知。

答詹柔尊

醉君江上阁,风雨闇然春。忽作十年别,几成异世人。得书如面见,赠句以情申.遥 羡湖烟里,能于鱼鸟亲。

秋怀

大河以北近京畿, 昨岁荒凉客解衣。疲骑穿城白昼静, 春林巢鸟路人稀。黄沙古道 吹风雪, 蔓草寒庐闭棘扉。汉帝于今尊卜式, 柏梁应笑露台非。

富池口

初日沧江宿雨醒, 乱山无数一峰青。锦帆宫馆灰飞尽, 几点寒鸦送客舲。

熊伯龙

熊伯龙,字次侯,汉阳人。顺治己丑一甲二名进士,授编修,历官侍读学士。有《贻 穀堂诗集》。

重修晴川阁

雕栏玉柱入长空,槛外帆樯万里通。春水远来巴子国,雄风高压楚王宫。凤凰欲下箫谁引,鹦鹉无言赋独工。直拟凭虚驰八极,云霄何日羽毛丰。

送宋牧仲下第归商丘

祇为秋风续楚歌,天将宋玉故蹉跎。承家不在科名早,落第真如噩梦过。怀有双珠 泣白日,囊余一剑渡黄河。羞称献纳空挥泪,皤鬓萧萧木叶多。

曹本荣

曹本荣,字木欣,号厚庵,黄冈人。顺治己丑进士,改庶吉士,授编修,历官侍讲学士。

杂咏

卢橘新传罢汉中,尚衣闻道减花绒。诸州节使休蠲助,圣主清心在合宫。

方孝标

方孝标,原名玄成,避圣祖讳,以字行,号楼冈,桐城人。顺治己丑进士,改庶吉士,授编修,历官侍读学士。有《钝斋诗选》。

答吴汉槎借读通鉴纲目

可与言今古,荒边只有君。赋诗能渐朴,观史不徒文。我已中年后,心难强记分。 幸将成败理,抉要与同闻。

胡天汉日月,宋代鲁春秋。彤管当年笔,牙签昔日楼。行厨原自富,腹笥更相谋。 茅屋清镫意,宁徒慰旅愁。

妾薄命

花冷御沟烟,春风影自怜。君心才易地,妾命遂占天。新法严霜立,深恩皎日迁。 但求中外事,一一竟宁前。

白头吟

爱妾非徒貌,怜郎不在琴。如何才子意,亦若世人心。犊鼻忘当日,凰音悔至今。 始知秦氏女,真识使君深。

依韵和鞠存

此生何意有归舟,风雨江山涕泪收。蓬径特缘求仲扫,剡溪应为戴逵留。百年摇落甘三己,五岳踟蹰拟《四愁》。人世几回堪聚散,肯教离别易沧洲。

楼暄

邻园远岫列平原,争带晴光拥荜门。镇日窗凝春气满,小楼人重夕阳温。吟声金石 高能出,世面风霜静者尊。知是天心怜范叔,绨袍尽典不须论。

柯耸

柯耸,字素培,号岸初,嘉善人。顺治己丑进士,授知县,历官通政司左参议。有《霁园诗》。

西谿小筑

卜居西郭半村中,几曲清谿一棹通。度壑钟声萧寺外,穿林塔影小楼东。树因初植 偏宜雨,竹自新移却畏风。倦起偶来松下坐,农歌处处属年丰。

出都留谢台中诸公

离亭箫瑟动秋风,帐饮青门夕照红。八月仙槎秋水阔,千家碪杵暮烟空。河梁惜别 存知己,海内论交有数公。乌鹊南飞浑不定,啼声还似柏台中。

王广心

王广心,字伊人,号农山,江南华亭人。顺治己丑进士,历官御史。有《兰雪堂稿》。

大梁行送林平子

燕山四月槐雨凉,酒徒击筑官道旁。骊驹欲鸣惨将发,为君慷慨歌大梁。大梁昔当全盛日,裂土苴茅建宗室。魏殿旌旗斗北翻,汴宫花石城东密。定王宪王皆好才,樊楼窈窕东堂开。诚斋旧帖龙文写,乐府新题凤管催。黄河如带萦天阙,舞榭歌钟几时歇。兔苑宾朋白雪尊,鹍弦士女金梁月。中原千里接神京,叔父勤王更勒名。鸡犬愿随淮桂老,鱼龙忽厌蔡河平。一朝风雨金隄决,杀气苍茫鼓声绝。龙章十叶赤帝孙,却立铜人水中没。沧桑变易八九年,我来欲渡愁无船。宫阙崩颓半深泽,狐狸踉跳空荒烟。偶逢遗老驱豚出,端礼门中招共入。银楼藻井荇带穿,玉殿鸱头土花涩。因言此殿西北隅,飞廉九仞凌清虚。浊河波浪埋不得,依稀绣栱临椒除。我登兰雪轩,更倚端清阁。空梁天矫堕盘龙,古柏阴森少调鹤。下寻石洞风翛然,黄尘不到秋花鲜。云英既死梵镫灭,谁从此地求神仙。呜呼此景当年识,近日传闻更萧瑟。华栋都输少府钱,碧甍尽入空王宅。河山君到莫重论,艮岳吹台总不存。但得晴天看少室,短衣落日过夷门。

潘山人至自辽左得季给谏消息

塞外潘生到日边,满朝惊喜帛书传。王修负担真千里,季布髡钳竟隔年。华表鹤归愁自语,纥干鹊下冷相怜。知君醉后攀牛角,一种先皇鄗上田。

短辕一哭去长安,铁岭金州道路难。搔首有天垂北斗,断肠无客对南冠。管宁木榻 经秋破,苏武群羝落日寒。那信圣恩思直谏,画图别苑两回看。

直方夜过忆卧子谈诗

偶逢宋玉过西邻,把酒重论故国春。一榻早悬陈仲举,《九歌》亲授屈灵均。衣冠 白社沈秋草,宾客黄初散洛尘。醉里寒星空自数,天门骑尾竟何人。

寄怀张鞠存年兄

黄叶秋蝉忽满林,客愁况是别离侵。张骞槎去明河隔,贾传书来痛哭深。渐有清霜 浮画角,更无流水入瑶琴。谁怜此夜淮南梦,丛桂青青露不禁。

城南别业近何如,白板双扉暮色虚。秋草不知王粲井,画桥犹记伯通居。湘帘对酒明镫夕,木榻弹棋听雨余。不信阑干苦相忆,倚来愁绝雁行疏。

岁暮送孝持

读书台畔钓鱼矶,彼美谈经过竹扉。羽扇才名三俊重,乌衣子弟六朝非。云生枳棘 鸾偏集,霜扑蒹葭雁欲归。莫道春风开径早,岁寒心事隔年违。

送荔裳

上客征帆昨夜过,江村风雨别愁多。东山自慰苍生望,郢市空怜《白雪》歌。野寺 开樽栖鹳雀,空梁拨棹散鼋鼍。承明到日应前席,须话桑田总逝波。

飘零十载阖闾城,酒后悲歌白发生。却为雷霆思帝德,偏从鸟雀话交情。青云启事才名重,画鹢趋朝羽扇轻。早望故人喧列戟,东南紫气有逢迎。

赠别澹归和尚

身世飘零梦屡更,云山只抵一尘轻。曾求铁汉楼边死,偶向金吾杖底生。野寺梅花窗窈窕,空林杜宇路凄清。谁怜海鹤心无系,又挂蒲团得得行。

尚书墓道行

茸城北郭清明路,士女提壶拜坟墓。纸钱飞尽浊酒乾,还向落花深处坐。杨柳阴阴 栝柏晴,尚书墓道满啼莺。牲碑滴露行人泪,石马嘶风故国情。老人指点为余说,尚书百岁 高清节。第宅张苍赐予隆,丘山郭泰呼号切。宰木无端又百年,根株蟠亘叶相连。祠荒蜀相 春应老,剑挂徐君树可怜。子孙繁衍如嘉木,玉树琼枝代相续。翦伐谁忧召伯棠,青葱不改 莱公竹。蹉跎奕世有兰孙,二俊才名众所尊。贫贱那知公子贵,衰迟偏受少年恩。配边万里 哀笳急,木叶山头对相泣。苏武丁年鬓已非,钟繇丙舍嗟何及。军纸抄家尽赐庄,墓田门帖 更凄凉。十围老柳千寻柏,官吏商量到北邙。匠石操斤仰而立,小者为薪大论值。昔日马下信陵坟,今日牵牛到家石。鄂君飞鹢正抡才,南国楩楠岂在哉。轮囷生为华栋用,松楸死作济川才。昨日三江秋水阔,木兰檝戒沙棠发。青雀舟中有白云,麒麟冢上无黄叶。荒隧西风 我重过,石人瞪目雨滂沱。君不见燕昭墓表千年木,既遇张华可奈何。

唐梦赉

唐梦赉,字济武,别字豹嵒,淄川人。顺治己丑进士,改庶吉士,授检讨。有《志壑堂集》。

祈雨茶话

荷笠先传樵客知,蜗居如甑出休迟。城阴黄鸟穿林早,驴背青帘过市低。偶尔清斋堪噀雨,无端高咏忆围棋。只愁十日淫霖苦,双蟹朋尊欲自携。

念东先生东池见招有作

疏傅归来酒政宽,黄金日日买清欢。平泉不作儿孙计,世界原如缺陷看。固有镜湖

归贺监,曾闻微雨过苏端。敢云二老同时晚,来往风流后正难。

济上留别朱野岩

湖上红衣摇落时,闲亭竹树寄芳卮。青门射策人皆老,碧岳寻真事已迟。别岸蒹葭 留晚照,前溪箫管动离思。《阳关》入破声声慢,知共琴樽更有期。

过故人旧圃

十年涧壑共栖迟,往事衰凉有梦知。月照清尊行命酒,秋分霜叶坐题辞。鸣泉初引成渠日,竹树新栽见长时。一自山丘零落后,闲亭无复水平池。

座间和念东先生

柳浪捎檐泛曲尘,相逢一日罢樵薪。谁知羯鼓催花者,总是芒鞋访道人。大笑倮虫皆奇客,偏宜野鹤似闲身。龙华盛会吾徒在,莫待僧瓷话宿因。

顾大申

顾大申,字震雉,号见山,江南华亭人。顺治己丑进士,历官工部郎中。有《鹤巢 诗存》。

登高丘而望远海

轩皇且战且学仙,桥山弓剑攀龙髯。吁嗟政彻不及此,扶桑沧海空青天。沙丘之云茂陵树,万弩射鱼气张怒。童男未返青雀遥,银雁金凫起泉路。琼田草不死,蓬莱尘不飞。丹丘灵药如可致,千秋万岁讵相辞。汾阴宫,琅琊碣,石麟秋草莽萧萧,铜仙望断咸阳阙。不见当时九鼎我,鼎湖云气时明灭。

薛城

我登古薛城,四望长太息。此地孟尝君,鸣钟会食客。西撼虎狼秦,陵原群失色。 再相绾齐组,万家张封邑。长铗鼓幸舍,狗盗揖左席。一朝归山丘,车骑散敌国。春秋祀忽 诸,百战荒荆棘。歌台嗥狐狸,野人烧冢域。谁抱雍门琴,弹之万古宅。

雪后登歌风台

一剑收秦鹿,秋风万里心。悲歌谁掩泣,壮士已成禽。井邑新丰旧,龙蛇大泽深。 残碑埋野戍,雪后此登临。

送纪伯紫入闽

裋褐科头故国遗, 五言新体旧京诗。多情愁对青谿柳, 老向南荒擘荔枝。

玉帐牙门异昔时,怜君万里赴戎机。渡江裘马多零落,今日参军尽布衣。

送沈绎堂编修迁大梁道

鼓角北风凉,双旌入大梁。十年悲瓠子,万马散敖仓。少府新沈璧,中原古战场。 君行能卧治,未许薄淮阳。

出平定州

忽尔危关豁,群然众岭低。山连雁门外,地出井陉西。乱石淹人迹,层冰怯马蹄。 相逢故乡客,镫下手重携。

始发良乡

上马频倾惜别杯,蓟门西去亦悠哉。地随督亢依山尽,河控桑乾入塞来。老去尚能持汉节,时清应不重边才。冰霜渐迩君门远,东望长安首重回。

秋雨移酌栎园舟中

云满东山急雨霏,移觞对酌两依依。荒城野戍鸣秋柝,海峤孤臣冷葛衣。醉后玄黄 镫半烬,尊前风雨雁初飞。君看丰沛笙歌地,昔日高台今日非。

吴亮中

吴亮中,字寅仲,号易庵,嘉善人。顺治壬辰进士,授户部主事,历官员外郎。

邗关夜步

千家镫火映红妆,九市笙歌沸月黄。散尽斗金人未醉,拨残银蜡夜偏长。帘深岂信朝迎旭,烟暖由来晓不霜。从古骚人潦倒地,独惭顾况更清狂。

发渭门宿茶喜滩

连山草木繁,横纵始锄葺。乱离二十年,亲故不复集。榛莽袭衣裾,谁能辨井邑。结茅汉之崖,绠短亦可汲。云深日蠓曈,作息随出入。种菽在冈原,种麦在阪隰。麦生山彘 多,况复官租急。

成亮

成亮,字寅天,号伾岚,大名人。顺治己丑进士,改庶吉士,授编修,迁户部主事。

村居

秋入村居卫水新,萧萧踪迹迁荆榛。桑田有政供吾课,盘味无兼爱客频。风雨匡床

堪豹隐,云霄枯木半龙鳞。朝朝晚起无多事,课子横经懒不嗔。

王庭

王庭,字言远,号迈人,嘉兴人。顺治己丑进士,历官山西布政使。

雨后

落日残雨余,林树半昏黑。南山白云闲,澹然见秋色。冷风何凄凄,微微野烟息。 归巢鸟更鸣,当户虫还织。惆怅独坐时,悠悠思何极。

秋雨遺怀

抱病身独闲,起行日云晏。萧条空林中,靡靡秋雨遍。残叶踏饥禽,荒村吠寒犬。虚室静琴书,闲阶冷苔藓。欲愁生计疏,还嗟世情浅。自適在丘园,匪能薄轩冕。悠悠岁月深,闲情谁当遣。

送裙君培

夕阳送君去,浩歌成独还。君来山窗下,竹石如我闲。众鸟自栖息,月明溪水间。 柴门复谁待,呼童方闭关。

所思

所思竟惆怅,夜寒风雪深。嗟君重离隔,感此孤旷心。将以路云远,幽梦能见寻。 翩然发清兴,为我弹鸣琴。柴门宛如昔,相送在南林。共言别来意,日暮愁邻碪。

栈道中作

人行山上高,天在山中小。圆晖易沈夜,初阳迟报晓。马走山树巅,飞鸟出其下。 云连深洞迷,石缺危桥架。七盘非险途,三秋足清景。日夕留泉声,谁能辨喧静。

潼关

关门高锁处,飞鸟不能过。雉堞连群嶂,风烟俯大河。代更千战少,势在一夫多。 入夜闻刁斗,军声壮若荷。

晓雨

独鸟鸣南园,晓来雨初息。空庭生秋阴,莓苔长寒色。

董文骥

董文骥,字玉虬,号易农,武进人。顺治己丑进士,历官甘肃陇右道。有《微泉阁

集》。

故关

神都西北界,天险设故关。连山千里来,微径线缕间。断崖刺天仄,金城本堑山。 崇墉冠其缺,雉堞纷回环。入谷骑拥塞,缘云鸟飞还。一夫荷长戟,百万未敢攀。白梃昔奋 呼,来去无险艰。防虞此何及,守在羌与蛮。

缘无定河行

昔闻无定河,远使河之涘。源自大荒来,浊浪吼千里。奔流何湍悍,颓沙性善徙。 地是古战场,四顾悲曷已。其窟涨征魂,貂锦三千死。时清无战骨,水寒终北鄙。磨刀刀未 莹,饮马马不喜。一望塞垣深,九月边风起。归渡会冰坚,悲哉宦游子。北首溯河源,怨此 南流水。

和吴学士梅村送王元照

故国重来客蓟门,宣和遗迹一无存。白头只索《丹青引》,文彩风流旧子孙。

暮抵蒲城望余雪

秦山雪后看,余雪半峰寒。马色斜阳尽,车声古道乾。金城悲麦秀,玉殿想云端。 暮鸟归飞急,王程尚未安。

骊山温泉

山上千门山下池, 玉环何处洗奚儿。野人分得温泉水, 菜甲红于锦荔枝。

三月廿二日汾阳道上见梨花折得一枝口号

东风远到晋山迟,三月梨花始放时。雨里粉痕殊郑重,月中空色共迷离。待人雪夜寒无粟,骑马平明淡扫眉。九十春光故园外,乡心客眼寄琼枝。

题长平驿壁

上党南来狼孟城,连山地险不利兵。鼠斗穴中勇者胜,父书能读徒空名。赵王何愚赵人哭,国中壮士尽长平。土花血碧拾金戟,战场处处今人耕。已降杀尽为鬼雄,前有锐头后重瞳。杜邮之土乌江水,剑且赐兮船自,六十万人含笑死。

北邙山

陟彼北邙山,累累满昔贤。松柏摧为薪,原陵犁为田。石马卧秋草,玉鱼出下泉。 而况洛城内,歌舞化寒烟。燕赵有佳人,蓬莱有神仙。一笑轻千金,一丸驻万年。

复过井陉口淮阴侯庙

背水千年庙,登坛百战功。至今思赤帜,何处吊藏弓。春雨王孙草,灵风古木丛。 淮阴年少子,终自笑英雄。

真定客舍对雪

穷阴满太虚,积雪冻庭除。鸦点埋云树,童依宿火厨。君恩狐白厚,老病酒杯疏。 江国寒梅早,垂垂已待予。

庚戌元日移家惠山舟中作

东风自信片帆斜,百里乡园路岂赊。爱听山泉因煮荈,并驱鸡犬似移家。未闻春鸟来樯燕,已见寒梅笑岸北。万国朝正看北极,十年拂雾马歕沙。

去年元日弃孤臣,赵北燕南滞病身。八口一舟迁易散,吴山楚水信难真。即看妻子 还疑梦,高卧江湖又早春。只恐莺花饶笑我,拂衣斑鬟已如银。

周体观

周体观,字伯衡,遵化人。顺治己丑进士,改庶吉士,历官江西参议道。有《晴鹤堂集》。

赠陈伯玑移居

重开三亩宅,环堵正相宜。花落春城晚,人归故园迟。鉴湖原是曲,邻笛为谁吹。 独踏庭前月,依稀授馆时。

秦笛仙赴岳州两梦见之

薄暮轻为别,扁舟去渺然。干戈南国外,雨雪大江边。信宿行应远,登楼望独悬。 春来能几日,客梦益相牵。

周茂源

周茂源,字宿来,江南华亭人。顺治己丑进士,历官处州知府。有《鹤静堂集》。

苦寒

我行適南服,絺绤生微凉。山川倦游览,草木多陨黄。商飙一以至,莎鸡鸣我床。 弭策且延伫,驹隙殊未遑。谁云瓯土燠,重纩无严装。坚冰既已合,宁独惊履霜。薄帷障虚馆,墐户鲜闭藏。中夜不成寐,揽衣起徬徨。游子倦行役,岁晏思故乡。虽复群动息,万籁增感伤。噭噭云中雁,天风吹枯桑。

寒夜饮董阆石斋沈醉而归因以自嘲

积冰盈四衢, 言赴江都约。座中四五人, 顾盼皆英倬。主人兄弟贤, 爱客善谐谑。 周生本不羁, 忽尔过三爵。惛惛弄明琼, 卤莽呼凿落。华镫吐焰微, 霜月逗帘箔。夜分客未 散, 都觉鼲裘薄。屣履下阶来, 一醉忘酬酢。空负拍浮名, 不复胜杯酌。岂意仆射酒, 竟类 羊公鹤。

天目禅师自仙岩枉过旅馆

绣佛清斋久,微尘拂镜台。拟参龙井去,翻度虎溪来。月色诸天净,潮音五夜回。 片言闻了义,花雨落莓苔。

玉华洞

寻山玉洞幽,缥缈上飞楼。冷翠常疑雨,空岩总似秋。石坛延鹤驾,云海望麟洲。 款段依乡井,真嗤马少游。

暮抵汀州诘旦与成子分道

暝螟方停辔,劳歌易感伤。怪禽樗社里,孤犊火田旁。淡月啼螺女,阴风舞蜃郎。 那堪同旅别,明发尉佗乡。

赣江舟次

双流移棹促,篷底乱山斜。细雨红蕉叶,轻风白葛花。客行滩路惯,愁对楚江赊。 闻道青原近,无由访鹿车。

舟泊钱塘

津亭极望海门遥,水国轻寒夜沉。隔岸青山神禹庙,中流白浪伍胥潮。春星万点 连渔火,宿雨兼旬变柳条。咫尺桐江图画里,牵舟无奈石尤骄。

春日过桐庐晤张无近

离情犹忆蓟门花,邂逅津楼感鬓华。绣岭春深红乐润,晴江涨后白鸠斜。迟迟拄笏 看朝爽,历历挥弦对晚霞。为问桐君仙宇近,玉潭几处满丹砂。

旧山

旧山无恙挂烟萝,此日传烽竟若何。笳鼓江关屯虎豹,楼船海国混鼋鼍。千重锦树 浮云暗,满目寒松落照多。愁绝正逢南客至,乡心细与问渔蓑。

怀季天中给谏

迁客音书隔岁回,穷交万里塞垣来。短裘射虎阴山暮,霜管题诗独石开。辽海沙寒 沈剑珮,淮南木落隐楼台。关门生入应青鬓,不待班昭疏屡裁。

去年徒跣出都城,洒涕呼天送尔行。汉苑莺花虚谏草,燕台风雨作商声。马湩羊酪 愁颜老,短笛悲笳旅梦惊。山水乌丸称绝丽,画图何似玉泉清。

秋杪坐雨柬苍水

登临萧瑟最愁人,况复穷秋雨浃辰。帘外扫花芳径滑,渡头沽酒夜潮新。西林小鸟 归红树,南浦轻鯈上白蘋。料尔闲居应有作,羊何宁厌往来频。

苍玉洞

郊行十里碧湍隈,缥缈苍岩见玉台。石作莲花疑华岳,山移银阙近蓬莱。仙人月夜 骖鸾过,游女晴春拾翠来。却恨斜阳催客骑,无由道左一衔杯。

过陈黄门墓

碧血当年溅铁衣,犹余蒲首入泉扉。草深断碣眠香麝,花落空山叫秭归。夜雨灵旗尝自出,秋风石马竟何依。大招拟赋还停笔,挂剑潜来恐是非。

赠总宪龚芝麓先生

楚江涵远润,衡霍动灵光。哲辅乘时出,醇儒翊运昌。卿材三策秘,帝眷九迁良。 绛灌功难并,夔龙让未遑。殿前推执法,海内颂惟康。久缺埋轮使,仍多题柱郎。谁人持国 纪,特与励官方。密勿来申命,訏谟足大匡。中丞亲佩印,副相独登堂。文采兰亭聚,棱威 柏府彊。朱轩排晓雾,白笔丽秋霜。斗自驺幡解,邪因廌角藏。格天封事切,名世表仪庄。 班剑连珠舄,微镫映紫囊。鲍宣怀直亮,熊远著清刚。峻若盘雕鹗,祥犹集凤凰。读书还见 士,授简更飞觞。俭匪菑川被,贫逾蜀郡桑。黑头公望重,黄发寿朋臧。蓬矢今初度,缇灰 恰肇阳。莫穷薰草历,无算吉云浆。玄鹤金庭迥,丹蕖玉井凉。上尊膺秬鬯,仙乐播笙簧。 一德真同泰,祈年衍庆长。

锺明进

锺明进,字子佳,号伟韬,长兴人。顺治己丑进士,历官惠州知府。有《两粤吟》、《南园集》、《燕中草》。

郁林除夕

旅中岁月恨淹留,此夕偏惊断梗浮。鼙鼓山河烽未静,梅花村落笛多愁。不堪腊尽 悲霜鬓,又听更残报晓筹。万里乡心何处达,梦归犹恐过廉州。

张三异

张三异,字鲁如,号禹木,汉阳人。顺治己丑进士,历官绍兴知府,有《来青园集》。

美斯桥步月

秋尽寒碪急,溪光上客衣。人烟和露冷,野色衬霜辉。竹远敲风细,林深逗月微。 渔翁贪共话,忘却掩荆扉。

夜泊危家渡

白露凝帆冷,钟声出寺南。月华穿曲径,山翠落深潭。舟泊云同卧,镫残酒半酣。 纵多愁绪在,不敢负幽探。

程云

程云,字天翼,莱芜人。顺治己丑进士,官孝感知县。有《松壶集》。

徂徕

不争岱岳尊,所隔犹尺咫。面面成一方,百有六十里。五汶夹之流,不然滔天起。 孙石读书台, 岩崿不容趾。至今竹溪存,千载思高轨。矧其对衡门,朝夕互青紫。或言采昌阳,可以延年祀。饮酒不暇仙,终焉聊复尔。

秋日赴饮田家

曳履行徐徐,秋老一望白。到门槐柳合,入门踏牛迹。罗坐斗室中,瓜蔓上屋脊。田夫礼貌恭,欲言笑哑哑。今年幸薄收,所余一斛麦。贫家无酿法,苦酒如黄蘗。稚子挈壶出,短几不盈尺。可以采园蔬,枣熟亦堪摘。是时山雨过,微风入篱隙。向夕石路滑,归家借袯襫。

朱不凡醉绿亭

东隅亭子秋尚酷,茂林繁露湿朝旭。早起科头过板桥,凭阑澹寂恣遐瞩。老藤化石 骨峥嵘,古螺吸水苔衣绿。携来几卷陶柳诗,僮子为我沽醽醁。

挽王禹符

谁为铭墓石,欲泣已无声。吾党论兄弟,斯人见性情。夕阳孤树直,寒月短碑横。 垂白双亲在,九原恨未平。

东蒙秋日

九日易为风, 凄其远望同。碧山分雪白, 黄叶变霜红。客梦初闻雁, 乡心久忆菘。 祇今将改岁, 何以谢东蒙。

送还雅

孤馆何淹滞,兼逢世难中。秋深终一别,日暮暂相同。客路沙边雁,人家岸上枫。 甲兵犹未戢,消息可能通。

郭同年冰湖道过孝感

咄咄吾兄弟,除官似逐臣。孤帆临百粤,万里背西秦。薄海威无敌,穷荒僣未宾。 安能久抑郁,去住总悲辛。

涉汶

九月徒杠少,褰衣及半途。岸容高自出,云影澹如无。白发心先冷,清秋兴愈孤。 道傍驰马者,应不识潜夫。

驱驴行不进,延伫立沙汀。两岸芦花白,一行雁影青。抵家惟数里,薄暮已多星。 祇有田家乐,柴门早自扃。

往东村

不为省秋稼,何尝欲出门。斜阳留一岫,疏雨隔前村。枣尚垂荒陇,桃应落故园。 及时争刈获,野老领儿孙。

客历阳成同年率菴忆初园中秋酌桂

叠石为山暮景寒,扶疏绕径此凭阑。百年月在尊前出,千里人来雨后看。手泽不忘 桑梓敬,鼻观岂受木樨谩。拂衣早遂初年志,难种江皋续蕙兰。

谢泰

谢泰,字汇征,号建侯,大兴人。顺治己丑进士,官竹山知县。有《蓼集编》、《客中吟》。

从军行

月在人千里, 君从月下行。不知君远近, 惟见月分明。斜汉垂秋淡, 寒蛩泣露清。 征旗何所往, 疑听夜笳鸣。

陈丹赤

陈丹赤,字献之,号真亭,闽县人。顺治辛卯举人,历官浙江温处道。殉难,赠通 政使,谥忠毅。有《客吟草》。

晚泊乍雨

一叶临孤岸,微茫烟雨中。涛声都带白,霜叶渐留红。雁影拖残照,渔镫映彩虹。 阴晴浑未定,身世讬飘蓬。

赵吉士

赵吉士,字天羽,号恒夫,钱塘人。顺治辛卯举人,由知县历官户科给事中。有《万 青阁自订诗》、《新又堂诗》。

赠吴田吴慎先

人不得其真,举动多踡跼。所以古达人,任天无羁束。我独重吴公,本来轻宠辱。 数亩傍清溪,分种秫与粟。户外橘柚香,窗中峦岫绿。叩扉素心人,一尊醉醽醁。安居无所营,澹者乃知足。

柯城送任交阶还阳羡

竹舍青镫漏未沈,夜寒先入旅人衾。一帘烟雨难为别,千里江云共此心。意尽还闻 岩半啸,曲高止作郢中吟。莫愁我辈长贫贱,爨下枯桐有赏音。

欲归

暮角吹斜鬓, 菰莼佐客饔。云移新雨月, 霜敛近秋松。谷口清岚染, 岩尖紫翠缝。 欲归归未得, 残照曳疏筇。

戴田有归江南程香升入幕秦中别后登楼玩月乡思转深

墨香萦涤砚,入座愈清辉。韦柳真诗在,求羊好友稀。楼高孤月伴,石古乱蓁围。 年老难成寐,家园无梦归。

姚文烈

姚文烈,字觐侯,号屺怀,桐城人。顺治辛卯举人,由推官历官楚雄知府。

别友人

三春朝夕感殷勤,又看榴花隔院分。惜别江淹才有赋,送穷韩愈久无文。轻风紫燕 高低出,永日黄鹂远近闻。尊酒不堪长啸傲,湖山烟水惜离群。

谢天枢

谢天枢,字尔元,号星源。侯官人。顺治辛卯举人,官庆远推官。有《岭外集》。

重九偕许有介山居读书

数茅结似老僧关,四面青光落古颜。闲我两人当九日,读残半卷暝千山。天平秋气 绿菰外,客瘦夕阳黄叶间。风雨满城听未得,此中高卧不知还。

戴宏烈

戴宏烈,字山民,号镫岩,桐城人。顺治辛卯举人,官成都知县。有《朗琯斋集》、 《西岳游草》。

同黄子正出居庸作

偶谢承明去,聊为塞上行。千山横朔气,万马动边声。上谷风沙暗,渔阳鼓角鸣。 江南庾信在,萧飒尽平生。

九江

戎马疮痍已十年,浔阳灰劫倍堪怜。水分九派涛声阔,山抱孤城塔影悬。野烧荒原 衔落日,秋风废垒起残烟。萧骚此际江州客,一曲《琵琶》意惘然。

怀孙大振公云间

卧病荒村叹索居,故人怀抱近何如。一时湖海交游尽,千里河山战伐余。夜雨空庭 常对鹤,秋风古渡正烹鱼。遥怜有客飘零久,不寄征鸿尺素书。

邹山

邹山,字宏景,号禹封,天门人。顺治辛卯举人,官玉山知县。

初闻罢官

到今方赐罢,执政恕微官。覆局终何定,才休便已安。旁人为削色,稚子羡加餐。 正好赋归去,《移文》报北山。

宋实颖

宋实颖,字既庭,号湘尹,长洲人。顺治辛卯举人,康熙己未举博学鸿词,官兴化 教谕。有《读书堂》、《老易轩》、《玉磬山房》等集。

八月十八日观潮

头白镫明急管催,高楼晴槛倚江开。潮声夜静千帆转,断岸风回万马来。吴越山川 供醉眼,古今天地独登台。九秋萧瑟谁堪赋,滚滚词人庾信哀。

和钝庵岁暮杂感

年少才名也自雄, 老来城北半飘蓬。闭门种菜浑闲事, 输与人间霹雳弓。

五十谁能读五车?《黄庭》《白帖》任冬余。江门老子诗偏好,只对青山不著书。

邱履程

邱履程,初名广生,字鸿渐,成都人。顺治辛卯举人。

寄费二参军此度嘉州

刀鋋初出骨空存,又曳轻裾上将门。才略自能追越石,旌旗谁复似桓温。芙蓉丽发新文藻,薜荔衣香旧梦魂。志士何妨聊袖手,空山归卧听啼猿。

徐作肃

徐作肃,字恭士,商丘人。顺治辛卯举人。有《偶更堂集》。

过周肯卫东村

僻地容来往,秋天别业清。倾壶耽一醉,好雨坐三更。近水暮云入,新田晚稻平。 闲闲堪著赋,何事欲关情。

人日同友人游阏伯台因过草寺归留小饮

今岁今时春早回,绝怜晴日净纤埃。遥青欲起梁王苑,古寺争驰阏伯台。茗碗空郊 开士灶,梅花小榻故人杯。还看淑气深相引,次第群芳杖底催。

谭德馨

谭德馨,字绍元,号又庵,新会人。顺治辛卯举人。有《又庵诗集》。

喜晴

竟日攒眉坐,今朝一放颜。白飞归壑水,青送隔江山。牧笛平林外,渔罾落照间。 野人防雨意,犹带绿蓑还。

【卷二十六】

范承谟

范承谟,字觐公,号螺山,又自号蒙谷,汉军旗人。顺治壬辰进士,改庶吉士,授

编修,官至福建总督。殉难,赠太子少保兵部尚书,谥忠贞。有《范忠贞公集》。

句留吟此邻碪惊梦忆旧之作也。词内藏署中同时被难诸人里族、字讳。

春日溶溶向夜深,松涛碪韵漏沈沈。兰亭少长频来梦,踏泛句留指碧岑。碧岑高矗云盘曲,四野青濛星陆续。手拂琼霄袖落霞,目低银汉回衡玉。玉衡遥指凤凰城,望美人兮心怦怦。瘦骨虽无缩地术,冰心尚信自天成。仰天欲语心转苦,怀抱纵横天尺五。奕叶貂蝉著国华,肯将姓氏汙家谱。倦眼迷离望莆田,酸风如箭射眸穿。三年破榻悲谁语,几堵颓垣痛各天。各天同难天应祐,紫电青霜乌巷胄。将军亲执绣雕旗,跃马直前真荡寇。一战成功抱犊闲,朝来泛水暮留山。那知多少东陵兴,都付西风残照间。董贾文章虫唧唧,穷通贵贱裈中虱。谁御长风汗漫游。我欲从之万事毕。恍忽天际兮来我真人,驾玉麟兮饰宝琛。建朱旆兮耀金廷,邀王乔兮酒数斟。舞袁公兮抚真琴,《韶》《武》迭奏兮开余素心。何以处此寂寞兮,闻太古之元音。继而坐予芝山之巅、双松之下,启口微吟曰,海日升兮东方明,卿云烂兮泰阶平,仙霞开兮役五丁。山魈馘,海鲵烹,何为凄怆憔悴兮,日劳劳而自戕其生君。不见画角鸣兮鼓声起,为我殷勤慰诸子。义仁忠勇万人魁,永寿芳名纪青史。余乃爽然而惊、肃然而迎,三星在户,四顾一檠。情耿耿,碪声清。

武彝曲不见笔砚者几三年矣。病卧中偶成《武彝》一曲,赠武彝子也。思欲写出一示武彝子,伺守者团食窗外,乃闭户垂幕,徐出寸管,滴汁于片石间,恍然如睹故人,鸣呼痛哉! 拭目展纸之际,臂酸索重,头眩心摇,因是数作数止,半掩半舒,挥泪奋毫者移时方意。孤臣血泪,义侠高风,于此可以略见耳。且予

自罹难以来,眼前所有一切非旧,独获署内《御历》一册,朝夕捧对。每逢君亲吉旦以至朔望讳辰,预自濯体斋心,肃于五夜强起,著我衣裳,倩人扶掖,荷械北向拜祝,遥殚愚忱,并效苏子卿坐卧不离汉节之意。傥予业缘已毕,涂血有日,遂我报称列圣隆眷,更望密检其历,同此数点残泪,合而贮之,俟逆氛扫荡,持以示我兄弟子侄,俾令见我心迹手书,悉我坚志苦衷。感佩云谊,当与河山并永。红螺寺巨辫行者殍赋赠武彝山人,时大清康熙十五年二月初五日也。

吁嗟嘑!淮阴未遇兮漂母哀,螺山落魄兮武彝开。漂母一饭兮情生俄顷,武彝三岁兮凝结成衃。自是有心知顺逆,非因濒死起寒灰。三月十五鸡啼晨,辕门甲士往来频。气色非常人共骇,城头雷炮崩苍云。苍云未散挝鼍鼓,天吴欲沸刑天舞。直凭谈笑折狂锋,刀戟如林何足睹。刀比霜兮戟作林,两廊杀气遏飞禽。君恩臣节当今日,后土皇天鉴此心。此心久许主人死,谁解全躯保妻子。可怜相向大中丞,俯首无言但尔尔。一身九锁声郎当,鬼火空房淡日黄。百计劝餐罗粪土,踢翻几案蜨飞扬。吁嗟嘑!我凛如霜兮人呼铁面,我衷如火兮人难自见。世受国恩兮父子兄弟,敢忘报称兮骨劘血溅。既堕鬼隅兮言返吾真,咫尺首阳兮幸与为邻。常山舌利兮鲸鲵胆碎,吐气如虹兮断齿截龈。左右难堪兮怒色加,环睛按剑语声哗。十日肉枯神愈健,咆哮怒者亦兴嗟。武彝武彝古人风,慨吟包胥赋孤忠。秦庭七日能完楚,君更余三将无同。君何不忍须臾死,未必天心遽如此。怀光希烈真奇凶,终须斩馘献天子。君不见公孙杵臼告程婴,成事称难死事轻。无论鸿毛与泰岱,汉节终归苏子卿。我闻此语转增苦,我何人斯比苏武。暂吸滴水效吞毡,可能链石将天补。垢面蓬头欷复歔,满前异类总狂且。生何为兮死有恨,朔望踉跄拜帝书。多君慷慨心如揭,吾亦披肝饮君血。炎荒毒日渴喉焚,凉我燕山片片雪。冬月悲风透骨寒,殷殷雅意纩还热。一曲长歌笔未终,啾啾四壁虫声咽。呜呼,谁为沈阳之裔兮,子暨诸孙。睹此片纸只字兮,须知为死血将尽之流痕。

当思何以处此兮,慰我生前未了之幽恨。吁嗟嘑!满目冉冉兮,八千里外之游魂。若使悠悠复泛泛,辜负亲恩与国恩。予写《武彝曲》既竟,不觉慨然于中也。久不亲笔砚,乍逢故物,悲从中来,兼拘挛之余,堤防之际,遂致阙漏姓氏。诚恐朝野之间兄弟子侄辈不知妖氛逆焰中,尚有怀忠抱义任侠者,沈埋其间,而能物色孤臣,周旋患难于两载之久。使持此以报朝廷,则为鞠躬殚节之人,具此胆略以任疆场之事,则亦干城御侮之选也。予家兄弟子侄,傥能效古大臣以人事君之义,则予虽横尸巷陌,亦将含笑九原矣。武彝子何?姓许名鼎,闽之泰宁人也。行者殍何?辱亲败子、误国庸臣范承谟也。

嵇留山寄观骚注参证诗以纪之屈子沈抑千载,无人知其在世、出世一片济人热肠。 不意际此颠陨之秋,困顿英哲,俾获著述传世流播无穷,留山可为三闾知己、上功臣矣。

《怀沙》匿奇迹, 忠彰道未扬。抑郁千载间, 兰蕙隐华芳。值兹颠覆初, 哲人罹危疆。冥会著《远游》, 汨罗忽翱翔。浩浩水无垠, 莽莽云俱苍。应知素心人, 掩涕不可将。

绝命词连宵乌鹊南噪,晓闻王师已逾仙霞,耿、刘二逆初谋携装泛海,继以众情弗顺,治议投诚。禁卒侦知其情,密以慰余。余笑曰:"二逆即投诚,终不免,然必先杀我以灭口。"因口占示之。

一笑襟开万怒平, 龙兴有寺葬真卿。执旗厉鬼争前导, 扫尽穿墙穴壁{鼠生}。

嵇永仁

嵇永仁,初字匡侯,字留山,又号抱犊山农,无锡人。诸生。随范承谟死难,赠国 子监助教。有《抱犊山房集》。

憔悴吟癸丑秋,邑侯吴公饯余于听梧轩,招集秦太史对岩、陈进士椒峰暨词客殳山夫、余淡心诸子同拈《踏莎行》词,末以"憔悴"二字限韵。词中有"孤城残角梦家山,乱帆影里人憔悴"之句。余心怦怦动。归述之老父,欲不果行。老父曰:"相国旧谊,其忍负之?"遂促余行。至幕府日,辄病胁,痛号欲绝,恐届不禄之辰,归念颇切。举颠末告之蒙谷,蒙谷为余解"憔悴"之意,亦和一词。词内有云:"城郭无光,村烟失翠。瞥然一见心如醉。停骖暂缓入山期,哀鸿待尔离憔悴。"余读之惊愕,私谓许子九日曰:"言者,必之声也,何为作此不祥语?"许子亦悚惕,相对咨嗟,知将不免,因决情而去,卒脱于难。余缘情勉留,遂逮于祸。非知几之暗也,情所感激不忍去也。不忍去而去,非但薄情,抑并悖义。嗟乎,嗟乎!祸患有因,端倪先兆,今日憔悴至于此极,余固久知之矣。

余本抱犊人,东皋有荒田。荷锄将经营,课仆耕云烟。天南节度不肯放,聘书早到 薜萝边。薜萝闲挂处士墙,处士一去令君伤。招携宾客置饯觞,吐词制调魂飞扬。有心负米 恋草堂,堂上念旧催治装,可怜离别九回肠。陟岭逾滩跻险峻,一步一望吴天长。羁栖伏枕 药炉间,海滨倦鸟思飞还。好音慰藉情凄婉,劝我停骖迟入山。好友掉臂行,病夫衔泪住。 张罗设网日月昏,冥冥翔鸿去无路。雨雪从来霰集成,蓍龟四体先分明。自是愚忠被束缚, 休嗤野客迷归程。吟来憔悴看双鬓,只恐秋添宋玉情。

颠倒歌从前相依蒙谷者,受其恩,辜其德,尽为衣冠中之穿窬。及受难日,此辈皆不与,岂奸狡之徒巧于攫金者,亦善于避祸欤!余与林翁能任、王翁幼誉、沈子天成,皆落

落寒素,家无儋石之储,坚守硁硁之志,与公誓同患难,不畏刀锯,不艳势利。逆虽百计挫磨,初心不拔,彼奸狡者,应揶揄呆汉之舍生取义也。

颠倒英雄熟是非,伯夷饿死盗跖肥。太史著书发悲愤,问天不应增歔欷。寒士好古艰遇合,牢落科场遭践踏。肉眼岂识璞中玉,销魂还逐风前蜡。家徒四壁依傍人,巧者致富拙受贫。忧谗畏讥叹维谷,犹幸知己愁眉伸。道义相交澹如水,金多交深物所鄙。小人有母孰养之,千里轻身浪掷死。死忠死义原相成,惟有罔极魂萦萦。山鬼揶揄夸明哲,闾里温饱翻偷生。辜恩报恩□莫计,世上休轻天下士。金乌玉兔疾如梭,千秋难解颠倒意。请君熟读《颠倒歌》,英雄英雄可奈何!

拟古诗蒙谷以炭画纸上,书颜杲卿、伯夷、苏武三古人相询,欲择一为决绝地也。 但被执,大骂,求死,既不得,十日绝水浆求死,又不得。是杲卿、伯夷,天已不欲令其继 之也。无已,请学苏武。

常山舌既乾,两耳了不闻。声留白刃间,迟回遏阴云。首阳腹已馁,薇蕨徒芳芬。精气弥豪放,鼎食安足云。维彼苏属国,持节牧羌羵。十年如一日,冰雪嚼纷纭。求死既不得,坚志豺虎群。从容与激烈,大道原无分。上林□雁札,终得达圣君。愿言励忠悃,天心将罢军。

红桥庄歌行癸丑秋,余妇送至吴门,止于外家之红桥庄。是日,天色甫明,薄雾漫水面,乳妪抱儿辈伫立岸上,若不胜惨切生离之状。人非木石,孰能无情?每一回思,肠寸裂矣。

秋风荡漾扁舟早,双桨到门搅怀抱。薄雾笼烟水气蒸,鸡鸣桑树催晨兴。怀中洁白鹅湖绫,眼枯难拭泪痕凝。良人远游意飞腾,不知前路多寒冰。虽然弧矢分所应,临深履薄生战兢。上有高堂下乳稚,养亲教子将何凭。出门儿女愁葛藤,欲语不语长抚膺。矫情挥袂急解缆,蒹葭摇落凫雁升。野老涤场将打稻,渔翁拨刺亦开罾。惟有征夫舍耕钓,红桥庄上画栏凭。

傅宏烈

傅宏烈,字仲谋,号竹君,进贤人。举人,官至广西巡抚,抚蛮灭寇将军,加太子太保。谥忠毅。有《傅忠毅公集》。

忆山居

当年松菊径,怅怅问何之。既觉山为远,方知我在兹。岚收孤影秀,雨歇半峰奇。 便作怒然赏,临风每系思。

清远峡

暝投云际宿,疑作水中仙。群壑去无路,断涯窥有天。清猿啸峤月,白鸟宿江烟。 往问前山寺,飞来有几年。 绝命词

自分一死无余策,身为厉鬼诛群贼。绝食依然浩气存,鼎镬刀锯求不得。天不假我 以速终,天心人意莫可测。吁嗟徂矣命之衰,惴惴生平无薄德。

曹尔堪

曹尔堪,字子顾,号顾菴,嘉善人。顺治壬辰进士,改庶吉士,授编修,历官侍讲学士。有《杜鹃亭》、《南溪》、《客装里音》等集。

游吾谷

高天热未平,深林绿已老。知是古人宅,瘦蚓号阴草。追维廖赖徒,探寻极深窅。 土腴泉更滋,回峰两肘抱。重扃漆镫墨,一声天鸡晓。人来鸟雀去,叶大鼯{鼠生}小。枫赤游更佳,秋心已缥缈。

啸台李空同撰碑, 左国玑书。

两山翠柏摇天风,古台突兀荒山中。宏正残碑断复续,左氏书法文崆峒。摩挲句读 叹古雅,万颗真珠春自泻。中散原非入道姿,公和本是逃名者。人间机穽苦相撄,石髓青精 足养生。嵇公援琴阮公哭,虚负空岩长啸声。

金鱼池歌仿杜乐游园体。

池边风日足留赏,曲水平隄暗菰蒋。且驻巾车卧绮疏,启扃拂簟楸枰响。皎月楼开云母屏,商飙帘动珊瑚网。绀殿凌空青霭间,步虚声在青云上。飞汞烟沈道士炉,落霞闪映仙人掌。昼明金阙翠华临,池道清尘畏来往。玳瑁鱼斑日应长,恍在江湖荡兰桨。名园岂是金谷奢,福地真如辋川爽。喜与诸公同赋诗,读《骚》痛饮良可师。今朝美酒注深爵,明日残花辞故枝。仕宦京华得高会,追欢胜景皆恩私。别后星河望渺渺,将离赠远遥相思。更余千载悲秋泪,漆发丹颧非曩时。

憩半山亭

曲岭行人少,孤僧独静居。云中炊火郁,竹里出烟虚。松老惟藏鼠,泉寒欲冻鱼。 寺门犹五里,且憩半山庐。

送宋荔裳少参之任秦州

腊雪街亭满,何时到巩昌。关山尊底月,斧钺帐前霜。阁暖调鹦鹉,花浓隐麝香。 出门怜旧伴,白首尚为郎。

送胡循蜚由衡州左迁商丘丞

燕山积雪高三尺, 九月严霜天地坼。与君长揖走风尘, 同是西吴羁旅客。独怜坎坷

仕宦途,折腰偏向府中趋。豪心侠骨委成败,场中游戏呼枭卢。来时衣带潇湘雨,南国纵横乱豺虎。探穴初耽衡岳深,览奇更喜梁园古。睢阳城边驱马行,才人迁谪易知名。酒酣日落哀筝急,泪湿青衫空复情。

华岩庵小憩有怀南还诸子

莱陌瓜畦取径斜,空林宿鸟隐袈裟。风欹霜压西邻竹,茜染栀匀九日花。庾信似悲摇落早,阮公休恸道途赊。江东已报收诸郡,浪息银河好泛槎。

柬同年吴方涟侍御

长安暑退雨来初,隔巷清秋苦索居。执戟长饥愁曼倩,杜门病渴卧相如。十年兄弟 干戈后,万里生涯瘴疠余。正可从容谋谏草,治安惟待贾生书。

别梅杓司兼寄施愚山

吴苑煨炉历已残,幽人时戴竹皮冠。《龟兹》不改歌声妙,牛斗犹余剑气寒。金粉 销沈空响屟,溪山平远待凭栏。回看京洛宾朋盛,公宴诗成敌建安。

穀雨后二日过镜槛小憩

春深乔木绿阴齐,北舍南村祇隔溪。孤艇随风独来往,杨花扑过小桥西。

终南结茅歌赠本尔上人

薄游偶傍禅床宿,静夜同燃佛前烛。天晴古院访三支,冻笔联吟阁下诗。拂蠹翻经为小住,探奇却爱山深处。万里遥从闽峤来,一筇还向关西去。眼前希见荔枝丹,常有红泉碧树看。茅屋苍凉人迹绝,可耐阴崖六月寒。永谢尘喧乐长往,商州风色偏萧爽。鹦鹉时依绝壁啼,王孙群偩悬藤上。坐来日月石上生,千仞终南冰雪清。青鞋布袜计亦得,人间驰逐空浮名。

孙钟元先生北还夜话宁境僧舍

卫源留兼旬,驱车即云迈。迟我一日行,觏止乃大快。移镫视须眉,耿耿照孤介。侠分燕赵风,学疏濂洛派。嘉遯获安贞,长筮得天山卦。追溯万历年,亲历几兴坏。屈指数难尽,披发见何怪。所著宜名山,流传深足戒。梗概绍刘杨,元刘静修、明杨椒山皆容城人。浮名鄙草芥。静观去矜心,庞公床下拜。

初冬同半千问旭静鉴过访扫叶清凉寺山楼

治城幽寺即寒村,黄叶堆来昼闭门。疏竹影摇通水色,垂柑实老绽霜痕。天浮吴楚 看明灭,月满江山自吐吞。更与虎头添画本,长空帆影雾中昏。

钱牧斋先生挽词

入世雄心老渐灰,昔年钩党竟风雷。俊厨何救东京没,刁顾还从北渡来。天为文章 留末路,人推碑版冠群材。先朝实录尤淹贯,多少微辞纪定哀。

送孙无言归黄山歌兼示王西樵彭鸿叟

甲辰十月游旧京,萧条旅宿闻尔名。方龚悃款为陈说,慷慨结客楼君卿。长贫不妨 用我法,久客毋乃非人情。故乡本在黄山下,老松奇石形堪诧。茅堂豁閜无纤埃。末俗尘鞿 此焉谢。谁写三十二奇峰,长歌短调风人风。健笔摩空洵奇绝,骊珠出袖光熊熊。少嬉草市 乡,遥对溪南口。山径蓝舆古渡船,止压归囊诗万首。朅来同泛西湖水,每忆黄山如梦里。 酒楼长醉杜樊川,丹炉休觅容城子。劝尔迟行姑且留,仍教大隐栖邗沟。山中故人达书问, 赤箭黄精犹可求。

周量赋诗赠行依来韵留别

每食无鱼叹此身,栖迟丘陇谢风尘。秋垂野菊携书卷,晓上寒潮拂钓纶。伍相祠前 多病客,荆卿垆畔和歌人。著书忘老松鳞蜕,醉倚瓜庐岸角巾。

王士禄

王士禄,字子底,一字西樵,山东新城人。顺治壬辰进士,官吏部员外郎。有《考功集》。

寄季弟贻上

离居足忧端,忽忽苦无怿。暌违感至今,提携念在昔。执手既未卜,所愿眠食適。顷者家邮至,言汝资药石。置书坐沈吟,芒芒中怀迫。移时取竟读,书言颇详覈。比当发使时,汝体业已泽。恐为虚见慰,此意苦难逆。丛杂缄牍末,最后得手迹。把读语良符,笔势更奕奕。终古魂梦淆,连宵役精魄。翘首望南云,安得双羽翮。送我置汝傍,睹汝肥与瘠。

次贻上用坡公东府雨中别子由韵见寄客秋自汴上省觐维扬,贻上被檄将有秣陵之行,仅对床一宿,乃与同舟,至真州南郭而别。比余北还,贻上尚未毕役归也。今年春,贻上用坡公《东府别子由》韵作诗见寄,读之凄然,未及和答,比在幽系,言念聚散,感慨不能已已。遂次韵寄之,并示礼吉叔子。

白沙洲畔树,年时记别汝。岁晚江城阴,风凄如欲雨。去当南雁时,不待雁同归。 离居复多难,徒尔思前期。叹息重叹息,兄弟等过客。几番约连床,欻若湘灵瑟。秋来雁又 飞,题诗附尔行。晨风零雨外,脉脉十年情。

长平坑歌

虎狼之秦胡不仁,锐头小儿服振振。劫灰更促括也将,一战赵垒成埃尘。白骨岳积四十万,至今此地无青春。丹河水绕发鸠麓,指点当年赵兵衄。土人往往坑旁耕,拾得残戈或断镞。镞头长以寸,戈头长以尺。持将磨向丹河沙,古血犹腥土花赤。省冤谷接武安台,

南来遗迹仍崔嵬。应共髑髅山下月, 夜深同对鬼磷哀。

飞龙宫行唐玄宗为潞州别驾时龙潜旧邸,今府治。

临淄此地曾潜龙,倜傥颇有文皇风。夜半入宫星如雨,乾坤再辟成奇功。十有一祀帝业崇,耀武太原临河东。中经上党鸾雍雍,凝笳清跸临旧宫。眷言顾之拟沛丰,问疾赐酺欢无终。易以嘉号志所从,更闻金桥谣儿童,羊头山翠当朝宗。勒兵三十万,旌旗千里重。陈吴作绘燕公颂,潞州别驾堪豪雄。乾符坤珍一十九,并与兹邸传无穷。龙漦降庭蛇起陆,龙入蜀江作鱼服。雨黑延秋乌语哀,月明南内弦声促。阿荦凶狡阿环骄,何术豢龙同豢犊。渔阳尘压沈香栏,勿乃遥为故宫戮。噫吁嘻!飞龙宫,已寒烟,三郎魂魄何来还。

诏罢高丽贡鹰歌

真人御极临八荒,百蛮九译皆享王。西旅之獒越裳雉,贡物各各因其方。海东俊鸟好毛质,铁爪金眸猛无匹。九都作贡来天家,特受韝镟佐罘罼。晾鹰台上秋天高,刈兰驱兽行蒐苗。羽骑骖翠华至,星游云罕纷周遭。蒙鹖射熊未足羡,跋犀殪兕劳遮邀。是时摘绦试一纵,万人昂首瞻青霄。飞鸟狡兔失巢窟,委身洒血填君庖。至尊往往动颜色,玉虬回辔鸣萧萧。柔远犹然勤睿旨,诏罢奇毛自今始。行苇兼存践履慈,茁葭漫赋春田美。圣神举动殊寻常,此事悠悠古谁比。君不见虬髯天子英雄人,佳鹞犹遣怀中死。

八月十五夜

把酒邀明月,清光遍薜萝。芙蓉秋水寂,丛桂小山多。一雁归湘楚,繁星点绛河。 虚堂弦索静,独和《越人歌》。

忆莱子杂诗

时复寻春郭,烟光纵目宽。山姿浓大泽,潮势汨三韩。小立抛藤杖,微吟侧箨冠。 一樽石冻酒,未厌海风寒。

禾中作

江城还槜李,望古一踟厨。老寺裴休宅,春沙范蠡湖。远烟明渚鸟,斜日冷樯乌。 太息东流水,年年浸绿芜。

胡明景帝陵

景皇决策仗于公,定变支危社稷功。南内已殊渊圣没,绝沟何意鲁昭同。玉鱼杀礼 虚幽寝,以王礼葬。苍鼠惊人窜败丛。莫向空山纷感慨,十三陵树各悲风。

上党

雄藩上党古今名,形胜居然未易京。南睨河山全觉下,宵看星汉只疑平。义阳千载 仍祠庙,夹寨当年剧战争。足底黑云天下脊,几朝车马赤霄行。 赠张篑山学士

铜龙晓色破层阴,羡尔批鳞意独深。言听便为天下福,计违不负一生心。他时舄奕 看青史,此日辉光烛翰林。我亦握兰东省客,浮沈徒愧二毛侵。

赋得丹凤城南秋夜长

丹凤城南秋夜长,关河寒近落微霜。那须锦字论长恨,自有清碪教断肠。破衲沙头 鸿欲去,拂云堆上草初黄。伤心不及城边月,犹照卢家玳瑁梁。

庭梅

索笑怜窗晓,流光照砌春。那须江上见,宛似弄珠人。

石门县

落日石门路, 语溪明夕波。女墙才几尺, 一半入藤萝。

绝句

记得佳辰吊汨罗,客怀长昼费销磨。朅来夕院愁如洗,为听兰娘一曲歌。

题龚半千画为周栎园侍郎

石门积雨黯层峦,鸦路苍苍万木攒。为忆秋风吹老屋,孤情著意写荒寒。

王士禧

王士禧,字礼吉,山东新城人。监生。有《十笏草堂集》、《抱山集选》。

登望京楼

巍巍楼阁倚云隈,占断春风百尺台。东去锦帆淇水合,西来爽气太行开。如新榱桷 存丹雘,极目烟霞点绿苔。莫上望京楼望远,《黍离》《麦秀》使人哀。

微云移时月出

乍散还乍聚, 疑烟复疑水。清光出云中, 皎皎如初洗。

南池

劳劳任城道,渺渺近南池。亦欲吟《秋水》,为惭老杜诗。

清凉洞

始皇曾避暑, 四阁望依然。欲纵登临目, 空愁雨雪天。

松

老幹化虬龙,赏心惟胜友。年来须鬓斑,宜伴支离叟。

百泉

毖彼百泉流,洋洋入淇沚。风动碧波纹,荷花香出水。

苏门山

遥望苏门山, 隐磷多幽致。青林间白云, 晚照含苍翠。

啸台

长啸人已邈,余音振林麓。世事笑莫谈,嵇阮有高躅。

德州河上口号

曲岸临大河,风帆日千里。迢递远乡人,离心讬江水。

思乡与怀古,望远临江楼。长歌指飞鸟,风起芦花秋。

王孙蔚

王孙蔚,字茂衍,临潼人。顺治壬辰进士,历官福建布政使、湖广提学道佥事。有《轺香集》。

秋江吟

轻舟如冯虚,江碧峰影倒。寥宇无尘埃,晴光动菱藻。幸因归棹闲,历此湖山好。 寓眺日夕殊,佳景恣幽讨。向暮下江城,霜碪处处捣。时序已如此,我颜得无老。楚山风雨来,一夜白秋草。

与友人山中夜坐

偶然缘水岸,落日见幽栖。野暮烟藏寺,山空月过溪。结篱松磴下,借树草堂低。 明早如无事,披云更杖藜。

与石徽音饮酒

阅世亦云尽,如君未易遭。交情今管鲍,侠气古荆高。霜落镫前剑,花飞梦后毫。 肯拚倾倒兴,不惜鹔鹴袍。

将至应山

前山将入楚,秣马识曾游。风土渔樵旧,江村父老留。苔沈宋玉宅,日照鄂王楼。 眼底飞鸿在,还须郑侠谋。

初发里门留别

年年高卧拟柴桑,何事骊歌动别觞。鸡肋浮名劳去就,鹿冠微愿惜行藏。征鞯渐欲 登山路,回首何能忘草堂。作客更从今日始,二陵秋色正苍茫。

赋赠卢司李

蓟门相对故人情,同拜新纶事远征。明月一轮巴子国,秋风匹马鄂王城。羞言桑孔 多心计,旧识于张有盛名。他日江天遥忆处,黄矶白渚楚云平。

秋赴长安途次晋中杂兴

行人去去复青山,策马西风了未闲。碧草难寻绵上陇,白云何处雁门阙。三更晓角 来霜里,一片秋声在树间。此际萧森愁欲起,不缘客路亦潸潸。

江行杂感

才离越岭又吴湄,寥落江湖忆故居。感愤千秋《鹦鹉赋》,雅骚一代《鹧鸪》诗。 篱栽黄菊知今是,路入桃花自古疑。乘兴莫停明月棹,辋川山色待王维。

芙蓉山色有无间,烟棹芦花千里还。远涧寒声移晚树,晴江落照上秋山。逢**人**尽说风尘苦,出世方知云水闲。昨夜终南来梦里,宛然三径扣松关。

早发峡石驿

西岩马首向层霄, 秋树平明烟未消。寂寂空亭人不见, 霜吹红叶过山桥。

湘行绝句

幂湖云淡带烟,渔镫明灭大隄边。风声夜半幽篁里,疑是湘灵廿五弦。

万里晴江落照迟,琵琶峰下小舟移。枫林日暮寒鸦影,飞入长沙贾傅祠。

程可则

程可则,字周量,号湟溱,又号石臞,南海人。顺治千辰会试第一,历官桂林知府。

有《海日堂集》。

舟晚

回舟转清澳,落日照前岑。水阔一帆远,云归众壑阴。虫声喧别浦,人语静空林。 寂寞河干客,悠悠行路心。

送徐庾清钱柏园归越

良会竟难永,岁寒人尽归。谁怜故乡子,独采南山薇。把酒不终夕,浩歌徒揽衣。 无能挽舟楫,恻恻对斜晖。

虔州

章江回合女墙低,不见行人但鸟啼。往日聊城谁射矢,至今函谷未封泥。风吹败叶 沈沙砾,日落前营动鼓鼙。欲向郁孤台上望,乱云含雨草萋萋。

度双牌峡

虔州南上路巑岏,忽到双牌水气昏。帆向夕阳争鸟道,天留孤堑峙江门。沿洄百折 滩声急,明灭千峰树影繁。谷口似闻鸡犬唤,人家疑是武陵源。

送魏子存司理成都

谁说蚕丛不易行,春风三月马啼轻。铜梁旧枕秦山险,玉垒新连楚塞平。芳草绿齐 过汉水,杜鹃红尽到绵城。知君箧底多词赋,谕蜀文应似长卿。

题赵承旨击鞠图

至元一幅鹅溪绢,四尺不满三尺余。翰林承旨颇好事,绘取击鞠为斯图。不知王者是何代,紫棱白面苍虬须。手提青丝绿玉策,据鞍顾盼神睢于。左右布列数猛士,衔竿挟杖纷骑驴。一球委地不得掇,四面击者群争趋。驴蹄骄蹴势欲动,蹀躞腾遝精神殊。我闻轩辕习武士,沙虫猿鹤皆前躯。一击能令力牧怒,蚩尤涿鹿功煌如。吁嗟王孙际龙战,绘此毋乃含欷歔。方今海宇尽混一,虎皮盖藏金仆姑。《云门》既奏泰阶平,纵有筑鞠非兵符。此图不用示天下,只合简册供清娱,衔竿挟策胡为乎。

晓起与邝无傲作

长安四月雨,霡霂生微寒。晨兴出帘阁,稍觉衣裳单。郁郁庭中槐,浅绿浮林端。 好鸟鸣相闻,仿佛栖岩峦。不见夏云热,宁知春色阑。赖有同心人,把臂延清欢。回首思故 乡,众卉萋以繁。黄梅摘方熟,朱荔谁当餐。嘉序长不归,谁能假羽翰。

吴渔山为余仿营丘早雪图

渔山山人不出山,朅来燕市仍键关。含毫泼墨自怡悦,为我披豁开心颜。鹅溪一幅营丘似,积素凝寒半江水。残条拂地冻欲僵,有客孤舟去如驶。芦叶萧萧风乱飞,千山寒色兼斜晖。此翁掉头颇解事,天地已闭人当归。不然访戴意亦適,岁寒兰芷应须惜。多谢山人冰雪心,挂帆好向罗浮宅。

沈荃

沈荃,字贞蕤,号绎堂,江南华亭人。顺治壬辰一甲三名进士,授编修,官至礼部侍郎。谥文恪。有《充斋集》。

晓渡扬子

曙色初开扬子渡,片帆遥挂海门西。横江晓雾千峰失,隔岸寒云万堞齐。短棹苍茫 渔浦外,长天缥缈雁行低。中流倚棹频回首,吴楚山川极望迷。

同徐宁菴宪副席竺来太守荥河秋望

西风猎猎动寒波,荥水相逢一浩歌。广武秋阴迷旧垒,太行晴色下长河。黄蒿断岸 奔流急,野寺疏杨夕照多。萧瑟那堪风景异,高天极目雁行过。

清源怀旧

晨鸡启重闉,城柝亦未缀。解缆乘细流,轻桡向晓发。凄凄下微霜,皎皎鉴寒月。 惆怅问前途,郁纡感逝节。回首溯旧知,音徽已灭没。眷德思偏长,怀分情叹歇。虚期万里 风,徒愧中流楫。十年过西州,凄怆心如结。

送张篑山学士归庐陵

養被萧萧出凤城,云霄极目重含情。片言岂诩回天力,三宿仍辞去国名。圣德优容昭日月,臣心愚朴本平生。曲江风度应相忆,莫恋空山猿鹤盟。

耿介

耿介,字介石,号逸庵,登封人。顺治壬辰进士,改庶吉士,授检讨,历官少詹事。 有《敬恕堂存稿》。

八月十六夜宴盱江楼得白字

江城霁夕晖,层阁凌百尺。冠盖会群公,对此秋月白。岂敢耽欢娱,良时亦足惜。 下见江水深,澄涵一天碧。细火通渔艇,连樯聚商舶。潜鳞吹波澜,宿鹭依沙碛。为政无烦 苛,民物各自適。冉冉江上枫,青青岭头柏。愿将孤月轮,皎洁比心迹。

都门送周亦大同年

曙色照行旌,鸣鞭出凤城。三年风雨意,两地别离情。露白秋江远,烟消枫树晴。 奇书中秘在,须早侍承明。

由南平至闽

茶洋六月放舟还,水竹千重咫尺间。龙抱石根翻急濑,天凭溪力割青山。人烟几处 闻新哭,柳色经年忆旧攀。争似澄江垂钓叟,一竿无语伴鸥闲。

嵩阳书院送窦敏修先生

古道于今叹《式微》,临歧执手更依依。山灵似有留行意,一片停云久不飞。

笪重光

笪重光,字在辛,号江上,丹徒人。顺治壬辰进士,官御史。有《江上集》。

饮张湘晓吏部鹤林别业

读书曾爱杜鹃楼,霜叶红时坐未休。别后烟霞常入梦,重来松菊正逢秋。欲寻老衲精蓝改,话到青山白发羞。好是结茅邻仲蔚,不教城市隔林丘。

山中杂咏

白发惊时变,青山见鸟飞。暑随桐叶减,秋向薜萝归。细草侵芒屩,新凉到葛衣。 自怜垂老日,方悟昔年非。

舟泊河干

山雨悬春树,江春入郡楼。人家依岸转,河水抱城流。自信干时拙,谁含作赋愁。 烟波时极目,吾意在沧洲。

答宋中丞牧仲

忆昔宦游日, 匡庐愧使车。归来三十载, 未致一行书。清兴因贫减, 颠名为病除。 多公持节钺, 犹及访闲居。

偶题

银筝玉柱拂晴霞, 红烛金尊照鬓鸦。不是浔阳江上客, 莫将双泪落琵琶。

杨素蕴

杨素蕴,字筠湄,号退庵,宜君人。顺治壬辰进士,官至湖北巡抚。

山居

高秋孤杖倚云间,坐看溪光卧看山。白雪风翻惊叠浪,青苔雨湿出层斑。群归倦鸟 飞飞急,对浴轻鸥泛泛闲。欸乃数声天欲暮。渔舟轻带夕阳还。

飞楼缥缈枕河湄,绕屋群峰列嶂随。雨脚每从晴外见,滩喧翻与静中宜。税完胥吏 宁过舍,野放鸡豚偶到篱。不学武陵深避世,渔舟停棹莫相疑。

张永祺

张永祺,字尔成,大兴籍宜兴人。顺治壬辰一甲二名进士,授编修,历官大理寺少卿。有《金滩倡和诗》。

送胡存人南归

握手谈今夕,离情己黯然。归恩深自责,交态畏人怜。别酒风前路,孤吟日暮天。 停鞭聊极目,江水迥浮烟。

送尔执北归后怅然有感

乡关揽辔客心惊,薄暮空林倦鸟鸣。婚嫁向平双鬓改,酒棋谢傅一身轻。桑乾雪映 千山晓,易水霜流万壑清。话到微醺官舍后,膝前儿女倍含情。

和绎堂送顾菴南归原韵

僧房长夏反《离骚》,燕市狂歌饮浊醪。野水沙鸥迎画舫,澄岚翠黛识宫袍。思归愧我荒三径,颂酒知君藐二豪。到日携筇清兴適,白云红树两峰高。

金滩赋赠郜凌玉学宪

河畔春风解缆初,故人相向漫欷歔。握中十部名山业,箧里三年秀水书。地近扬雄时问字,途临阮籍一回车。桃花水绕漳河去,尺素东来寄鲤鱼。

丁思孔

丁思孔,字景行,汉军旗人。顺治壬辰进士,改庶吉士,授编修,官至云贵总督。

题画壁和毛秋岑韵

秋水蒹葭阔,孤舟自往还。好音酬去雁,清响答空山。垂钓烟波里,言怀杯酒间。 几人有清趣,心与境俱闲。

项景襄

项景襄, 字眉山, 秀水人。顺治乙未进士, 官至兵部侍郎。

南屏

荡艇入南山,晴湖净如拭。系缆枯树根,寒烟生微白。偃卧周山阿,脚步层岩隙。 方丈出松巅,亭亭高百尺。入门逢老僧,尘缨顿若失。说法水月心,妙香浮广泽。落花满空 林,披云坐磐石。置身在霄汉,庶以慰营魄。安得常如此,元言共朝夕。月出竟忘归,零露 沾衣湿。

题画

闲来结得小茅亭,但识烟云月露形。历日不书藤叶纸,年年只记柳条青。

张可前

张可前,字箸汉,江陵人。顺治壬辰进士,官至兵部侍郎。有《宛在轩诗集》。

新昌县寄朱启宇

负郭三家市,窥城万木村。水春喧雨急,山烧入云昏。露草蛇盘径,风林虎啸门。 何时荒僻地,归与故人论。

傅感丁

傅感丁,字雨臣,号约斋,钱塘人。顺治壬辰进士,官至副都御史。有《舒啸轩集》。

登海涌峰

昔闻虎卧此高丘,今日登临最上头。近接灵岩惟片石,遥观雪浪有孤舟。消沈伯业 同烟草,寂寞禅心视水沤。剑窟泉飞石梁北,声随香梵几时休。

郭棻

郭棻,字芝仙,号快圃,清苑人。顺治壬辰进士,改庶吉士,历官内阁学士。有《学 源堂集》。

春暮张尔戌捕卿招同李书云余铨卢王北山三给谏摩诃庵看杏花

破懒寻春远,招携石竺间。兴高即暇日,地辟况禅关。树里千声鸟,尊前一带山。 登楼凭眺远,不负此官闲。

野旷春逾媚,林烟绿一围。远公容设酒,曾点未成衣。坐树莺声老,蒸田水气肥。 闲云如有意,故故傍人飞。

刘木水由代州州贰擢守辽阳州

五马原侯秩,三韩况帝乡。风能清代郡,才可问南阳。海气榆关紫,秋花铁岭黄。 三年屈指是,粉署待含香。

迎薰亭侍宴

太乙波明影碧霞,斗牛星畔泛仙槎。百壶湛露圣人酒,十里香风君子花。蛱蝶过船吹芰粉,䴔䴖出水带菱芽。衔杯四望欢无极,身在瀛洲第一艖。

赠程穆倩山人

廿载怀君老始逢,瓣香不枉为南丰。纵谈身世悲桑海,屈指知交叹雪鸿。酒国有人 堪独往,砚田无种与时穷。干旌早晚徵耆旧,莫掩邗江半亩宫。

严藕渔宫赞假归无锡

潇洒抽簪出凤楼,春风人上木兰舟。一编青史垂行橐,十载红尘浣素裘。去日莺花怜满目,到时江雨漫回头。长安老友无多在,在马兰台尚滞留。

别曹秋岳夫子十稔偶于晋阳拜晤感而有赋

左官次第买归航,回首青门已十霜。玄鸟尚留龙马塞,逐臣敢负芰荷裳。且将世事 浮桑落,况有文词动柏梁。为忆髫年环绛帐,几何双鬓已苍苍。

春日张永舒太学招同李湘北学士王北山给谏杜子静宫允张南溟比部雅集遯园次韵

正欲降愁部酒兵,衔杯为爱遯园名。舌存未许谈时事,心老才知淡物情。小鸟争来 高阁噪,新花还向旧枝生。滦鱼易酿皆乡味,不羡张翰莼菜羹。

刘山人游中州凭寄张上若同馆

轺车忆下午桥庄,痛饮醍醐月正霜。白发我犹歌偪仄,青山君已定行藏。滏河春雨 骐驎浴,行坞秋烟薜荔香。满眼干戈凭问讯,金台客老意苍茫。

余缙

余缙,字仲绅,号浣公,诸暨人。顺治壬辰进士,官御史。有《大观堂集》。

晓起闻钟

偶出闻晨钟,云自湖南寺。南望不见湖,惟见湖中树。渺渺水石间,因风时一度。 何当月明中,泛舟寻湖屿。

北固山晚眺

石头城东烟水空,金鳌夜吸海底红。天吴啮断白玉虹,渴猊怒攫青芙蓉。中流幻出 妙高峰,浮涛拍浪将奚从,似欲渡江随六龙。

癸丑夏日斋居苦雨

蠡城五月雨丝密,湿云压檐黑如漆。街头到处水绕门,路上行人泥没膝。舟子舣岸如蛎房,两月何曾脱蓑笠。上年秋涨淹禾苗,农家比户吞声泣。卖丝粜穀望今年,谁道夏霪甚畴昔。一片洪涛浮太清,天风未吹海已立。麰麦方熟尽生耳,陂塘总决江湖一。侵晨插秧水浸畦,薄暮归耕船入室。盎中粟罄妇儿啼,官吏催粮如火急。卖男贴妇安足悲,时有龚黄当见恤。

舟次山阳

燕将雏舞柳绵飞,浪涌渔舠鳜正肥。淮酒初浓梅雨暗,吴蚕方老柘风微。农缘输赋 田畴薄,官善征商估客稀。惟有野人无逋课,市桥长载月明归。

王廷璧

王廷璧,字昆良,祥符人。顺治壬辰进士,授刑部主事,历官陕西凉庄兵备道按察司副使。有《聚远楼诗集》。

秋日饮李相国园亭

山容全入画,老树动秋香。露叶萤光湿,风巢鹤梦凉。茶烟生暗竹,酒气霭回廊。 莫拟平泉侈,卢鸿一草堂。

邢台

尘土彫残客里颜,马头隐约见雄关。草蒸湿绿长煎雨,云插空青欲占山。流水远通 寒棘外,小桥孤卧野花湾。季龙宫殿知何处,惟见苍苔点石斑。

燕市有怀惟度魏子时客楚南

酒散繁台雁影单,十年客梦老渔竿,长镵杜甫沿山劚,短铗冯驩带月弹。回首沧桑 皮骨尽,伤心湖海鬓毛残。传来战火三湘满,何处梅花续旧欢。

李昌祚

李昌祚,字文孙,一字来园,号过庐,汉阳人。顺治壬辰进士,历官大理寺卿。有《真山人集》。

鲁峰别王汾仲

摇落乡心属暮秋,王郎真合古人求。终宵对月烧茶灶,竟日临江上酒楼。雁外山低 黄叶路,日边帆去白蘋洲。江流漠漠天如水,图画何曾尽别愁。

刘必显

刘必显,字微之,号西水,诸城人。顺治壬辰进士,授行人司行人,历官户部员外郎。

题槎河山庄亭壁

十年尘梦冷渔矶,又向滩头理钓丝。久客乍归鸥作伴,短墙半缺水为篱。月明松影 窥窗际,夜静溪声到枕时。独坐悠然成大觉,挑镫拂壁一题诗。

叶矫然

叶矫然,字子肃,号恩庵,闽县人。顺治壬辰进士,授工部主事,改乐亭知县。有《龙性堂诗集》、《雁唳篇》、《东溟集》。

山海关

神州锁钥古雄关,铁骑云屯重此间。一自六龙兴朔漠,顿飞万马下燕山。楼船瀚海沧波壮,烽火边城白昼闲。多少征人罢远戍,深闺幼妇莫愁颜。

碧山衔照映边墙,匹马临关道路长。中土哀鸿轻出塞,南冠罻雉泣投荒。一城碪杵 当秋急,八月风云匝地黄。最是居人闲指点,红花十里几回肠。

立夏日雨中集城西书院

䴔䴖逐子伯劳飞, 天淡云浓夕照微。劝汝东风一杯酒, 明年春色早言归。

张溍

张溍,字上若,磁州人。顺治壬辰进士,改庶吉士。有《读书堂诗草》。

寄殷宗山

烽烟不到地,岁月任逍遥。饮犊犹嫌水,临风欲弃瓢。千峰供杖履,一代见渔樵。 应共巢居子,云根劚药苗。

张晋

张晋,字康侯,号戒菴,狄道人。顺治壬辰进士,官丹徒知县。有《黍谷》、《秋舫》、《一啸》、《苏门》、《劳劳》、《石芝》、《税云》诸集。

秋望

家世崆峒山下居,每因风雨念吾庐。鱼龙水落霜来后,鸟鼠秋高月上初。慈母手中 千里线,故人云外数行书。经年未忍西南望,知道青松久笑予。

报国寺

胜地开金刹,诸天近翠峰。月高秋在塔,云冷晚留松。往事存题碣,前朝剩赐钟。 一声烟外鹤,落尽旧芙蓉。

河上

步屟向汀洲,残山望眼收。云归藏晚堞,柳断出晴楼。古寺藤烟夕,荒滩蓼水秋。 平沙看旧雁,落日更生愁。

春寒

寒云殢小溪,树树锁烟低。二月春将半,孤村莺未啼。花牵新水细,山背夕阳迷。 莫恨湖光冷,东风自不齐。

杨端本

杨端本,字树滋,号函东,潼关人。顺治壬辰进士,官临淄知县。有《潼水阁集》。

春暮

惜春春暮燕飞斜,日坐园林玩物华。井上旧垂金线柳,阶前新植玉兰花。逐贫不作 扬雄赋,解渴时烹陆羽茶。何用买山逃世外,万竿修竹自烟霞。

忆曹禹疏

余家渭水南,君家渭水北。盈盈渭川水,相望两岸侧。君令泰山西,余客泰山东。 峨峨泰岱山,巉岩横其中。昔望渭水波,今望泰山巅。夜夜海边月,朝朝山外烟。

秋声

秋声来何处,竦听情思怯。四顾寂无闻,微风生梧叶。萧飒林木鸣,万籁音相接。 淅沥数点雨,云潋山岚浥。作赋欧阳子,爽然秋意慊。

湖暮

倚槛湖方暮,山山横翠飞。水浮双塔动,树拥乱云归。铙鼓喧回棹,笙歌沸落晖。 钟声来远寺,隔岸响微微。

顾亭林卜居华山

谷有图南卧,卜邻古洞幽。莲开犹十丈,松老自千秋。扪虱应难识,翔鸿未可求。 不须丹诏至,野性白云留。

仙娥溪

川回大壑雨冥冥,十里嵯峨拱翠屏。溪水桃花流不尽,仙娥山外数峰青。

曹同统

曹同统,字能绍,号容庵,巢县人。顺治壬辰进士,授怀庆推官,历官东昌同知。 有《容庵诗集》。

中弁晩道

日落烟沙白,荒荒野色微。村寒牛影瘦,天阔雁行稀。谍骑冲风至,锄农荷月归。 此邦三异迹,默尔念前徽。

陈维国

陈维国,字大治,一字坦山,武陵人。顺治壬辰进士,官信阳知县。 有《坦山山 人集》。

客濠州别杨小陆

只此两狂客,空山喧酒声。长年别好友,竟夕慰深觥。松傲霜前色,梅孤雪里情。 尊中无限意,明日是归程。

桐城晤胡渚叟明府

一县烟岚合,山城吏似仙。闲情飞鸟外,公事落花前。偶和词人句,频酬酒客钱。 萧疏谁得识,坐月静鸣弦。

赵{山原}

赵{山原},字鲁{山眉},号长公。莱阳人。顺治壬辰进士,官万年知县。有《寒堂诗稿》。

晚泊天门山

孤舟逢日暮,晚宿傍山青。寒月三更出,长江一带明。病中添客泪,梦里落潮声。 何处栖飞鸟,萧萧万里情。 戚藩

戚藩,字价人,号蘧庵,江阴人,顺治壬辰进士,官安定知县。

灵隐寺

策杖行过旧虎林,翠屏深绕万松吟。寺连沧海朝烟白,塔入澄湖夕照阴。猿父呼来 都解呗,牧童歌去已忘音。喜逢支遁拈花示,响答鸣泉处处心。

【卷二十七】

黎士弘

黎士弘,字愧曾,长汀人。顺治甲午举人,由推官历官甘肃布政司参政。有《话素 斋集》。

登虔州塔顶同朱具臣南昌游云生

登临缘分事,吾自偶然来。孤远荡闻见,高危验胆才。长风牵璧立,众树领江回。 烟积山如幕,晴吹次第开。

佛祖峰山寺坐月

错绣诸峰夜色安,烟光树气积高寒。苍茫星汉容人立,喧寂林峦共佛看。凉月有怀成独笑,清宵无累况登山。纸屏细坐幽如梦,何处幽香满一栏。

石钟山癸卯四月, 时送仲弟宣岩之任寿春。

双钟峙中流,高低互相位。微风吹水波,万窍各鸣嘒。仰观造化心,雕镂亦为罪。濯濯苏眉山,捉笔工点缀。放舟绝壁下,领意得奇最。子弟与山川,韵事足图绘。夷考作记年,送子德兴尉。余来涉江涛,别弟趋吴会。古人今不殊,事迹偶相类。离怀虽黯然,妙得山水对。西风泥行舟,遂谋三日醉。

大言

小心事贵人,眉睫博意气。巢由拜马首,士亦各有志。呼来坐堂下,微筦烦顾视。 环指座上客,是子觉稍异。三公间九卿,勉矣行自致。驰归语细君,此是亲传示。

庄生未闻道,李耳故疏脱。干将不示人,铅刀称善割。古来青冢上,谁为表清浊。 彼哉柴桑君,耽诗诡寂寞。公田忍不收,乞食徒取薄。 马安称巧仕,潘生嗟宦拙。万物各枯菀,造化何区别。达士贱权奇,名花厌高格。 蟋蟀知风寒,鸿雁知霜冽。泛泛水中凫,稻梁谋亦得。

花发大堤西,花发大堤东。策马谁家子,蹀躞凌春风。行道各借问,名父忝上公。 郁郁守贫贱,执鞭甘所从。

永新道中即事

河水细如线,峰峰见兀硉。散石亘中流,奔雷喧日夕。山寒鸟不飞,微雨洒衣湿。 牵缆百尺高,隔树明人迹。薪烟望目劳,群虎见跳掷。长吏本凉德,敢怪尔充斥。四顾井邑 荒,吁嗟悼行役。

下水苦逆风,上水苦冻雨。雨冻手足僵,竟日行十里。岸花歇众芳,磷磷见水底。勉力事宵征,众声合邪许。孰知舟中人,心更劳胼胝。一官不自爱,致身等腐鼠。空歌《行路难》,艰辛用自取。

一山一山过,细雨鸣嘐嘐。西风号四野,壮士安能豪。嵯峨望城郭,中多蓬与蒿。鸡犬不闻声,灯焰空寂寥。老母隔江城,儿心中夜劳。仲弟陷文法,意外生波涛。日遣两儿去,急难京华路。会与少弟见,有泪如河注。念之摧心肝,焉得生羽翼。不如颠倒卧,庶几忘百虑。未明起披衣,残月犹在树。

印无数戊子西江兵变,十一月始平,废印数百,留南昌署中。哀强人之不义也,为 作《印无数》篇。

亦何累累,亦何辈辈。大者丞相尚书御史大夫章,细琐参军丞簿尉。大笥小簏声琅琅,还想当时尽朝贵。书生白面朝典铨,夕卷黄河拥高旆。豪奴千指坐索人,巨室高门闲过醉。一丸已堕睥睨墙,烧烛侯家方嫁妹。楚猴虽沐冠常裂,《春秋》大义应书贼。岂有中心事主为国恩,日日雕铜分暴客。生不足怜死不惜,阴风吹满秋灯湿。狼籍头颅杂土飞,独余废印高屋眷。

书来家弟遂已破贼大桥为志数语

南塘小儿弄兵戏,抹额红巾等山魅。夜切人肝作脯甘,对裂轻缯如破絮。杀人不死还等间,随上军门求补吏。山中日日报揭竿,百道军书勒簿尉。簿尉何能令请行,牙兵几队趋山际。昨日书来珍重看,云已破贼数十辈。留之不可诛不胜,细作爰书别党类。我闻此语心独欢,贤者宁不当如是。呜呼作贼不死死者冤,民不作贼将徒然。

己亥小寒走笔赠古林和尚

不见吾子十年矣,子来远渡西江水。拜子颜色为子欢,遂能解脱了生死。忆昔追随全盛日,破壁短檠同吮笔。规模贾董公孙书,指点云烟酣六籍。其时吾师杨长公,叔夜同里沈若水陈锡振俱劲敌。与叔胡生三十强,摩空作赋徐庾匹。各各心矜吾子贤,退让不敢齿行立。子家簪缨床满笏,群从诸郎庙廊属。子独游迹扫朱门,沧桑弹指逃空谷。贤者所为不可测,学孔学释非两截。大地应须截铁人,能穿虎豹探龙穴。往事陈言空浩浩,选佛归来年尚

少。老大还念嫁时裳,我为子语子应笑。三生石上灵岩山,欲得从君觅领要。

题于慧男集药地老人画帧

前年曾见壁上山,去年又看卷中树。道人丘壑自胸中,水水石石纷无数。使见所梦忆所历,叹者得息迷者悟。青原山上山如簇,何岭何峰是其族。我未入山见道人,欲向此山先礼足。譬如问鲭诣五侯,才过屠门已果腹。春音居士殊高致,抗首风尘仙作吏。前身要是白社人,乘闲便入青原寺。又乞五岳留真形,道人泼墨供游戏。我欲问君假齿图,沿溪处处咸相志。他日入山或不迷,不止盘礴领其意。

舟过建武夜行

不住因风好,能争半日程。船灯敲石火,人语渡河声。月上千峰立,霜深一雁鸣。 经年南北路,多半是宵征。

贵溪小隐岩

出郭无多路,斯山遂觉深。四时全雨色,长夏逼秋心。野馔分僧供,残碑与客寻。 谁能容小隐,弭节愧登临。

至南昌知周先生无恙且得手书庚子五日

到门惊喜公还在,痛定开函泪更流。万死才回明主顾,孤儿犹嘱故人收。众中薄命 谁能惜,意外微生荷独留。误尽闽南碑下客,无端北望哭西州。

九月同集蔡翼皇太守来青亭

绝胜亭台见远岗,相将高处待重阳。几行浊酒浇槐冷,尽启疏帘让菊香。人在他乡 知友重,客当佳序附官忙。朅来脱帽狂从事,手划银河数漏长。

九日晦再至南崖

是曾经到还如乍,置我真宜丘壑间。马上得全看树色,月中记两入秋山。快游尽兴怀才满,尘事经心侮欲删。勾漏沙床他日约,一峰一石与回环。

送别施愚山先生

先生七载湖西住,到处人能说使君。酌水自编良吏传,扶风新散讲堂文。半江烟雨催归棹,一日星辰涣小群。同在他乡仍惜别,相思嘱寄敬亭云。

来甘州一载矣尚未纪其风物夙昔交游问贻杂至特作六百字写怀用柬知我

万里黄河飞一线,五州棋错东西面。(兰州渡河而西为武威、张掖、酒泉、敦煌四郡。)大旗日落照孤城,画角声低迷故县。秦人百二夸山河,明驼马羌唱歌。硖水淙淙石齿

齿,祁连千仞高嵯峨。白头父老说前事,举边还指战场地。射残铁镞半段枪,得来换酒谋朝 醉。马兰苜蓿生沙州, 荒邮短驿连古沟。四月寒山催种麦, 风高六月犹披裘。夹道鳞鳞见番 族,放马满山羊满谷。天巴岁岁说防秋,未必饮河能果腹。(番族旧属西人,岁索牧畜,名 "讨天巴",边士防其出入。)河西僧人著黄衣,蚁蜉经卷银字肥。吞针罗什不长见,斗室维 摩仍有妻。或云此辈便其俗,要使羁縻压荒服。时平不问燕雀安,防微深恐鼠蛇伏。前生草 地纷请求,闭关却谢诚良筹。岂可鸿沟割项羽,宁容子敬分荆州。(前西人请畀草滩,不许。) 庙堂胜策坚壁垒,得使澂澜安弱水。曾无佛骨与仙才,来束单车结双轨。(弱水离山丹十里, 古县名删丹。) 书生落落真自豪,一斗伊凉笑尔曹。朝来起看雪山雪,夜卧贪窥星汉高。甘 州四山积雪, 经夏不消。金瓶新摘"青粿", 万颗匀圆荐红玉。(梨秋熟者曰"金瓶", 穀早登 者曰"青輠",葡萄一种曰"公领孙,"熟时紫圆绿盖,大小间垂,东南所未见也。)长枪江米 压囊香, 听尽甘州《垂手》曲。(歌舞有大、小《垂手》。)曲中何曲最断肠, 银笙吹月出 半衔。尊前铁石顽司马,肯教闲泪浇青衫。经年此处似差乐,土房煤瓮倾羊酪。譬如生长作 边人,那识金齑开碧阁。甘州陶工绝少,官廨俱以土覆。衙散清斋一事无,还能忆我前读书。 凿空博望出下策, 欲将缯币联康居。缯币东来千万轴, 单于城畔高粱肉。单于城去镇百里。 纵使贰师出渥洼,何如八骏追周穆。还想子公破月支,(张掖即大月支地。)当时壮节称魁 奇。而我不烦折一矢,谈笑欲狭前人规。几人称王几人帝,槐柯蚁蛭真儿戏。(张重华、吕 光、秃发乌孤、李暠、段业、沮渠蒙逊皆于河西僣伪号。) 重华空上建业疏,蒙逊解乞《搜 神记》。不知何代何王宫,阴房鬼火遮路红。彩虹已逐瓜蔓水,尺碣挂壁夸奇功。龙王庙有 西夏建桥碑。看乌西飞兔东走,功名富贵亦何有。巧鹳当径啄新蒲,跛羊卧路啮残柳。监仓 公子无乃愚,不算升斗量锱铢。作诗索句如追逋,胡为嘐嘐喘古徒。我不敢效我友逸,粗了 簿书吟抱膝。虎头燕颌百不须, 坐享清时懒投笔。

寄倪闇公汪舟次两翰林

细数平交真尔尔,我记汪子与倪子。倪子恢奇磊落人,驱毫使墨如烟雨。万卷读破龙威篇,廿年久贵长安纸,晚交汪子章江上,珠光剑气相向。我宰山县苦低眉,君临溪阁时微叹。三日两日走尺书,赖手清篇情肮脏。契阔经年限南北,不见故人好颜色。前秋我始渡江归,一读除书屐齿折。岂因王贡侈弹冠,祇爱枚贾车连辙。大液池头清似玉,圣人宏网收鸿鹄。耐饥且索东方米,时清肯费景文烛。昌黎好在续长编,未要柳州书屡促。忽忽怀今转念昔,天寒雪大酸风急。睛鹤久看沙苑飞,顾曲亭荒新燕入。有怀周栎园、伯衡两先生。何不早贵十年前,见君并辔传呼曰。短章写就特寄君,知君执卷挑灯立。

许珌

许珌, 字天玉, 号星亭, 侯官人。举人, 官安定知县。有《铁堂诗钞》。

水吉舟中同李竹西长芭彭陶暇守岁

中原犹未达,一月在风波。晚泊人烟少,残年贼骑多。客心依古堠,春色到寒蓑。 蛮地填兵甲,何时缚尉佗。

浙江

浮生尚飘泊,又作渡江人。战守留残垒,经过属暮春。湖声犹向越,海色更通闽。

不见任公子,苍茫望古津。

吴门听歌

如怜行路客,莫唱《竹枝词》。柳暗梁生冢,花深伍相祠。迎春歌扇急,落月舞花迟。无那弹《天宝》,临风起暮思。

留别鹰垂次来韵

朝来放弃罢高吟,老大徒羞华发侵。狗监已多妨荐语,龙门真有倦游心。秋风玉箸空关塞,落日金台自古今。明发别君转惆怅,不知何处更招寻。

河上寄韩固庵

十年复向帝京游,寥落金门索米秋。西掖名花供判事,北陵荒草对含愁。客心远泊 乌龙水,官火闲吟丹凤楼。诗赋似君真绝少,才人自古重秦州。

河上寄施愚山

仟郎大雅振鸣珂,此日相思下浊河。乘传才名天下少,惊人诗赋粤中多。孤舟野火 吟鹦鹉,古戍寒刁散骆驼。不尽萧骚芦荻月,欲乘秋色敬亭过。

钟山诗次杜于皇韵

孝陵陵上草萋萋,日落江南杜宇啼。金瓦久经麋鹿窜,玉环空锁凤凰栖。青氛大地 归科斗,紫气中天散鼓鼙。一自尊灵兹永蛰,才非曹植敢重题。

石人十二旧戎装,绣柱参差咽夕阳。朱雀埠前无木桁,乌龙洲上有沙场。暮烽侦海 边笳急,秋烧弥山宝物荒。玉队依然松柏老,铜驼零落泪双行。

御宿逶迤霜露寒,人闲玉碗惜凋残。新朝常护龙虒骑,高庙空劳獬豸冠。过阙谢翱 挥涕泪,吟诗杜甫奉心肝。堆名金粟仍无恙,漫说当年势翥盘。

崩湍坏道郁清秋,七孔桥前水不流。剩有黄花围石椁,绝无青鸟恋朱丘。经年置户 园丁散,垂老司香宫监愁。祇见长生荒苑鹿,月明犹带旧牌游。

访王贻上于慈仁寺双松下同作

骑马横过五都市,独数中原问王子。才闻近自泰山来,置身却在双松里。入门拔地摇穹苍,老树盘根浑四旁。白日蔽亏郁萧莽,樛枝拂拂栖凤凰。世间灵物忌孤美,此松殊有相连理。青铜降粒神仙家,黑铁修鳞帝王里。银栏绣砌徒岧峣,六月高寒气弗骄。科头其下吾与尔,摩崖索碣寻前朝。长啸悠悠自千古,虚坛忽听生雷雨。月石风泉迥绝尘,如入灵源不知处。因之雅欲游山东,齐州九点摩秦封。尔归岱侧吾闽海,明年野夫来看松。

吴绮

吴绮,字园次,号丰南,一号听翁,又号红豆词人,江都人。贡生,顺治甲午荐授 秘书院中书舍人,历官湖州知府。有《林蕙堂集》。

采桑篇

紫陌春风路,柔条压春树。晓起自携筐,盈盈采桑去。非直为蚕饥,畏郎无好衣。 银钩正欲采,惊出黄莺飞。莺飞何决绝,踏得桑枝折。宁知桑树中,更有离人别。

青山下望黄将军墓道

霜花入江江树红,半江落日摇悲风。此时客向青山路,遥见松楸窜狐兔。推篷指问 黄头郎, 云是将军神道处。将军束发事边疆,浴血榆关四十霜。射雕并挽双飞,回马常持半 **叚枪。曾经搏战乌桓贼,手戮长鲸襄水赤。上相频分卧内符,诸侯竞屈辕门膝。手缚渠魁未** 报恩,渔阳鼓入延秋门。西京已下仙人泪,南国还招帝子魂。马渡琅琊从此化,将军定策同 王谢。岂知艳曲号《无愁》,亚子空呼李天下。天下龙髯痛未消,临春明月响琼箫。中涓厮 养横宫锦,丞相家儿插坐貂。就中更有陈留子,宫门夜半传黄纸。尽逐元丰旧党人,半闲堂 里烟尘起。传檄言诛刁与刘,武昌杨柳作边愁。岩疆已付中行说,壮节空思祖豫州。将军义 愤填怀抱,洗日虞渊何足道。一朝失计在移军,清风小用临江啸。倚剑空持南壁天,北来烽 火照甘泉。横江零落千寻索,下殿仓皇七宝鞭。此时将军镇姑熟,宫中夜到驱黄犊。紫髯怒 吼阵云昏,《虞歌》夜泣蛾眉绿。平明战鼓动江鸦,裹创犹呼御赐騧。鸣弦岂意来鹑尾,拔 刃空闻叱虎牙。可怜魂染胭脂血,蒲首归来事难说。几年墓木拱白杨,夜夜犹然叫鶗鴂。我 闻此语心伤悲,为指江涘之高垒。当年庙算列四镇,此地实为君封陲。痴儿不了公家事,模 糊颠倒山河字。骂贼不及雷海青,弄兵窃效田承嗣。将军抗表建牙旌,讨逆应先李茂贞。一 喝逆流万人死,摧枯拉朽无坚营。楼烦出射弓矢堕,锦裘绣帽如雷火。紫电横飞灵宝刀,红 冰腻结连环锁。至今白骨满苍山,折戟犹存战血斑。竖子无成悲广武,词人多恨哭江南。吁 嗟将军复何有,从来运数多阳九。留守魂游宋氏河,监军泪滴唐家酒。吾徒意气岂能灰,当 时所用违其才。夕阳下山黄叶雨,江风飒飒魂归来。

闻其年以博学宏词荐为赋短歌

陈郎五年不得意,青衫颓落凌云气。忽闻天子下徵书,乡里小儿叫奇事。兵兴以后 文章贱,牙郎估客乘高幰。尽谓黄金可致身,公卿那用张华研。吾侪有字何堪煮,贱卖长门 人不与。妻儿大笑乃公痴,何如且学扬州贾。陈郎本在泥途中,一朝走入甘泉宫。掀髯脱却 犊鼻衤军,乃知吾道非终穷。吁嗟小儿小儿汝莫嗔,当今天子重才人。

芜城歌赠送屈翁山

芜城十月霜飞早,游子相逢惜秋草。镂管争从月下吟,瑶觞竞向花前倒。忽闻屈子 天际来,座中众客欢如雷。共言意气为君发,共言怀抱为君开。闻君平生不得志,读尽奇书 有奇事。万里麻鞋讯故人,千金宝剑留深意。踏遍人间古战场,掉头不肯事侯王。弹琴独看 文君鬓,典酒频销陆贾装。几年漂泊人难测,憔悴兰成归未得。八月槎浮桂海潮,六朝山爱 斜阳色。偶然乘兴来观涛,明月同寻廿四桥。只有客怜词客赋,更无人听玉人箫。竹西握手 天将雪,满路西风打黄叶。送君又上白门舡,秋尽垂杨不堪折。杜牧凄凉梦懒成,狂歌一曲 别离情。西园宾客皆云散,独听寒江暮雨声。

长椿寺夜坐对月同仲潜作

爱寂投僧宿,君来亦不还。残春生静夜,明月老空山。幽境能相许,尘心自不闲。 淡然同小坐,风叶打柴关。

重阳后三日再集采友堂

元卿夜启关,蜡屐集花间。月静群鸦息,天高一雁还。世情逢酒淡,客计向秋闲。 更有西山约,枫林叶正斑。

赠雨青上人

支公能好鹤,闭户话香林。庭树一何静,湖光相与深。帆开知雨霁,磬响落檐阴。 我自劳劳者,逢君生远心。

归云庵夜泛同愚山阮怀诸子

山晚离城远,寒新怯暮游。乱峰争落日,一径入深秋。清兴因官懒,诗名借客留。 何时能解绂,终夕对沧州。

泊八里滩

渐远青塘路,篷窗懒更开。山烟孤塔回,湖色乱帆来。吾道存书卷,余生话酒杯。 寄言鸥鸟伴,从此莫相猜。

同云止过石公房

寒蕉拂拂与窗齐,老碧新香坐欲迷。一钵软烟梧子饭,半锄凉雨菊花泥。闲支短杖调饥鹤,学定空床过午鸡。却愧好山从结梦,明朝秋句不堪携。

送石潭归里

雪尽垂杨已渐深,临歧折赠欲沾襟。三同身世兼忧喜,四杰才华半古今。严谴原非 真主意,贫归长系故人心。东门一送飞旌远,庄舄凄凉有越吟。

夏日清啸楼晚望

偶寄闲身不当归,凭栏尝对水烟微。鸟追斜日穿虹去,龙斗惊雷挟甫飞。近海潮声 秋隐隐,过江山色晚依依。芦中鼓枻无人在,憔悴乾坤一钓矶。

红鹅馆纪事

疏懒偏宜近墨庄,披衣侵晓过林塘。桐阴照槛客窗绿,荷叶满池人语香。江雨欲来 鱼竞喜,山风忽动鹤先凉。不辞永日摊书坐,索有邻家煮柘浆。

再至金陵和田纶霞

频年飘泊竟无成,百不如人笑老伧。学道几经居药市,著书从欲赋《芜城》。原难 富贵宁须悔,便作神仙未免情。五岳纵游何不可,那堪重入旧瑶京。

梅清

梅清,字渊公,号瞿山,宣城人。顺治甲午举人。有《天延阁删后诗》。

东岳

作镇纪崇望,应星协神区。乃憔群岳宗,盘礴临东隅。峻哉何巍巍,悬磴垂云衢。半壁俯全鲁,远影缭勾吴。我来春夏交,瑶草方芬敷。始临一嶂断,忽出众壑殊。次第开天 阊,海色万里舒。树挂飞蜃长,石蹋扶桑孤。羡门如可招,挟翼将同驱。乃知灵境别,旷览良不虚。冥怀入神明,喟焉思真符。风雨若有俟,瑞应岂遂辜。方期传遥踪,封禅奏成书。

神宫郁岧峣,曾岩露晶荧。遥望飞甍高,惊指朝霞升。陟磴耀流目,跻庭肃群心。 我欲问太乙,陈词叩幽沈。射牛典既遐,瘗玉迹亦湮。俯仰眷春祺,惟此褕翟尊。范金焕宝服,色映河汉明。幡幢何飘飖,侍从罗群星。灵贶一以昭,对越拟紫宸。厥祀匪徒然,锡胤蕃斯人。载协勾萌期,言应郊禖辰。灵雨润遥泽,惠风澹群氛。浩矣《青阳歌》,长此徽箫笙。

石公从黄山来宛见贻佳画答以长歌

我陟岱宗三万丈,倒瞷扶桑起泱漭。手摘片云归江乐,梦中缥缈碧霞上。碧霞峰正青,忽然接黄海。石公贻我图,恍惚不可解。绝巘阴森四壁寒,云峦窅冥惊漫漫。玉屏五老争拱立,海门九龙纷乘骖。骤疑仙峤合,转讶真宰通。卧游当岳表,乃在天都峰。天都之奇奇莫纪,我公收拾奚囊里。掷将幻笔落人间,遂使轩辕曾不死。我写泰山云,云向石涛飞。公写黄山云,云染瞿硎衣。白云满眼无时尽,云根冉冉归灵境。何时公向岱颠游,看余已发黄山兴。

题画杂诗

寒云寒树护山家、岩壑无人一径斜。策杖行吟独惆怅,几枝春色到梅花。

秋空漠漠晓岚清,落木萧萧野水平。愁向疏林停短棹,天边鸿雁最关情。

上去江陵下石城,乱帆都向夕阳明。诗人好为江干写,莫使青莲独擅名。

朝来松响拂溪流,六月寒声似晚秋。不是临湖亭上客,谁容此下一科头。

为怜叔夜并怜松,写入生绡对影重。但使抚弦能作调,何须遥问赤城峰。

琴溪

高士遗台东磵东,俯临百尺之飞虹。云卷云舒绝壁下,花开花落空潭中。丹砂炼去山俱寂,赤鲤骑归路不通。叹息往来车马客,几人招手问琴公。

题画答堵廉生

君乡谷水清无敌, 酌水时时更忆君。寄问松风双塔静, 可能忘却敬亭云。

午夜歌

瞿硎山上鹤长飞,瞿硎山中人未归。苍松依石坐吹笛,白云好我霑裳衣。白云自流 日将暮,花枝冥冥隔溪路。腾身直上东山头,骑鹤乘风欲飞去。仙人久别今当还,清宵忽渡 海中山。到来拍肩更相笑,万岁一朝如等闲。刁斗击精悍,歌舞杨芬芳。空岩无事此良夜, 人间欢怨争茫茫。人间欢怨争茫茫,午夜夜时谁短长。

越中漫兴

秋风一骑越山清,客路东来移我清。梅市逢人仙是吏,乌程作县酒为名。

查诗继

查诗继,字二南,号愚溪,又号樊村,海盐籍海宁人。顺治甲午举人,官霍丘知县。 有《深宁斋诗集》。

马草行

铁甲三千动地来,马蹄杂沓如轰雷。军有供顿马有穀,县官奔走如奴仆。刍茭比屋 困诛求,府胥索钱不即收。君不见江山城头新鬼哭,招魂无人乌啄肉。

炮夫行

十月王师捕山贼,县官追呼炮夫急。一六当头领雇夫,百夫押以衙兵十。此行只向乌伤去,不比骊山送徒戍。况复王官如父兄,蓑笠糇粮为尔具。恶少奸胥暗结连,一夫索钱八十千。讹言街巷声喧阗,幕府飞箭龙旗鲜。阴雨泥泞满天黑,村邻有夫招不得。素封华屋尚张皇,小户单丁躯命逼。县官见此中心哀,走谒太守申藩台。输金雇役从民愿,税户欢呼打桨回。记得前年十月半,仓前粮艘帆影乱。只今米烂未输租,又值役夫连海岸。父母咨嗟望太平,少年喜见烟尘生。衣租食税寻常事,拜将封侯无尔名。

后炮夫行

岁莫喧喧夜捉人,当门县尉点行频。押送江干下江舶,王牌忽下哀劳民。蒙恩讙噪声动地,得钱脱役夸亲邻。谁知羽书传旦暮,王师仓猝西兴渡。桃符竹爆空酸辛,菜饵饤盘将不去。雨雪江山烟火稀,白骨支撑满前路。行到金华呈太守,幕府无文停待久。白昼呼群掠远村,醉围解尉攒拳殴。解尉獐徨无羽翰,科钱营脱离险艰。黠徒乘机从此逝,追至兰谿半不还。县差承帖追逋目,鞭笞狼籍空劳鹿,归时老幼尽欢欣,重去难将消息闻。男儿轻死贵死敌,何不弓剑学从军。

后马草行

四百八十炮夫行,马草十万连催征。县官怜民省民解,牌差敛费纷纵横。前年解钱塘,今年解信安。信安山多稻草少,户口流亡断飞鸟。营盘草多要折钱,解吏索钱还索草。去年湿草烂江干,草户于今杖血丹。安得马嘶息海岸,樵歌出村闻夜半。

曾畹

曾畹,原名传镫,字庭闻,宁夏籍宁都人。顺治甲午举人。有《金石堂集》。

梅下望家信

又觉春风到,梅花信不来,陇头赫连国,庾岭郁孤台。地以青天接,书难白首开。 暂收边徼泪,长啸大江回。

和黄冈杜于皇澂江赠诗

此生犹见汝,幸汝不佯狂。身世看秋箨,乾坤正夕阳。台城穷彻骨,夏浦饱经霜。 谩说工诗赋,青钗鬓发苍。

丙申自秦中归送弟烂就耕乌石陇每羡西周古,千家尚力耕。高原无奥草,春日少人 行。袯襫空山满,衣冠乱世轻。鹿门归去好,闭户有松声。

○晴川阁

大别排云住, 楚山一望开。乱流争岁月, 孤屿下楼台。高浪沱潜出, 夕阳嶓冢来。 湖南征战苦, 几处角声哀。

赠顾松交吏部

直觉东归似故乡,每逢佳节就君觞。客中文宴如羊曼,吴下名园数辟疆。芳草画凝歌扇绿,落花春散舞衣香。东山未许频游玩,早晚徵书发建章。

鸣沙洲

不见黄河春气动,却从沙碛辨阴晴。流澌著水天皆冻,大漠无风山自鸣。饮马浪寻 荒烧窟,射雕贪出苦泉营。传闻烽火年来息,张轨隗嚣已尽平。 题万年少年伯显西草堂

歌风台下夜乌啼,郁郁山庄古木齐。半亩桑田人去住,一湖春水屋东西。星临丰沛 瞻龙龙,地接青徐杂鼓鼙。独把渔竿恁月钓,门前草色正萋萋。

王泽宏

王泽宏, 字涓来, 黄冈人。顺治乙未进士, 官至礼部尚书。有《吴庐集》。

易州新使院咏松

去年手植新松树,碧叶青枝取次阴。幹长凌云应有日,后人谁识岁寒心。

买花

卖花扌詹上露才乾,野老移来满药阑。抛却故山花事盛,翻来燕市买花看。

罗为赓

罗为赓,字西溪,南充人。顺治甲午举人,官行人司行人。

过合州

放舟天未晓,梦醒日初晴,云绘远山色,江流急雨声。岸沙留虎沙,炊霭见荒城,在昔繁华地,荒凉感客情。

林尧华

林尧华,字闻伯,莆田人。顺治甲午举人,官榆次知县。有《浣亭诗略》。

去榆次县作

敝庐风雨足苔矶,句漏寻砂觉昨非。菱米有租充石鼎,荃丝为布剪山衣。诗情独往 蚕抽茧,酒兴频年鹢退飞。闻道闽南开市舶,过江通印子鱼肥。

李瑨

李瑨,字宕山,渠县人。顺治甲午举人,官凤阳知县。有《片石齐集》。

闻笛

晚霁江城夜气清,寂寥孤月对愁明。谁携羌塞三更笛,吹作吴山十月声。岂有梅花 开更落,自惊杨柳折还生。天边旧业归何日,为尔今宵梦不成。

榕城杂咏

民力东南久驿骚,尚闻飞舰欲凌涛。将军自许铜柱,长吏谁曾过石壕。萏草夜呼朝 市闭,海田春隔缭垣高。何当借箸筹方略,原罢乘风破浪艘。

别孙无燂甓社棠阴晚未残,相逢谁复问南冠。令君座上香三接,公子门前铗几弹。 久客未闻生马角,累人何止愧猪肝。拟将千尺珠湖水,深比桃花一样看。

☆陶忄岑 陶忄岑,字冰修,嘉善人。顺治甲午举人,官天台教谕。

集徐文在山园

草堂倚绝巇,山色映朝晖。晴日凝花气,香风到客衣。霜崖丹树回,竹径碧云飞,况是登高节,长吟坐翠微。

同诸子游石梁时张九夏不至

丹崖万仞倚天高,临水登山迁彩毫。金岭秋风驰列骑,石梁落日挂寒涛。刘根自是 乘霞客,子晋宁嫌控鹤劳。窃怪季应招不至,憨然亭下续《离骚》。

孙中彖

孙中彖,字易公,号莲溪,桐城人。顺治甲午举人。有《楼月堂诗集》。

秋日送戴山民游豫章

北山高枕卧烟梦,送尔长征感慨多。猿狖夜啼孤岭月,鱼龙秋静五湖波。尊前怨别 携吴剑,客裏惊心听楚歌。若上滕王高阁望,西山南浦近如何?

陈忱

陈忱,字用亶,秀水人。顺治甲午副贡。有《诚斋诗集》。

苕城雪中归

孤城门未启,风雪一舟停。村店茅柴酒,官塘牧马亭。逼寒头转白,仄岸草犹青。 岁晏归心迫,乡音易动听。

蒋玉立

蒋玉立,字亭彦,嘉善人。顺治甲午副贡。有《泰茹堂集》。

渡江

江流九派尽朝宗, 六代繁华怅旧踪。千里云浮瓜步树, 片帆风送蒜山钟。莺花半落 愁边过, 烽火频年客裏逢。五岳尚赊他日原, 何时汗漫一相从。

寄魏交让

青郊结伴共相招,白社风流尚未遥。日暖莺声闻柳陌,春深花落转蘭桡。骚人自纪 庚寅岁,旅客重过丁卯桥。我念离群空对月,怀君江上影萧萧。

陈凯永

陈凯永,字雝期,号学山,海宁人。顺治乙未进士,官至工部尚书。谥文和。

依韵酬念祖弟归应省试

河桥折柳怅难留,且试驱车历九州。芳草平沙逢驿骑,斜阳深树见山楼。洛中已识《三都赋》,江上休披六月裘。桂子秋风应早发,好携彩笔渡金沟。

田种玉

田种玉,字公琢,宛平人。顺治乙未进士,改庶吉士,授编修,官至礼部侍郎,加 工部尚书、太子少传。

诗话:公琢以顺治甲午举顺天乡试第一。明年,即登第。回翔台阁,刚介不谐俗。 左授奉天府丞,乞归,卜居易水,莳圃自给。康熙癸巳,年逾八十,景陵询顺治中科目旧臣, 存问进秩。又数年,乃卒。

海淀

清秋人意豁,引兴到郊西。金谷昔辉映,濠梁今品题。插天石剑矗,指地柳丝齐。 静悟疑身隐,荷香满袖携。

徐旭龄

徐旭龄,字元文,号敬庵,钱塘人。顺治乙未进士,官至漕运总督。谥清献。

诗话:清献父死于寇,行求瘗所,以梦兆得之。历官清介有声,在都居槐市斜街, 出都后赵吉士给谏继居之,号曰"寄园",为一时城南觞咏之地。

送吴次公游蓬莱兼呈沈留侯

为厌风尘作客难,且依仙吏策轻鞍。燕台碧树云初转,秦望神芝露未乾。岂有侯门 怜骏骨,好从海客问金丹。酒徒去住忽无定,离思中宵月里看。

图尔宸

图尔宸,字自中,满洲旗人。顺治乙未满洲榜一甲一名进士,授修撰,官至工部侍郎。

晚钟

梵放忽然寂,前山闻暝钟。声催斜景入,路隔翠微重。老树警眠鹤,空波迎古龙。 予心澹无虑,真欲契禅宗。

晚步

野色初开宿雾清,晚晴天气嫩凉生。半陂新水鹭莺立,一架落红鶗鴂鸣。霁后烟痕 连树碧,雨余虹影接霞明。蒋生三径无人到,怊怅行吟句未成。

史大成

史大成,字及超,号立盦,鄞县人。顺治乙未一甲一名进士,授修撰,官至礼部左 侍郎兼翰林学士。有《八行堂集》。

送张越青给谏终养归里

是处归春雁,乌飞犹上林。多君爱日疏,先我望云心。臣齿幸还少,主恩良自深。 望尘追可及,策马莫骎骎。

范潞公去官归里

山色故园好, 妒君归及春。诗从携杖得, 名以去官真。林筍甘于蜜, 湖莼绿似蘋。 试看纸尾署, 谁不叹风尘。

杨雍建

杨雍建,字自西,号以斋,海宁人。顺治乙未进士,授知县,官至兵部左侍郎。有 《弗过轩诗钞》。

观风台

城上高台接混茫,天都风物郁苍苍。云封雉堞千村绕,地并乌聊六水长。见说春溪 仍乐土,安知歙浦一残疆。黄峰极目徒相望,赢得愁思满客囊。

李赞元

李赞元,初名立,字望石,大嵩卫人。顺治乙未进士,改庶吉士,授御史,官至兵部侍郎。有《滴翠园集》。

春日登宏济寺

纵览旷无际,长江一望深。危亭穿石罅,密树散春阴。帆影当窗暝,钟声入浦沉。 盘桓千仞上,徙倚自长吟。

锡山晚泊

片艇寻幽胜,溪行几曲湾。夕阳微照水,雪影尽归山。汀鹭河边去,渔舟浦外还。 旗亭何处问,树下绿阴闲。

孙光祀

孙光祀,字怍庭,号溯玉,平阴人。顺治乙未进士,改庶吉士,由给事中官至兵部 侍郎。有《胆余轩集》。

吴耕方招饮观菊

秋光澄几牖,入夜有余清。丛菊绚屋壁,环向各为情。华镫更交辉,群蕊滋晶莹。 徵歌引羽商,箫管问瑶笙。曲缓落轻尘,缥缈度新声。气静欲息机,那复世味撄。嗟彼利禄客,役役多所营。何如付澹忘,杯酒慰平生。微醺醒归路,天半斗参横。

与郝雪海徐孟枢同事武闱赋赠

纵谈晨夕慰如何,柱史忧时感慨多。谁靖烽烟蟠地轴,拟攀星汉洗天河。空闻甲胄 盈边垒,可有熊罴入网罗。但愿四方销战伐,无劳圣主《大风歌》。

刘芳躅

刘芳躅,字增美,号钟山,宛平人。顺治乙未进士,改庶吉士,授编修,官至工部侍郎。

曲阜晚眺和朱竹垞韵

孔庭释菜后,携客步莓苔。牺象汤孙彻,金丝鲁殿开。牲碑工拓就,蓍草马回。愧少《春秋》癖,言旋罢讲台。

綦汝楫

綦汝楫,字松友,高密人。顺治乙未进士,改庶吉士,授编修,历官内弘文院学士。 有《四友堂诗》。

送单牧之赴任灌阳

建陵迢递半年程,灌水争如密水清。月静千家闻虎啸,峰回万树听猿声。依人翡翠 巢官阁,夹道榔接驿城。报最何劳三载久,于今南国已休兵。

移居邻王茂衍方伯

薄宦居难定,移来思不穷。高楼晴有月,老树夜多风。阅世游将倦,怀乡梦欲通。 南邻词赋客,恬澹此心同。

张惟赤

张惟赤,字侗孩,号螺浮,海盐人。顺治乙未进士,历官工科给事中。有《退思轩诗集》。

东郡七夕立秋

光岳楼前暑气收,断云疏雨送扁舟。关河暝色催碪近,海岱烟岚入树浮。天上双星 方渡汉,人间两鬓又惊秋。明朝玉笛声凄切,风起黄榆白雁愁。

梁熙

梁熙,字曰缉,号晰次,鄢陵人。顺治乙未进士,由知县历官御史。有《晰次斋稿》。

书砦居屋壁

阴气昏白日,冻雀噪暮枝。徘徊如有待,纡徐掩户迟。念昨愁不寐,悬席透夜飔。隙月点霜被,病骨冷难支。断墙集野砾,遂若惬幽私。烧灯拾僵蠹,竹素欣相披。侧身还怅望,儒术欲何为。土壁摇寒影,萧条十年思。

去秦

青阳催淑景,林麓一朝新。鸟鸣东郊路,飘然今去秦。惟昔抗遐想,岂期傍风尘。蒲鞭违夙愿,中夜自酸辛。将投衡泌老,翻作京国人。潦倒时何济,展转志欲伸。父老壶浆惠,道周拥劝频。今年雨泽足,君不待芳春。对此心恻恻,幽怀未易陈。知尔难忘旧,泪眼寄渭滨。

千午出汴城五年不复经过丁亥计偕循内堤望坏垣有悲往事

斯城仍聚水,过客欲招魂。惨目今如见,微生昔竟存。民终煎市釜,寇自荡宫门。 寇乘筏入周府,复烧西城门楼。河伯浮余息,临流永戴恩。

咸阳

青门昔傍渭滨行,岂意秋风到渭城。不尽寒波斜日动,可怜荒野暮云平。雄图过眼 迷三辅,别酒当歌叠四声。槐里宵深残烛下,还将杂记阅《西京》。 早寒

秋风吹雨尝如此,不合萧萧入客耳。碧草摇风湿欲翻,玄蝉抱叶泠然止。祇林一卧 岁时阑,可奈无衣悲早寒。悲歌乍放声还歇,今日谁听《行路难》。

雨中遣怀和刘伯启韵

无镫弹时少,为园闭日长。匡床秋得適,布被雨知凉。树许江潭赋,花因栗里香。 平生萧瑟意,身世好谁商。

潼关

川原缭绕望中收,西映残阳旧戍楼。形势长连三辅壮,风云自涌大河流。泥封函谷 无诸国,瓜种东陵有故侯。还忆繁台沦陷日,曾开玉帐控中州。

张注庆

张注庆,字元长,号曲山,阆中人,顺治乙未进士,官御史,巡按广东。

濯足仙女潭同费此度作

濯足仙女潭,潭水清且洁。轻儵出其间,鳞次悉成列。长挹清流香,芳饵非所悦。 猿啼万山云,渔歌两岸雪。我友醉浊醪,为探冯夷穴。数咏吴隐诗,不见心如结。

周宸藻

周宸藻,字端臣,号质庵,嘉善人。顺治乙未进士,改庶吉士,授御史。有《柿叶斋》、《自东》、《客游》等集。

张稚恭中翰招同高念侣副宪王兰陔水部湖舫宴集

晴湖如练水云收,画舫相携兴自幽。几处柳阴浮绿蚁,谁家花影傍朱楼。回思聚散 怜佳会,过眼风华感昔游。搔首斜阳频怅望,乾坤何地是沧洲。

秋怀

忆昔曾看禁苑花,恩深宁敢效《怀沙》。病收陶令三秋菊,贫卖青门五色瓜。丘壑 道存惟我辈,江湖归老已无家。不堪往事空搔首,独立苍茫起暮霞。

傅扆

傅扆,字兰生,一字彤臣,号丽农,山东新城人。顺治乙未进士,由推官历官御史。 有《瀛海》、《燕居》、《柏台》、《于役》、《南游》、《家居》、《美芹》诸集。

广川道中和贻上韵

道旁故垒跨连营,积雪侵云势欲平。莫笑角巾无武略,禁中颇牧是书生。

丁澎

丁澎,字飞涛,号乐园,仁和人。顺治乙未进士,历官礼部郎中。有《扶荔堂诗集》。

酬吴司成梅村

《风》《雅》久淹没,延陵抱幽愫。博涉慕马卿,遐览追谢傅。羲轮跃咸池,群星灿奔赴。琨瑶厉秋霜,淋响谐宝璐。青云旷千载,鸾凤相追步。惊飙动紫闼,摇落《思玄赋》。 玉池明光草,金茎茂陵树。宫商纷迭陈,斯音独《韶頀》。

寻聚远楼故迹感旧

层楼嵲吸云溶溶,下瞰缥缈之孤峰。巉岩环拱若列戟,喷泉倒出双飞龙。湖山无恙城郭改,老树突存千丈松。忆昔高宗常驻跸,南渡朝廷全盛日。君王吟坐爱此楼,月榭梅坡最清逸。和宁门外提点呼,御舟传唤戏西湖。教坊杂进太平曲,《六么》爨赚纷笙竽。王侥角牴林赛舞,缠头乱掷红氍毹。宸游喜与民同乐,宝骑香车日交错。北府兵厨雪王醅,瓦子勾栏银凿落。箫声忽起熙春楼,点花牌动青丝路。争看吴怜唱《柘枝》,山鸟不啼风雨索。四百年来往事非,铜驼草深萤火飞。朝朝松柏西泠路,何处梨花无燕归。云鬟翠饰交龙钿,熹庙繁华眼犹见。居人尚指玉津园,画船箫鼓喧波面。红裙低拜鄂王祠,银筝细撚平章院。一旦黄尘动地来,绮罗香散成蒿菜。狮子巷中土花落,酒市墟荒络纬哀。樵采时闻歌《敕勒》,粉堞悲笳吹《落梅》。不见南朝旧乌鹊,至今长绕越王台。

送刘石生之秦

万里咸阳道,三年复此行。雁声寒渭水,秋色上蒲城。日蚀秦碑断,天空汉畤平。 尚留双剑在,风雨试长鸣。

野眺

秋原落日俯长谿,倚暮看山独杖藜。满目蒲菰双岛外,几家烟火万峰西。泉倾古洞 云偏出,人在青冥鸟乱啼。精舍不殊寻柳谷,惟令许掾得幽栖。

左莱阳著书宅

生平苦忆左莱州, 谪去龙沙万里流。按曲能传中散调, 遗书应耻茂陵求。黄榆夜雪长驱犊, 紫塞春风几换裘。潦倒暮年夸健笔,至今辞赋满沧洲。

报宋荔裳观察

风起卢龙急雁行,几年归梦渡渔阳。髡斜季布藏车下,钩党苻融泣路旁。马怯危桥 冰汩汩,鹳鸣横岭月苍苍。乾葵棘兔惊秋晚,不敢逢人问故乡。

登岱

翠微宫殿俯危峦,岭坂逶迤更几盘。天近扶桑长不夜,月明瑶草易生寒。松鸣越观 留山鬼,鸟啄秦碑净石坛。七十二君封禅地,回中风雨想和銮。

孤悬海岳枕神洲,得供卢敖拄杖游。天外数峰开汉畤,星边九点辨齐州。清宵鹳搏 浮云落,古洞龙吟断壑流。人在碧城看夜色,芙蓉何处接层楼。

飘渺神宫霄汉间, 丹梯突兀迥难攀。苍龙峪窈云归洞, 白鹤祠孤雪满山。呼吸自能通帝座, 风烟原不到人寰。未逢刻石千年事, 《梁父吟》成独往还。

千丈悬崖撼石闾, 扪萝叠磴倒衣裾。孤峰半落天疑尽, 绝顶平临日乍舒。帝女珠宫 喧象珮, 仙官绛节驻銮车。白云尚见封中起, 笙鹤如闻度碧虚。

刘体仁

刘体仁,字公,颍川卫人。顺治乙未进士,历官吏部郎中。有《七颂堂集》。

松村访傅青主先生

城外好风日,骑驴投谷口。双塔出深松,历村翻在后。既涉石子溪,乃望岩间牖。柴门过樵牧,试问在家否。野色照须眉,下阶笑执手。生平良内愧,出言犹色忸。泪睫述家门,呼儿具杯酒。泛爱答夙心,所言皆师友。移情纵谈谐,遂忘风尘久。日暮徒依依,中心亦何有。

送戴务旃游华山

夜谈太华奇,朝起理轻策。似子独往意,自然生羽翮。我无济胜具,心悬神仙宅。 椓壁闻蚁缘,索度或猱掷。即至玉女盆,莲花岂堪摘。颇穷造化由,能识巨灵擘。一身出天 地,笑看培塿积。归来毛髓异,定跨茅龙脊。

赠归元公

归生声名满天地,词倒峡流腹经笥。看山不计沽酒钱,对客转喉多触忌。口虽生花家屡空,黄金不肯谒王公。萧骚星鬓对尊酒,乌丝挥洒蜡炬红。岁暮一舟浮震泽,第二泉边我蹑屐。相逢大笑把君衣,枫楸丹黄霜烟白。令君好客如临邛,狂谈高咏争为工。深杯如泻三山海,泛君舌上青芙蓉。文采风流有先后,君家太仆如北斗。一时潦倒何足云,星日光芒自不朽。君今潦倒知者谁,真成历落复嵚崎。寒波捩柁情无极,清颍藏名理钓丝。

刘元徵

刘元徵,字伯诚,号梦闱,大名人。顺治乙未进士,历官刑部郎中。有《培园诗集》。

登京口玉山清音阁

策杖蹑江巘,临风倚梵楼。秋天出远树,夕照见归舟。清磬云中发,惊涛槛底流。 坐来尘境隔,疑是御风游。

太平刘松舟别驾席上口占

江云惜别年华易,筇市论交意气雄。万里行踪惊去住,百年身世感穷通。月明城郭潮声满,雨霁池台暑气空。好客中郎还倒屐,倦游司马自飘蓬。

李继白

李继白,字梦沙,临漳人。顺治乙未进士,由知县历官户部员外郎。有《望古斋集》。

虎丘寺

虎丘游,雨散花飞点石头。曲径迷离山向背,云房深阒树春秋。梅舒冷艳香生阁,茶试新泉(缺见原书不清楚)向五贤祠上望,使君才不愧苏州。

邱象升

邱象升,字曙戒,江苏山阳人。顺治乙未进士,改庶吉士,授编修,历官大理寺左 寺副。有《鷇音》、《入燕》、《岭海》、《白云草堂》诸集。

江上杂兴

白门霜落柳条枯,谁买银鳞过酒垆。万里行人千里雁,夕阳相对下菰芦。

清远峡

委折江如线,锋棱势益增。晓昏云气变,雷雨石痕崩。洞古空猿迹,庵荒暗佛镫。 客心愁入暮,高峡尚层层。

苦竹渡

夕阳残影没,衰眼翳长空。树暗惊人语,溪寒避虎风。戒心齐击柝,野火乱烧丛。 前路津门是,星华望未通。

杨继经

杨继经,字传人,蕲水人。顺治乙未进士,官大理寺评事。有《菊庐诗集》。

忆玉台山春晓亭

玉台芝老狼烟矗,三十年前山尽秃。玉台花发春雨深,又向岩边结茅屋。屋前寂历春晓亭,春花烂漫春山青。清泉欲断不复断,春鸟未听时可听。三年此别意长往,石门苔磴隔尘壤。昨夜镫前梦落花,依稀似到山亭上。

宿智印禅师道场

翠壁苍崖接泬寥,参差黛巘倚云霄。夜寒玄豹啼林密,春暖骊龙听法遥。金铎宝幢 传佛偈,石梯残字见南朝。偶来欲脱荷衣去,惭愧无因挂一瓢。

忆蕲上旧居

五柳思归不得归,桃花开后鳜鱼肥。几时为掉轻舟去,自到湖边放鹤飞。

曹申吉

曹申吉,字锡余,别号澹余,安丘人。顺治乙未进士,官至贵州巡抚。有《澹余诗选》。

宛丘春日行

欲雨不雨春色深,青青嫩草俯墙阴。几树繁花开欲尽,一丛弱竹不成林。竹影花光时映水,鸟飞未动声先起。忆向江边怨去年,却来湖上思千里。湖上韶华正可怜,绕城春水尽渔船。鸥鹭自随云上下,楼台直共水沦涟。隄上谁家新种柳,袅袅游丝纷左右。燕至欣逢上巳前,莺啼已过清明后。上巳清明烟色浓,太皞陵畔数株松。宛丘自有西湖乐,梦里青峰三四重。

听歌者周生

参军绝技出天然,曾侍开元供奉筵。几部《龟兹》零落尽,至今人识李龟年。

湘阴

萧瑟黄陵庙,依依帝子灵。渚边蘋自白,湖外草犹青。云薄纷遥岫,烟寒隔浅汀。 当年虚《九辨》,高咏有谁听?

梁儒

梁儒,字宗洙,汉军旗人。顺治乙未进士,历官江南提学道佥事。有《徽音集》。

游西山

磴道盘空上, 禅关半夕霏。樵声散幽谷, 山翠湿行衣, 带露危花坠, 穿林独鸟飞。

逍遥尘壒外,得意便忘归。

春初雨中独坐

烟雨濛濛隔薜萝,雨中极目试如何。好山入望青犹浅,芳草缘隄绿未多。浊酒篘来 聊自適,新诗吟就独高歌。人生行乐须臾事,莫放春光取次过。

冯云骧

冯云骧,字讷生,代州人。顺治乙未进士,康熙己未举博学鸿词,历官福建督粮道。 有《飞霞楼诗》、《云中集》、《国雍》、《草沱园偶辑》、《瞻花稿》、《涉霞吟》、《青 苔篇》。

时序篇

童童山上松,条条风中柳。四时一以化,贞脆随所守。人生天地间,苦无金石寿。 阴阳不停驭,霜露变林薮。小人羡荣利,志士耻升斗。余生三十年,碌碌犹奔走。探海斩妖 蛟,利剑不在手。侧身视风尘,哀歌对樽酒。明月写素心,孤云结良友。曾许稷契俦,羞居 管晏后。进未奋功名,退非耕畎亩。一身半浮沉,百年任休咎。今古浩无涯,悠悠叹白首。

述怀

人生各有命,富贵安可求。静心服道素,泉石恣优游。冥鸿达者羡,文牺志士羞。 伤彼陌上花,疾风吹未休。去为沟中泥,妍华讵可留。南山有古木,曾不畏高秋。

猗猗兰蕙香,露濯鲜华好。采为君子佩,过时恐枯槁。兰蕙何易衰,茂茂菉施草。 丈夫怀远猷,乘时苦不早。意气矜豪雄,日月赠人老。身世叹悠悠,忠信以为宝。

云中行赠王广生

边风动地吹沙白,云中三月春草碧。旧内荒凉长野蒿,饥鸟哀鸣啄乱石。我来吊古倍凄然,萧条野烧望平田。崖崩黄土麒麟冢,苔没红楼玳瑁筵。纷纷驼马城南去,觱篥一声天欲暮。甲光惨淡寒霜明,大旗缥缈愁云护。况复轗轲叹郑虔,空斋寂寞冷朝烟。传经莫谩夸刘向,载酒何人过草玄。王子峨峨天下士,携来一束牛腰纸。白雪裁诗富新词,朱霞摛藻发奇理。开樽共醉碧桃花,浑忘踪迹在天涯。吹来柳絮依人袂,飞过黄鹂照影斜。当年赵女能歌舞,可怜罗绮为尘土。玉貌香消白蝶春,花魂夜湿青磷雨。白登台边古战场,荒墩老木回苍苍。雕戈埋月沉空垒,石马嘶风倚坏墙。龙堆遥望愁何极,平郊月道迢迢直。与子高歌一怆神,南山万古伤心宅。

潼关行

潼关城下月如水,潼关城上鼓声死。司马北望拜神京,臣报国恩毕于此。万群寇马踏沙黄,长戈大戟飞寒铓。弯弧旧将婴城斗,断甲材官泣战场。孙公洒血潼关道,鬼马不归嘶碧草。花袍玉剑委红泥,渭水飞鸦波浩浩。冰心巾帼何嶙峋,就义从容不顾身。维凤玉颜

同日死,千年石砌闭青春。几队蛾眉愁耿耿,飞鸟轻身坠碧井。绿鬓吹为夜雨苔,红衫化作流霞影。有子苍茫西向秦,荒园遗迹访蒿榛。昔日夹道红旗阵,今日空衙动野磷。愁云覆井寒烟古,秋风萧萧黄叶雨。玉骨曾传葬此中,鬼神长护埋香土。牵来素绠古龙惊,庄容衣佩宛如生。观者万人共叹息,方知天地鉴幽贞。重向战围泪沾臆,青山一带愁何极。元戎战骨碎刀痕,魂魄茫茫招不得。更有遗孤已二年,父老指点私相怜。破巢漫说无完卵,赵氏婴儿自瓦全。同时饮剑有乔公,呼天拊膺气何雄。腰横宝带眠颓堞,手掷头颅向晚风。眼见山飞沧海立,铜驼霜冷荆榛湿。宁武孤城再合围,余者降旗拜寇入。吁嗟乎悲哉!国家之乱谁为基,英雄数尽际艰危。翼虎已分鹑首策,赵卒长平大聚时。一门仗节古来少,日月飞光同皎皎。青枫梦断麒麟图,香闺血化鸳鸯鸟。有臣死国妇死夫,高风大义厉顽愚。呜呼其形往矣神未徂!呜呼其形往矣神未徂!乔公迁高,字元柱,定襄人。以明经官监军道,骂贼,伏剑死。

拨闷

大漠草竿竿,羁愁望远天。风斜高鸟影,云淡落花烟。迟暮怜吾道,干戈阅岁年。 南山归去好,凉雨种瓜田。

怀唐于野

唐生甘石隐,高卧大江秋。片月依莲社,孤云隐竹楼。烟花六代渺,诗卷万年愁。 徙倚层楼晚,云横白鹭洲。

赠李天生

与子几年别,重来欲白头。徘徊今日饮,慷慨古人愁。雁度千山月,云横大壑秋。 向禽曾有约,汗漫几时游。

戴王纶

戴王纶,字彣极,一字经碧,号一斋,沧州人。顺治乙未一甲二名进士,授编修, 历官江西粮储道,罢职。康熙己未举博学鸿词。

章门新秋送客北上因寄龚芝麓年伯

楚天秋色动征桡,北望燕山道里遥。此去酒垆谁击筑,一时江月正吹箫。云生驿路 铜龙晓,沙满关城铁骑骄。劳苦中丞高谏议,可无书讯下云霄。

陆求可

陆求可, 字咸一, 山阳人。顺治乙未进士, 官福建参议。

大田驿晓行

冲烟行古道,长剑伴孤征。残月晓犹白,吟虫秋愈清。气蒸知海日,潮起听江声。

欲向芳洲上,褰衣撷杜蘅。

福永道中

满目怜凋瘵,荒原不忍看,炊烟一路少,庐舍几村残。泽畔烽初息,居人梦未安。 萧萧风雨后,空见海涛寒。

胡在恪

胡在恪,号念蒿,江陵人。顺治乙未进士,历官江西盐道。有《真懒园集》。

张翁止宿

擔云叆叇倚江边,篱菊萧疏暮柳前。汉上抱来空有瓮,成都卜后并无钱。榻悬客梦 生残月,酒醒乡关隔晓天。莫道一廛犹小隐,青羊相忆计何年。

张联箕

张联箕,字德生,号即公,益都人。顺治乙未进士,由知县历官澂江知府。有《穆 如轩诗略》。

即景

结邑依山麓,荒城物候偏。三时常过虎,七月未闻蝉。举案黄艹齑饭,投床白褐毡。 炎凉忘世味,我欲慕巢仙。

权知吉州九日感赋

空庭惟落叶,闭户见秋山。雉堞连云暗,溪流抱郭湾。白衣人寂寞,黄菊色斒斓。 徒有{'''羊}门役,登登版筑间。

纪元

纪元,字季恺,号子湘,文安人。顺治乙未进士,由推官历官巩昌知府。有《卧游山房稿》。

夜至西湖对月独坐

新秋才见月,湖水散清辉。林外花初落,池边鸟自飞。两峰回竹屿,一艇到山扉。 庭际当摇落,怀人应未归。

杨应标

杨应标,字胜林,号南城,嘉善人。顺治乙未进士,由推官历官剑州知州。有《永

思堂集》。

静夜吟

夜久群动息,秋潭冷素心。推求往古事,历历罗胸襟,守贞道所贵,回遹众乃任。 滔滔江湖流,一往不复禁。穷巷罕过辙,寂寥鸣素琴。长松挺孤秀,何忧霜雪侵。

东明河上口占

重重隄岸绕东明,尽是黄金力筑成。不用防河桑柘满,老农带月荷锄耕。

朱孔照

朱孔照,字浴曙,号云台,应山人。顺治乙未进士,官苏州同知。

游天井涧寺

揽辔苍茫里,东风晓日斜。香吹新草木,绿遍旧桑麻。山碓舂流水,茶铛煮落花。 不知城市近,犹有此烟霞。

张锡怿

张锡怿,字越九,号宏轩,上海人。顺治乙未进士,官泰安知州,有《树滋堂近稿》。

喜吴汉槎南还次徐健庵韵

思君频望玉门关,少壮漂零万死间。同去几人多白骨,生归一辈半苍颜。江乡枫冷家何在,塞碛云迷雁独还。听说流人最肠断,黑河无渡水潺湲。

钱黯

钱黯,字长孺,号书樵,嘉善人。顺治乙未进士,官池州推官。有《洁园存稿》。

过泾县水西寺 马蹄得得趁平沙,高下林峦入望赊。浅濑过帆回雉堞,淡烟笼竹隐人家。亭涵疏雨松涛细,寺俯惊雷夕照斜。客路风光在何许,纸窗月影到霜花。

☆于鹏翰

于鹏翰,字六息,号山白,文登人。顺治乙未进士,官峡江知县。

临川雨夜

寒雨潇潇夜,偏来客邸多。蕉声残漏滴,竹户野云过。潦倒荒陶径,风尘惭邵窝。 倚床将假寐,何处赋离歌。 蒋中和

蒋中和,字本达,一字位公,晚号眉三子,靖江人。顺治乙未进士,官兰阳知县。 降沧州州判。有《半农集》。

咏怀

万里绕长空,秋云浮海曲。海曲有伊人,长啸无系属。敛霞以为衣,啖波以为粟。 落日没千山,荏苒又初旭。神龙亦可烹,所患在多欲。

绳床系尺瓠,霜月挂庭树。皎皎清夜心,幽人起独步。昂首盼空濛,云自疏林渡。 无端发清响,蟋蟀吟秋暮。自问有何知,还笑杜武库。

洞庭多奇波,终南饶积翠。常与世相亲,亦与世相弃。孤鹤有余情,闲伴白云契。 渴饮湖中水,饥啄山中。舒卷凌长空,不向人间寄。

焚余

寂寂衡门草《太玄》,相知博得一桓谭。只缘老去还投阁,翻羡伊人名不传。

董含

董含,字阆石,华亭人。顺治乙未进士。有《艺葵诗集》。

登穹窿谒句曲行宫

山势岧峣欲到难,玉真宫殿拥千官。香飘下界青冥近,磬入诸天碧落寒。洞口断云朝放鹤,石根晴树暮栖鸾。金门羽客龙泥印,夜礼星辰上醮坛。

干揆

王揆,字端士,号芝廛,太仓人。顺治乙未进士,有《芝廛集》。

壬辰北归居枫桥别业

归来投别业,鸡犬一庭前。雪重千门树,湖吞万井烟。鸱夷寒食庙,虾菜夕阳船。 何似营平路。黄沙猎火天。

读山翁大师新蒲绿依韵柬寄

江头老父话兴亡,蒲柳春光又十霜。徒有子规愁望帝,更无鹦鹉忆明皇。唐陵麦饭 悲寒食,汉腊桑门祝上方。指示傍人尽流涕,讲堂钟鼓暮云黄。 王撰

王撰,字异公,太仓人。有《三余集》。

夜宿山楼

重重烟霭望中收,渔网参差古渡头。木叶凋时孤雁远,月华高处一桥浮。谢公屐冷山无恙,白傅船空水自流。话尽凄凉十年泪,秋风残醉卧南楼。

哭外舅鹿城顾大宗伯丙戌死难温州江心寺。

国岭衣冠拥殿墀,偏安犹见汉威仪。驱车海峤看传檄,拜表江关始出师。万里弓刀 空报主,一船棺椁仅从儿。灵旗夜雨归何处,指点文山异代祠。

赠杜于皇

忆自分携历变更, 访君曾过石头城。人惊夔府贫来句, 世重攀川乱后名。此地溪山 千里梦, 今宵尊酒廿年情。西陵放棹乘秋涨, 好待荒郊泛月明。

卢廷简

卢廷简, 字子闲, 江都人。顺治乙未武进士。

白鹿泉

白鹿衔花山径幽,寒泉疑到洞庭秋。曾闻说偈龙听法,几见谈经石点头。水声从檐 际落,冰花飞向涧中收。仙踪何处寻遗响,晓夜涓涓不断流。

【卷二十八】

钱陆灿

钱陆灿,字尔韬,号湘灵,常熟人。顺治丁酉举人。

与袁箨庵唐祖命方尔止张瑶星余淡心黄俞邰诸君子集牡丹花下

前岁花时渡江去,去岁吴门三月暮。三度花开一度香,今年恰在金陵住。金陵旧是帝王都,岁岁花开如画图。此花又殿春风后,朱衣王谢相传呼。一筵醵费中人产,一花千人万人眼。金盘彩篮共贻赠,招邀名士分折柬。永和兰亭金谷园,月落檀板催金尊。百尺乌丝长到地,清辞艳句争飞翻。得所秾花易消歇,子规啼血栖宫阙。无复天彭百驮花,王孙五胜埋香国。花残人散可怜春,十处园林九处尘。欲往城南访耆旧,酒徒零落空芳辰。太史园中花百种,红欹绿捧花头重。花神有意洗妆迟,要勒词头固君宠。诸公同日看花来,邓生酒瓮

还重开。廿年无此好事者,无诗不饮那能回。酒醉诗成花欲语,明岁花开待予汝。春雨春风 作主人,鸾飘凤泊同羁旅。

金陵柳枝词

柳丝亻褭亻褭复萧萧,三月秦淮旧板桥。北里烧残人又嫁,不须风雨也无聊。

计东

计东,字甫草,号改亭,吴江人。顺治丁酉举人,有《改亭集》。

豫让桥

秋尽蓬山惨不骄,流泉夹岸夕阳遥。伤心国士酬恩地,瘦马单衫豫让桥。

宣府中元夜即事

边月新秋夜,哀音四面齐。战场多旧鬼,野祭有遗黎。柝乱愁人听,风惊倦鸟栖。 遥遥天汉上,河鼓渐垂西。

宣府逢立秋

秋气吾所受,边城太早寒。披裘三伏惯,拥被五更残。风自长城落,天连大漠宽。 摩霄羡鹰隼,健翮尔飞搏。

邺城吊谢茂秦山人

邺中怀古正秋风,词赋深惭谢氏工。生欲移家辞白雪,没随疑冢对青枫。诸王礼数 何常绝,七子交期竟不终。自是贵游无远识,布衣未必叹飘蓬。

答云间蒋驭闳

西陵原上忆经过,屈首从君学《九歌》。岂意边书警御宿,遂令复壁老山阿。破家 张俭飘零久,赁保王成辛苦多。今夕相逢还道故,数声鹤唳起庭柯。

吴兆骞

吴兆骞,字汉槎,吴江人。顺治丁酉举人。有《秋笳集》。

榆关老翁行

榆关酒楼临大衢,征人日暮行驻车。鹿裘老翁鬓成雪,夹毂相逢问里闾。乍闻吴语 三太息,坐我楼头话畴昔。自云家世本吴中,住近张王旧宫侧。少年追逐冶游场,破产徵歌 意无惜。沙家枪槊冠江南,学得梨花推第一。技成好作关河游,贩缯几度来边州。燕姬十五 芙蓉色,弹筝夜夜酣高楼。一曲红绡醉中掷,囊空典却千金裘。三载边庭履霜露,飘摇裋褐谁相顾。途穷不忍到乡关,却向军中应征募。金羁翠眊绣蝥弧,名隶渡辽第三部。关前上将霍将军,遣向松山守烽住。孤城接斗无时休,铁甲中宵带冰卧。老边墙直长城隈,梯冲百道如山来。宁前死屯昼城闭,旌旗黯惨纷黄埃,雄边健儿十三万,鼓声欲死弓难开。碛西降丁最翘健,日暮分营夜催战。吁嗟万骑无人回,射尽平州铁丝箭。曙光瞳瞳海生绿,战血无声注空谷。严霜如刀箭如猥,欲上戎鞍泪交续。坚城既堕将军降,几部残兵向南哭。相随散卒临渝城,横刀更隶龙骧营。倏忽长安易朝市,关门不用防秋兵。从此飘零脱军伍,种豆锄葵学农圃。且将衰齿讬鸡豚,幸免微躯饲豺虎。昨年有客来燕京,传道江南亦被兵。故国他乡尽荆棘,穷黎何处还聊生。伊昔姑苏城畔住,门前小店临江树。半生羁戍塞垣秋,梦断吴关旧行处。今日逢君辽水北,被褐驱车欲安適。白头边语久侏亻离,重听乡音涕横臆。凄惶岭外北风哀,莽莽边沙路何极。沽酒邀君君莫辞,天涯相见且相悲。莫嫌憔悴穷边叟,犹是吴趋市上儿。

同诸公登中后所戍楼

若为荒戍驻征轺,纵目烽楼野色遥。万里川原迷大漠,百年亭堠识前朝。平沙暮卷山头树,落日晴翻海上潮。倚堞却寻南首路,汉关迢递已云霄。

同陈子长坐毡帐中话吴门旧游怆然作歌

辽城四月春风来,黄鹂啼树梨花开。陈生邀我郭南去,笑骑鞍马双徘徊。沙场黯黯日将暮,半醉归来解鞍卧。毡墙谁拨鹍鸡弦,弹作商声泪交堕。忆昨故乡百不忧,命俦啸侣吴趋游。裁诗每题白团扇,纵酒欲赌青羔裘。沙棠之桨云母舟,美人玉袖搊箜篌。金窗银烛月未午,清歌窈窕无时休。就中少年三五辈,徐郎顾子称风流。独孤侧帽倾士女,正平摇笔凌王侯。百年行乐竟谁在,凄凉边地伤离愁。只今相对休悒怏,人生苦乐犹回掌。陇西将军困醉尉,邯郸才人辱厮养。古来憔悴多名流,吾辈何悲弃榛莽。君才弱冠我盛年,可怜沦落俱冰天。旧游一别己如雨,阴关万里徒含烟。寄哀欲讬庾信赋,赏音空忆钟期弦。金樽有酒且沈醉,何须惆怅风尘前。

海郎山灵湫神女歌山顶有公主台遗址。

海郎山色倚巉岩,山半灵湫映晓岚。公主旧台余翠岫,神女新祠傍绿潭。神女婵娟艳瑶彩,霏烟曳月迷年载。怨入青蛾忆汉宫,魂依白鹤长辽海。含睇凝情不可亲,乘风飒飒如有人。虚无琼珮空山雨,杳渺鸾骖绝岛云。和亲当日悲登陇,遗恨千秋尘澒洞。宝镜何时别紫阍,玉衣无处寻青冢。松花柽叶小祠荒,繐帐无人春日长。鸦翅发垂宫样髻,虎章腰结羽人妆。香粉长筵醉芳醑,巫女如花下灵语。踏露时闻石马嘶,腾波自共冰姨舞。一曲迎神芦管愁,年年赛火海东头。望乡莫更歌《黄鹤》。红粉魂归塞雨秋。

早秋陪诸公游密将山

招邀出郭门,青山殊未已。金鞍小骑何连翩,人影遥遥翠微里。翠微一望延层峦,深松伏涧相风湍。飞泉半挂银河残,秋岚散入芙蓉寒。石门黯黯金花裂,隔溪苍翠时明灭。回风绝壁森昼阴,六月空濛见残雪。西峰百尺寒崔嵬,振衣欲上观蓬莱。黄云泱漭动海色,楼船射鲛安在哉。松花江水流浩浩,千秋战骨关山道。龙堆狼望空嵯峨,飞将勋名归蔓草。

昨夜秋风吹塞天,临潢万树生寒烟。金笳玉笛起愁思,边心四据空茫然。安得仙槎泛清浅,乘流直度支机前。壮士无家谁不怜,李陵已向阴沙没,逢萌空税辽东田。君不见徽宗埋骨空江曲,遗冢苍茫走麋鹿。徽宗冢在五国城西。艮岳风流亦一时,黄沙玉柙无人哭。万乘飘零且复然,吾生那更悲穷谷。击筑高歌出塞辞,何如楚客吹参差。眼前有酒且不饮,迢遥漫作乡关思。紫骝嚼啮当风嘶,为君重进金屈卮。醉卧青山且莫归,明朝秋雪吹人衣。

送人归辽东

送尔驱征马,离亭叶已飞。云山三岁别,风雨一人归。碛晚黄羊少,关寒白雁稀。 苍茫望辽海,今日是王畿。

游西山兰若二十韵

四禅分浩劫,双树启香津。地涌龙沙古,宫开鹿苑新。宝铃流塞雨,金刹照边春。窈窕丹栌合,崚嶒碧嶂邻。下堂钟送客,归院树迎人。仙梵消兵气,天花洒战尘。瀑泉喧月晓,山磬静霜晨。咒食闻禽下,繙经见虎驯。果肥风破甲,松劲雪生鳞。座儗逢师子,林应集雁臣。南宗坛卓锡,西竺字函银。香散冰天畔,僧归沙海滨。啸声疑药老,碑制想王巾。共道城为化,谁怜里是贫。白诧徒仿佛,皂帽自逡巡。已昧生还日,空悲老去身。神人宁梦汉,逐客未归秦。涕泪瞻慈像,皈依请梵轮。祇林谁抖擞,朔野此沈沦。何日吴中寺,长斋礼应真。

置酒歌

临潢城头暮吹笛,北斗兰干月将出。金吾置酒坐北堂,银鞍召客何辉煌。织成罽幕芙蓉卷,紫氎新茵兽文软。黄羊作馔堆金盘,青骊挏酒挥犀碗。筵前火照明星稀,凝笳急管纷相依。锦衣如雾声綷縩,宝刀拂露光霏微。须臾月东吐,留宾坐挝鼓。还褰丹绮帷,更出红妆女。金钿曜紫貂,珠袿袭青鼠。的皪芳唇歌,便娟细腰舞。沈沈芳夜兰,恻恻北风弹。青蛾扇底蹙,素指弦上寒。哀弦声屡阕,灵虬水频咽。但顾罗袖欢,讵惜珠缨绝。酒兰华幕坐欲移,徘徊落月秋河低。锦镫车马纵横去,应照香尘绕路飞。

白头宫女行长安女尼妙音者,本崇祯时旧宫人,后出居氏间,祝发于北城之佛舍,与海昌相国居址接近。尝出入相国家,述甲申三月及宫中旧事甚悉,又言宫中侍姬,都以青纱幕外约钗梁,自遭丧乱,香奁宝钿悉为人夺,惟存青纱数幅,犹昭阳故物也。今年戊子,余以谤议械系都官,而相国亦以他事下吏,因与其嗣君直方子长相见,酒酣耳热,为言妙音。予既自伤谗枉,复闻妙音之事,悲红粉之飘零,感羁人之沦落,乃连缀其词,作为长歌,以传于乐府云。

长安女冠头似雪,曳地黄紽悬百结。手执金经泪暗垂,云是前朝旧宫妾。一朝充选入披香,倭堕新梳内殿妆。低鬟自惜青虫小,系臂愁看绛缕长。当年御极方清晏,宫中屡启催花宴。云母屏开见舞人,水晶帘卷低歌扇。歌舞年年乐事殊,森沈宝幄挂流苏。北宫漫阅鱼龙戏,东绢频临《蛱蝶图》。图史纷披间珠翠,深宫镇日长无事。鹊顾书从女史传,鸾雏钗向昭仪赐。昭仪明艳独承欢,促坐金床倚笑看。灯簇九微长侍辇,妆成七宝自凭兰。兰前罗绮纷成列,阿监才人几分别。玉墀草细打球高,珠箔花深吹管彻。景福宫前细柳垂,琼轩不闭共追随。绣镫缠鬃娇试马,绿绨隐几倦弹棋。春花秋月年华换,掖庭寂寞肠堪断。素手

繙书教小王,红颜对食怜同伴。自从羽檄扰秦川,遂使官家少晏眠。五夜刺闺频报警,三春合殿罢开筵。几载天颜惨不乐,中宵独坐占芒角。炮火新开内教场,诏书屡下文渊阁。阁门封事日纷纷,督府潼关复覆军。几部黄巾残豫楚,千群青犊下宣云。宣云处处名城堕,倒戈自启居庸锁。阙下交驰告急书,殿前望断平安火。军锋倏忽逼神京,一夜都人已数惊。内苑左貂群揖盗,团营飞骑半翻城。城上弓刀争内向,苍黄无复蓬莱仗。独御金鞭视九门,空颁铁券封诸将。白马青袍卷地来,君王长叹不平台。日诏内人从避寇,手持爱子共衔哀。可怜十叶汉天子,海竭山崩竟如此。复壁宁教伏后藏,佩刀自刺清河死。珠伤玉碎满曾城,宫车无那赤龙迎。犹有黄门曾殉主,岂知紫闼竟屯兵。自怜白首深宫住,欲问家山渺归路。潜脱霓裳出九重,却寻月径依双树。一话香台已十秋,每谈遗事自生愁。室中漫礼金仙席,梦里还随玉辇游。惆怅生年遘阳九,戒珠持遍甘衰朽。仙家龙种尚飘零贱妾蛾眉亦何有。我来故国几沾翰,摩娑铜狄北风酸。昭阳旧侍悲通德,长乐姬人识佩兰。从古存亡堪太息,凄凉无处寻遗迹。《麦秀》偏伤过客情,《柘枝》还下宫人泣。

王云明

王云明,字圣能,西华人。顺治丁酉举人,官黄安知县。有《习阳集》。

留别黄安父老

乡思萦长夜,天恩放老夫。涓埃宁万一,鸥鸟且江湖。犹忆触蛮斗,但凭牛马呼。 衰颜休揽镜,壮志罢张弧。琴鹤仍无恙,壶浆俨在途。生还真似梦,此别莫长吁。既遇苍鹰击,敢云白璧诬。诸君情自切,三月政全无。善守清时法,勿忘旧令迂。可封期比户,握手暂踌蹰。

魏力仁

魏力仁,字山公,南乐人。顺治丁酉举人,官庐江知县。

登狼山

胜地名山压海门,山形回合五狼蹲。南瞻吴会江光白,东望扶桑日气昏。外府鱼盐增课税,不庭鸟窟长儿孙。清时防御劳宸算,特遣嫖姚镇大藩。

张橓

张橓, 南和人。顺治丁酉举人, 由教谕历官国子监助教。

仙井

百尺寒泉平地生,高台古木远风清。自从至正投符后,云雾空濛锁玉京。

沣水

淼淼烟波入画图, 黄色白鸟泛青蒲。千家茅屋临流水, 十里香粳在镜湖。

李珪

李珪,字鹤汀,渠县人。顺治丁酉举人,官宁德知县。有《说剑斋集》。

送王孝先入秦幕

江上相逢春草满,桥边送别暮禽鸣。黄云陇树千峰隔,落日边山一剑行。汉畤几年 犹置驿,秦关百里未休兵。丈夫还有苍生志,为看陈琳草檄文。

任绳隗

任绳隗,字青际,号植斋,宜兴人。顺治丁酉举人。有《直木斋集》。

清明日游昆山

昆山一片石,巉秀称奇绝。不使土附之,削肤仅存骨。扪萝数十盘,宛转踞其脊。流云湿松杉,回绕佛坛出。眼前无华岳,此亦去天尺。所以惯游人,不如乍来客。佳人飘缟带,湘佩穿林陌。婉约故可怜,含凄况寒食。春风吹古道,芳草眠残碣。车马虽复喧,荒原自空碧。我能真赏见山灵,不独寻常寄游迹。钟声日暮下镫龛,迟却十年来面壁。

上巳夜虎丘舟中社集即席赋呈吴梅村先生

上巳由来纪胜游,春深带月共登舟。诗从河岳争千古,人是中原第一流。锦缆似随 双剑合,玉箫还傍夜珠浮。诸君视昔能无感,风景依然晋代愁。

今夕岂非良宴会,关西江左共登坛。时泾阳武纬天、张公辅同在座。星临万舸传杯暖,剑聚双龙出匣寒。酒到夜深生气骤,诗成水际得波澜。相看各有行藏意,金马何尝却钓竿。

清明日绕道登俞山谒墓

看山不厌取途宽,百折登临欲上难。石马昔时增气象,丰碑今日念衣冠。莺愁落照啼高树,磬逐归云下佛坛。极目可怜惟灌莽,为谁禁火食犹寒。

同人集曹荩臣致远堂分韵得开字

城头日落晚钟催,寒夜阳春动地回。白发自怜知己旧,青樽谁为故人开。座中侠气 干霄上,墙外书声度幕来。相劝莫辞金谷数,试看百罚有深杯。

平原谒颜鲁公祠

尚书遗像肃威神,瞻拜犹能起后人。万里乾坤存正气,七朝培植出宗臣。东藩指顾 山河日,西向从容捧诏辰。老至愈坚姜桂性,生平大节在君亲。

李天馥

李天馥,字湘北,号容斋,永城籍合肥人。顺治戍戍进士,改庶吉士,授检讨,官 至武英殿大学士兼吏部尚书。谥文定。有《容斋集》。

古意

南望临广野,见此山与河。河水深以长,高山复峨峨。秋风木叶下,鸿雁当天过。 物象殊清迥,凭吊忧思多。云树不可极,我心劳如何。

春日

端居寡营尚,悠然澹心情。百年感逆旅,何为劳吾生,忽闻春风至,有酒急须倾。 醉卧东窗下,阶前一鸟鸣。

退谷

偶随泉声行,还逐泉声止。泉声近不鸣,清流石齿齿。孤亭俯层巅,满阶红叶委。 万籁动笙竽,岚光生涧底。秋气入夕佳,微凉耽徙倚。蓬瀛想金仙,薜荔吊山鬼。此地昔流 觞,高会拟曲水。我来悄无人,空山落松子。望远资无穷,念往情何已。兀兀碧槛前,坐看 溪云起。

广应寺在西山, 明内珰建, 后皆珰坟。

秋云压山山欲低,山光倒泻青琉璃。绕麓松枝老龙怒,奔涛卷地风凄凄。古殿阴森 影金粟,月黑深廊飞蝙蝠。北接荒原冢纵横,枯榛断莽土花绿。幽崖寂寞清露堕,永夜虚林 生野火。当日观军出使人,贤愚魂魄空山锁。

送宋荔裳按蔡四川

前岁相逢广陵道,竞渡初过君发早。去年再遇芍药开,陈榻同饮说岩寓。同浮菖蒲杯。君今出使复重五,人生离合真奇哉。转眼留连曾几日,赤灵朱胜伤俄乖。多君客邸偏好客,自谱新词骇鬼伯。在狱谱剧,脍炙人口。大第名园徵旧欢,急管繁弦度兰夕。间为诗歌据上头,一时作者皆辟易。王家兄弟谓阮亭昆仲。用火攻,九辩君称老折冲。予亦弱冠为长句,结好辄复惭山东。方调琴樽频过从,讵尔治蜀借文翁。蜀道天上九千里,重江曲栈何穷已。翼马峨眉绣络骄,泷船滟滪牙樯驶。西陲按部外台尊,况复金躔称俗美。软尘漠漠广宁门,如云供帐罗高轩。男儿得意屈群力,朱轮绮盖何翻。君到莫作巫山赋,侈辩雄风惊峡雨。长途愿赠纪行诗,知君临水登山处。

重游西山

列岫参差出,西风款段轻。云中看鹤影,树杪觅泉声。野旷增乡思,山深冷宦情。 此君相别久,踪迹愧平生。

送高念东少司寇

立朝无几去安之,信是先生素不羁。自谓何妨行我法,谁能稍劝合时宜。蛮中子舍 归偏早,海上神山约未迟。从此祥刑成往事,岱云徕竹费相思。

楼桑村怀古同说岩

衰草寒烟望里孤,楼桑遗迹未全芜。帝乡羞属黄初历,王气犹延赤伏符。国士风流 成据蜀,宗臣鱼水失吞吴。啼鹃旧恨蚕丛远,此地惟闻叫野乌。

董岐卿侍读参莫经略军事经略卒于军独获免归朝诗以慰之

谁使参军度井陉,无端左省罢谈经。下帷未及成繁露,入蜀偏惊落大星。鸟鼠烽高 秋岭绿,鱼凫战苦野磷青。孟王僣党多降表,回首连云悔建瓴。

野猎

羽骑参差小队开,黄云城阙射生来。光飞杨柳雕弧冷,声彻林皋画角哀。晓日忽腾 双虎疾,秋风斜制一雕回。更思逐逸前村去,为语琵琶莫浪催。

九日公招游祖家园同芝麓先辈石臞阮亭玉随玉虬赋

佳辰同作出郊游,野菊香风到马头。十里疏钟空际落,千峰晴黛望中收。烟寒林麓红檎老,霜满乡关白雁秋。脱帽狂吟惊少长,好山载酒一淹留。

送洪昉思南还

未荐深惭蚤见知,汉廷空羡骑郎赀。谁言此辈宜高束,不信斯人独数奇。南国烽烟 萱草梦,西陵雨雪《竹枝词》。逢迎应有游闲遇,忆尔寒江系楫时。

挽王西樵司勋西樵有《十笏草堂诗集》。

消息惊传《鵬赋》成,悠悠天道意难平。不禁秋夜汍澜泪,何限春明缟纻情。《十 笏》缥缃空旧草,百年霜露又前生。觥船遽觉司勋梦,无复江湖载酒行。

终古斯人竟寂寥,山阳远笛冷清宵。烟霞痼疾成长别,兰茝归来下大招。《封禅》 鸿篇新恨杳,燃脂花史旧香消。应刘去后风流散,挂剑空悲墓道遥。

感怀

把酒闲吟祇自宽,小窗香灺意阑珊。明河未落云生浅,华露无声月上寒。禁地论思 伤老大,塞垣烽火怅艰难。南楼旧属平津胜,几度临风想治安。

同说岩憩天宁寺浮图赠点石上人

命侣寻幽白纸坊,双悬塔影讶奇光。此处一塔二影。行耽细马蘼芜路,坐爱枯禅薜荔墙。一气鸿濛连海岳,数株松柏阅隋唐。老僧都未知名姓,何必城南意独伤。

喜闻秦蜀捷音同说岩赋

熊赐履

熊赐履,字敬修,又字青岳,号愚斋,孝感人。顺治戊戌进士,改庶吉士,授检讨,官至东阁大学士,太子太保。谥文端。有《澡修堂集》。

临皋渔人挽歌

先生家住团风里,笭箵婆娑照江水。年年款乃洞庭滨,信口吟成槎上史。泛泛兰舟一叶飞,西风吹入浔阳涘。垂纶高挂洪塘鲨,投竿引出白沟鲔。沧溟何处不烟波,扬子矶头舟可舣。抱瓮丈人山下逢,开尊共话羲皇理。天地为笼江海罛,渭渚严滩安足齿。何况戋戋上谷骄,飘然返棹麻溪沚。归来不脱旧时蓑,一夕乘槎弃如屣。芦花自白峰自青,七十年来梦泡耳。楚些一曲哀江头,思君不见悲风起。

雨夜怀人

寒宵苦独酌,忆汝复谁亲。为念诗情冷,应知道味真。残烟笼野色,细雨暗江春。 何日过桑牖,花间共饮醇。

春亭对雨柬于皇

草堂花意近,风雨乱春晴。修竹摇空冷,残梅入望清。烟霞本故物,丘壑自多情。 鹿鹿胡为者,输君学晚成。

金山

十年思胜地,此日试登临。海气侵云湿,江光带雨深。宁堪方外想,粗了未来心。 倚槛频恣眺,阴风动客襟。

焦山

人隐偏名地,山灵转姓焦。偶然通帝座,遂尔逼云霄。丘壑风烟老,江湖岁月遥。 我来寻古洞,披石坐松{风翏}。

吴园六朝松

六朝销废尽,剩此一株松。石劈苍根冷,脂乾白藓封。团烟巢鹳鹤,老幹逼虬龙。 薄暮婆娑下,清飕动远钟。

陈廷敬

陈廷敬,字子端,号说岩,泽州人。顺治戊戌进士,改庶吉士,授检讨,官至文渊阁大学士兼吏部尚书。谥文贞。有《尊闻堂集》。

十五夜北山见过有怀孙吴二子

昔者与孙吴,玩月城西亭。萧萧天风来,万里摇青冥。寒空荡圜魄,惊鸟群悲鸣。明镫曜曲房,渌酒凄以清。短歌易慷慨,良时伤我情。奄忽浮云驰,踯躅东南征。光景不可驻,奔落如流星。二子渺江湖,芳颜坐凋零。四海何寂寥,独处思平生。惟我与君子,绸缪结至精。遥夜命俦匹,羽觞罗中庭。清浅河汉流,金波正泠泠。濡翰发妙制,朱弦激新声。今日不为乐,别后徒屏营。

龙泉寺下院

日隐原上村,秋阴起桑柘。杳杳随烟钟,悠悠远峰下。境空放梵长,天迥飞云泻。 松门晚色静,碧草净可藉。风吹篱边花,寒香正盈把。薄游涉清旷,所历向潇洒。乐幽抵嗜 芰,味道如啖蔗。至人患有身,矧复簪缨假。息心同冥寥,聊此絷吾马。

梅花用坡公次李公择韵

寒夜凛客心,鸡鸣车毂动。节往如逝湍,光景一玩弄。颇爱幽窗梅,著花破严冻。 天公怜寂寞,物能竞喧閧。飞霜点衣裘,风埃暗驺从。我生樗散徒,不材因自纵。山泽赏四 友,竹经从二仲。息景偃东冈,获享水石贡。冷梅坼冰雪,析析柯屡重。卧压短檐日,疏影 杂禽哢。有时但孤吟,祇供樵厮讽。默想苦寒夜,戚若念前痛。光宠谢少俊,鞍马事上雍。 未招罗浮魂,骤牵春明梦。何当十年计,绕屋手溉种。春风吹白日,羲驭不得鞚。别后绮窗 前,何人镫火共。枝间挂桐花,池上蹲老凤。遥忆黄叶山,谁扫青螺洞。待我花下归,白酒 酿百瓮。

忆樊川梅花用东坡松风亭梅花韵

半林乔木樊川村,数株梅花牵梦魂。媌娥靡曼不挂眼,夭桃野杏为狂昏。一廛未安扬子宅,五亩欲老香山园。玉妃鬖髿露身手,暗香冷艳来相温。有时先生春睡美,绮窗唤起惊朝暾。经寒故尝却罗幔,避风勤与关柴门。翻笑孤山林处士,拥衾对花花无言。只今人去花寂寞,谁怜落月闲清尊。

书湘北秋水渔父图

吾闻潇湘洞庭烟尘中,沧洲不合容渔翁。今之画图尚复尔,孤舟渺渺寒林东。远峰 青冥水云白,秋树苍莽枫叶赤。草木曾无战伐愁,谿山欲老菰芦客。李生雅好江海奇,张帆 鼓檝游何时。且当结束事鞍马,与子射猎南山陲。

城南黑龙潭寺西楼对酒歌

春残龙尾横斜道,羸骖退食随年少。文书丛里过东风,欲写幽怀何处好。天晴古陂南城南,城阴水碧金沙潭。是日宿雨林景澹,微波流影青于蓝。寺前野亭向冥寞,狂飚吹尘暗廖廓。杂花红蕊寒且禁,幸不逢花怅零落。亭中袅窕西楼开,远烟空翠山光来。渼陂波涛琉璃色,汉江春酒蒲桃醅。直须对此衔金杯,捶琴击筑心徒哀。苍茫万事渺如昨,几度落日轩辕台。凤兮栖栖不得意,东山绣斧流言忌。古来贤圣亦复尔,醉舞高歌吾老矣。回头笑谢新少年,一生羞为时人怜。

晚过杨编修尔茂

驱车巷南来巷东,寺西老树斜阳红。黄叶到门落可数,秋色入眼庭华浓。故人怜我心迹同,开颜握手霜天空。论文细欲霏玉屑,说剑壮可生雄风。竟须潇洒微官外,休论艰难万事中。感君义气相裴回,古来贤达甘尘埃。萧萧易水风增哀,蔓草已没黄金台。男儿在时得钱勤,买醉,不见古人白骨缠苍苔。

赠韩少室山人

沁川先生尝乐饥,一生高视世不羁。西崖古道蓬蒿齐,小亭昼闭春阴移。我时徒步往见之,颜色渥丹霜鬓滋。年近九十心胆奇,大书洒墨光淋漓。短札细字如毫丝,方瞳炯如电垂。仙者缥缈高莫追,浮丘洪崖世难知。吾徒缩手归来时,赤松黄石吁可师。

菟耳山

马上卢龙塞,鸿边菟耳山。流云无定日,飞雨过重关。古木生空翠,孤峰点细斑。 征途能暂息,绝顶一跻攀。

移居怀林澹亭

郁郁久居此,天涯又卜邻。秋花今别汝,社燕并辞人。岑寂长愁地,漂摇独去身。 偶因违咫尺,转益念交亲。

夏夜怀玉谿旧隐寄张灵璧四辅

三伏向尽朱火藏,炎蒸未已愁中肠。流萤入帘故宛转,明星照席何低昂。琴书休夏 年力异,药饵经时归兴长。焉得清谿千尺水,与君濯足临沧浪。

题窦画

摩诘遗诗画意闲,烟云粉本有无间。风流一变添文采,小李将军著色山。

春蚓秋蛇虿尾钩, 家鸡野鹜岂同俦。祇应落墨惊纨扇, 画作桓家乌牸牛。

杜臻

杜臻,字肇余,一字遇徐,嘉兴人。顺治戊戌进士,改庶吉士,官至礼部尚书。有《经纬堂集》、《烟霞集》。

经皂林驿

驿路桐川外,林光转岸容。帆樯通楚甸,粳稻问吴侬。信喜军书断,人归草舍重。 扬舲冬日好,何必更扶筇。

虎门

羊城军府壮,虎寨水声吞。不有三门汇,焉知百谷尊。春波浮日月,南斗豁乾坤。 设险金汤固,绸缪报国恩。

屠粹忠

屠粹忠,字纯甫,号芝岩,鄞县人。顺治戊戌进士,由知县官至兵部尚书。有《采 芝堂诗》。

宿张道士山房

虚窗近好山,山影窥窗隙,藤穿古洞幽,月过小桥窄。放雨一旗青,堆云半榻白。 老树作人喧,新萝补天阙。煨筍及烹薇,在在皆手泽。禽到学书符,啄木鸟也。客来愁水厄。 意与石俱闲,诗随花共发。见我何殷殷,云是岁星谪。相订赤城游,霞光起眉额。夜梦入天 台,玉女共晨夕。天台玉女峰最胜。

长啸歌赠孙雪庵

苏门先生善长啸,声出丹田吐灵窍。骈阗半岭鼓吹喧,缥缈中天鸾凤叫。海陵豪客云耳孙,广颡丰颐有奇抱。三杯耳热意气雄,仰面蹙口声转洪。初如幽溪泻山溜,渐如大谷吼松风。清如沧江铁笛裂云石,肃如寒天哀角号霜空。烈如猛虎跑地山月黑,壮如灵鼍掀浪海日红。悲如渐离击筑燕人慷慨泣市上,惨如荆卿依柱秦帝辟易走宫中。好坐剑阁峨眉,凛冽凄清古雪吹空寒瑟瑟。好踞泰山日观,悠扬迢递罡风响入秋冥冥。幔亭峰顶使子骞太姥玉管金箫千派歇,洞庭湖口令湘妃汉女银筝锦瑟一时停。仙人犹然爱此声,何况我辈之凡情。一啸愁人能散郁,再啸醉客亦解酲。三啸洒洒尘心失,四啸飘飘道骨轻。此声天授非人力,开口欲学学不得。岂是神丹绛雪调,将毋真炁黄房植。仙家有种宁偶然,吾欲挟尔游八极。嫌尔太肥饿令瘠,愿尔两腋一朝生羽翼。

春暮山行

已惜春将去,犹逢花乱飞。山疑人面熟,鸟唤客愁归。竹影侵云淡,溪流带雨肥。 何期沾背汗,坐石解重衣。 甲戌服阕北上舟次瓜步

饭后徐徐摩腹行,舟中淡淡觉心清。潮因雨过添流急,帆为囊空带月轻。乡梦已随 红叶去,余哀犹傍白云生。猜知客久沙鸥熟,既去还来似有情。

郑重

郑重,字山公,建安人。顺治戊戌进士,官至刑部侍郎。有《霞园诗草》。

秋夜宿南山白足轩

清夜疏林寂,高吟度远峰。月微兼冷露,香炉又残钟。秋老山容淡,更寒蝶梦空。 孤镫留信宿,半榻白云封。

魏双凤

魏双凤,字雝伯,又字阳伯,获鹿人。顺治戊戌进士,由知县历官宗人府宗正。有《南游草》。

补陀胜境

古寺倚山成,云霞院外生。竹摇惊鸟语,松响隐泉声。日午行将倦,春残雨复晴。 敲门僧未觉,可是闭关情。

赵仑

赵仑,字阆仙,号叔公,莱阳人。顺治戊戌进士,历官太常寺少卿。有《因树屋集》。

金山

一柱砥中流,三峰望里收。山光无地接,塔影与波浮。鸥鹭思依榻,江潮欲上楼。 钟声何处是,隔岸听悠悠。

井陉道中

夹道万峰齐,劳劳信马蹄。关连函谷北,山入太行西。积雨征衣黯,危岩客路迷。 瞻云空有泪,不敢忆幽栖。

陈肇昌

陈肇昌,字扶升,号省斋,黄冈人。顺治戊戌进士,历官顺天府尹。有《秋蓬诗》、《南湖居士集》。

望是故乡行次韵送毛子霞隐君归郢

八尺昂藏一老子,短棹苍江弄烟水。占尽风流卖尽痴,手挽颓波追正始。倚马曾飞羽檄文,英雄原上悲残垒。千载遭逢吏隐间,转瞬浮云皆敝屣。兰芷由来楚泽多,朝朝采撷行还止。海内声华久识君,相逢却在武昌市。晴川黄鹤几招邀,载月传笺兴无比。相如善病复多情,白头红粉同欢倚。四壁萧然不厌贫,千金散去浑闲事。朝来束书忽告归,吴头楚尾知何处。笑指郢中是故乡,十幅蒲帆去若咫。听雪楼中景物清,锦瑟湘帘如画里。只今赤日拂江长,芳草王孙行未已。劝君缓棹待秋风,一片青山何彼此。

张贞生

张贞生,字幹臣,号篑山,庐陵人。顺治戊戌进士,改庶吉士,授编修,历官侍讲学士。有《王山遗响》。

和友游定岩读书岩诸胜

定光去后杖无踪,独惹游人篆石宫。磴绝连云三径别,岩虚漏月七情空。书帷案润窗前迹,瓮牖桥成指上功。代远传闻多涉怪,钵盂信否可降龙。

王遵训

王遵训,字子循,号信初,西华人。顺治戊戌进士,改庶吉士,官至户部侍郎。有《余清轩诗集》。

园居

为客一何久,归来草树荒。诛茅开小径,刈棘补颓墙。几袅炉烟细,园饶井臼凉。 却怜十载事,强半滞他方。

林壑饶幽胜,扶筇意自舒。湖云乘晓霁,山树入秋疏。鸟立沙边艇,人归柳下庐。 但斟桑落酒,何处问樵渔。

萧惟豫

萧惟豫,字介石,号韩坡,德州人。顺治戊戌进士,改庶吉士,授编修,历官侍读。 有《但吟草》。

登清风台谒夷齐庙

我立永丰巅,首阳向我峙。遂之清风台,以访墨胎氏。郁郁松柏林,悠悠深漆水。 雨洗春色深,人入清风里。未食蕨与薇,安知肉食鄙。为顽与为廉,百年同一死。吁嗟黄虞 人,在此不在彼。

望南阳湖

纵目烟波千万顷,满湖渔艇捕鱼翁。银河半泻山为岸,太极初分气作宫。挽粟江淮 通贡赋,合流济泗竞朝宗。八垓汗漫游何日,欲买扁舟住此中。

旅店早发

荒村天未晓,惊月入窗棂。问夜更将尽,思归人半醒。桥头分野径,树杪点疏星。 何事为形役,鸡鸣马上听。

夏日园中即事

晨昏候母安,此外便聋哑。胜败两相忘,以金注若瓦。万物质非铜,造化工始治。 烦暑不入林,园中避炎夏。浮云视岂真,松风听未假。六月余雨泽,禾黍被原野。二三素心 人,弹琴敲棋者。短服复散发,《黄庭》手常把。高枕卧北窗,陶潜吾师也。

杜镇

杜镇,字子静,南宫人。顺治戊戌进士,历官翰林院侍读。有《宝田斋草》。

怀贾无染隐君

琴书丘壑自闲闲,三十年前早闭关。未拟陶潜居栗里,真如安石卧东山。秋风故国 悬霜鬓,夜月荒台照旅颜。指日赋归寻旧侣,相期颍水鹿门间。

王曰高

王曰高,字北山,茌平人。顺治戊戌进士,改庶吉士,授编修,历官礼科都给事中。 有《槐轩集》。周栎园曰: "北山诗以风趣淡宕为归。"

昭庆寺小阁月夜

同是一轮月,湖头觉更明。云随风欲堕,人与气俱清。入目烟光阔,澄心晓雾莹。 如何方镜净,滓翳顿然生。

吴伯成明府招饮秦园同留仙天士

天然山水地,点染作名园。树色干云秀,蛙声过雨繁。看花时坐石,待月更倾樽。 我欲忘归去,桃源即此村。

于涟

于涟,字清漪,文登人。顺治戊戌进士,历官吏部郎中。

秋日道中

左辅遥天塞雁过,回看秋色近如何。岂因白发高怀减,偏为黄花客思多。风雨蓟门 羞老大,梦魂衡宇滞关河。干戈闻道消吴楚,不必登临始放歌。

戴王缙

戴王缙,字绅黄,号云极,沧州人。顺治戊戌进士,官行人司行人。有《萧云斋集》。

雨夜怀邓孝威

憔悴何时已,思君苦未休。乱山残树影,野水暮云秋。雨逐江声黑,虹明夕照收。 何时重把袂,清梦自悠悠。

刘果

刘果,字毅卿,号木斋,诸城人。顺治戊戌进士,由推官历官江南提学道佥事。有 《十柳堂诗集》。

赠姜勉中昆仲

吴门风雨听鸡声,共被君家旧著名。鼓瑟耻为齐处士,传经犹是鲁诸生。孝能继志 由天性,淡以论交见古情。一榻东邦三皂帽,幼安千载有同盟。

客有问东武名胜者略举示意

澄鉴决淇白玉堆,青峰插汉五莲开。春前花满卢敖洞,雨后云封苏子台。夜半琅琊 先见日,天晴潮汐书闻雷。李斯古篆留清署,为记秦皇览胜来。

山家

略彴横施磴道偏,棱棱石齿草芊芊。溪宽树影遥沈水,云起山峰上接天。尘世莺花 浑是梦,烟霞鸡犬尽疑仙。亦知大隐非容易,欲向此中小结廛。

高晫

高晫,字元中,号苍岩,襄陵人。顺治戊戌进士,历官苏州知府。有《滇游草》、《新安近咏》等集。

哭胡敏公次桑楚执韵

《广陵散》绝动哀吟,孤幌疏风雨暗侵。自痛文康埋碧玉,谁将贾岛铸黄金。西州 泪寄鹃啼尽,东海魂归鹤怨深。鸣咽不成怀旧赋,独挑残焰夜沈沈。

寄答桑楚执见怀

短发空余老大悲,三年一读故人诗。竹间残局完公事,塞外新编是宦资。自笑子辰 牛马走,谁怜杜甫凤皇饥。何时煮石青峰下,共跨黄羊侣鹿皮。

吴淇

吴淇,字伯其,睢州人。顺治戊戌进士,历官镇江同知。有《雨蕉斋诗集》。

长安秋霁

蓟门秋乍霁,徙倚望长空。横日孤云白,先霜病叶红。水明官道上,碪乱客愁中。 矫首千山外,南飞有塞鸿。

宿西山桂香阁赠某道士

云卧西山阁,烟松阴石扃。窗分江月白,槛受海潮青。啧啧栖花鸟,飞飞掠水萤。 问君投宿处,此夜借茅亭。

舟次湖南

一官自叹迹如萍,万里扬帆出洞庭。薄暮犹霑神女雨,垂边渐见老人星。草连湖水 愁中碧,烟锁岳峰望里青。庙近黄陵休系缆,冷风清瑟动湘灵。

林云铭

林云铭,字西仲,侯官人。顺治戊戌进士,官徽州通判。有《挹奎楼集》、《吴山 獻音》。

登陴纪事

万物当刍狗,海波传警息。己亥夏六月,蹂躏江南北。官民不知兵,相继自顿踣。延及宛与池,闻风堕疆域。新安失唇齿,讹言相煽惑。强者思走险,弱者竞逃匿。我为新安吏,蒿目徒恻恻。七月方上旬,防兵反攻逼。骁骑薄西城,飞矢流如织。空拳宿城头,有气难吞贼。海谍七人来,诡辞夸战克。廿三抵郡内,狼狈为鬼蜮。歼之演武场,观者无人色。相挈避挑衅,半城生荒棘。叛兵拔营行,所至掠新特。更闻祁门令,邑陷奔屴崱。万山尽伏莽,民心多反侧。纷纷羽书驰,军情何其亟。议战苦无兵,议守忧无食。书生何所能,惟有死报国。

白发词

星星白发, 劝尔一杯酒。谁不知, 壮盛后当衰朽。何劳一茎两茎, 插标鬓右。蜉蝣何夭, 冥灵何寿。臭腐神奇, 迭为{尸几}首。相传交股国, 东有不死民。吾将解吾舣, 卜吾里, 傲杀人间碌碌, 等闲糠秕。任尔白如菅茅, 黑如秬秠。我只不对镜、不临水, 本为愁中生, 何事苦添愁。夜游秉烛无须问, 莫使樽空惜杖头。

客杭书怀

老去偏为客,病多不耐愁。疏钟千里梦,淡月半床秋。羽檄惊旁午,家书绝致邮。 宵深眠未稳,肠断碧云楼。建州古迹。

静寄

寂寂荒陬好结茅,烟霞不负旧时交。参将水月无生话,筮得天山最上爻。客少空悬 孺子榻,书多但拥放翁巢。草玄有志终须就,却懒逢人说《解嘲》。

重游新安

频日缘溪箬茧船,到来犹见旧山川。烽烟甫靖多空巷,戎马成群杂市廛。鬓雪自怜 前貌改,晨星难得故人全。扶藜父老争相问,忆唱骊歌十二年。

罗孙燿

罗孙燿,字乃远,顺德人。顺治戊戌进士,官都匀推官。有《石湖集》。

和刘倬之湖上

药屿花源一钓矶,相看终日坐忘机。寒空波影鱼微动,夕照林声鸟尽归。近处未能 供茗具,远游犹及制山衣。知君笑我多疏放,池日黄龙定是非。

湖阁夜雨

溜泻檐阶锁夕烟,竹声松响共萧然。一天雨掩闲吟阁,半夜风横罢钓船。花委暮林 香漠漠,草低寒砌色芊芊。此心不逐疏棂去,好背孤镫便学禅。

张一鹄

张一鹄,字友鸿,号忍斋,娄县人。顺治戊戌进士,官云南推官。有《滇黔诗》、 《野庐集》。

辰龙关

天地金汤险,由来王气钟。五丁开绝塞,二酉抱神龙。乱眼奇峰过,惊心暑瘴重。 兴亡千古在,立马倚长松。

怀人

西南诸国滇为大,六诏新开僰道平。应忆松江莼菜好,却将老眼看昆明。

别滇

十里壶浆送,都言羡尔归。独怜车下泣,半是壑中饥。日落怀难尽,交深泪不挥。 渐遥金碧地,还整旧渔矶。

侯体随

侯体随,字从甫,号》己叶,杞县人。顺治戊戌进士,官景宁知县。有《》己叶集》。

同友人吊江淹墓

江淹富文藻,梦花结思深。所惜历乱朝,众口甚铄金。赋成恨与别,生死友朋心。 更忆狱中书,涕泗忽霑襟。千载倏忽度,棘荆生古墓。土黝草芽青,东风吹老树。我携良友 来,慷慨悲其遇。村剧奏嘈杂,新碑镌谬误。毋乃冢中人,泠然嗤而怒。

邹祗谟

邹祗谟,字訏士,号程村,武进人。顺治戊戌进士。有《远志斋集》。

折杨柳歌

美酒白玉壶, 高树白头乌。壶空乌不去, 弹尽大秦珠。

清河县

客久归程近, 乡思益不禁。春波高泗水, 暝色下淮阴。漠漠寒林树, 萧萧枉渚禽。 黄河流不到, 禹德叹逾深。

往嘉禾行莺脰湖中

客游倦休憩,孤帆乘蹁跹。绪风薄千里,冷泠桂楫间。荇芰发照耀,荑柳媚清涟。仰望碧云合,旷然知空山。倒景不能发,余晖生红泉。愁来愤方结,理至累已捐。涤荡悦心耳,杳冥思神仙。琴高骑赤鲤,挥手随芳烟。波澜虚晓月,渺渺区中缘。去去谢湖水,绸缪永勿谖。

登烂柯山坐青霞洞天半日

清溪隔荒畬,螺翠峥嵘起。白塔与红亭,明灭苍松里。石路足盘纡,磵流自瀰瀰。 拾级得间道,怳闻洞天咫。旷然通虚明,辽廓信可喜。若无众山横,坐瞩见千里。御风朝玉 京,浩浩却炎晷。欲携楸枰来,缥缈问仙子。便得青鸾乘,但恐白驹驶。王质诚何人,到今 犹不死。流传好神怪,此言无乃诡。不忍独长生,崎岖寻石髓。但当笑题诗,再看碧桃蕊。

咏怀

举世乏萱草,平生苦寥寂。东郭拉熊虎,壮心思射猎。西室会名倡,珠环生叹息。相如工词赋,家徒四壁立。君卿善遨游,五侯供饮食。如何怀烦忧,弃之远行役。攀翻桂树间,挥霍椒丘侧。隐士已耆年,教我伫颜色。并望恩与仇,逍遥谢荆聂。

中秋京邸

此夜中秋月,清光十万家。吴歌闻隔院,边调入征笳。北阙横秋色,西山隐暮霞。 故园从桂树,应发昔年花。

鲁绍连

鲁绍连,字可泰,一字小秦,山西籍贵溪人。顺治戊戌武进士。有《鲁小秦诗集》。

芗城

孤城如斗酌溪滨,极望茫茫一黯神。废垒烟空栖白骨,寒芜日落吊青磷。何来越子 三千甲,只负田横五百人。岂有桃源堪避世,几村烟水尚迷春。

崖断溪连转碧萝,岩阿亦近列仙窝。不闻归鹤来华表,但有哀鸿泣罻罗。山色故从 愁处绿,野花偏傍战场多。乱流满目嗟何及,空使英雄惜鬓皤。

【卷二十九】

王士禛

王士禛,字贻上,号阮亭,又号渔洋山人,山东新城人。顺治戊戌进士,授扬州推官,行取礼部员外郎,改翰林院侍讲,官至刑部尚书。谥文简。有《渔洋》、《蜀道》、《蚕尾》、《南海》、《雍益》等集,合为《带经堂集》。

拟美女篇

洛滨风日好,美女出相望。瑶象饰香毂,玉轪鸣锵锵。采春兰阪上,弭盖蘅皋傍。 龙辅节纤步,莺珠结明珰。借问女谁氏?少小生平阳。大姊入后宫,次姊琅琊王。小妹虽不 贵,夫婿直东厢。出入冠鵕鸃,天子侍中郎。槛衣万锦费,騕褭千金装。容华诚自惜,贵盛 宁易详。洛水正微波,明澜一何长。川路西南永,扁舟不可方。寄语盛年子,顾义慎自防。

拟白马篇

骏马生代北,少年出幽并。结束各光采,指顾风云生。朝游属玉观,夕宿卫承明。身逐孤儿队,名隶羽林兵。行行南山猎,意气何纵横。苍隼决云来,飞矢逆风鸣。大泽鹴鹄遒,深雪狐兔惊。回瞻鹳雀门,突兀与云平。鞍马倏来归,势若浮烟轻。昨夜羽书至,贰师出边庭。上马别妻子,鸣镝追前旌。旧随冠军伍,复此河源行。大漠少行人,深谷多鼯{鼠

生}。朝饮沙上泉,夕戍云间城。左顾疏勒服,右盼伊吾清。无令都护将,关外独声名。

醴泉寺高阁瞻眺有怀范文正公

风雨湖上来,萧条洒飞阁。殷雷起眉际,极目穷寥廓。遥天压烟水,空濛气磅礴。 大泽盘蛟龙,斜风偃雕鹗。却眺鸿濛中,日光远回错。草木暗四山,急淙鸣万壑。怅然思古 人, 《大雅》何时作。

蠡勺亭观海

登高丘而望远海,坐见万里之波涛。长天寥廓云景异,春阴偃蹇鱼龙高。怒潮乘风立千丈,虎蛟水兕纷腾逃。群灵潜结万蜃气,一痕未没三山椒。须臾势尽潮亦止,波淡天清静如绮。菱苔沈绿纷塘坳,螺蚌摇光散沙汭。参差岛屿罗殊域,纷如星宿秋天里。击我剑,听君歌,有酒不饮当奈何。日主祠前水萧瑟,仙人台上云嵯峨。羡门高誓不可见,秦皇汉武空经过。祇今指顾伤怀抱,黄腄瓶尽荒草。人生快意无几时,明镜朱颜岂长好。吾将避世女姑山,不然垂钓蜉蝣岛。

周文矩庄子说剑图后有董宗伯书《说剑篇》

古今人物画手谁第一?晋有卫协吴曹兴。南唐周生更奇隽,行笔瘦制姿崚嶒。此图在世逾千载,墨光黯淡生光晶。君王隐逸各有态,蚕丝烟篆交回萦。目瞋鬟突五剑客,短后之衣曼胡缨。二人旁立目左顾,剑如星日光纵横。昂首右顾者三士,二人按钅覃神欲生,一人拔剑作虎步,怒如截兕吞长鲸。使笔如剑剑气出,此公无乃能铁兵。庄生说剑固豪快,十步千里无留行。千年奇论佐奇笔,挥毫泼墨皆飞鸣。云间墨妙更遒绝,锺王腕底纷斗争。自云昔见吴兴书《说剑》,恨不作图双妙并。今逢此卷信神物,又恨作书非赵卿。徘徊三叹出金石,焕然妙迹如神明。我闻周生妙得后主作字法,秋胡谢女风格清。秦淮花月汴京土,感此伤人今古情。

秋柳

秋来何处最销魂,残照西风白下门。他日差池春燕影,祇今憔悴晚烟痕。愁生陌上 黄骢曲,梦远江南乌夜村。莫听临风三弄笛,玉关哀怨总难论。

娟娟凉露欲为霜,万缕千条拂玉塘。浦里青荷中妇镜,江干黄竹女儿箱。空怜板渚 隋隄水,不见琅琊大道王。若过洛阳风景地,含情重问永丰坊。

东风作絮糁春衣,太息萧条景物非。扶荔宫中花事尽,灵和殿里昔人稀。相逢南雁皆愁侣,好语西乌莫夜飞。往日风流问枚叔,梁园回首素心违。

桃根桃叶镇相怜,眺尽平芜欲化烟。秋色向人犹旖旎,春闺曾与致缠绵。新愁帝子 悲今日,旧事公孙忆往年。记否青门珠络鼓,松枝相映夕阳边。

洗象行

水关苍苍柳阴碧,宝马流苏纷络绎。日中传呼洗象来,玉河波射珊瑚赤。须臾钲鼓千云霄,万夫声寂如秋宵。虎毛蛮奴踞象顶,丘山不动何岧峣。岸边突兀二十四,直下波涛若崩坠。纵横欲蹴鼋鼍宅,腾踏还成鹅鹳队。乍如昆明习斗战,万乘旌旗眼中见。又如列阵昆阳城,雷雨行天神鬼惊。奴子胡旋气遒壮,忽没中流狎巨浪。撇波一跃万人呼,幡然却出层霄上。今年丞相收夜郎,扶南盘况旧王章。远随方物贡天阙,屹然立仗金阶旁。圣朝自不贵异物,致此亦足威遐荒。黄门鼓吹暮复动,海立山移浩呼汹。大秦狮子多威神,山林岂是天家珍。

余澹心寄金陵咏怀古迹诗却寄

千古秦淮水, 东流绕旧京。江南戎马后, 愁杀庾兰成。

锺阜蒋侯祠, 青溪江令宅。传得石城诗, 肠断芜城客。

再过露筋祠

翠羽明珰尚俨然,湖云祠树碧于烟。行人系缆月初堕,门外野风开白莲。

雨后观音门渡江

饱挂轻帆趁暮晴,寒江依约落潮平。吴山带雨参差没,楚火沿流次第生。名士尚传 摩扇渡,踏歌终怨石头城。南朝无限伤心史,惆怅秦淮玉笛声。

晓雨复登燕子矶绝顶

岷涛万里望中收,振策危矶最上头。吴楚青苍分极浦,江山平远入新秋。永嘉南渡 人皆尽,建业西风水自流。洒酒重悲天堑险,浴凫飞燕满汀洲。

吴季子祠下作

我行延陵城,怀古心菀结。让德邈已远,流风缅曩哲。州来季当立,高怀宁讵屑。 躬耕表遐志,亮哉子臧节。慕义永无穷,穹碑字难灭。所悲于潜役,国乱相更迭。伍胥进勇 士,专诸践王血。逊位固高义,复命忍臣列。《春秋》不名贤,书札理当晰。呜呼三代后, 斯风久沦绝!廉节起顽懦,尚论义常窃。缟纻思古人,空祠飒寒雪。

五人墓

流连虎阜游,宛转山塘路。石门映回波,英灵此中聚。满坛松桂阴,落日青枫树。 生傍伍胥潮,死近要离墓。千秋忠介坟,鬼雄誓相赴。酹酒拂苍碑,寒鸦自来去。

自米堆山下行至上阳村钱家磡望湖中渔洋法华诸山

杖策信忘疲,行行画图里。崎岖下云壑,苍茫望烟水。石径何盘纡,疏篱照梅蕊。 寥落重湖滨,柴门数家市。居人太古风,但解数鸡豕。语我种植法,敦朴有奇理。虽非用里 俦,颇谓桃源比。逶迤到湖漘,浩渺叹观止。震泽控三江,波澜此方始。法华表东陲,渔洋 正相似。烟雨春空濛,峰峦暮俶诡。昨朝梵天阁,远眺如隐儿。岂知方丈山,忽落芒鞋底。 欲乞五湖长,垂钓将已矣。

和牧翁题沈朗倩石崖秋柳小景

宫柳烟含六代愁, 丝丝畏见冶城秋。无情画里逢摇落, 一夜西风满石头。

秦淮杂诗

新歌细字写冰纨,小部君王带笑看。千载秦淮呜咽水,不应仍恨孔都官。

旧院风流数顿扬,梨园往事泪沾裳。樽前白发谈天宝,零落人间脱十娘。

傅寿清歌沙嫩箫, 红牙紫玉夜相邀。而今明月空如水, 不见青溪长板桥。

新月高高夜漏分,枣花帘子水沈薰。石桥巷口诸年少,解唱当年《白练裙》。

故中山西园

上公邸第旧西园,水石萧然绝世喧。无复秋兰被长坂,祇余修竹映朱门。萧曹事业终归尽,江孔文章莫更论。日暮风烟愁客思,冶城南是谢公墩。

瓦官寺

江色斜阳下,来过古瓦官。勇如骠骑少,痴似虎头难。梵响流空寂,松声覆殿寒。 逍遥能解否,试问道林看。

答朱锡鬯过广陵见怀之作时谒曹侍郎于云中

桃叶渡头秋雨繁,喜君书札到黄昏。银涛白马来胥口,破帽疲驴出雁门。江左清华惟汝在,文章流别几人存。曹公横槊悬相待,共醉飞狐雪夜尊。

昭阳顾符稙画便面栈道图歌

顾生画学李思训,尤工栈道兼骡纲。丹青金碧妙铢黍,近形远势穷毫芒。褒斜山色一千里,子规啼处烟苍苍。女郎祠边人迹绝,但见哀猿连臂叫啸青崖旁。江水如油下南郑,阁道似发通陈仓。红毡裹背笠覆首,人物结束疑唐装。车马班班入云际,如蚁缘垤相扶将。秦川渭水望不到,蚕丛直上天茫茫。仰家扇子冰雪色,一茎斑竹磨潇湘。如何方寸怀袖里,宛然置我蜀道青天长。扬一益二古天险,谯周鬻国谋非臧。阿瞒四纪作天子,青骡西幸何仓皇。三十年来蜀道塞,况从古史论兴亡。因君妙迹发遥慨,如听铃声替戾冈。

送陶季之潞州

先生昔日登武夷,铁船峰头看弈棋。中冠离支三百颗,酒酣自擘轻红肌。峰头烂睡忘甲子,坐笑曾孙生白髭。张帆伐鼓下黄鹤,欲滥三湘穷九疑。披襟兰台发高唱,快哉不辨风雄雌。平生名岳屐齿遍,风尘京雒嗟衣缁。投我奇文浩千顷,蛟龙大泽缠躞跜。谓我四海一知己,譬若庄休从惠施。高斋茗饮坐清昼,风炉活火分枪旗。我时无事似犀首,酒鳞浮动银留犁。丰台红药花照眼,骊驹忽告将西驰。壮心犹作骥伏枥,適志无如泥曳龟。我闻上党天下脊,当年潜邸传临淄。飞龙荒宫没烟莽,断碣仿佛开元词。纷纷梁晋夹河战,鸦儿万骑陈军麾。锦囊负矢盛意气,歌声慷慨留三垂。时平不用弓箭手,空老昭义千熊罴。战场下马问亭长,鬼磷飒飒寒飙吹。君家草堂临射陂,门前五柳藏东篱。何时单舸径归去,北窗高枕谈黄义。

胶乐张雉画葛洪移家图歌

下帘卧清画,远梦生罗浮。觉来北堂上,素练横沧洲。依稀三万六千丈,风吹绝壑红泉流。何人携持杂负戴,全家避地来山幽。先生身骑乌牸牛,丹鸡白犬随行辀。鲍家小女两丫髻,手把芙蓉居上头。惠怀之际那可道,万乘不洗金墉羞。王家宁馨失三窟,华亭鹤唳悲清秋。回首铜驼洛阳陌,名士对泣新亭囚。伏波将军不受赏,丹沙欲就来交州。大鹏讵可伍鹪鷃,跛鳖坐笑追骅骝。张生妙笔擅黔陬,令我逸兴生丹丘。夙昔读书慕仙意,望而不见中心愁。十五婚嫁愿粗毕,青鞋快作逍遥游。刀圭为我留井灶,此生未作坳堂舟。

世祖章皇帝御画渡水牛戏以指上螺纹成之赐中官某臣从黄州通判臣宋荦得观恭赋一章

章皇握乾符,武功煇旁魄。孚斋春昼长,游艺眷图籍。泉壑穷窈窕,烟云罗幽赜。宝绘赐近臣,往往等球璧。常从青箱堂,奎藻睹赫奕。营丘及河阳,到眼堪一掷。想见忧勤暇,胜情寄山泽。戏作渡水牛,生态妙盘辟。肉怒垂星圆,筋突阴虹直。脰似满黄锺,角堪扣白石。弹指九牛毛,森疏如刻画。水波稍演迤,浮鼻未没脊。仿佛绿杨风,掩映春芜碧。神武十八载,文教洽重译。干戈与弓矢,包用黄牛革。《小雅》赓宣王,尔牛何湿湿。旐旟牧人梦,考牧周官职。应知翰墨余,与世登衽席。龙髯去已远,讴思遍荒僻。云汉烂天章,典谟布方策。圣主念绍庭,率由正无射。小臣沐皇风,流涕记飞白。

送宋牧仲别驾归黄州

词赋梁园忆胜游,一麾云梦泽南州。三分谁似周郎少,《九辨》深知宋玉愁。乌鹊南飞河汉转,大江东去古今流。山川如此容高啸,羡汝黄泥坂下舟。

送陈其年归宜兴

与君五载扬州梦,细马吟春皂荚桥。岁晚幽州复相送,九门风雪压盘雕。

送客魂销枫树林,买田阳羡旧同心。花枝照眼鱼叚笼嘴,未得从君弄渚禽。

送吴天章归中条

二月春芜绿,纷纷蝴蝶飞。花朝逢暮雨,寒食减征衣。道路谁知己,登临不当归。

中条多水竹,此去掩荆扉。

爱汝王官谷,他年拟借居。三峰当户牖,五姓足樵渔。田舍堪怀古,茅茨宜读书。 独怜好身手,归去注虫鱼。

题尤展成新乐府

南苑西风御水流,殿前无复按《梁州》。飘零法曲人间遍,谁付当年菊部头。

猿臂丁年出塞行,灞陵醉尉莫相轻。旗亭被酒何人识,射虎将军右北平。

千金匕首土花斑,儿女恩仇事等闲。他日与君论剑术,要离冢畔买青山。

题施愚山卖船诗后

国家急廉吏,将以风百僚。如何十年来,吏道纷吴敖。哀哉此下民,鞭朴分安逃。鲁山与阳城,斯人竟难招。江西饱乱离,白骨填蓬蒿。石田废不治,遗黎杂山魈。一二老寡妻,茕茕困征徭。昔者数守令,为政严风飙。峻令盛诛求,细不遗龀龆。金玉竞辇致,乐哉共宣骄。宪府前上寿,鞠一何劳!公堂侮下民,意气一何豪!寡妻哭向天,血泪埋荒郊。乱后几孑遗,乃以资汝曹。是时宛陵公,持节吉临交。为政贵简易,洁己先清翛。放衙苔藓净,飞鸟营其巢。赋诗弹子岭,慷慨同《石壕》。白鹿与青牛,斯道谁鼓橐,公独奋百世,皋比陈唐尧,廉耻存纲维,义利穷毫毛。兰芷变荆棘,孔鸾革鸱枭。汝曹即不仁,宁终肆阚虓。七载一舸归,无物充官艘。两部万黔首,留公但号咷。读公《卖船诗》,中心何忉忉。填膺抒此词,庶以备风谣。他年韦丹碑,会见留江皋。翘首望宇中,烟火尚萧条。安得百施公,为时激顽浇。

送张篑山学士归庐陵

回首觚棱别紫宸,孤舟遥下富川滨。谁令江外渔樵侣,争识先皇侍从臣。上殿似闻 辛庆忌,行吟休拟楚灵均。千秋公议存青史,应为朝廷惜此人。

观秘魔崖至龙潭作

山行逐薙若,径转无人迹。亭午逾高岭,逍遥随所適。古寺披荒榛,乍到如有获。 卢师晏坐处,犹存涧边石。石上留孤松,终古不盈尺。地僻山鬼邻,鸟下苍苔积。孤阁临寒 溪,林壑莽萧槭。灌木纷相纠,阴崖互崩拆。何当秋雨时,惊湍若潮汐。来此十日眠,濯足 蛟龙宅。

卧佛寺

清晨越南磵,毕景来东林。石径入幽阒,稍闻钟声音。禅房鸭脚古,别院桫椤阴。 春夕月复佳,微云灭遥岑。山气自蓊郁,天宇亦森沈。道人澹相对,松风洒衣襟。夙怀清净 退,回识妙明心。寂寥无可说,请君张玉琴。

晚入退谷却寄孙北海先生

谷口远烟暝,水石起寒色。西溪有归人,东峰隐余日。积雪封巉岩,微径雪中出。 残冰流复断,暗泉听还失。不知荒寒中,前峰去安极。稍见觳觫牛,怅望归飞翼。侍郎昔挂冠,于此散愁疾。画壁沧洲图,结屋云林侧,溪南万竿竹,岁久渐蒙密。为述净名意,更就支公室。惭叹解巾非,何年此栖息。

故明景帝陵怀古

雨中度故关

危栈飞流万仞山,戍楼遥指暮云间。西风忽送潇潇雨,满路槐花出故关。

国士桥

国士桥边水,千年恨未穷。如闻柱厉叔,死报莒敖公。

河中感怀寄诸兄

何处依依动客愁,蒲津云物迥高秋。河声近挟中条雨,关势遥分太华旒。人代茫茫 双去鸟,夕阳渺渺独归舟。京华故国俱千里,心折西风鹳雀楼。

望华山

关中八水汇,清渭独朝宗。黄河西北来,交会船司空。河流挟底柱,岳势分宏农。山河两戒首,气压殽函东。金天正肃杀,屹然白帝宫。削成五千仞,真宰散鸿濛。及关见岌嶪,元精罗心胸。倏忽云气生,西接终南峰。诸峰忽已失,俯首趋河潼。峨峨司寇冠,独立青云中。苍茫望三辅,秋气去安穷。荒唐秦皇腊,寂寞希夷踪。何当驾白鹿,还共骖茅龙。

华州齐云楼

齐云楼上望京师,渭水东流无尽时。父老尚传行幸日,教坊曾谱断肠词。城空只见 双飞燕,劫败犹争一局棋。莫问寒烟十六宅,土花凝碧至今悲。

汉武帝通天台址

通天台畔望咸京,秋入秦川雨半晴。御宿不来仙掌散,宫车已往露盘倾。神光遥指 虚无影,渭水长流日夜声。此去西风茂陵路,祇应肠断沈初明。

武功道中

武功回首望金城,古迹萧条感乍生。秃节尚怜苏属国,党人终赖窦游平。白头郁郁身前事,青史悠悠世上名。千里终南山色好,一枝筇竹万缘轻。

马伏波祠

冥冥炎海伏波祠,肃肃灵旗故国思。万里功名铜马式,五溪淫潦跕鸢时。隗嚣讵识 真王异,朱勃终惭地下知。空忆平生少游语,归来款段悔教迟。

凤岭

南岐地何高,凤岭踞其右。路绝无钩梯,直上若悬溜。日月互蔽亏,光明错昏昼。云雾四荡潏,雷车中杂糅。飞龙何衙衙,夭矫出岩窦。俯瞰两当水,奔流下腾凑。转石类抟撠,画沙成篆籀。初疑饥蛟蟠,更作外蛇斗。闻昔周文王,盛德及灵囿。凤鸟此来集,世远事悠谬。末季重边防,戎马几驰骤。秋风吹散关,一夕惊老瘦。

五丁峡

南穷石牛道,岩岩下云栈。三日招我魂,足踔目犹眩。岂知东苍州,耳目益奇变。始过金牛驿,樛嶱已凌乱。漾水从北来,劣足泛凫雁。举头嶓冢山,峨冠倚天半。大哉神禹功,从此导江汉。渐入五丁峡,谲诡骇闻见。斗壁何狩狰,十万磨大剑。攒罗列交戟,茫昧通一线。乱水殷峡中,鲛蜃喜澜汗。仰眺绝圭景,俯竟雷抃。九鼎铸神奸,到此百忧患。东方牧犊儿,竟使蚕丛判。我行忽万里,风土异乡县。身落大荒西,终赖皇天眷。咄咄复何言,艰虞一身贱。

金方伯邀泛浣花溪

解缆江村外,溪沙失旧痕。夕阳来灌口,秋水下彭门。清吹临风缓,神鸦得食喧。 百花潭上好,新月破黄昏。

长寿县吊雪菴和尚

枳县秋风怆客魂,金川遗事忍重论。谁从鱼服悲宗国,惟有乌朝恋旧恩。叶下沅湘 愁北渚,芜生鄢郢哭东门。至今松柏滩头水,呜咽寒潮吊屈原。

万县有感

千秋南浦地,险阻控三巴。恶少仍雕面,通侯各建牙。何人饲豺虎,吾道一龙蛇。

鼓角寒城暮, 江流卷白沙。

秭归夜泊

江水茫茫去,西风感鬓丝。峡深夔子国,月上屈原祠。滩响夜方急,猿声寒更悲。 楚天摇落后,何处采江蓠。

过长沮桀溺耦耕处

曾读陶公传,辽辽沮溺心。耦耕余故迹,流水抱寒岑。鸟下日将夕,云归山半阴。 从来避世者,不厌入林深。

挽姜贞毅先生

曾闻碧血裹朝衣,沧海横流万事非。生已变名吴市去,死当埋骨敬亭归。空山落日鸣鶗鴂,孤墓深春长蕨薇。魂傍要离君爱弟,英灵来往怒涛飞。

通州水月菴三用清虚堂韵

凫翁三五嬉晴沙,残僧闲关如退衙。黄芦苦竹隐缺岸,水葓往往飘残花。濠濮会心岂在远,便可泛宅仍浮家。水关上接鲍丘水,伯珪战地啼寒鸦。卓老一抔没荆棘,惟怜文采兼奇葩。古人于此两寂寞,高枕且听风炉茶。漕河如林万樯立,负城时送回帆挝。仿佛扁舟落吾手,背痒欲倩鸟爪爬。病鹤触笼翅翎短,老随鸡鹜吁可嗟。安得十洲纵汗漫,排空一气凌云霞。

赠郝雪海侍御

龙性讵能驯,依然七尺身。谁从燎原日,还忆徙薪人。肝胆酬明主,风霜老逐臣。 孝陵松柏泪,霑洒又重新。

血战蚕丛日, 愁云压阆中。谤书翻置狱, 刀笔敢论功。又失巴西险, 何时剑外通。 凭君重草檄, 早为破田戎。

杂感

陇水洮云外,传烽万里通。天兵张掖下,露布朔方同。贼已亡方望,时堪仗窦融。 明年看置酒,图画满南宫。

饮马洞庭阔,连营笳吹闻。南人知象主,汉表失番君。斑竹祠边水,苍梧野外云。 何时真下濑,一试习流军。

戮力还羌帅,孤忠有法王。不缘蒙上赏,何以警无将。天狗过秦野,髦牛限鬼方。 古来称陇蜀,成败几苍茫。 一发东瓯路, 悬军春复秋。何人裹马革, 几辈烂羊头。礼比长公主, 荣逾恩泽侯。 圣朝宽大德, 不死竟何忧。

曹升六谢千仞携酒过饮宋牧仲张杞园亦至同赋长句

陵州罗酒玉雪清,青州金露琥珀赪。直沽冰开酒船到,属车捆载连瓶罂。二子提挈肯过我,鸱夷交卧纷纵横。我爱徐景山,不知曹事惟酒枪。复爱谢安西,玩弄玄子如老兵。眼中况是我辈客,谈天炙毂声彭觥。一斗枯肠芒角生,五斗胸中鳞甲平。一石旷若游八极,《逍遥》《齐物》无亏成。幽州二月草始萌,小桃照地如红鞓。天涯酒人不易得,何必琴筑琵琶筝。十掷辄犍讵缘拙,三语作掾谁所令。蜡炬成堆冠帻堕,西南月作金盆倾。

昔闻马文渊,居后欲轩前欲轾。又闻栾将军,贱贫辱身贵快意。此语非长者,亦复非游戏。劲翮扶摇九万里,岂识青冥更垂翅。鸢肩火色多少年,一老行吟独憔悴。惟应中山酿,供我千日醉。駃騠为胾驼作羹,有酒如渑那复记。千秋亭上相叫呼,不知何与痴人事。丈夫不得手执丈二殳,身领渔阳万突骑。亲射蛮毡缚鬼章,谁识邓先好奇计。此酒须满百斛船,使我反覆没饮如渴骥。子路百榼尧千锺,黄土谁能别愚智。诸君不釂阁当闭,举觯径须烦杜蒉。

曹正子邀同家兄子侧及诸君丰台看芍药晚过祖氏园亭

回首旗亭画壁时,重来已是十年迟。应刘逝后风流尽,只有恒河照鬓丝。

宫锦千丝费翦裁, 让尼他婪尾殿春杯。老颠剩欲相料理, 乞取齐奴步障来。

霑湿春衣更不嫌, 花枝娅姹雨廉纤。鬓丝禅榻心情改, 闲看儿郎插帽檐。

送姜西溟归慈谿

春风滋百卉,不荣孤柏根。白日回阴崖,霜雪惨不温。丈夫重知己,烈士轻感恩。 姜生起句余,水击南溟鲲。《商歌》一亩宫,名动万乘尊。孤高取众忌,当路谁攀援。季布 揖曹丘,感激由片言。何况贫贱士,风飙阻重阍。枚朔善骫骳,庄徐擅高论。连尻结股脚, 词赋若云屯。君独衔恤归,秋风刈丛萱。虎鼠竟何常,挥手声暗吞。

寄青浦丞李青立

麟趾异凡蹄,凤毛异凡羽。君为南阳孙,豁达类其祖。请从复辟论,即事感今古。神龙奋幽蛰,天星落如雨。仓皇夺门功,造次成肺腑。舆台珥貂蝉,政柄归奄竖。陈请滥恩泽,带刀依负斧。晋文定王室,请隧不见许。吁嗟彼何人,凭藉乱狐鼠。爰立当危疑,踪迹等羁旅。当时武功伯,唇齿终龃龉。公实仗忠信,臲卼成心膂。呜呼三杨后,伯仲见伊吕。天地郁风云,将相如龙虎。爱君清门后,克秉高曾矩。低眉百寮底,手版趋公府。青袍映春草,远向春申浦。妇有林下风,乐事笑眉妩。诗寄雁南飞,因风堕洲渚。

送冰修归海昌兼寄朱生

老大身将隐,飞扬气自雄。游燕交马客,归越事猿公。仙饭青精饣丸,诸儒《白虎通》。故人朱季在,何处驾飞鸿。

其年检讨见和绿雪之作复遗岕茶一器索赋

敬亭如静女,姽婳有余态。洞山如道流,吐纳成沆瀣。阳羡连故鄣,{尸几}雕相负戴。地灵草木异,云雾凝叆叇。尤重罗嶰名,超轶绝流辈。山气夕阳佳,风露非灌溉。昨赋《绿雪诗》,莽卤乏清裁。名流递赓唱,粲若珠百琲。髯也实致师,拔戟成一队。白甀题红签,细君自蒸焙。朝来肯送似,秀色染眉黛。下帘候鱼目,芳瓷露蟾背。虽复遭水厄,颇亦浇垒块。茶声正瑽琤,竹影交琐碎。诗成遣长须,聊作三舍退。君当贾余勇,吾衰鼓已再。

送邵子湘之登州

我闻大九州,香海环其外。裨海内络之,万川势交汇。《禹贡》周职方,中央浮芥蒂。邹衍不可作,畴与辨茫昧。昔者始皇帝,东巡极海岱。海神驾桥梁,大鱼射澎湃。号为秦东门,刻石表朐界。三山在水下,其事颇奇怪。邵生列仙儒,远游信所届。遥飞阜乡舄,往抚天吴背。龙蹻凌丹崖,九点烟凝黛。崭绝日主祠,夐与之罘对。日月影动摇,岛屿光破碎。朝潮激天轮,夕汐裂地肺。巨鲸若连山,奋鬣云昼晦。时见新罗船,墨点空青内。广乘渺何所?归墟谁负戴?木张悉文雄,髯才更十倍。归来述沧溟,始信九州大。

和田纶霞郎中移居

田郎诗格如雪车,昨来新句传移家。梦向漪亭坐秋水,苍筤万个眠{鹿开}麚。冬官事少蹋壁卧,日未卓午先放衙。残书满前自穿穴,纷如雁字风中斜。未要沈范相赏识,风亭月观吟梅花。庐如瓜牛足摇膝,毕逋爱伴城头鸦。鸷鸟累百讵比数,蹀趾習聊度终参挝。牵萝补屋绝代子,慎莫无匹悲娲。

问钝翁编修疾

先生方丈似山茨,闻道维摩病起迟。乍可心情同木石,依然谈笑却熊罴。别裁伪体时流忌,独抱遗经后代知。遥忆玉堂清夜梦,雪中花坞水边篱。

送张仲诚知资县

不惮三巴远,高名万乘知。子规声断处,山木雨来时。囊有涪州易,园无鲁相葵。 王襃诸弟子,应习《鹿鸣》诗。

东丹王射鹿图

人马势逸不可当,开图素练生风霜。奇哉落笔如挽强,谁其作者东丹王。东楼西楼二千里,乘秋出猎凌穷荒。番部红靴铁裲裆,左射右射必叠双。凿蹄骄马如风樯,三花翦鬣粉怒张。俊鹘初变为正鸧,苍鹰塌翅随马缰。雄狐狡兔皆遁藏,射麋丽龟走且僵。东丹昔日称人皇,扶余开国邻扶桑。秋冬射猎海东碛,头鹅燕罢传浆。跨海南归大梁苑,时时梦忆穹庐乡。往往丹青自游戏,寸缣尺素如琳琅。宣和压架六千轴,东丹九幅千金装。艮岳灰飞玉

匣散,此图岂不关兴亡。蜡炬如椽照空廊,雄谈剧饮累百觞。东丹丹青远擅场,蹊田夺牛语堂堂,令人千载悲同光。

送同年伊翕菴中丞巡抚云南

金马山前驻碧油,青蛉塞外阵云收。天威近已通诸赕,王会依然遍九州。铜弩雨深诸葛垒,丛祠春赛颍川侯。《铙歌》鼓吹征蛮府,万里昆明是壮游。

柏台新命帝亲除,重译西南罢羽书。雒将朱鸢皆内属,越人黄屋竟何如。赐来天厩 飞龙马,行避中丞赤棒车。荒服祇今劳睿虑,要令绝域化耕锄。

再送念东

锦湖秋色漾涟漪,湖里游人歌《竹枝》。斜日泊船红蓼岸,神鸦飞过鲁连祠。

长白山中跨白驴,偏提时挂小篮舆。八驺朱雀航南路,可似先生薄笨车。

送毛斧季归常熟

昆湖有真隐,金栗缅高风。桑海遗民老,襄阳耆旧空。人言虞仲里,又得小毛公。 廿载淮南别,吴江几落枫。

中秋后得富顺范生嘉州帅生书知其陷贼不辱伪命遂有是作

几载豺狼横巴蜀,今朝书尺慰相思。天彭井络欣无恙,伏剑佯狂更不疑。会见费贻 徵合浦,何妨甄济动京师。汝曹识字知忠孝,一笑南楼倒接篱。

十一月十八日纪事

招摇方指子,七日后长至。五星如连珠,贞符协天瑞。詄荡天门开,日射觚棱次。公卿俨行列,百寮咸备位。云中露布下,琅琅动天地。十月日在未,军府秉谘议。雷动传滇城,十万连步骑。贝子坐武帐,诸道师总萃。将军拜被社,偏裨怒裂眦。搜穴翦狐鼠,然犀照魑魅。天上舞钩梯,地中鸣鼓吹。不遑濡马褐,况敢执象燧。胆落钟讵闻,约长发竞系。半年筑长围,屏息门书闭。樵采路久绝,啖食到残骴。鼫技悔已穷,蚁援复何冀。孺子一匕殊,伪相五刑备。自然天助顺,岂曰吾得岁。昆明水清泠,金马山屃赑。妖氛一朝洗,磨崖勒文字。釐圭命召虎,乘轩宠邴意。六诏歌且舞,给复置官吏。皇哉圣人德,涵育及动植。手提三尺剑,削平诸僣伪。何以硎曰仁?何以淬曰义?所以八年中,次第芟丑类。师行不驿骚,民居不憔悴。自兹万斯年,囊弓兵不试。敢告载笔臣,著之大事记。

和徐健庵宫赞喜吴汉槎入关之作

丁零绝塞鬓毛斑,雪窖招魂再入关。万古穷荒生马角,几人乐府唱刀环。天边魑魅 愁迁客,江上莼鲈话故山。太息梅村今宿草,不留老眼待君还。

戴氏鼎

昔在京师赋《方鼎》,年少笔力回千钧。焦山鼎图岁在已,江海起立鱼龙奔。迩来衰谢二十载,虽有意气无由振。戴氏此鼎何处得,势如怪兽狞以蹲。平头负戴到蓬户,四座动色谁敢扪。云雷盘旋间饕餮,斑斑古色疑周秦。凹中尾鬣状天马,缘{尸几}鼯鼠拱且驯。或云子午纪年月,或如癸甲兼庚申。或云乾上艮在下,天山为遯理则均。著马履鼠古所训,义云阴屈而阳伸。制器尚象有深戒,寡闻尠见徒纷纭。大巧坐令倕龁指,流俗岂辨饲与饙。丹枫阁中尽奇古,此鼎屹立何雄尊。市丘鼎龋任嘲笑,烹鸡何以羞明神。不烦更问柳下季,历千万世存吾真。

多父敦

昨日赋罢《天马鼎》,今日复示古敦牟。山川连日发光怪,黄白下覆云油油。此敦 形制奇且古,两耳三足穷彫锼。上作饕餮下蚩尤,细辨非簋非彝舟。古人一物殚工巧,用盛 黍稷神所羞。珠盘玉敦载盟府,云以歃血亲诸侯。流传千载历尘劫,却伴高士山之幽。昭余 自昔称晋薮,侯甲水作青瑶流。丹枫孤阁踞其上,朝霞暮霭临窗浮。先生静坐观众妙,图书 万卷皆亲仇。此鼎此敦置左右,苍然古色来商周。庭列九宾发缇幕,令我一见生叹愀。长安 市儿宝康瓠,金敦玉敦知何求。什袭归去闭高阁,会有光气腾龙虬。

元祐党籍碑

天津桥上啼杜鹃,耕父已见清泠渊。宫中尧舜不可作,厚陵社饭悲年年。二惇二蔡 秉国轴,同文馆狱纷钩连。衣冠相望走岭表,一网尽矣嗟群贤。司空手籍元祐党,大书深刻 相磨镌。彗星下扫文德殿,毁碑夜半何喧阗。攸攸狒狒一儿戏,可惜宋社成南迁。潭州死骨 尚有臭,党人名字光中天。西南荒徼八桂郡。此碑千载人争传。上云垂戒万万世,其词何异 诛共驩。从来青蝇乱白黑,三代遗直今如弦。小人勿用易所戒,崇宁偾辙无忘旃。

题徐骑省集后

江左黄星事又新,萧萧白发入咸秦。茂陵玉碗通天表,未信初明是恨人。

寂寥小雪闲中过,斑驳新霜鬓上加。拥鼻微吟一惆怅,残年风景又天涯。

送黄方叔之官山海

翩翩黄叔度,揖我向榆关。半刺今为政,长城无限山。扶余潮信外,孤竹夕阳间。 重镇当年地,茫茫古戍间。

过宣城馆有感

暮天黄叶落,一过西州门。无复高人迹,空闻宿鸟喧。新阡思挂剑,旧馆忆开尊。 南望澄江水,谁招屈宋魂。

二禺祠

轩辕二帝子,闻住绿云间。世远无遗迹,夕阳空乱山。攀髯失弓剑,采药异荆蛮。 猿鸟青冥里,应悲去不还。

歌舞冈

歌舞冈前辇路微,昌华故苑想依稀。刘郎去作降王长,斜日红绵作絮飞。

三峡桥

五里闻瀑声,轰若车千两。谿回见飞梁,穹若虹百丈。众流会三峡,峡门扼其吭。 建瓴沸惊湍,排空削层嶂。石激水斯怒,水横石逾壮。水石终古争,怪奇纷万状。日射金井 潭,溅沫出桥上。日光散青红,雨丝乱飘飏。绝景遇两苏,何人继高唱。

玉渊潭

己历三峡桥,更访玉渊水。水流大壑中,路转层松里。片石横百仞,其右平如砥。 九十九飞瀑,一门争万轨。岝崿直要冲,跳荡不得止。雪浪如车轮,凸凹忽奔驶。激射为深 潭,神物潜尺咫。夜黑风雨来,鳣鲔皆避徙。久立凛毛发,薄云漏余晷。西眺石人峰,梵呗 空中起。

蟂矶灵泽夫人祠

霸气江东久寂寥,永安宫殿莽萧萧。都将家国无穷恨,分付浔阳上下潮。

题查夏重芦塘放鸭图

鸭母船依湖水滨,船头长日饭龟莼。凭谁寄谢桓南郡,不是鹅栏教斗人。

《鸭头丸帖》种鱼经,尽日芦埼泛渺冥。何似渔阳随突骑,天风齐放海东青。

米海岳研山歌为朱竹垞翰林赋

海岳研山不可见,人间空说《研山图》。研山之图亦遭毁,云烟过眼徒嗟吁。宣和艮岳已尘劫,矧乃片石轻锱铢。永嘉流落几百载。昭陵玉匣今亦无。讵知神物有呵护,星芒夜陨三天都。太平宰相盛文物,宝此何啻千璠玙。古藤书屋花未放,主人爱客招吾徒。眼中突兀忽见此,乍疑几席罗衡巫。壶中九华那足拟,仇池枉用夸髯苏。三茅地肺互钩带,二华云气相萦纡。蛟龙屈蟠待雷雨,仙灵仿佛回骈车。华盖一峰独秀拔,宛插玉笏翘犀株。翠蛮玉筍左右列,脽尻股脚相欹扶。上洞下洞閟曲折,潜通小有涵空虚。龙池幽窈验雨候,颇疑中有骊龙珠。峰独者蜀属者峄,上泉有埒下有澞。坐客摩挲三叹息,苍然古色生眉须。海岳之菴书画舫,几伴此老浮江湖。巧偷豪夺历千劫,阅尽春秋如蟪蛄。翰林好事过颠米,日餐蛾绿忘饥劬。沧江夜夜虹贯月,莫令光怪惊菰芦。

郭有道墓

大槐坂上逐车尘,争效先生折角巾。至竟清流解亡国,望门投止是何人。

【卷三十】

王又旦

王又旦,字幼华,别字黄湄,郃阳人,顺治戊戌进士,由知县历官户科给事中。有《黄湄诗选》。

王阮亭曰: "幼华诗一变而清真古淡,再变而为奇恣雄放。及归龙门,读书太史公祠下,而其诗益{大沦}泫澄深,渺乎莫窥涯涘。"

姜西溟曰: "今京师以诗名家者,称'两王先生',一为新城阮亭少詹,一为郃阳黄湄给事也。其后新城予告归省,而都下之言诗者乃专归郃阳。公生平与阮亭周旋最久,故阮亭序先生诗曰: '幼华之诗凡数变,而予皆能道其所以然。'然公诗与阮亭谿径自别,古体老而益肆,外露奇倔而内涵静穆,非学醇而功力深至不易臻斯境界,宜阮亭亟称之也。"

自千尺抵云台峰作

清晨杖轻策,入谷二十里。倾崖骤合沓,钩梯纷相倚。苔古行踪灭,险艰从此始。云窦俯绝壑,繘垂但纚纚。攀繘踏危石,足顿不能起。岩屋照颓阳,曾岑倒松梓。养力憩烟霭,乃知崎岖美。东南得高壁,路隘不任趾。乱峡无全天,坤轴忽崩圮。太息展远眺,前途尚

苍龙岭

削壁突断绝,微径始跻攀。长虹驰远影,飞落青冥间。迅飙两崖起,猎猎云气还。 连峰若动摇,我行亦孔艰。天色扑莲花,瑶草何斒斓。陟危千万虑,旷望忽开颜。璇宫应不 遥,从此排天关。

玉井

万桧翳深景,夕日风飕飗。茫茫石磵外,颢气谁挽收。莲花不复见,一水入云流。

坏幹系短绠,灌莽生石路。披草汲清泠,冥然惬幽遇。天风入泬寥,坐看高下树。

大风雨自玉井归西峰宿范湘滨道人复庵作

越嶂探玉井,日照东林木。云气生壁上,须臾荡虚谷。爽籁激幽响,大雨一何速。 群帝忽徕下,乘蹻纷相逐。桂旗连宝羽,飘飘低以属。天色变多端,一气自回复。徒侣对面 失,苔滑阻纡曲。纷吾身何讬,暂憩云中屋。稍觉心魂安,更旷登临目。欹斜千山松,偃卧 一径竹。莫漫嗟险艰, 庶几惬幽独。入夜展道经, 孤镫照人宿。

下山

下山寻旧径,沈沈临大壑。乱石忽改观,烟景纷相错。低头追胜迹,背面惜林薄。 岩回明星掩,路转石月落明星,峰名。石月,在东峰上。大河折东流,波荡宏农郭。万古东 西路,世往事冥漠。名岳如可留,吾欲齐龙蠖。

杂兴

荜门槐荫清,野垄青苕柔。荷锄守旧辙,贫家无外求。孤云归空山,山前涧水流。 平心惬微愿,选念亦自由。纷吾涉尘鞅,无端生百忧。举步皆谿壑,念往多所尤。譬之御骇驷,一纵不得收。慷慨欲置之,反顾还夷犹。

焦山

乘春历江皋,访古浮玉山。江风正荡潏,短棹欲进难。千里滞水国,岂不增忧患。 隔岸见石屏,忽使怀抱宽。曲径渐分明,丛篁亦檀栾。幽事供怡悦,指点轻狂澜。胜游难再 得,我役何时闲。

羖差历逐牂羊,相倾无朝夕。旌旆明江涯,楼船何络绎。高士卧空山,闭门但自適。至今三诏岩,古木森千尺。斥堠尚在眼,客子苦行役。常怀岁时迁,念此饥寒迫。赪颜再稽首,不敢乞白石。孝然常以白石与人,煮之成芋。

盐官杂兴

晨出步城南,城南栈栈多莓苔。昔人负高调,在此延望但见野木风号鸟毰毸。成连何处寻尔师,如何至今不知回?云烟莽阔白日冻,阴风常起伯牙台。千载尚有凭吊客,山径时时骑马来。

金虎行

然如城楼夜打鼓,素月将中近金虎。早起黤黮岚结阴,塕然风吹鹳上林。濛雨迟回 久不下,欲断欲续飘古瓦。桑苎摧折唤不醒,滴沥何能遍中野。群灵参差如连鸡,炎官气盛 犹問。三月雷火久闭藏,天威未远还须假。群儿同声叫号屏,须臾细注檐头泻。我怀岁功惜 已晚,泽其枯矣寡萌虇。

一貉行

山人朝猎得一貉,换米一筥十日乐。一貉可怜获一筥,百貉成裘知几许。素丝细制 光蒙戎,堆床照燿锦绣红。王孙著来骑大马,霜飞雪下无寒风。时易调移不称意,金毳纵横 遭委弃。朱门错刀如流泉,还忆山人始得年。

牵缆词

昴毕西横夜犹暗,官船催夫牵锦缆。石尤风高霜满河,欲行未行徒蹉跎。天明前村鸡下树,五里六里已为多。橐中糇粮早已尽,前途尚远饥如何。生来不合水边住,负儋欲问山中路。山家奉令猎黄罴,正是昨宵牵缆时。

秋获词

吁嗟我生遇不淑,结茅作舍露中宿,年年种田食无粥。腰镰入陇叶初黄,可怜不待 禾子熟。官家百事无时休,县门霹雳震不足。西风匝地繁霜下,亩税力役相委属。君不见贫 人在官不顾私,黄犊饿死那得知。

击词

杨柳城头光渐黑,公家悬急漏刻。绕城百转天未明,火灭薪残逗霜色。防兵近驻江 之浒,醉拥金钗夜歌舞。入市打人知几回,长官不敢促收捕。已闻剽劫如转轴,犹向东郊射 鸡鹜。朝来邮吏何忽忙,帖下传说军无粮。

河决时久雨。

襄樊一水东下潜,高风吹浪何时恬。百川之长背卑谦,五月五日忧如惔。二女拥珮手掺掺,黑旗皂幢锦作幨。乃与土德有猜嫌,欺尔微弱较钝銛。大呼其类无巨纤,獱獭鲮鲤鲂鱮鳒。三足六眸奉令严,河伯砐硪衣襜襜。山崩厓圮意不厌,若通顼冥威势兼。乃使神崃肆诐憸,招屏翳遂遣飞廉。望舒离虎警夜占,长云不断雨{雨兼}{雨韱}。十旬茫昧乌与蟾,地轴坼裂如缟綅。泣诉于帝乞光炎,帝曰彼势不可钳。奔逸不异马脱柑,郢南灾浸日益添。有田无岁无苍蒹,修筑徒劳邑中黔。五才递用亦互歼,呜呼其苦在茅檐。

怀杨树滋山居

驿骑交驰地, 幽栖汝最闲。解官仍白社, 避乱得青山。路入岩花曲, 亭深水竹斑。 年前风雨夜, 樽酒一开颜。

茅舍连千嶂,风林自一家。晴窗交薜荔,昼户掩桃花。紫塞雕戈急,黄尘战鼓挝。 回看高卧处,初日带烟霞。

选胜车箱谷,经年只梦游。岳莲开对面,渭树接床头。野鹤遥相待,山泉近可谋。 关河兵未罢,飘荡几时休。

赠梁峒樵水部

几载常含画省香,知君例作水曹郎。久辞请谒草侵户,近著《河渠》书满床。旧业 六盘秦北地,臣躯九尺汉东方。那堪塞上烽烟暗,升斗朝朝问太仓。

送陈说岩宫詹奉使祀北镇

门辟铜龙侍从初,春风辽海引簪裾。云霄日近融残雪,圭币坛高切太虚。诸部常怀 行在地,词臣正校职方书。当年大略犹堪问,愿上雄图贮石渠。

佳气葱葱傍海生,营州今是汉西京。龙归丰沛连朝饮,火照粉榆彻晓明。旧事华封 传道路,当时羽骑绕边城。振衣直上高峰望,大漠烟销北斗横。

登东少梁山禹庙眺黄河歌呈同游诸公

少梁山势何岧峣,林烟漠漠风萧{风蚤}。典午祠堂一百丈,此山对峙相争高。客言 禹庙登临好,空濛万里无尘嚣。桑柘刺眼槐花落,来穿萝径同游遨。龙门直下五十里,秦山 晋树相周遭,云气苍茫看不见,青天一豁奔惊涛。七月暑退蝉鸣号,雨脚欲下风雷交。鲸鱼 逞怒呼其曹,两河左右纷动摇。呜呼战伐经几载,木罂渡口横弓刀。昔自楚归岁在卯,夜携 八口趋中条。间道汾阴止河浒,欲披葭菼寻渔舠。隔岸人家闻吠犬,望庐不到心徒劳。一从 朝那来效顺,甲兵如雪都潜销。吾党高卧饱闲散,不妨老作韩山樵。西来凉气入乌帽,祇应 饮酒持霜螯。向夕客散不须约,通林明日还连镳。

太史祠隔河望孤山

绝巘连云出,秋风隔水多。韩原中缺处,山翠压黄河。

终日山头坐,看山兴未阑。秦山看不尽,犹借晋山看。

巍山顶上

陟巘得石林,竦处如步障。藉草肆遐瞩,势挟秋云壮。初日出大河,空翠非一状。 三岭自北来,罗列森仪仗。远色际高天,颢气四奔放。开山起何年,鬼工劳意匠。忆昔出城 游,驻马看青嶂。霁华静松栝,石角争背向。及此凌苍崖,深荷山灵贶。遥知道傍人,视我 烟霄上。平生耽幽兴,冒险每携杖。徘徊玩空曲,题诗杂樵唱。

古从军词和马云翎

离家从远戍,荷戈日已深。野风起枯杨,鸣雁多苦音。潮没黄陵庙,雪落云梦林。 沮洳阻长驱,万马空骎骎。贰师不好谋,我力恐难任。永捐父与母,男儿岂无心。

奉命移旧垒,车徒发皋兰。四顾莽肃肃,野气蹙天寒。万灶驻桃林,男女杂旌竿。 红粉隘大路,马上明绡纨。昔日随都尉,令严不遑餐。一鼓斩女子,勋名永不刊。

秣马临清漳,漳水咽不流。两河多绿草,王程尚悠悠。五日视豆莝,十日饬雕锼。 月余大蕃息,惜哉时已遒。戈鋋明落日,猎骑出长楸。淹留将奈何,空与狐兔仇。

横山观

身置烟霄上,扶藜一叩扃。云流藏殿阁,树老断青冥。坐石双旌合,看花数骑停。 谁怜栖遁处,吹角不堪听。

登横山绝顶

山穷得平野,绝顶散牛羊。垂柿低含雨,高榆迥受霜。举头空碧落,四面尽青苍。 觱篥吹何处,西风入夏阳。

寄张帝臣时帝臣携家住华山

他时货畚似春农,聊就青山策短筇。直豁云烟栖八口,平携鸡犬入三峰。炎天树尚 留残雪,静夜人还伴怪松。我去关东空怅望,城头出没碧芙蓉。

渚宫

旧迹何劳问, 东风草又新。江蓠春秣马, 啼鴂暮愁人。白积千秋骨, 青然几夜磷。 那堪听画角, 肠断是西津。

夜宴出房烝,军城酒似渑。阵云通白帝,边月堕黄陵。垂手花低幕,缠头柳覆缯。 章台歌舞地,今古怅偏增。

次汉口将归武昌

雨后停桡古渡头,汉阳芳草自油油。明镫夜聚三江舸,酒旆春摇两岸楼。人去桃花 犹有庙,水沈鹦鹉尚名洲。来朝历遍登临处,直破风涛下鄂州。

登大别山同毛子霞朱悔人江非诺魏师聃

石路层城外,空亭落照间。导江传《禹贡》,对岸指吴关。地坼洲前树,天青雨后山。招寻成久客,楚月几回弯。

同朱悔人大雨渡江呈李镜月

渡口烟初暝,孤舟客未归。楚天低远岸,江雨撼危矶。指顾千峰失,空濛一叶飞。 中流叹奇绝,不敢怨霑衣。

淮海人何在, 幽寻水一涯。到来云遍野, 坐久树栖鸦。雨脚妨山翠, 船头破浪花。烟江如画里, 处处可为家。

矶上待月寄怀胡君信

雨后绿阴繁,凉气生七泽。遥念石庄人,林间岸轻帻。缺月未离海,残霞忽敛夕。 独鹤下烟江,渺渺楚天碧。

村居

老树浓阴水一方,满村槐柳间青杨。时平且纵花前酒,地僻能容醉后狂。月夜休干徐吏部,贫星苦伴蔡中郎。盐齑没齿何妨饱,剩领松风入户凉。

广陵使还得吴野人郝山渔汪长玉书

江广思扬子,年荒惜故人。艰危谁计日,丧乱各经春。杜曲看花眼,浔阳乞食身。 十年中夜月,两地照清贫。

野菜行

白草原头日晻暖,田父锄田除野菜。今年春到羁马城,麦花不生菜花生。野人储无升斗米,户户提筐采春荠。也知煮菜一饱难,伤心且缓须臾死。城中胥隶何披猖,经过宝马争辉光。白酒黄鸡不敢献,鞭箠嫚骂难遮防。朝朝县令出厅事,县门仍挂恤民字。上官不复采风谣,许君原是循良吏。吁嗟呼!野人偷生守蓬麻,但愿满地麦花兼菜花。

郊行感事

酒入愁肠恰半升,东郊林下杖枯藤。心随夜半移枝鹊,身似门前饭粥僧。绿树饱酣 山径雨,东风初泮大河冰。独怜亭尉今皆醉,不敢寻春过灞陵。

送家叔季鸿先生游睢上谒后土祠

绿杨连岸晓风斜,东渡汾阴泛客槎。天际两崖驰竹箭,春流三月涌桃花。黄云宝鼎 沧衰草,绛气灵坛落暮鸦。旧事于今何可问,市楼沽酒是生涯。

东风紫燕入丛祠,河上人家记旧仪。古砌半沈天上水,苍松全折雨中枝。依稀三烛 流光夜,想像千官立仗时。独喜啼莺犹未歇,看花一路到汾睢。

玉果犀钱伴客醺,此生投老恨空闻。对人敢说青箱字,隔水徒湔白练裙。三月扶筇 登殿阁,一天垂柳下河汾。灵祠飒飒如风马,应有神光入夜分。

寄张枚公张时在保宁将军幕中

莫叹花时别渭城,知君幕府早成名。巴人久已归图版,仆射由来类父兄。万户无烟 犹转粟,三城有成且休兵。凭君寄语征西将,父老连年想太平。

怀顾黄公

不畏穷愁只著书,幽栖风物近何如?断云疏雨吴王岘,竹瓦临江十尺庐。

泊江口树下寄周澹园

长川望不极,渡口问吴艭。白鹤起高树,青山阴半江。秋花垂屋角,水荇落船窗。 为报南康好,殷勤鲤一双。 亭上

坦步章丘上, 苔华处处斑。青林红几叶, 九月下黄湾。天坼禺东地, 潮吞海上山。 故人家在此, 开卷对孱颜。

宿花首台

乱石夹奔湍,我行随意深。选胜崎岖间,幽人多苦心。云堕竹篙岭,流影松树林。 葱茏翳山翠,不知西日沈。取径行木杪,花宫在层岑。细泉天上来,苔阶有清音。夜气湛虚明,真源疑可寻。泠然不成寐,高风吹短襟。

望水帘洞

老人峰下路, 乱瀑对清秋。小憩云中树, 遥看石上流。风声传海峤, 雨脚下循州。 从此扪萝去, 青天倚二楼。

冲虚观

我寻鲍公履,因之登翠微。仙人不可见,海燕西南飞。灌木蟠长根,清樾当门扇。洞中自昏昼,日月安所归。巑屼四百峰,高下相因依。玄气结重云,山云漭相围。服食宁所愿,庶免为人鞿。徘徊暝色下,冷露沾裳衣。

招隐桥与周澹园

下马玩密绿,山静闻激湍。与子坐石桥,风入青琅玕。是时望鹤鸣,峰名。亏蔽松林端。初日上左蠡,气势高且寒。古人耻束带,鸿毛视一官。遗徽传今古,慷慨诚为难。吾谓守不固,一出良足叹。故里有名胜,何事他盘桓。金庭郁参差,云气张绡纨。他年著书毕,直去骖青鸾。

除日大雪登燕子矶

野梅香入寺门烟,雪落亭皋正渺然。敢恨新年羁水国,谁能元日看江天。千寻翠壁 迷僧舍,三尺银花拥画船。箧里红囊茶尚在,夜深活火手亲煎。

李念慈

李念慈,字屺瞻,号劬庵,泾阳人。顺治戊戌进士,官天门知县,康熙己未举博学鸿词。有《谷口山房集》。

朱圉山

我过朱圉山,山势何缥缈。丹崖卧横纹,十里行未了。寒路风沙集,冰溪清渭绕。 鸡犬叫云中,人家出树杪。天寒烟不上,道险壑方窈。移神探古迹,流目瞩去鸟。海内多战 斗,河西尚征剿。苦为行迟迟,半是忧悄悄。云开西倾青,日出伏羌晓。问奇怀胼胝,寻幽 披萝茑。因爱山中静,人世多纷扰。

阿坝东山晚眺

骑马到松岑,万绿渺无数。况有一片月,挂在西陵树。遥遥陟寒坂,披榛入广雾。 乱山何累累,陵谷相回互。黄河自天来,巨波东南注。极目俯大荒,风沙千里暮。海内多战 伐,边功竞驰骛。良马千队连,士卒百金募。联营卧冰霜,转输披寒露。杀伤不足论,策名 良已误。我来经战地,鬼火照寒素。黄羊走沙碛,饥鹰啄狡兔。连峰接渺茫,落日边风怒。 长林振响籁,空阿生深惧。持觞吊往昔,慷慨各相顾。寄语岭上儿,莫唱《丁都护》。

登太华南峰绝顶谒上清宫还出四眺

众山祖昆仑,五岳兹雄长。峭壁出青云,巍然俯群象。高标五千仞,三峰石非两。绝群迥独尊,赴天成孤往。窈窕玉女祠,仿佛巨灵掌。竭尽筋力能,驯致青冥上。短衣谒白帝,问源伫仙仗。海云东南生,夕日下林莽。偃仰天池侧,四顾爱森爽。学仙亦荒唐,驰思聊自广。何当营茅茨,洒然遗尘网。

秦驻山观海

秦皇并四海,飞剑骋雄略。穷极世上欲,还希神仙药。长城既西筑,骊山亦东作。 巩图思万世,民生咸萧索。巨桥那可成,临望心旁礴。辒车载臭腐,驰道空寂寞。徒令鹤上 人,大笑入寥廓。

立秦夜感怀

闻道花门信,甘州今尚围。城分犹拒战,兵久未成归。刁斗连边动,军书入塞飞。 客怀无一可,愁绝盼春晖。

登浮山

绝顶凭谁引,苍藤乍可攀。偶然临福地,不信在人间。湖水遥通艇,江光日浸山。 东南百战后,登眺泪潺湲。

굸

片片浮云去, 愁人正望乡。东风吹汝急, 几日到咸阳。

松江舟中

松江过吴会,一道得安流。旭日轻乌动,和风细草抽。近城先见塔,入市尽通舟。 柔橹春衫把,吴娘倚柁楼。

怀张少参商于

一官贫剧向商于,万里艰难事簿书。直北家音新得否,山南群盗近何如。秋空剑气 张华宅,夜色星文扬子居。稍待西风溪水落,好将佳句付双鱼。

春日庄浪看雪

萧萧风雪下千峦,客里相看泪不乾。欲典羊裘沽好酒,却愁明日又春寒。

九曲亭

九曲亭犹好,樊山纵马蹄。人经赤壁水,燕带雪堂泥。词赋名空擅,川原草自萋。 潘生遗法在,春酿过桥西。

广州除夜

屈指残今日,禁愁又一年。已知过少壮,不复惜婵娟。海色连铜柱,江春发木棉。 殊方累多口,迢递限山川。

郑梁

郑梁,字禹梅,号寒村,慈谿人。顺治戊戌进士,改庶吉士,授户部主事,历官高州知府。有《寒村集》。

阮芸台曰: "寒村以《晓行》诗得名,朱竹垞尝赠以诗。寒村玄孙简香勋以墨迹示余,余和之有云: '别拟建堂尊二老,竹垞经义《晓行》诗。'简香因建堂祀两先生,余为书'二老堂'额,秦小岘观察为文记之,又画《二老重逢图》,取竹垞'别久重逢转倾倒'诗意。"

晚村

一卷残经对好风,会心多在晚村中。已凭沟浍污流竞,自觉烟云色相空。古墓欹倾 耕犊上,野桥低小钓航通。年来渐洗名根净,惟许前溪鸥鹭同。

归家即事

暂得离城市,归家事转清。移花乘细雨,插种急新晴。浪暖鱼儿出,烟浓杏子生。 村居无俗客,随意听禽声。

夜泊燕子矶

燕子矶头看月浪,观音阁上听风芦。但知意思凌天表,那记形骸滞客途。夜静钟声鸣不断,江长帆影过如无。何须别羡玄真子,泛宅浮家作钓徒。

画长松呈梨洲先生

峨峨千丈松,挺生蓝溪侧。种自新建来,根从蕺山出。耸身立云表,枝柯散八极。 众芳仰广荫,攀援各努力。中有幽兰姿,细草愧弱植。瞻望徒殷勤,高卑不相及。松枝忽下垂,一朝承颜色。何以报长松,馨香保贞德。

秋晚

斜阳平楚风烟乱,新月遥村鸡犬微。好与邻翁争席罢,其如客邸带愁归。疏萤暗落 青苔井,野火孤明白板扉。多少惊心荣辱事,秋江拟付钓鱼矶。

登楼

久不登楼望,江天别样清。朔风寒有色,西日照多情。木落山馀骨,村空水作声。 倚窗看未倦,林月一轮明。

娄庄晓行

不知长夜不知冬,枣堡榆庄走兴浓。疲马单车十字路,青天明月五更钟。寒风自与 严霜约,清气偏于瘦骨逢。今日京华肩准息,却嫌人事又环攻。

郯城道上

村落无树木,鸟兽无羽毛。江淮数百里,弥望皆黄茅。山行入郯城,始复见柯条。 枣色远苍郁,柳意寒萧骚。草屋枳篱中,犬声时哰哰。

江淮日雨雪,入山天始晴。瀰然千里白,照日增光明。天无片云黑,野无寸草青。 藐焉余一身,有若纤尘停。所以古达人,思与大化冥。

病骨衰气血,瘦硬柴一把。晨征霜露寒,两脚痛如剐。跼蹐一舆中,羡杀蓬门寡。 鸡啼茅屋上,牛眠土墙下。从容指行人,云是南来者。

早发氵术阳

立春早起》术阳程, 衾薄空舆梦不成。浅水无桥牵马渡, 晓星如月照人行。

望夫石

万劫难灰伉俪心, 舟中过客底愁侵。倚门两载嗟行役, 知比冈头望更深。

毛际可

毛际可,字会侯,号鹤舫,遂安人。顺治戊戌进士,授彰德推官,迁祥符知县。康熙己未举博学鸿词。有《松皋诗选》。

渡黄河

晨兴理轻策, 咫尺阻长河。是时当伏秋, 激浪涌嵯峨。中流风怒号, 嘘吸愁鲸鼍。 同侣皆动色, 将伯欲如何。舟子谈笑馀, 顾视颜愈和。扬帆复理楫, 枕席恬然过。始知镇定 力, 可以靖风波。谋事苟若是, 经营岂在多。

仙人沈香船歌泸溪山顶。

仙人鼓棹空中举,飞上重岩斟桂醑。夜深沈醉堕岩前,忘却仙舟在何处。七尺寒玉凝紫脂,沈香之号恐传疑。波间似有蛟龙护,月落澄潭雾起时。至今陈迹已千载,苔纹藓绣生幽采。行人日日见仙舟,仙舟日见行人改。吁嗟乎! 化工奇谲何所无,儒生鲜见徒惊呼。君不见昔人凿井逢篙楫,年月犹书吴赤乌。

冬日游林虑观珍珠帘

丹嶂何年剖,悬流万仞谿。峰晴留古雪,石怒抱寒霓。小径攀藤滑,危亭俯树低。 天台差共拟,翘首石城西。

游上黄华寺

半日寻钟至, 微茫路可求。岩危如欲坠, 水缓不成流。草静栖寒鹿, 林空集暮鸠。 白云飞欲尽, 月上碧山头。

憩芦沟桥寄洪昉思

九衢车马地,独向此间行。簿领年来事,渔樵物外情。微云浮远岫,晓漏度层城。不信清霜苦,君听朔雁声。

【卷三十一】

徐元文

徐元文,字公肃,号立斋,昆山人。顺治己亥一甲一名进士,授修撰,官至文华殿 大学士。有《含经堂集》。

怀贤诗•冯太傅溥

岳岳冯太傅,由来秉直伉。格心帷幄中,抗议岩廊上。两朝信贞笃,终以资弼亮。 殷然去国心,矢谟一何壮。重谒属车尘,输忠永不忘。车驾东巡,公奏乞回銮,请无南幸。

怀贤诗•汤巡抚斌

中丞荷道重,沉静寡物虑。致君讬荩诚,推已得强恕。屹焉镇江国,清风畅晨曙。

树表畏具僚, 惇俗变黎庶。持用悦性情, 非取要民誉。

怀贤诗•徐总漕旭龄

吾宗挺贤达,翛然美无度。抗志古人间,落落遗世务。登陛色不辱,宰物众所慕。 再岁畀双节,一日芟百蠹。持情无激矫,適己但贞素。

怀贤诗•徐处士枋

卓哉徐处士,皎节净如练。入山岂必深,尘迹自能断。载乘探幽奥,山川写英绚。 君善丹青,资以给食。独寤聊自歌,斯饥亦云宴。珍重式庐情,斯人不可见。巡抚汤公屏驺 从入山访之,君辞不见。

怀贤诗•陆知县陇其

陆君任名教,学植固深基。秉礼自贞笃,执德无委随。鸣琴化不辍,尘甑固其宜。 畜民如子弟,求理若渴饥。安得究儒术,树之为人师。

怀贤诗•韩学士菼

矫矫韩学士,高视薄浮壒。寡虑泊无营,立言道所赖。痛饮非徒然,寄赏不在外。 物情任回遹,揽古意自泰。心清白雪照,兴逸朱霞会。

怀贤诗•汪编修琬

汪翁钝自名,曾不乐宦达。平生无俗情,率尔自轩豁。真意安可渝,随人议疏阔。 著书何沈深,直排古贤闼。山馆惬嘉赏,尘组犹屣脱。

怀贤诗•张知府鹏翮

张侯王姿妙,潇洒自拔俗。惊人厉危操,適己澹群欲。挺节立郡朝,强直无蹙缩。 吴趋攀素车,鲁郡明丹毂。君莅吴未匝月,威信甚著,以忧去。后补守兖州。何用美斯人, 比德峚山玉。

二给事诗•孙君蕙

元叔赋《疾邪》,发音何煌煌。休琏感时俗,陈辞慨以慷。伊人负奇姿,奕奕黄门郎。激昂论意气,伉达上封章。嫉恶有本性,见之若探汤。作诗寓孤愤,属兴深且长。此意谁实谅,读之增感伤。

二给事诗•任君辰旦

谀巧日以工,直谠道不存。圣明忠易效,曷不顾国恩。之子奋百里,高步登掖垣。 职思在献纳,天关手欲扪。登祀谅非古,违众进苦言。君上疏论封禅事。艰哉松山役,慷慨 声不吞。君奏瘗塞外明时战骨,得旨诘问,令驰往省视,人皆为君危,君意气自若。碌碌彼 徒尔,遇合乌足论。

江南三学使诗三学使者: 刘君果、田君雯、赵君仑, 皆山东人。

人心目已偷,士耻日已忘。郁彼礼义府,俄成赇赂场。楩梓谁为收,筐箧厚自将。 因缘书上考,意气何轩昂。安知抱玉客,掩涕徒浪浪。吴都信多幸,衔使交琳琅。刘君奋才 杰,高自标门墙。所过列巾卷,训饬故百方。田君夙英挺,若渴勤搜扬。文体一以变,流风 为之昌。弭节未淹岁,矫矫立士坊。继以连城璧,温雅彰令望。采采深渊藻,灼灼茂林芳。 人思肄朱弦,户有陈青箱。彼皆奋东国,身近邹鲁乡。圣泽虽已远,笃生尚材良。教术岂苟 同,同于厉冰霜。足令振颓俗,姓氏余辉光。

秋日杂感

云物苍凉禁御同,逼人秋气动遥空。铜池霤滴宵宵雨,金井梧飘叶叶风。秘阁几曾 锵佩玉,缭垣时听响哀鸿。当年醉草青词处,满径苔衣锁碧宫。

天兵万里播声灵,誓扫鲸鲵服不庭。催战正驰赤白羽,转输难论斗箕星。同时将帅推徐勣,盖代勋庸数卫青。文齿雕题拓地远,受降还拟到穷溟。

金风阊阖授衣初,陇亩荒芜足感歔。淮右人民祈石燕,江州车马就河鱼。大农孰问 长平粟,左藏仍编会计书。但得政苛非猛虎,甘将膏血佐储胥。

梦到阖闾城外望,一天寒色满平芜。街调献辔严秋马,树绕将雏子夜乌。白羽将军初建节,青苗长吏正催租。庙堂自轸艰难意,谁绘流民入画图。

叶方霭

叶方霭,字子吉,号ì 忍庵,昆山人。顺治己亥一甲三名进士,授编修。官至礼部侍郎加本部尚书。谥文敏。有《读书斋偶存稿》。

村舍见红紫葵花开特可爱

插棘编荆茅舍清,此中谁拟见倾城。紫丝作障遮空暗,红锦裁衣曳地明。惆怅忽从攀处得,凄凉多为别时生。不须更结繁华梦,野蝶山蜂自有情。

春日

柳短闲莎长,春风触处狂。蝶飞遗剩粉,莺过炙新簧。银榼频倾酒,金钅卢满爇香。可容穷阮籍,一恸绮罗旁。

秋日过邻院

山云禅榻静相因,偶为孤游得笑嚬。闲对景光真逝水,暗悲身世总流尘。频来檐鸟

疑新主,别去庭花是故人。一阕渔歌数声笛,溪边林下转情亲。

枯树

无复凌霄耸壑心,千寻落落卧幽岑。敢将荣悴争时代,独与岩流共古今。纵使帆来 难近汉,便教斫就不堪琴。南朝名士虽工赋,未解庄休意更深。

柳

袅雨拖烟万万丝, 秋来憔顇不胜悲。何人曾到灵和殿, 记得君王手种时。

琼树

琼树何曾见一枝,纷靡众草竞英蕤。拟从骚客求兰佩,欲向灵妃问桂旗。天上只疑 星是石,人间枉泣墨非丝。偶经抵鹊山前过,终古无端替玉悲。

清江

清江水色碧于苔,南客扁舟北渡来。晓日未瞻鳷鹊观,阴云已满凤凰台。漫防酒醉 先防醒,不怕花残却怕开。无限伤心还自语,此生终见太平回。

将至辰山寄勿庵子

知近幽人住,谿流觉更清。偶随落花入,忽见群峰迎。石上迟谁酌,涧边遥独行。 烟波三十里,无分与君争。

关陇平

关岭茫茫,陇流汤汤。纡徐逶迤,峥嵘崄巇,面蜀肘凉,辅车相将。狡焉启疆,震惊我一方。(一章)

关岭兀兀,陇流潏潏。彼泾启戎,乃蠢兹蟊贼。为虺为蜴,为螟为螣昂首张臆,助逆抗有德。如猬之集,如豨之突。(二章)

泾原既清,群贼大睢睢盱盱,延旦夕之命。帝命臣海,为陇民徙灾。帝命臣勇,师 出自西陲。(三章)

帝诏臣海,汝速入坂。出彼朝,为勇军援。特之角之,沓之蹙之,除民之慝。俾 妇子恬適,尚嘉乃绩。(四章)

海涉河泾,言腾灞浐。秦山矗突,嵚崎陇坂。逾邠越凉,飞旓扬旆。扶舆猗靡,云 罕綷纟萦。雍部阻长,敢惮痡。式遏寇虐,以宁尔室家。(五章)

勇自河西,衔枚疾指。来从酒泉,转战天水。矫矫虎臣,一乃心力。摧坚挫锋,荡

彼蟊贼。兵车百万,汹汹雷震。横会方州,为行为阵。(六章)

东西合围,贼在釜底。叶平。其智斯竭,其魄斯夺。勇率其麾,崖诛谷讨。曰臣思 克,曰臣进宝。赳赳奋武,为王干城。勇实帅之,桓桓于征。(七章)

于征何所,于巩于临。道阻且长,蔽亏岑崟。深入其阻,禽狝草薙。申用三驱,根 株断刈。余贼窜蜀,游魂犹悸。西夏以绥,贺兰其乂。(八章)

胁从蚩蚩,亦孔之哀。宽其诛锄,予以惠来。维海维勇,刚克柔克。勇也帅师,为 辟为祓。海也敉民,为揉为活。北地上郡,稽颡归命。如旱望霓,海实绥之。(九章)

义威戢武, 奠我西陲。剖蜩斮猬, 人畏以怀。秦民嘘呵。化为讴吟。殄熄暴悖, 克广德心。经战伐区, 蠲除租赋。问孤吊死, 起乃沈痼。廓我皇恩, 义声先路。(十章)

帝德振振,陇山既平。陇流既清,维天子之祯。陇山既伏,次黔粤滇。蜀敢不詟伏, 如翰如飞,万福来威。(十一章)

维臣之力,维师之武。絷缚巨憝。争刌脍脯,塞神人之怒。黔首喁喁,式歌且舞。 亿万斯年,笃我皇景祜。(十二章)

海氛清

巨浸稽天,滔滔如何。天吴蝄像,倚以为家。有鲸有鳄,有鲛有鼍。摧橦决帆,血 人于牙。中国有圣人,尔独扬其波。(一章)

蠢兹蛙黾,亦杂此处。曰予胜国,从诞敢继其绪。藉瑕蹈衅,伺窥肘腋。结连蜂螫, 载逞凶慝。离间我臣仆,盗据我疆场。(二章)

于兴于泉,于汀于漳。乃扬沸汤,乃噪蜩螗。我有城郭,倏为沮汝。我有民人,倏 为鱊鮬。忍死须臾,后来其苏。(三章)

王承帝命,大将军旗鼓。我冠带之国,忍鳞介是伍。据我上游,张我罿罩。与子偕作,与子同仇。悉率左右,歼此群丑。(四章)

暨暨藩臣,一心一德。讨贼自赎,不邛已恤。堑山堙谷,马腾舟驶。亲董其旅,以临濛氾。陛下曲赦臣,臣敢不效死。(五章)

将士和睦,有凫在藻。既获贼师,如饥斯饱。或拔其角,或脱其距。或斧其吭,或 截其膂。贼穷见窘,无地自处。(六章)

彼强者跳,我攘我逐。彼黠者穷,我殄我戮。神惎之毒,鬼速其覆。如探鷇鸟,如 振槁木。非我黩武,取彼残已足。(七章)

前徒既莽, 凶渠束手。计无复之, 狼奔鼠走。茫茫烟岛, 为逋逃薮。仁无必取, 义

不尽杀。屏诸穷发,无污我王钺。(八章)

四州士女,来迎王旅。君子维何,元黄在篚。小人维何,饔殄在筥。复为王臣,以耕以仕。叶。歌帝之德,诵王之武。(九章)

帝德溥将,涵负吐纳。百谷来王,天与地沓。何人不绥,何物不怀。何戾不蠲,何 善不嘉。皇仁熙熙,云何不来。(十章)

皇帝在位,受天之蒙。东西朔南,无思不服。其有不服,自婴显戮,献馘于泮,献 俘于庙。武功既昭,文德用绍。史臣奏雅,来哲是诏。(十一章)

吊铁崖墓

先生不可见,遗冢自斜晖。无复携红袖,还闻葬白衣。才销明主忌,老幸故人依。 铁笛吹云起,犹疑踏月归。

授职翰林学士感恩述怀

麻衣席帽满尘埃,亲荷先皇衅沐来。敢道齐贤留异日,屡称苏轼是奇才。身离牛口惊还在,梦挽龙髯恨不回。今遇吾君重拂拭,孤桐果否爨余材。

姚缔虞

姚缔虞,字历升,号岱麓,黄陂人。顺治己亥进士,官至四川巡抚。

夜柬王少参舟中

薇省辞黄鹤, 兰桡伴白鸥。岸回江月抱, 天迥夕云流。银汉乘霄上, 金陵逼岁遒。 田租闻复减, 侧识汉皇忧。

翟廉

翟廉,字静生,号棘麓,赵州人。顺治己亥进士,历官布政使参议。有《宦游偶寄》。

感怀

兵戈纷在眼,骨肉远关心。半载音书滞,孤城草木深。黄昏磷火出,白日阵云阴。 何处猿啼急,凄凉游子吟。

高营夜坐感怀

红衣新熟橘,白首老书生。解渴闲呼酒,思家厌说兵。海天风鼓浪,平野月临营。 遥忆黄河北,霜寒古赵城。

于觉世

于觉世,字子先,号赤山,山东新城人。顺治己亥进士,历官广东提学道佥事。有《居巢》、《燕市》、《使越》、《岭南》诸集。

送别北山都谏

竹西亭下放舟行,一曲骊歌送客情。去尽游人山色暮,昆仑冈畔又潮生。

感怀和家兄回狂韵

十年作赋客心违,独倚危楼啸落晖。《天问》有词愁莫对,奚囊得句满方归。画中 诗意云生岫,醉里良朋月傍扉。何日乘风当破浪,监州不设蟹初肥。

王追骐

王追骐,字雪洲,号锦之,黄冈人。顺治己亥进士,改庶吉士,授礼科给事中。有《居俟楼集》。

送甥杜湘民南旋

汝归仍是客,故国似无情。凉月才今夕,秋风已半生。相期他日梦,共爱盛时名。 别意难持赠,江流不断声。

孟秋客中

秋飞一叶后,人在万山中。远笛荒村月,孤衾野店风。树衰容自老,虫细语偏雄。 知我今宵梦,萧萧北地鸿。

卢乾元

卢乾元,字万资,号余庵,汉阳人。顺治己亥进士,改庶吉士,历官工部员外郎。 有《世清堂集》。

怀王来硕

碧湾成卧隐,岁晚事诛茅。月白寻渔桁,风危护鸟巢。文章归老宿,魂梦恋深交。 自达穷通理,无烦作《解嘲》。

王大作

王大作,字邃于,曲沃人。顺治己亥进士,官行人司行人。有《穆园集》。

瀑布

曾闻拟海立,今信有泉飞。绝壁风霆斗,青霄烟雨霏。光寒秋客袂,雪濑宕渔矶。 晚渡石桥去,真同雁荡归。

崔{山华}

崔{山华},字莲生,平山人。顺治己亥进士,历官陕西凉庄道。有《公余咏》。

山游纪胜

冲襟蹑秋岑,日落千崖耸。孤啸临远风,势与江波动。轻策冠飞鸟,万象接幽踵。 寒姿结霜标,阴泉澹云孔。横揽空濛表,不知烟霭重。拂石憩古苔,抚松迁修竦。江色在衣 带,寒涛坐来涌。

师子岩

崇岩吐青冥,光响限林谷。栖神迹未化,践幽境转肃。缘流乱木区,遵石入云族。忽与烟雾并,稍知日月伏。目恬天岭交,心霁风霄穆。江海有端倪,乾坤不盈掬。翛然叩虚抱,松风媚幽独。

合掌峰

奇峰閟天经,合沓神化积。密石涓细流,阴霞荡虚壁。息心响空音,万象俱践夕。流景媚林姿,归禽度云隙。平挹遥海苍,俯眷双湖白。空水倒群峰,恍惚天地易。洪幽撰耳目,眺听理勿隔。永观元化初,于焉振霄翮。

越西行

越西之疆古姑蔑,南走滇黔右两浙。万山回合抱孤城,一道金溪沸奔雪。狂氛一夜吹黑云,闽关以北无坚屯。国家承平三十载,卒见烽火皆崩奔。弹丸小邑千岩底,踣之直用靴尖耳。城存与存亡与亡,不死犹图报天子。奔走风尘万岭间,齧指血溅蟠桃山。浮图一矢贺兰志,誓不与贼生同天。仰天叩心天鉴此,收城岂雪生民耻。百里提封谢主恩,孤臣待罪甘心矣。十年长吏愧苍黎,乱后还惊有孑遗。君不见月波亭上清秋魄,依旧含情照越西。

竹西亭

歌吹扬州路,西亭旧足夸。香风散罗绮,夜月写琵琶。画鹢停深柳,春城覆落花。 追思全盛日,肠断玉钩斜。

毗陵道中

挂席当春杪,毗陵古岸舟。柳攀江雨细,亭没戍云浮。岁祲花空发,城荒麦未秋。 东南财赋地,谁慰一人忧。

吴门道院弥罗阁

飞阁层霄迥独攀,凌虚凭眺俯人寰。金铺昼暝栖云雾,碧落风轻礼珮环。槛外天低 吴苑树,窗中人倚洞庭山。花洲锦缆知何处,千里毗陵一夜还。

郑日奎

郑日奎,字次公,号静庵,贵溪人。顺治己亥进士,改庶吉士,历官礼部郎中。有《蓉浦别集》。

小隐岩

意日穷搜讨,幽意犹未足。更过小隐岩,随步姿清瞩。两壁势相拒,一径往如复。 石跨涧为梁,僧缘崖作屋。檐飞四时溜,窗倚千竿竹。山花不辨名,溪草随意绿。风尘接混 茫,声光相为触。主人意殊快,张宴岩之曲。高歌翻宿鸟,清吹振林木。促席尽绸缪,开襟 谢拘束。安知高峰外,夕阳下平陆。

一线

登高复临深,所欲尽奇态。侧身苍翠中,试足鱼龙背。两峰势欲合,万象全幽昧。 仅透一线光,顿失天地大。日月无多照,欻忽异明晦。纵横罗怪石,踯躅有余碍。淙淙半空溜,直下曳潜濑。湿云凝不流,鸟声云内外。静觉雷雨蓄,幽疑鬼神会。因想开劈初,五丁力稍懈。一罅不及补,千古诧奇怪。坐啸窈冥中,无言但称快。异境岂恒遇,兹游矢以再。长揖告山灵,呵护请相待。

游嵩山寺

十里溪声五里山,数椽梵刹万松间。老僧扫地不为客,待有白云时往还。

曹鼎望

曹鼎望,字冠五,号澹斋,丰润人。顺治己亥进士,改庶吉士,授刑部主事,历官凤翔知府。有《楚游》、《新安》等集。

石照山

晓出玉鄣门,渡溪复越岭。茂树欲参天,盛夏翻清冷。幽壑隐禅关,隔断尘千顷。侧见古亭边,石照传奇景。翠峰危以特,壁光闇而炳。讵止鉴须眉,罗列山河影。惟空故生明,惟静乃能永。昏昏行役者,胡不发深省。

小塔寺

楚天黄叶暮,禅院白云封。径僻宜乘兴,亭留为劝农。乱篁迷小塔,斜石倚孤松。 久坐从僧话,林端送晚钟。 汉口别舍弟

汝从燕马去,我向楚州来。归梦随江水,离愁入酒杯。暂分鸿雁序,先到凤凰台。 有约迟冬杪,斋头看腊梅。

江月

雪尽群峰出, 江空一月浮。清光流不去, 偏照异乡愁。

黄州雨泊

涛涌千层雪, 江飞万缕烟。雨余山欲暗, 赤壁夜停船。

姚文燮

姚文燮,字经三,号羹湖,桐城人。顺治己亥进士,由推官历官开化同知。有《羹湖诗选》、《咏园诗集》。

阿迷州

磴曲盘难尽,边诈州著阿迷。一丸天罅小,连笮瀑痕低。客榻依琴室,斋钟彻鹤栖。 松滋旧图画,感触故山蹊。

李伸

李伸,字佚,高邑人。顺治己亥进士,官永宁知县。

千秋台

千秋事业祖孙同,小邑还堪歌《大风》。赵北山河终不改,洛阳城阙已成空。映台 芳草萋萋碧,隔树明霞霅雪红。无限游人增感慨,一杯为酹夕阳中。

井在

井在,字存士,文安人。顺治己亥进士,官兴县知县。有《铁潭集》、《簏蟫集》。

拟陶饮酒

栖迟衡与泌,家无担石储。种秫理酒床,相对数卷书。兴至过白石,挥觞讯太虚。 启期何自宽,庄周终蘧蘧。吾乐自有真,八达何足誉。

荒宅惭杨子,而有架上书。遗悲念手泽,世盛感皇初。我忧何以解,独酌情亦舒。 岂不思共適,醉醒殊乃疏。所以楚灵均,萧然赋《卜居》。

灞上轻薄行

风急长安道, 日暮长安行。纷纷灞浐尘, 向人衣上生。促轮乱马蹄, 鞭影控悬旌。 岂无素相识, 有盖莫我倾。相逢游侠儿, 足捷身致荣。去去不相顾, 谁怜羁旅情。

王钺

王钺,字仲威,号任庵,诸城人。顺治己亥进士,官西宁知县。有《世德堂集》。

送洪区邱先生教谕长清

白发焉能逐队行,一官独冷称长清。遗民自识康成草,博士家传伏氏经。瘦马骨高疲远道,古槐根出枕荒城。应怜到日多幽赏,松桂高风苜蓿羹。

岭南秋色

秋来不复见黄叶,但见野云漠漠生。花气中人如二月,鸟声依树欲三更。新禾瘴发 微寒起,广莫风轻潦水平。若向山城高处望,羁人何事不关情。

马骕

马骕,字宛斯,号骢御,邹平人。顺治己亥进士,官灵璧知县。

池上作

板桥南去湿烟空,春水平池宛镜中。新柳深含何限绿,小桃斜坼一枝红。种鱼有术 寻渔父,断酒无心学醉翁。鸥鹭闲情湖海兴,年来宦迹付征篷。

李如淓

李如淓,字仲渊,号澹菴,高阳人。顺治己亥进士,官酆都知县。有《行素堂诗集》。

秋日过衡阳与王文振登大观楼言别

依依不忍道,携手上高楼。北极燕云远,西山落日愁。蝉鸣枫叶冷,猿啸大江秋。 楚地知音少,因君且系舟。

秋日自遣

寥落江城暮,秋风处处同。一官三峡外,数口万山中。贫贱差时辈,飘零任转蓬。 故园归未得,目断信陵东。

高恒懋

高恒懋,字励昌,号乾甫。静海人。顺治己亥进士,官奉天教授。

同友人过华藏庵

长夏萧疏倦倚楼,相将兰若慰沈浮。午钟敲醒十年梦,溪水流残半世愁。塔影斜侵 竹院冷,茶烟不断白云流。徘徊竟日风尘外,话到无生意未休。

彭鹏

彭鹏,字奋斯,号无山,莆田人。顺治庚子举人,由知县官至广东巡抚。有《古愚 心言》。

日哭三君子行福州守王之仪,建宁同知俞三畏,侯官令刘嘉猷。

嗟乎天地黯淡白日黩,为鸱为鼠何反覆!三月有客过江言,月望榕城人集木。出者仰天皆屏息,入者和尘保走肉。传闻男子得三人,伏尸流血耻臣仆。泣曰三人者为谁?客云以耳不以目。将疑将信听客云,迟之七日果来复。督臣不挠被幽囚,生死存亡握粟卜。屈指三山王邦伯,骂贼睢阳身为戮。碧水丹山司马公,含笑就刃无颦蹙。忠烈同时孰后先,刚锋交下血喷漉。上有猛兽正负嵎,下有豺狼心久蓄。张牙开齿狞人前,躭躭视之欲逐逐。堂堂尽见七尺躯,下风稽颡惟俯伏。悬河谈天舌槁然,肝胆冰寒形神觫。三公浩气归山河,杀身成仁彼所独。如是我闻闭紫桑,虚空掩口吞声哭。吁嗟乎! 仳仳彼有屋,蔌蔌方有榖,哀今之人谁非食君禄。

从征行

大东小东空杼,征徭不辨其盈缩。自从排户应兵兴,官差打门暮与夙。少妇露面鸣咽陈,妾家良人无伯叔。昨夜行役点数千,良人在内尚枵腹。计程此去十二时,只身何能两驰逐。妇陈官差亦咆哮,两邻老妪闻之哭。我翁六十昨同去,儿家重派翁必复。东西两妇声惨恻,老者气乏少者伏。两妇几几欲断绝,官差暂舍过北屋。中有跛者不能行,絷之维之大颦蹙。跛者含泪向妇泣,莫怨官差苦自鞠。废疾似我出雇钱,谁云跛受手足福。妇向跛者微欷吁,太平盍日向天祝。今兹一一重申饬,不奉羽书毋给副。匪不念彼征夫苦,祁寒暑雨赴杀戮。奈此役夫无休息,遗黎久难支鞭扑。谁将此示怀好音,越趄渐次寻邦族。百尔君子惟所司,努力奉行体并育。但愿清宴无烦苦,职思其居车脱辐。

成克大

成克大,字子来,大名人。顺治庚子举人,历官镇远知府。有《历游诗》。

望洋台

峻岭有高台,突兀南溟岸。长风万里来,天际帆影乱。极目荒徼外,一气疑未判。 蛟室邈难即,蜃楼聚复散。天吴时出没,骊龙珠光灿。四海无扬波,重译来浩翰。百货走如 鹜,有无相易换。澳贾罔市利,此地立龙断。攘夺衅窦开,掩袭肆狡悍。横山起军垒,张威 护里闬。外御异己者,会使诸彝惮。我来一登临,狙獝信难捍。嗟彼番鬼谋,贸迁操胜算。 但恐姿骄纵,与世成冰炭。滥觞不在多,积微固有渐。勿令登台人,徒作望洋叹。

仲冬赴澳

岭外朔风起,飒飒吹我裳。仰天见浮云,将无来故乡。故乡隔万里,北雁无南翔。 乡书阻逾时,伫立心徬徨。久客复行役,云水渺相望。前路何须问,风波感慨长。

炎方霜雪少,海气夜寒生。飘摇舟一叶,游子衣裳轻。饥渴莫我问,骨肉万里情。 泠泠晚潮水,凄清款乃声。独怜宵征客,憔悴百愁并。顾影无俦匹,仰盼悲参横。

过南赣

双江清见底,还绕古虔州。水势奔滩险,风烟接瘴愁。菜花开野岸,梅片落汀洲。 岁暮嗟行役,征帆去不留。

海幢寺送客登眺感怀

万里浮槎至, 凭高望越台。潮平梅雨歇, 天阔岛云来。霸气余残垒, 王宫尽劫灰。 无边惆怅意, 送客酒盈杯。

郑茂

郑茂,字子勉,又字紫沔,永年人,顺治庚子举人,官武平知县。有《竹边楼诗草》。

都门霜降日作

风雨连朝动客愁,笳声呜咽满边楼。卷帘何事看新月,一夜霜寒木叶秋。

支隆求

支隆求,字武侯,嘉善人。顺治庚子举人,官沂水知县。有《泊庵集》。

柳洲亭

陡觉红埃隔市闤,青罗如带柳丝环。园亭自占晴云外,钟磐遥闻斜照间。顿醒尘心 返初地,难抛积习爱名山。同群鸥鹭由来惯,消受春风一日闲。

孔贞瑄

孔贞瑄,字璧六,号聊园,曲阜人。顺治庚子举人,官大姚知县。有《聊园集》。

渡荆江

欲渡烧鸡浦,轻舟凌晓开。波从白帝下,人自夜郎回。两岸浮烟动,中流急雨来。 江陵形胜古,残垒近城隈。

王士祯

王士祯,字淑子,淄川人。顺治庚子举人,官成山卫教授。有《偶然草》。

虚上人从淄邑来胶欢然道故上人住青云寺乃余昔年读书处也

连雨胶河涨,新晴路始开。书凭双鲤至,秋带一僧来。煮茗烟迷竹,谈经月上台。 不堪追往事,山径锁荒苔。

董俞

董俞,字苍水,华亭人。顺治庚子举人,有《浮湘》、《度岭》诸集。

和王南州听杨太常弹琴诗

莫谓锺期少,相逢故太常。穷途俱落魄,夙昔奉君王。调入巴云远,音同淮水长。 雍门千古恨,倾耳泪霑裳。

雅乐沦江海,先皇旧赐琴。曲终尝变徵,愁绝不关音。风雨孤臣泪,乾坤逐客心。 可怜家万里,西望白云深。

崔华

崔华,字不雕,太仓人。顺治庚子举人。有《樱桃轩集》。

浒墅舟中别相送诸子

溶溶月色漾河湄,晓起频将玉笛吹。同上邮亭忘别绪,独行驿岸解相思。丹枫江冷 人初去,黄叶声多酒不辞。此路三千今日始,蓟门回首雪霜时。

江上

萧瑟满江上,一雁蘋际飞。水气杂渔烟,微茫入清辉。淡怀如高秋,生业在钓矶。 大鱼饵不受,贪饵鱼不肥。断丝弃中流,石上散发晞。

过江州有感

但得绝流去,此行非我身。有军挥白羽,无令不朱轮。坐失邯郸策,空嗟氵兆水人。 故园花已落,惆怅老风尘。

题严陵钓台

功名莫后人,云台已娟。生不能封侯,何当故人怜。

昔年吴市门,辛苦南昌尉。应为妇翁留,七里光炯翠。

水习荆南公, 步习大司马。此时烟濛濛, 羊裘卧月下。

影落台千尺,光连水一隅。我来亦爱此,不独是狂奴。

马腾龙

马腾龙,字卧仙,文水人。顺治庚子武举。有《隐泉集》。

思亲

饮泪思慈母,晨昏托老妻。孤身万里客,异地五更鸡。瘴疠侵人骨,江山老马蹄。 山城城外柳,一望一凄迷。

张玉书

张玉书,字素存,丹徒人。顺治辛丑进士,改庶吉士,授编修,官至文华殿大学士。 谥文贞。

谒项王庙

项王祠枕长江水,拔山气沸惊涛起。阴森白昼啼{鼠生}鼯,萧瑟西风黯菰米。座傍乌骓伏不鸣,余怒犹欲乘云腾。想像悲歌出垓下,可怜遗恨迷阴陵。英雄坎壈识天意,失路东归亦何泽。万户轻身赠故人,一死何颜见义帝。往事东流逝不回,雌雄壁垒空尘埃。君不见下相城头望丰沛,樵歌暮上歌风台。

息浪庵夜坐别叔敦让木诸子

短棹携樽触浪过,将离莫问夜如何。最怜帆远浮天阔,始信江空得月多。隐隐钟声千佛唱,星星岸火一渔蓑。荒鸡促曙行人去,回首双峰护薜萝。

大阅恭纪

銮舆晓出传宫漏,万乘春蒐控玉鞭。十二羽林雕辇后,三干犀甲幔城前。招摇色映长隄直,华盖香凝禁树妍。脱臂饥鹰霜距疾,嘶风彀骑雪花拳。龙鳞乍晃云霄上,虎旅同趋日月边。褒鄂宗臣张左纛,薛岐帝胄领中权。衔枚受律连营肃,射柳分弓七札穿。觱篥声中看队列,《饶歌》曲里促觞传。丁宁诸将投戈日,长忆先皇讲武年。驷介踏云还紫禁,六飞扶日下青天。威驰塞北名王垒,风靖滇南涨海烟。指顾销兵资庙略,两阶舞罢谱虞弦。

送邱曙戒前辈之武昌

猿声夹岸听斜阳, 江树苍茫接故乡。却较长沙归路近, 行吟何事怨潇湘。

挽马章民年丈

辛苦中闺罢锦机,白头曾未识宫衣。可怜风雨寒灯梦,犹是书堂夜读归。

李仙根

李仙根,字子静,遂宁人。顺治辛丑一甲二名进士,授编修,官至户部侍郎。

季秋王公武约游上方山

二十年前望落霞,如今重到似还家。半山红日迎人出,一径清烟傍马斜。鸦势远盘 孤塔影,渔歌长应转帆挝。偶然兴会因同调,欲觅幽闲更觉奢。

申涵盼

申涵盼,字随叔,号定舫,永年人。顺治辛丑进士,改庶吉士,授检讨。有《史籁》、《定舫诗草》。

云台画

云台画, 黜椒房, 椒房庸何伤? 君不见, 麒麟阁上将军光!

铜雀台

铜雀台,分香履,一代雄风长已矣。台上月明,台下流水。

佛骨表

欲佞佛,及于骨。然顶焚指,意在获福。谓可不死邪,佛如不死那得骨?

杂兴

青青岭上柏,移植廊庙间。但能守清操,所至皆深山。疏水卿足乐,逢迎耻厚颜。 闭门而却扫,坐卧有余闲。何为长戚戚,徒使鬓毛斑。

公卿税文藻,名士贡航梯。辽东夸白豕,楚人来山鸡。欲贵洛阳纸,先灾大谷梨。 猎者道交错,謦唾比虹霓。谁作指南车,破此歧路迷。士人先德行,淘金黜沙泥。

夜宿刘将军园亭

建纛江东久,将军喜论文。门庭无棨戟,池榭有烟云。曲折堪修禊,风流已冠军。

我来方夏日,凉月夜缤纷。

仗剑从戎去,堂留绿野虚。园丁晨扫径,奴子夜烹鱼。灞上谁开垒,西湖正跨驴。 清时无战伐,卫霍有闲居。

黄金台

昭王拥篲已尘埃,碣石宫前尽草菜。伏枥有心防虎视,按图何地索龙媒。空闻易水千金价,早见咸阳万骑来。满目霜笳悲马角,黄云落日照荒台。

黄竹子歌

江边黄竹子,风雨夜悲鸣。不堪截作笛,亦有断肠声。

孙蕙

孙蕙,字树百,号泰岩,又号笠山,淄川人。顺治辛丑进士,由知县历官户科给事中。有《笠山诗选》。

登千佛山绝顶

淅淅天风响雁群,移尊飞阁未全曛。僧参破寺疑驯鸟,人到空山似懒云。晴壑日悬 初地静,平林风定午钟分。思从慧业诸缘减,碧乳香寒石窟闻。

舟泊广陵

横塘草碧竹烟凉,树带风乌绕蜀冈。二十四桥何处问,广陵城下月如霜。

登燕子矶

铁锁沉江王气收,萧骚风色暗江楼。丹枫远岸戎戎市,绿浦寒烟点点鸥。秋好金陵 桃叶渡,风回玉笛木兰舟。名山输却空王子,梵刹依然枕碧流。

舟出瓜洲

一棹晚江静,欲就人烟泊。鸟边日微茫,眉际金焦落。初地动疏钟,客心方寂寞。 沙碛长潮痕,竹树攒江阁。放眼扬子桥,已转瓜洲郭。安得故人来,孤篷共斟酌。

金山

水国琳宫蜃气昏,云开金碧射朝暾。一围树色高连塔,四面江声涌入门。郭璞墓前 增战垒,中泠泉上没潮痕。凭临不敢舒长啸,恐有蛟龙卧石根。

送友人北归

长淮二月风气和,濛濛花雾清明过。南浦春涨送君去,共醉当筵金叵罗。黄河奔激 天吴蹙,白浪如山骇心目。峒峿山头落照红,轻裘解向河干宿。野水添杯酒不醇,欲留欲去 意逡巡。桑柘阴阴啼布穀,柴门稚子待归人。

虎丘宴集分得微字

偶携蜡屐来吴会,海涌峰头看落晖。人去故山秋渐老,客逢新月雁初飞。当筵洞壑留今古,过眼云烟仟是非。良夜坐深金粟影,天香都上酒人衣。

于忠肃公祠

出狩天王竟北征,烽烟已逼凤凰城。有君定国真长策,奇货难居始罢兵。南内邀功 争复辟,西曹枉杀患无名。最怜一事公遗恨,不使前星羽翼成。

坐灵隐冷泉亭得响字

侵晓纵清眺,爽气生林莽。脱叶映初阳,宿露滴余响。幽讨策短筇,岩壑恣下上。 灵隐瞰湖光,泠然惬心赏。蘋香散汀沙,鸥泛随兰桨。萧萧枫树林,色夺明霞朗。支公快同游,玄言共俯仰。人生激电流,能著屐几雨。岩栖养性灵,衔杯动遐想。何时赋《遂初》,结屋东西瀼。

兰谿道中

轻舟摇桂楫,细雨过兰谿。远寺山支阁,层田水叠梯。林稀松鼠见,烟暗竹鸡啼。 难倩河阳画,吟诗落日低。

登八咏楼

翠屏回合万峰收,婺野星分古缙州。官廨闲云遗碣在,人琴往迹大江流。西堂春草 年年合,南浦飞鸿字字秋。苦忆东阳清太守,苔阴满地客登楼。

闻鼓山绝顶可望海外诸国欲登不果

共说鼓山高出群,半天岚翠昼氤氲。岛藏诸国晴时见,风卷洪涛静夜闻。未得肩舆随度鸟,何时蜡屐踏层云。晦翁亭子空相忆,绝顶松篁望不分。

灵宝女郎祠

缥缈仙楼似玉京,苍茫独眺旅人情。河声入洛三门合,岳色来秦万里明。望气台空 芳草暮,度关人去夕阳横。孤心别寄登临外,徙倚愁闻二月莺。

太华绝句

绝顶青冥露掌开,仙人风迹隐楼台。云间忽敞中原色,俯看黄河一线来。

秦川怀古

内史新丰不可求,长陵王气已全收。千盘鸟道归隆准,百战鸿沟割沐猴。风雨满天来渭北,麒麟遣冢自南丘。几经汗马劳诸将,紫塞黄榆起暮愁。

为姜勉中兄弟题谏草楼

杖血曾闻溅汉廷,孤忠旅望海云青。难回国步逃吴市,易了家缘问敬亭。失序雁鸿 天漠漠,经时薇蕨雨冥冥。空余十二封章在,梦绕铜驼几涕零。

沧海横流付急湍,当年一柱砥狂澜。吁天抗疏枫宸远,斫地高歌宛水寒。长忆主恩 留北寺,当诛臣罪恋南冠。不辞党锢人千古,辽鹤归来尚故官。

马世俊

马世俊,字章民,亦字甸臣,溧阳人。顺治辛丑一甲一名进士,授修撰,迁侍读。 有《匡庵诗集》。

大坯山

远影平如盖,孤峰澹若云。松楸迟日照,芦苇带风闻。翠潋一湖抱,青光三郡分。 忘机余已久,鸥鸟自成群。

九日即事

晓檐爽气报初晴,云意徐收到树轻。落叶裁诗秋蝶化,短篱曳杖午鸡鸣。一峰入户 青光好,万里登台白发生。眼底纷纭休再问,满天鸿雁不同程。

坐骆氏水天一色楼

翠色空濛隔岸来,高楼如画面湖开。此生未得余杭郡,今日相期河朔杯。天远亭虚 谁放鹤,山寒节近好寻梅。义乌才子多流落,词赋乡关起暮哀。

闰三月二十八日午门应制赐宴及烛

右掖趋朝瑞霭浓,千门望跸立从容。烟光次第笼台柳,漏点依稀带晓钟。曝背岂知 丹陛峻,温纶不待紫泥封。大官送饭初承诏,银烛还闻下九重。

罗人琮

罗人琮, 字宗玉, 桃源人。顺治辛丑进士, 历官四川道监察御史。有《紫萝山人集》。

杂咏

平生作计许吾曹, 肯向千秋觅剩膏。觉悟偏生标一指, 神明固胜画三豪。全天自合同樗栎, 与世何当学桔槔。闲却此身休运甓, 姑从痛饮快持螯。

邵延龄

邵延龄,字大年,号静山,平湖人。顺治辛亥进士,由内阁中书历官刑部郎中。有《耐轩集》。

送沈融谷之任来宾

茶星大雅士,试县得来宾。来宾剧远道,象郡开自秦。炎方殊气候,服食慎风尘。故旧纷相慰,猺獞皆吾民。方今朔南暨,顽梗良以驯。君也勤抚字,礼让风俗醇。所负平生志,盘根才独伸。挥手勿复道,登车忘苦辛。

存诗稿用宛陵韵

诗不可轻作,此论疑亦偏。不求文字名,何必责备全。禽虫有鸣窍,而人胡不然。喜怒一写之,何物更存焉。君子贵寓意,任情长短篇。不必笑梨枣,士无轻弃捐。嗟哉文章伯,刻苦穷岁年。纵有山水趣,仍为居食牵。自命颇不小,李杜相后先。诋毁中晚季,曾不及宋贤。我所阁笔者,名山与大川。

次张耳黄元日韵

拂拂春风到鬓边,星星偏不让人先。连朝客思浓于酒,十尺闲斋小似船。是处名流 吟节序,谁家老妪解诗篇。劝君且袖祢衡刺,薄醉疏狂得少年。

李时震

李时震,字恂庵,江南山阳人。顺治辛丑进士,官内阁中书。有《去来吟诗集》。

王家营别诸同人

脂车春晓别园林,握手依依思不禁。千里关山今夜月,一时樽酒故人心。缘堤柳浪催行色,绕树莺簧弄好音。尺素自然频见寄,临歧那复更沉吟。

连佳樗

连佳樗,字克昌,南宫人。顺治辛丑进士,官内阁中书。有《损斋诗草》。

筑墙谣

高筑墙,墙高不可越,登登杵声莫教绝。官司念汝汝自竭,不见东村,鞭挞流血。

县吏下马,挥鞭戟手。虎咆雷殷,儿啼妇走。老翁指墙,噤若无口。土在身,木在首。

墙下有壕,壕深及水。水潺潺,壕无址,风雨忽来,墙入壕底。风耶雨耶,戕我生 者汝耶?

饮丁若思榆枋馆

负郭人家少,结庐丛树中。岩深能障月,洞小自留风。曲径竹阴密,长廊花气通。 选茵聊共坐,是处有残红。

君自多幽兴,能留看竹人。檐花催进酒,池水待垂纶。稍话间中事,真疑世外身。 柴扉须静掩,此外即风尘。

此径不常扫,今来门始开。多君储绿醑,许我破苍苔。寄兴花边句,留欢池上杯。 还期待良夜,看月一登台。

石床环坐稳,微雨况初过。盘摘新蔬早,衣沾落絮多。看棋移日影,把酒度莺歌。 欲结求羊侣,还来就薛萝。

张衡

张衡,字友石,又字义文,号晴峰,景州人。顺治辛丑进士,历官陕西榆林道。有 《听云阁集》。

龙潭村

不识烟尘地,犹藏太古村。苍松迷谷口,怪石绣云根。岩复人居匿,坡回犊牧暄。 柴门堪小憩,转盼失桃源。

塞下曲

羽书忽动塞垣开,十万军储括地来。闻说屠耆归命早,凯声已过赫连台。

悠悠羌管动边愁,二月冰寒水不流。回首家园春色断,有人掩泪独登楼。

闻笛

寒鸿初动塞云收,阿滥堆中唤客愁。记得吴江归棹晚,芦花风外一声秋。

牛枢

牛枢,字伯衡,号双溪,元氏人。顺治辛丑进士,历官嘉兴知府。有《滇游草》。

平溪道中漫兴

不是函关界, 胡为紫气翔。岚氛迷晓色, 林影障晴光。雨洒征衣薄, 风回驿路长。 分明烟火处, 隔水正徬徨。

孙钅 永

孙钅永,字古喤,号徵庵,嘉善人。顺治辛丑进士,官潮州通判。有《芷庵集》。

丙寅正月四日集陈园公鍜圃偕王山长赋

岭海多炎威,终冬百卉滋。荣瘁固常理,而乃独迷离。良无冰与雪,安得不纷披。春寒忽以肃,凛烈沁心脾。天道渺难信,执义守襟期。良夜欣宴赏,高会独忘疲。智愚岂有术,兹理察如丝。小人玩细娱,君子怀明夷。立德不在小,慎此白日驰。寒暄迭四序,悟者仅盈卮。素心诚有讬,永怀商山芝。高山不可寻,转侧如轮輹。本无婴物心,所期在幽独。开轩肃宾侣,献酬浮蚁绿。饮醇乃適志,不必杯行促。庭树发鲜花,结根挺岩谷。古幹郁且蟠,振采异繁缛。大抵天地间,杜机成芳淑。纷纷各自媚,贵文而贱朴。良无金石固,见耻鸿与鹄。古来肥遯者,畏垒高卜筑。眷我同心友,亮节各如竹。修竹荫华池,清阴接云表。不与凡卉争,经霜独矫矫。伶伦识其音,宫为黄钟肇。德晖千仞下,结实等瑶草。数斛充臼杵,安用游三岛。彼美此中居,其颜姣以好。道广无杂宾,庭轨何须扫。落叶煮清泉,典籍恣搜讨。驱车一再过,湛然乐深窅。相视各忘言,命酒不知晓。谅无诡随趋,遑计拙与巧。

送陆季冲之任郁林

骅骝烁电本空群,岭外梅花正俟君。地近苍梧常带雨,天连勾漏半飞云。莫辞椰酒 蛮中异,更有芦笙马上闻。此去不须愁薄宦,故人还是沈休文。

送王怀人归汉阳寄张素先孟天友

芳郊碧草正萋萋,落日河梁手重携。词客高吟《青雀舫》,楚人齐唱《白铜鞮》。 城边树色连樊口,江上花明满大隄。十载故交零落尽,因君为访鹿门西。

苏楫汝

苏楫汝,字用济,新会人。顺治辛丑进士,官内阁中书。有《梅冈集》。

次韵高荡荡宿煮石园

山馆非无暑,闲心到处秋。闻君与孤鹤,卧对古松丘。轻荫移凉坐,岩城得野游。 崖边月初百,定上石西楼。

寿林秋浦先生

硕果风流在薜萝,主持文藻逸情多。时违不损龙高卧,道大何劳凤作歌。旧学人争 推伏胜,一经吾尚及田何。华堂丝管扬亭月,岂独候芭载酒过。

叶映榴

叶映榴,字炳霞,号苍岩,上海人。顺治辛丑进士,改庶吉士,降国子博士,历官湖广参议道署布政使。殉夏逢龙难,赠工部侍郎,谥忠节。

庚申夏至日起武威至张掖

武帝功成吏守边,伤心天末是居延。人家板屋风声里,思妇寒衣泪眼前。目断燕支 愁见月,槎浮银汉渡经年。惭余不作征西将,药里书囊信一鞭。

林尧英

林尧英,字蜚伯,莆田人。顺治辛丑进士,由兵马司指挥历官河南提学道佥事。有 《澹亭诗略》。

初夏忆木兰旧游

还望梅峰半,茅斋起寂寥。径通岩顶石,楼瞰海门潮。蝉嘒风中竹,蜗行雨后蕉。 澄心点《周易》,滴露在林椒。

石室峰头坐,巉岩直接空。云遮江树白,日射海波红。松鼠盘藤蔓,莎鸡隐竹丛。 长怀观蜃市,楼阁散柔风。

魏裔讷

魏裔讷,字观周,一字辩若,号蘧庵,柏乡人。顺治辛丑进士,官江南桃源知县。 有《逸林居诗》。

丙午春日同柴巨公游龙门

蹇裳蹑石磴,缓步入高云。晋国千峰断,秦川一岭分。行人冰上渡,浊浪树边闻。 杯酒携良友,相看日欲曛。

石佛寺

梵宇开何代,钟声峭壁间。高楹基趁石,古佛像因山。萍水攀僧话,烟云荡客颜。 残碑经岁月,风雨欲成斑。

过金陵

鸡鸣山外大江流, 迢递孤城暮霭浮。六代遗宫余乱草, 千年王气委荒丘。青谿花落

春将老、翠柳莺啼麦欲秋。往事不须频怅望、铜驼自古恨难收。

王维坤

王维绅,字幼舆,号鹅知,长垣人。顺治辛丑进士,官梓潼知县。有《渐细斋集》。

舍弟晚至昭署

破壁坐萤火,空堂鸣马蹄。凉乘文水上,远自剑门西。辛苦怜吾弟,饥寒愧老妻。 何期今夜酒,同醉玉绳低。

清明书感

稠桑密蔓翠遥遥,独坐空堂对泬寥。风雨愁连小寒食,乡关泪溅闰花朝。万山重复皆遮眼,五斗凄凉尚折腰。手种长乡山畔柳,为谁攀尽最长条。

登大伾同孙右汉

欲识山容十载余,东风杖履任徐徐。下方钟磬前朝寺,绝壁龙蛇何代书。马鬣已平 襄敏墓,莺声空吊次楩居。凭高看足春光好,谁向峰头结草庐。

中秋闱中陪家贻上郑次公两主考公宴贡院即旧蜀宫。

峨嵋天际月华凉,同上南楼望帝乡。东壁云霞新翰墨,西风禾黍旧宫墙。鱼凫乍辟 怜三户,骏骨难求负九方。惟有百花潭尚在,共携杯酒问沧浪。

河汉遥连凤阙边,使星久已见双县。何期作赋来王粲,更向传经识郑玄。驷马风流余蔓草,卧龙祠庙老啼鹃。天涯难聚西园侣,珍重婵娟一夜圆。

寄申三太史随叔时病假归里

骑驴供奉午桥东,谢傅声歌孰与同。为恐黑头难早相,且从白社侣生公。千门柳色沙村雨,十里荷香水阁风。岂似蛮荒愁苦吏,感春独泣乱山中。

和答凌玉见送兼怀沈绎堂之作

高士春山长薜萝,又披疏雨唱骊歌。龙文宝气来茅屋,马首风沙指大河。别绪桃花 潭尚浅,怀人《杕杜》赋偏多。相逢为说君诗好,不数中原旧李何。

高之騊

高之騊,字圣游。淄川人。顺治辛丑进士,官平越知县。有《含翠堂诗》。

旅困值雪

冻合遥天暮雪飞,寒肩孤耸拥鹑衣。臣饥欲死当安命,寇乱如麻敢曰归。兄弟鹡鸰贫共急,儿孙牛马老相依。北风吹背萧萧冷,谁寄梅花到竹扉。

李世锡

李世锡,字帝侯,号霞裳,胶州人。顺治辛丑进士,官嘉鱼知县。有《绮存集》。

荒园

荒园草木深,时复值长夏。绿影遍方塘,清阴蔽茅舍。白日向西颓,返照穿桑柘。 庭花处处开,高低自相亚。翠叶与丹荣,明霞互映射。中有学佛人,身心久休暇。手把寒山 诗,欢颜坐及夜。既夜若为眠,狂歌莫能罢。奇哉宝月轮,光明上柳罅。

村居

少壮农忙老者闲,了知万事不相关。揖人坐语路旁树,窥我行吟墙外山。薄暮日沉云两角,诘朝风动月重环。绳床纵有浮生梦,不过田园水竹间。

赵培基

赵培基、字二维、号鹿宾、平乡人。顺治辛丑进士、官陵水知县。

遣愁

故国云山外, 音书何日来。烟深溟海暗, 风雨夜猿哀。人向百蛮老, 鸿应五岭回。 自怜愁泪眼, 懒上望乡台。

旅食随人饱,方言久客通。山云常荫绿,海日早翻红。岚瘴村村雨,桄榔树树风。 独怜星月夜,遥与故乡同。

秋怀

万事愆黄发,艰难吾道违。海深天更远,林暗鸟还飞。避世甘贫病,称兵有是非。 初心何日遂,闲杀北山薇。

唐世徵

唐世徵,字魏子,一字琴叠,湘潭人。顺治辛丑进士,历官江西玉山知县。有《数峰诗》、《燕游草》、《为郎小草》、《碧泉诗钞》。

石浦草亭为刘符九

竹覆浑无径,村回此有亭。岸烟随暮雨,渚草带春星。溜引畦三亩,山移翠一屏。

徵君自经济, 丘壑不求铭。

侯元棐

侯元棐,字友召,号兔园,杞县人。顺治辛丑进士,官德清知县。有《问渡小草》。

中秋坐月有感

秋月仍如此,荒村倍可怜。百年新白发,万事老青毡。蟋蟀吟何苦,蟾蜍影自圆。 亲情常共酌,牢落一灯前。

诸嗣郢

诸嗣郢,字乾乙,号松槎,一号勿庵,青浦人。顺治辛丑进士。有《九峰山人集》、《溪上吟》。

春日徐松之以诗见赠次韵奉答并订山游

春风随意柳条新,采药摊书寄此身。休怪白云封不住,桃花原是惹渔人。

过第九峰怀古

短展高筇破寂寥,危楼曲圃望迢遥。三春草色埋双俊,一夜钟声换六朝。神虎啸风 常习习,乱篁翻雨故潇潇。年来莫话封侯事,流水行云意尽消。

九峰草堂同吴梅村先生夜话

名花美酒共婆娑,月落乌啼奈晓何。为遇浔阳旧供奉,殷勤重唱《渭城》歌。

李自郁

李自郁,字文叔,松滋人。顺治辛丑进士。

桃花源

旧梦荒唐说避秦,桃花辜负几千春。人间那有仙源路,多事刘郎枉问津。

苏嵋

苏嵋,字依岩,大兴人。顺治辛丑进士。有《圯上吟》。

子房山

圯桥进履处, 洪波没碑颡。留得子房山, 颓然立榛莽。可怜楚王峰, 朝昏共俯仰。

黄石与赤松,令人有余想。当年秦皇鹿,得失如反掌。况乃韩彭辈,身命付罗网。今古此浮名,谁能塞天壤。悲风起林末,谡谡发枯响。空瞻博浪墟,轮蹄自来往。

得鹤川守崔斗瞻札

剑津离别后, 廿载各天涯。山雨迷归雁, 淮云急逝骓。干戈方过眼, 发鬓已成丝。 万里伤心事, 音书到下邳。

秋望

关山迢递夕阳斜,衰草离离客路赊。野水连天惟渡鸟,孤城隐雾半藏花。南来旅雁 云边笛,北云归鞍塞上笳。独怪湖滨垂老叟,经年寂寞滞天涯。

次俞静庵杂咏

一庭新绿散芳阴,犹见残红点客襟。枝上流莺啼不住,方知门外已春深。

【卷三十二】

费扬古

费扬古,满洲旗人。袭封一等公,官至抚远大将军、领侍卫内大臣。谥襄壮。

杂诗

晋室尚风流,称最惟嵇阮。性僻德无邻,行孤心乃远。犊车自往还,竹林任偃蹇。 仰首望飞鸿,举足登绝巘。放浪天地间,久假而不返。无古亦无今,谁复惊岁晚。

秋日出都门, 言寻西山道。试登最高峰, 放眼观浩浩。天风飘塞鸿, 荒原衰白草。 日暮起层阴, 落叶随风扫。烟云荡长空, 野水枯行潦。蓟丘古战场, 杀气飞霜早。草昧窃英雄, 妄意窥大宝。千秋几斗争, 士卒涂肝脑。白骨幽黄沙, 扑面伤怀抱。倚杖独徘徊, 漫忆渭滨老。百世树奇功, 长往终难保。何似赤松游, 飘然归绝峤。

陌上草青青, 陇头烟霭霭。行歌田野间, 春风拂衣带。野雀集蓬蒿, 蛙声满沟浍。 小蝶无随人, 平楚郁松桧。日午闻鸡鸣, 村妇向田外。桑麻四望稠, 衣食真足赖。

揽衣登高台,悠然舒远眺。林皋木叶飞,荒阪净野烧。塞雁下沙湾,落霞明晚照。 天末起悲风,何处哀猿叫。脉脉感幽心,我亦发长啸。云山足徘徊,怀古足凭吊。今昔几何 年,临风想同调。

和友人山居

晨夕对青山,徘徊水石间。风翻花影乱,谷静鸟声闲。芳草迷人远,孤云带鹤还。 何年移住此,欹枕听潺湲。

夏日

荷浦风环十里香,轻罗团扇约微凉。画桥别墅云山外,短笛孤舟返照旁。老树参天 阴漠漠,新泉出地响浪浪。幽人自解羲皇趣,林下何妨午梦长。

新秋

西风瑟瑟又惊秋,绿暗园林雨乍收。金井自寒连晚照,玉箫中断起离愁。江清水落 芙蓉岸,夜永香沈翡翠楼。勋业未成空揽镜,生憎白发已盈头。

吴兴祚

吴兴祚,字伯成,号留村。浙江山阴人。贡生,隶汉军旗籍,由知县官至两广总督。 有《留村诗稿》。

舟次浔州

行尽粤东路,粤西又一天。是山皆瘴雾,无树不蛮烟。幻语闻獠洞,歌声出蜑船。 遐荒风景异,化俗愧前贤。

江上有感

雨洒江村暮,寒烟下钓矶。饥鸢掠水去,老牸负云归。猺獠仍顽梗,风谣各是非。 慨然行古道,任与世情违。

海口八字山炮台

并马登临际,重云黯未开。班师存旧垒,遗策问荒台。蜃气因风散,涛声挟雨来。 筹边劳指顾,端藉出群才。

电白县观海

划然开眼界, 咫尺辨沧溟。日照沙边赤, 春生岛外青。鲸鲵今不见, 楼橹昔曾经。 海若知王化, 年年效百灵。

和友人韵

荒城落日空千堞, 堞外秋飞燕影双。几片残霞归暮岭, 无边黄叶下寒江。昔年说剑曾无敌, 此夜论文未肯降。兴尽顿忘更漏永, 风吹凉月照银釭。

重台

携将清兴陟重台,白社何缘共举杯。殿角微风驱暑去,峰头斜日剖云来。数株宝树迎人立,几片昙花向佛开。倚遍石阑寻妙句,钟声已过碧山隈。

于成龙

于成龙,字北溟,别号于山,永宁人。明崇祯己卯副榜。入国朝,由知县官至江南 江西总督。赠太子太保,谥清端。有《吟咏书》。

赤壁怀古

赤壁临江渚,黄泥锁暮云。至今传二赋,不复说三分。名士惟诸葛,英雄独使君。 今朝怀古地,把酒对斜曛。

乙卯春题书雪堂

竹笋才生黄犊角,蕨芽初放小儿拳。试寻野菜和香饭,便是黄州二月天。

宋荦

宋荦,字牧仲,号漫堂。别自署绵津山人,商丘人。由侍卫援黄州通判,官至吏部尚书。赠太子少师。有《西陂类稿》。

登废城

荒城亘数里,形势自森布。秋草碧参差,闲云莽回互。停车陟其巅,披榛得徐步。 白日忽西驰,乾坤入薄暮。行潦接洪流,归人喧野渡。远村蚤稷收,近岸寒鸦聚。纵览感孤怀,含凄倚独树。往者全盛日,兹城称虎踞。城中十万家,歌舞不知数。狂寇来纵横,蹂躏失险固。磷火照郊原,通衢走狐兔。遗镞樵夫拾,废堡山僧住。回头市井闲,人烟已非故。凄凉二十年,小康犹未赋。暂此息鼓鼙,遥天看飞鹜。

望龙蟠矶

孤屿排空起,波涛万顷连。蛟龙留窟宅,殿阁自江天。法鼓闻山县,神鸦送客船。 沙头间极目,斜日起苍烟。

樊口

地接沧江远,波连曲港深。人烟环近渚,鸡犬散疏林。水落鱼初出,山高日易阴。 只应同钓叟,来往得幽寻。

落日荒江畔,停桡处处船。人闲沽酒地,风冷卖鱼天。远水菰蒲接,空林橘柚悬。 坐看新月上,长啸破苍烟。

春夜舟泊芜湖饮识舟亭

岸帻空江上,登临有废亭。槛边看夜市,杯里落春星。故友浑彫谢,渔歌半杳冥。 凄其游子意,明发又扬舲。

舟泊天门登梁山

水宿苦萦回,维舟步江浒。天门划然开,并峙雄千古。梁山岩壑幽,突兀若廊庑。 穿云一迳遥,林薄霭春煦。峰腰棠棣繁,磵侧朱樱妩。芬菲表杂花,采撷欣俦伍。崚嶒殿阁 悬,飞梯袅相拄。登临力屡疲,啸傲气还鼓。乘风凌绝巅,浩荡江天俯。博望咫尺间,岚影 晴吞吐。题诗忆谪仙,斯人邈难睹。日暮怛忘归,渔歌发烟浦。博望,山名。

喜彭躬菴处士过访即席赋赠兼送往江南

千仞金精不可攀,荷衣今喜接江关。林峦采药文章老,湖海盟鸥岁月闲。暮雨清樽 留赣石,春风孤棹过庐山。南中耆旧彫零甚,谁与天涯数往还。

雨中由磴道上洪光寺

我游得一奇,维此招提径。纡回十八盘,老柏夹危磴。霏霏小雨来,萧晨作轻暝。 树色杂烟岚,到眼殊幽胜。衣袂霑古香,伫立发清兴。林隙望山门,天风送孤磬。

辟地自中使,规模仿朝鲜。毗卢绕千佛,法像穷诸天。幡幢尽奇丽,照耀苍崖巅。 胡为名胜区,僧徒散如烟。影常吊山鬼,松鼠窜几筵。荒寒不可留,亭午风凄然。却顾阶除 上,游踪破苔钱。

春日同汤潜菴介山弟至儿过圣安寺小饮有怀高念东先生

草色才青放马蹄,春风随意过招提。旃檀又拜诸天像,杨柳兼寻几曲堤。精舍闲花留对酌,空墙醉墨和前题。旷怀不见香山老,回首双林落日低。

海上杂诗

画角传荒戍,征旗指大沽。云沙看不极,疆理辨全无。茅屋行彭越,天风送海凫。 晚潮吹地至,想像百灵趋。

真欲穷荒外,追随节使行。朝朝观日出,夜夜听潮生。浩荡求仙志,艰难彻土情。 何时沙碛里,提榼饷春耕。

杰阁从前代,山海关城楼。平看碧海流,千年留碣石,一发辨登州。潮送斜阳落,风传绝塞秋。倚阑聊咏志,俊鹘下荒洲。

登丰台太乙阁

海滨楼阁上清居,碧瓦金茎落照余。幔卷灵风开玉座,鼓喧春社驻云车。明禋待举甘泉祀,宵火曾窥子政书。倚槛长空数归鸟,楚词哀怨忆三闾。

送友人归苏门

送子故山去, 苏门寻啸台。遗音想鸾鹤, 古屋扫莓苔。砌下百泉沸, 窗中千嶂开。 飘然欲一往, 惆怅离筵杯。

平生怀有道,引领夏峰村。谓孙钟元徵君。尔去枌榆社,还经薜荔门。清风留梦寐, 白首课儿孙。挥手潞亭畔,绿槐晴鸟喧。

黄山松石歌寄金仁叔将军兼索子湘和

黄山松石天下无,好事往往绘作图。千岩万树不到眼,刻意摹写徒区区。茸城将军胸次别,远道移取来崎岖。石一拳耳俨千仞,松不满尺盘两株。盛以巨盘置铃阁,珍比七尺红珊瑚。今年移镇向闽海,临行辍赠及老夫。鸭觜船载入廨舍,宾客咋舌儿童呼。吟窝得此良不俗,大笑今我官岂粗。南荣相对坐竟日,看山读画同欢娱。石也以松为毛发,松亦以石为肌肤。芙蓉一片忽堕地,陵峦宛转秀色殊。扰龙双幹双麈尾,千霄之势当前俱。晋卿倘见定豪夺,柴桑或抚还惊吁。丛桂疏梅助清致,何烦命驾穷天都。将军雅意应有报,几回欲赋还踟蹰。今晨鼓兴了此债,属和火急催髯苏。

和子湘春雪后夜坐效韦左司

梅花半将开,媚此雪后月。空庭耐春寒,坐到昏钟歇。池光明檐楹,鹤唳激林樾。幽人默相对,诗思清到骨。

白云泉

迢迢白云泉,一线吐岩腹。涓净涵莓苔,凄清韵琴筑。时有白头僧,持瓢到幽谷。

送汪陛交入都兼寄阮亭尚书

白发渔洋老,风流众所师。好同天下士,去和济南诗。霄汉县清梦,云山失旧期。 沧浪倘相问,道我泛涟漪。

过银锭桥旧居

鼓楼西接后湖湾,银锭桥横夕照闲。不尽沧波连太液,依然晴翠送遥山。旧时院落 松槐在,仙境笙簧岁月闲。白首链师茶话久,春风料峭暮鸦还。

初至西陂寄长安诸子用东陂松风亭韵

有脚不踏渌波村,清境往往萦梦魂。今年得请返旧隐,烟水顿洗双眸昏。堂开鱼麦 宛世外,略钓近接乐春园。御制诗有"当乐故乡春"句,敬以名园。穿花时见孤鹤舞,倚石偶 把残书温。空亭林月散清影,祇疑海上升朝暾。孤篁行药遵野岸,扁舟吹笛归衡门。故人天末几怅望,得句难共伧父言。沧浪琴僧澄照期过我,西陂春家酿名。熟开芳尊。

过北兰寺

豆棚连曲牖,竹径转虚堂。图史心无著,茶瓜味总长。观泉嗟面皱,踏阁爱山苍。 白袷凭栏处,松风作意凉。

别圃从容过,回冈更有亭。沙痕浮日白,山色印江青。列岫承余韵,是地旧有列岫亭。支颐感客星。无须催小队,渔唱暮堪听。

卞永誉

下永誉,字令之,一字仙容,汉军旗人。荫生,由通政司知事官至刑部侍郎。有《式 古堂集》。

杂诗

孤鸟声啾啾,小虫复唧唧。感此心茫然,抚膺长太息。视我衾与枕,徘徊不能寝。焚膏耀辉光,顾影重自审。

远别离

妾理箧中衣,郎买江上舟。郎舟尚未发,载满妾心愁。郎舟自西去,江水自东流。 江水流不返,江风吹不住。郎作江头风,妾作江头树。晓风吹树哀,晚风凄又来。树叶若飘 泊,妾心空徘徊。

卞永吉

卞永吉,字谦之,汉军旗人。官绵州知州。有《来远堂集》。

初秋发夜郎

雾满失前蹊,长林鸟乱啼。石危鸣濑急,峰峭断云低。客久迷乡梦,星驰促晓鸡。 秋风何太急,先到夜郎西。

邗上送人之黄州

故人辞我去,匹马向黄州。别绪频攀柳,相思独倚楼。江流通汉水,春信接邗沟。 烽为年来急,迟迟莫浪游。

范承斌

范承斌,字允公,汉军旗人。袭一等子爵。

八月送友人还山

除架

园霜一夜满,三径豁空扉。瓜蔓凉云委,藤阴绿叶稀。寒虫徒唧唧,冻雀强飞飞。 秋意原如此,人生念息机。

卢震

卢震,字亨一,汉军旗人。官至偏沉巡抚。有《说安堂集》。

晚泊千墩有感

野色平烟草,孤村泛海天。铎声山顶寺,镫影树中船。宿鸟冲残照,征帆落晚烟。 长途多寂寞,万感忆从前。

中秋夜遣怀

芳晨谁共一壶倾,片月孤臣相对清。风里萧疏多白发,树间淅沥有秋声。梅花羌笛 催诗思,远杵寒碪动客情。极目凄然怀故里,高堂何日奉瑶觥。

听雁

闲窗寂寂映春晖,嘹呖参差听渐微。故向羁人头上过,偏从独客舍边归。楚南麦长流民返,燕北沙温猎骑稀。珍重远投鸡鹿塞,雌雄相保任高飞。

隆教寺

层峦回合梵王宫,色相楼台烟雨中。千树门头盘石磴,一铃殿角语天风。林栖孤鹤 樵僧返,山拥重云野寺空。薄暮疏钟催去客,那禁神骏忆支公。

送陈其政副使之任广东

荷风柳露飏双旌,杯酒酬君出凤城。江上锦帆鹦鹉唤,岭头龙节荔枝迎。烟消瘴地花多种,山耸蛮天驿几更。回首洛阳春易老,可能频念故人情。

闲居杂咏

木杪西风禁乱鸣,索居此日叹浮名。酒能痛饮黄金尽,事较粗知白发生。岁月堪悲同宋玉,行藏何必问君平。远来嘹唳衡阳雁,笑尔劳劳历百城。

王遵坦

王遵坦,字太平,益都人。官至四川巡抚。有《愿学斋》、《墨甲堂集》。

咏古玉镜

人间铜臭久尘埋,圆壁千年出洛街。晓步想随双凤珮,晚妆应照九鸾钗。微茫斑駮 云生面,错落光明月入怀。最好琼楼伴仙子,素娥斜捧上瑶阶。

王樛

王樛,字子下,号息轩,汉军旗人。荫生,历官通政使。有《息轩草》。

九日同高念东在衡及从子敷政游丰台

未恨途穷阮步兵,路讹偏喜惬幽情。寒流静抱孤村碧,平楚遥连晚照明。秋色近知 为圃乐,病身差幸出游轻。何年淄水盘山道,共话南塘九日行。

夏日

暑气侵人难久卧,夕阳故故度窗纱。不如散发浓阴下,细看游鱼饵落花。

八月十一饮敬兹寓归与信涉仲美坐小园葡萄疏影如画复小酌数盏漫赋一律柬念东

柳丝摇落叹金城,深夜怀人华发生。过雨疏烟浓树影,乍寒脱叶起秋声。酒徒未欲论升斗,傲吏惟应隐姓名。长羡鹿门多旧侣,沿溪踏月看秋耕。

行赵堡口寄念东

黄沙漠漠近幽燕,泽国心惊物候偏。远浦送帆初灭影,夕阳到水欲生烟。时名愧我 甘牛后,归计多君在雁前。倘遇相思须载酒,南溪柳外听潺湲。

龚佳育

龚佳育,字祖锡,号介岑,钱塘人。历官光禄寺卿。

题垂钓图

无心随处便为家,渺渺伊人水一涯。翻笑秦民太多事,沿溪何必种桃花。

张宸

张宸,字青雕,江南华亭人。由中书历官兵部郎中。

越中秋思

日落长沙枫树红,断猿啼处暮云空。可知昨夜乡关梦,身在寒烟万点中。

八月江湖起暮寒,青枫浦口角声残。更吹龙笛家家雨,一夜巴陵去住难。

将登铜雀台过漳河

跃马向三台,扬鞭漳水隈。寒沙势空阔,独鸟意徘徊。旧碛沈铜瓦,秋风起霸才。 潺湲流不尽,枫荻自悲哀。

赵而忭

赵而忭,字友沂,长沙人。荫生,官中书科中书。有《虎鼠斋集》。

同孝升丈即席次邓孝威见送韵

自信无良策,穷年抱犊衣。春携三月去,天放一人归。白简谁言事,青山愿息机。 深思前路好,孤艇送余晖。

陶之典

陶之典,一名大云,字五徽,号澹庵,宁乡人。官内阁中书。有《冠松崖集》。

南天门

業忽自平,心目一为旷。帝座殊未遥,踟蹰碧落上。班荆待同游,且与云揖让。云起乍平门,林峦失背向。飞断万松涛,自成千顷浪。仿佛见海蜃,楼阁幻奇状。数日迟岳云,对此一元畅。

洞庭守雪

十年湖梦隔,忽向湖中舣。洞庭雪耶非,峨眉幻为水。水落云势张,沙翻空气委。 一夜湖雪平,寒光无起止。茫茫十二螺,疑被同云徙。吹我高寒心,浩入湖波瀰。夜色一气 中,舟呼素烟里。独寤洞庭澜,孤怀向元始。

浯溪道中

横空秋气发,历乱舞山晖。楼势摇溪竹,钟声返寺扉。谷闻群兕斗,云带断峰飞。 独有乘风翮,迢迢万里归。

抵密印寺逢晴

望近毗卢旭影重,溪桥一似故人逢。百年听老钟声客,千嶂颜开佛日冬。全染名山成锦绣,只留新雪辨芙蓉。雪畴正有商量事,耆旧先来自别峰。

林尧光

林尧光,字觐伯,莆田人。拔贡生,官行人司行人。有《湅亭诗略》。

过宾秋园亭

策我红藤杖,开君白版扉。山亭棕树暗,石磴枳花飞。小隐偏危帽,幽寻尚氎衣。 此时足虾菜,江口子鱼肥。

李经垓

李经垓,字性符,号庵,任丘人。诸生,以荫补国子监博士。有《东园集》。

文选楼

梁祚几何时,斯楼独存久。痴哉大法王,舍身如敝帚。可怜太子统,痛心独搔首。 国事日已非,才华空八斗。使之践帝位,不至台城丑。著意在诗书,满腹苍龙吼。小事谬而 死,贤不永其寿。文快贤士心,楼播词人口。今古重斯文,遗像垂孝友。瞻礼尽同人,相看 自不朽。

望支硎山

大士圆通路,岩廊一望间。浅深环法水,高下尽灵山。孤塔白能立,群松翠可攀。 支公何处是,日暮采烟还。

惜花

喜雨催花开,怨雨催花谢。问雨雨不知,花开花陵藉。

落花飞满衣,似有留人意。何处无情风,依然吹落地。

昨朝花正好,今日花已老。借问爱花人,落花扫不扫。

旅夜闻笛

乡梦难成付酒杯,谁家长笛耳边催。愁人不听伤心曲,说与邻家莫送来。

佟凤彩

佟凤彩,字高冈,汉军旗人。由副理事官官至河南巡抚。谥勤僖。有《栖友堂集》。

过襄城石首山

汝水驱车马,扬鞭指翠屏。泉声冲石落,鹤唳隔烟听。远树连云淡,微风拂草青。 轩辕曾问道,留咏寄山灵。

天门山

百战生还解佩刀,扁舟东去走江皋。鬼神护此千秋石,阊阖开当万里涛。白日行空 天马过,黑风吹浪海鱼高。扪萝直到云烟里,惆怅山灵笑二毛。

晚登保安城西望小顶山

碧嶂青青翠色横,夕阳直射古荒城。乱峰烟锁层层秀,瀑水晴悬的的明。鸟弄余辉缘树语,樵迷幽径带云行。停骖西望饶佳致,远隔关山忆帝京。

丁炜

丁炜,字雁水,晋江人。诸生,由训导历官湖广按察使。有《问山诗集》。

卧病酬林澹亭

轻寒腰带减,窗竹渐离披。未得高眠早,常愁退食迟。青山秋后梦,黄叶雨中诗。 酒熟东篱下,君闲可预期。

甲辰上巳沈康臣过集

佳辰须强饮,谁慰寂寥居。花柳看憔顇,江山待祓除。休文能过我,逸少有遗书。 且共追觞咏,情深感慨余。

送唐习之游金陵

都亭春霁后,送子复南游。箧里仲宣赋,樽前玄礼舟。啼莺移苑树,乳燕入江楼。 故国今如许,清吟且莫愁。

奉陪王贻上登八境台次元韵

积年难晤面,今日共登台。诗看前人咏,樽因我辈开。霜鸿依泽集,星使泛槎来。 极目江天外,风烟蔽草莱。

远水双流合,严城四望孤。春潮通野渡,夕鸟下平芜。宿雨藏墟市,轻风过舳舻。 明朝愁欲别,握手缓斯须。

新淦舟行

城下空江向北流,虔州西上正悠悠。柳边过雨鹭窥网,花外夕阳人倚楼。渔笛数声 愁欲剧,篷窗孤枕梦偏幽。一川烟景频来往,每对青山忆旧游。

元日即事次上官三立大廷尉韵

鹓鹭班归彻火城,阳回初啭上林莺。嘶风宝骑联镳出,映日宫貂簇锦行。柏叶共分春昼酌,梅花独结岁寒盟。喜瞻云物新开霁,应念调和属老成。

献陵怀古

同姓占封此地嘉,贤王礼乐有光华。当年《大雅》归毛氏,落日遗宫忆汉家。鸦啄 残红翻柿叶,雁迷浅碧过蘋花。翛然立马苍茫外,城角秋深起暮笳。

病起示舍弟韬汝

三秋卧病叹支离,冷雨幽窗祇自悲。换得衰颜惊鹊镜,移来废砚触蛛丝。暂抛世累钟残后,顿起乡心叶落时。莫道身慵生事减,池塘犹示惠连诗。

贾谊宅

洛阳才子屈长沙,旧宅开残橘柚花。天下治安犹痛哭,南方卑湿漫伤嗟。霜寒废阁 啼妖鵬,日落荒庭集暮鸦。千载怀湘同有恨,赋成骚客鬓应华。

胡介祉

胡介祉,字循斋,号茨村,宛平人。荫生,历官河南按察使。有《谷园诗集》。

望是故乡行次毛子霞归郢

毛生岂是鸱夷子,何事吴山复楚水。子长二十称壮游,梁鸿《五噫》何年始。晴川 阁上补新图,赤壁矶前吊故垒。犹忆金台蹑屐过,白眼那顾公卿屣。此时意气徒干霄,击筑 声残悲不止。卖文卖字知者谁,掉头一旦辞燕市。负却金箱五岳行,高踪到处畴能比。余也 薄宦鄂王城,竹里花间期共倚。昨来折柬索新诗,迟君不来真缺事。忽闻冲暑归并州,极目 烟波渺何许。欲采瑶华未得将,盈盈相望人如咫。我亦移官向岱东,片帆拟挂秋风里。别后 相思知若何,江云江树愁无已。万叠峰阴听雪楼,晞发高吟想在此。

过武胜关

万山连不断,断处一关通。马踏残烟里,樵归落照中。晚云平古道,霜叶舞寒风。 不尽天涯思,征鸿点碧空。

王鑨

王鑨,字子陶,孟津人。贡生,历官山东提学道按察司佥事。有《大愚集》。

西郊

霜落松杉劲,场空黍稷收。回云余暮雨,古大畏寒秋。寂寂村烟断,荒荒野水流。 兵戈身已老,忍泪向旄丘。

夕阳

夕阳衰草伴寒丘,老树阴风吹敝裘。月落孤城残角暮,钟鸣旅馆夜心秋。独怜处世 才无用,翻恨经年战未休。剩有东都闲故旧,同携鲁酒上高楼。

魏裔鲁

魏裔鲁,字竟甫,号曦庵,柏乡人。诸生,历官山东盐运使。

马道

削嶂通烟雾,攀萝曲径扪。银沙走石壁,雪浪漱云根。老树垂松子,寒溪长竹孙。 停骖邮舍晚,愁绝听啼猿。

白草桥

青山两岸合,白草一溪斜。驿路桥边树,烟村嶂外家。石梯堆积雪,铁锁控流沙。 役赋多愁苦,遥闻每叹嗟。

夔门

峡连数百里,日月隐重峦。彩鹢狎惊浪,轻帆下急滩。山回神女庙,水绕武侯坛。 形胜今犹在,伤心望永安。

山居

十丈丹梯百尺溪,绿杨村在众峰西。松门日暖眠花鸭,藓径云深护竹鸡。卷幔远山 青未了,携觞嫩草碧初齐。幽居最喜无尘事,时有春禽隔树啼。

雨淋铃

銮舆出狩幔宫围,栈阁铃声夜雨霏。寂寞昭阳谁奏曲,梨园觱篥有张徽。

成光

成光,字近天,号仲谦,大名人。荫生,历官湖南粮储道。有《素园诗集》。

客秋别汗朱于都门至是造访濮阳

名流垂画舫,才致近归君。夜拥青藜杖,朝挥白练裙。悲歌辞上谷,握手对南薰。 吾辈何摇落,同淹麋鹿群。

饮邺郡李磊轩斋

一逢元礼羡登仙,把臂论交岂偶然。邺下风流词赋盛,客中心事酒杯传。隔窗鸟语 消残暑,夹径花枝起暮烟。旧德世传兼嗜古,尊彝满眼任留连。

魏勷

魏勳,字亮采,号苍霞,柏乡人。荫生,历官陕西临洮道。有《玉树轩诗草》。

喜彭士报自豫至燕

跋涉何辞远,中原匹马来。黄金燕市客,白雪孝王台。笛里关山老,年光日月催。 华堂秋色静,试共尽余杯。

周应遇

周应遇,字鹤泉,一字麓山,善化人。官云南洱海道佥事。有《友水轩集》。

楚雄游紫顶寺同王玉熊李少白汪季安时茶花盛开

绮阁盘溪顶,千松抱佛青。好花先客醉,尘影对泉醒。官恋闲中弈,僧翻忙里经。 晓来成底事,归路愧山灵。

韩则愈

韩则愈,字叔夜,鄢陵人。贡生,官永嘉知县。有《秋岩诗集》。

灵峰洞

有峰拔地起,亭立三千尺。转折拾层级,洞天窥一隙。幽邃直佛窟,传闻太守辟。 岁月既已久,石上苔藓积。洞门俯众山,双筍谁为擘。灵芝高可采,初月瀁金液。小憩招白 云,藉草欲晨夕。山僧不厌人,筍蕨喜留客,终老袪尘缨,优游此山泽。

蕺山晚眺

石磴盘旋共客登,微茫水雾认层层。桥边落日迷秦望,城上寒烟接禹陵。远浦渐昏闻过雁,柴扉半启见归僧。旅愁好借风吹去,又费先生酒一升。

许遇

许遇,字不弃,一字真意,号月溪,侯官人。官陈留知县。有《紫藤花庵诗钞》。

江上寄友人

处处春归客不归,片帆迢递逐斜晖。野花点水红应瘦,远树留云绿正肥。读遍好诗 愁未醒,看残明月梦还违。何时得结寒溪侣,箬笠青蓑弄钓矶。

丁耀亢

丁耀亢,字西生,号野鹤,诸城人。诸生,由教谕历官惠安知县。有《逍遥游》、《陆舫》、《椒丘》、《江于》、《归止》、《听山亭》诸集。

瓜洲

水外苍烟一鹭明,长天雨歇半江晴。双舟对过如梭急,爱听船娘转舵声。

屠牛叹呈张中柱学士

燕市西番旧羌落,屠杀天生自安乐。都城用牛不计万,远近群驱就束缚。撑拄蹄角侧不起,努张血力睛犹烁。钦刃一哮微带声,中节砉然遂解髆。庖丁见惯谈笑轻,一瞬十牛如振萚。众牛旁立相待死,毛角濈濈神自若。胔肪同登大俎盘,皮骨群分百匠错。死犹济物不辞用,生本利人代耕作。虎豹凶残出于柙,劳生尽力填谿壑。功罪报施已不仁,造物何尝分厚薄。东风春草年年生,老牛死尽犊还耕。

哀陈章侯

到处看君图画游,每从兰社问陈侯。西湖未隐林逋鹤,北海难同郭泰舟。鼓就三挝 仍作赋,名高百尺莫登楼。惊看溺影山鸡舞,始信才多不自谋。

梨口村

瑶草琪花遍地生,青禽红果不知名。层层列岫天如束,人在翠微深处行。

听笛

寂寂远峰青,梅花落洞庭。何人吹入破,能使客愁醒。鹤唳云门远,龙吟海气冥。 悲秋兼别恨,明月满山亭。

孙锡蕃

孙锡蕃,字棐臣,黄冈人。拔贡,官霑化知县。有《复庵诗集》。

春游有感

茅亭三五隐湖东,避世寥寥北海同。万马中原凋壮发,孤峰天外卧山翁。江声夜夜 流明月,柳色青青冷汉宫。雨长石苔春渐老,伤心人在落花中。

东古寺次杨伯祥兵部韵寄金子骏先生

天末孤臣走闲关,芭蕉一叶已轻闲。身存湖泛鸱夷子,亲老人传谢叠山。读史英雄 成败论,立孤难易死生间。肩头霜雪平生事,夜半悲风逐鬓斑。

宋之韩

宋之韩,字奇玉,号莲仙,沂州人。岁贡生,由教授历官泸州通判。有《海沂诗集》。

鸿禧寺灯下

湖州鸿禧寺,夜静似深山。晚磬月中细,晨钟院外闲。经声连竹径,佛火出花关。 禅舍浑无事,灯光动旅颜。

泸署感怀

忆昔虚声二十年,于今俯首蜀江边。牙签数卷父书在,鸟道千峦王路艰。寄傲时思康乐里,题诗尤觅雪涛笺。无端远涉不毛土,无赖秋心系暮蝉。

刘汉藜

刘汉藜,字博仲,鄢陵人。恩贡生,官江南清河知县。有《宝苏斋诗稿》。

同淇瞻登伾山

北阙浮云迥, 伾山秋色多。寒声落危石, 木叶下黄河。抗疏新骢马, 传经旧薜萝。 少年登眺意, 回首已蹉跎。

舒逢吉

舒逢吉,字康伯,广济人。诸生,官浏阳教谕。有《综雅集》。

九日饮王山长斋

雁声嘹呖过西楼,共客长安我独愁。自荐羞怀丞相刺,仙登喜共故人舟。频斟绿蚁 凝双眼,谁把黄花插满头。取醉莫嫌归路晚,一钩斜月正凌秋。

彭焱

彭焱,字然石,孝感人。岁贡生,官黄安训导。

古剑

䴙鹈膏白鹇,尾清光凝凝。一沟水良工,未有儿女情。冶铸全兹英雄理,光芒不屑 剸蛟螭,愿击小人卫君子。我今持尔久无功,不用还与沈埋同。白酒浇入古血腥,对尔惨淡临西风。

寄家仲

牂牁江上羽书催,裹血将军夜半回。异国惊魂豺虎路,天涯洒泪弟兄杯。那堪生死 十年事,都付关河一使来。壮志消磨双鬓短,几回残梦楚天隈。

毕际有

毕际有,字载积,淄川人。官江南通州知州。有《存吾草》。

秋夕

隔户度轻碪,空阶鸣络纬。此处少梧桐,不知落叶未。

和其年即事原韵

镫下幽窗读《楚辞》, 忽惊秋鹘纵绦丝。竹炉声寂鹦哥语, 正是檀槽半咽时。

重九前五日西园小饮

漫道重阳期尚赊,东篱黄菊已先花。檐前秋满云笼月,天外星寒客泛槎。高会况逢 鸿雁到,豪吟直欲斗牛斜。池亭镫火环如昼,疏柳幽篁醉孟嘉。

方畿

方畿、字奕千、号还青、桐城人。恩贡生、历官汉中同知。有《四松斋集》。

淮南

漕舟帆底客登楼,漂母祠前树报秋。地枕江湖连岱岳,天开淮海是扬州。战场旧握 群雄策,河势初分二水流。自是世儿无具眼,坐输荆布识王侯。

傅燮詷

傅燮嗣,字去异,号绳庵,灵寿人。荫生,官邛州知州。有《绳庵诗稿》。

自石邑之蒲吾

高峰四合插天齐,石邑西来路转迷。鸟道半随山曲折,人家多在涧东西。依墙种树

遮茅屋, 垒石为桥接断溪。 幽境自能消溽暑, 长吟缓步一攀跻。

山中绝句

文山突兀接晴空,俯瞰群山培塿同。昨日市城西望处,此峰正是夕阳中。

章汉

章汉,字素岩,任丘人。诸生,官武邑教谕。有《贮月轩诗》。

日说

日说归休未便休,三年濡滞一生羞。秋风虚动张翰棹,夜月空悬庾亮楼。七叶汉貂 声自藉,千金燕骏骨谁收。贤愚穷达从来事,呼我何妨任马牛。

魏体仁

魏体仁,字仲一,号筠圃,南乐人。官永清训导。有《一枝堂诗集》。

抵嘉阳

策马春风入汉嘉,山城曲抱水流斜。子云亭古余芳草,孙氏台空吊落花。十里桑田藏竹户,几行柳市带渔家。车停昨夜飞新雨,洗出峨眉一带霞。

颜伯珣

颜伯珣,字石珍,号相叔,曲阜人。官寿州州同。有《砥芳园遗诗》。

孤琴叹

残弦少新张,孤琴久难理。回舟抱汝来,弃置复似此,譬彼良友朋,愈疏道深耻。 平生所绸缪,焉能缺终始。时迕事竟违,幽情递变徙。况罹雉罗间,赤舄羞几几。晨床蒙蛛 丝,宵月啮鼯齿。惨澹金博山,音断琅玕水。中庭买双鹤,饥鵛鸣未已。旧欢尚零落,新知 安足倚。人生慎离合,明发泪清泚。

八月望后际堂诸子携酒过馆舍时将去正阳

不欲非公绰,卑栖岂士元。旧耕思土鼓,新彦望金门。岁晚才难并,诗成泪有痕。 白头看衮衮,多尔在中原。

厌归

归厌犹妻子,官微少簿书。吟诗从乱帙,种菊未亲锄。危树号饥鹤,残经守蠹鱼。 深知老马悔,浪说在盐车。

璿玑泉

巨峰划中陂,东南无半麓。中有百溪流,上有十丈瀑。势割朱夏长,寒刮亭午目。遂使神鬼工,中园得渗漉。青天振飞响,殷雷转岩木。谁寻从来源,汉使终往复。此地济惠通,涓滴不敢掬。明禁三百年,沟洫废为陆。匠心理独成,凿井原山腹。周蔽岈嶂,窟藏环斗轴。牵牛咫尺内,运如璿玑速。洞掣玄冥宅,浩落珠万斛。支分各汇陂,南走石池澳。欻解抱瓮忧,滋生赖溪竹。凫鹥日满梁,鲂鲤亦渐育。匪直群类蕃,黄茂锡嘉穀。济兖水利亡,旱虐时反覆。狃俗自乏术,天岂罪饘粥。乃知神禹功,润泽在四渎。近者淮泗间,机法颇赢缩。颍川虹饮筒,用乖文可读。此志竟寥寥,栖讬同麋鹿。云水杳冥去,窈窕成春服。缅昔辋川人,遗篇临池录。

秪芳阁

澒洞陂水阴,中岸折长壑。南屏诸峰稠,林木互参错。苍然秋色深,窈窕见层阁。洞户属玲珑,霭气夕漠漠。水声琴书润,天碧衣裳薄。阁下转曲房,步櫚缘岭凿。葳蕤紫珠盘,当槛纷未落。苔长屐痕疏,梯石净洗削。昔闻礼衣人,不加陶渔乐。矧余一褐夫,泉石殊不恶。近攀越观云,远召缑岭鹤。婚嫁愿何奢,栖意尽寥廓。

中陂

万物皆忌盈,山水宁厌取。自开原山泉,中园坼水府。出纳皆汇陂,势无百里土。 譬犹建中州,四澨分条缕。黯淡原山崖,窟根互撑拄。石气入青林,幽姿为云雨。南屏镜中 悬,一一类天姥,春莼丝就搴,秋鱼鳞堪数。往往花港船,清樽随棹舻。过阁侣常集,岫月 待初吐。长笛碧烟收,如闻潜蛟舞。万象纷濛濛,光炯鉴可睹。岸疑留遗佩,洞欲摘石乳。 幽胜固非一,物色兼草莽。江汉有覆舟,他山多贙虎。消息懒服食,何羡生毛羽。

马之骦

马之骦, 雄县人。官寿张主簿。

过扬子江宿玉山寺示僧达己

客枕五更尽,禅龛四壁空。梦归天界外,身在佛声中。山静自移月,江平不动风。 迟明理舟楫,前路指飞鸿。

盼柯园晤石耳山人

劳生谁复澹风尘,石耳山人道意真。栗里曾称晋处士,叠山原是宋遗民。清余积雪 萧萧发,危挺孤嵓落落身。莫讶武陵非隔世,桃花流水自通秦。

广平别友

两易春衣共薜萝, 乍临风柳听骊歌。悬知别后清宵梦, 只向邯郸道上过。

吕鼎铉

吕鼎铉,字嵩和,掖县人。官宣大督标参将。

过慧宗上人禅院

闲来过野寺,随意卧僧床。峰静秋阴转,松深午梦凉。点晴龙破壁,听偈鹤登堂。 不作出尘想,泠然与世忘。

高奣映

高奣映,字雪君,姚安人。世袭土同知。有《妙香国草》。

题陈翼叔石棺

石椁添新事,坚贞贮此身。乾坤无久客,天地有遗民。矍铄闲消岁,呕哑漫对人。 何时当碧化,笔墨吊孤臣。

【卷三十三】

惲格

惲格,字寿平,后以字行,改字正叔,武进人。有《南田诗钞》。

王郎移家桃源涧

搴幽缀山楹,解辙弄薜荔。上交杉篁音,下瞰欲无地。激波澹花林,翰墨散春气。 半壑异昏明,瑶琴枕独寐。窥庭如在山,探山山晖閟。有时风雨来,襟带乱空翠。应闻天鸡鸣,或与猿鸟值。出入径寸间,森然万象植。云物敢秘精,造化同得意。玄黄改橐籥,阴阳 无根蒂。振冠千载上,浩荡骋灵辔。

古意

鷤鴂一以鸣,芙蓉不可话。天津泻其波,蟾蜍久寂寞。黄鹄正号呼,羽毛半凋落。 离离蛸蟏织,唧唧野田雀。八风不动籥,元气亦无橐。白云一朝枯,仙人足安错。

金虎行肃杀,山树悉衣赭。瑟风荡琼华,崇城阒如野。彀弩射高墉,鹰隼不能下。 日月无瞆聋,江河忽暗哑。谁将乘龙渊,空望游车马。

扶桑有红蚕,缫丝茧如瓮。采彼云霓光,言织麟与凤。瑶姬守明河,绿梭不能控。 高壓乱丝结,若华泪交送。處妃为抚膺,湘君亦凄恸。燃火索琼茅,从君卜天梦。 十年爱鲍鱼,天下无臭兰。岂知昆仑墟,恶草成琅玕。红云摧帝珠,有鸣非玉鸾。 既丽其裳,范亦华其冠。灵夔宴旱魃,玉斗酌金盘。九鼎已沈河,谁能辨神奸。

列星如垂珠,美人以为服。惜哉无良期,丹泉不可浴。投身下大荒,空悬九幽烛。 西皇犹未寐,悬圃方局促。我欲乘飘风,行空岂有足。神灵驾云车,旋转亦无毂。

枯桐失牙徽,玄云散重阴。一从操《南风》,千秋无此音。举世不见赏,空有太古琴。轩辕何时遇,重华旷难寻。田连抽其弦,泰容忘其吟。灵祇中夜泣,兰气秋已沈。縆丝不敢言,何繇写我心。

闭户图仙灵,出门贩五岳。五岳不得售,仙灵何能乐。芙蓉羽衣瘦,冰鳞玉肤剥。 星明不见月,无晦岂有朔。螣蛇矫其尾,奔龙皆丧角。有凤鸣荆山,吾将采良璞。

下土正麟斗,若木风荡荡。一夕坠濛谷,六龙不得上。夸父亦何愚,邓林以为杖。 崦嵫只一山,神州亦无两。百灵皆高眠,而我独偃仰。早不畜雄鸡,何时见天朗。

绮里在南山,弹琴见白帝。骑虎行翠微,刚风犁青蕙。神泉窦已塞,穹洞霾风闭。 瑶圃困春租,芝田穷秋税。徵调及山鬼,翦伐尽八桂。何以荐兽藁,女萝束薜荔。珠树无余枝,珍果不留蒂。致书问游云,云将欲流涕。

坎井在东道,棘林出西陌。后园树以梅,前檐复栽蘖。坎下不可饮,棘中非安宅。 苦雨零我衣,酸风交相射。灌兰无余臭,种芝少光泽。沈忧方及晨,长叹坐至夕。

九月披重裘,凝寒堕人指。北辰换枢纽,鳌足正南徙。积气俄已倾,星辰乱天纪。 温风久不至,邹衍冻其齿。凤鸟忽无声,伶伦寒其耳。

长星三十丈,有孛如车盖。太白当昼明,日轮不能大。朝闻泰山吟,暮见鬼神旆。 磷火化列星,哀鸿作天籁。神京正嵯峨,河山自根蒂。雕题贡名马,卉服献珠贝。灾患亦不 生,妖祥复何害。

巫阳呼九关,空中鸣天鼓。增城非故居,上帝无宁处。横流奔重霄,不周没其柱。 南山虎无食,牛哀夜相语。衔尾浮渡江,叹尔不如鼠。

北地有藏碑, 悬谶出渊水。云谁司盖藏, 鬼斧不得毁。其文既傎错, 其言复何指。柳叶辨虫书, 煌煌告人纪。天神笑下土, 鲁国无男子。吕尚方鼓刀, 投纶未知止。关中何寂寞, 拔剑亦云已。

燕赵非我乡,衡霍久见隔。升高望四野,但有狐貍迹。莝彼豢龙刍,秣马将安適。 盛年亦须臾,前路转见逼。还顾望灵台,芜草已盈尺。灵台尚不存,憔悴敢自惜。

高冠不复暖,久客无完裾。悲风缘隙来,阴气惨不舒。日夕望大江,谁能脂我车。 富贵于我贱,贫贱于我贵。珪组何敢爱,沟壑何敢讳。椒薰昔所佩,缨緌今所畏。无裳岂忘 寒,长饥岂忘味。安得榑桑晖,冰苕作春气。

古意赠友

大匠不运斤, 楩楠同薪樗。王良不在御, 神骥贱为驽。和氏勿见剖,弃掷成碔砆。 利器非蟠根, 胡从知湛卢。所以处风埃, 贤智尽为愚。囚臣世所笑, 鲍叔为脂车。谋业须逮时, 蓬累徒区区。吕梁何必险, 侧足在通都。旷观钧陶外, 黾勉崇令誉。

高穹垂星芒,鸡鸣耿长宵。穷阴尚流霰,春气在寒条。黄钟久希声,举世失《箫韶》。 何由见凤仪,期与帝相要。重轮转羲驭,吹万旋斗杓。阳林交丹翠,阴涧发兰苕。螣蛇盘霾雾,鹰隼乐风飙。绝足未奔空,凡马同衔镳。绛螭一骧首,重云开紫霄。

晓行深谷

树暗不断烟,崖蜂时堕蜜。藜床荔垣藓交络,桧雨篁阴不见日。松梢风过落藤花,仰看饥鼯啄山栗。

游仙曲

天衣如云初拂石,碧眼仙人散绀发。上有琼华照银阙,绿波无风见蟾月。瑶圃玲珑翠相结,赤城鳞鳞堆绛雪。采香仙妾纷成列,东行海水飞尘积。卢敖绿玉杖九节,齐侯枣花散余白。上元酒盎澄天碧,芦刀刻髓流金液。行厨炰麟烟五色,海上歌鸾闻乐阕。山河率舞灵妃悦,白鹄西飞一双雪。汉殿何年种桃核,真人宵光眼相射。欲耕下土无阡陌,鼋鼍驱风移水魄。榆柳凋枯安可摘,昆仑破碎非我宅,骑龙奔云九关辟,登降帝台杳无迹。坐卷红霞展瑶席,手顿羲和不敢夕。

在东园柬毛稚黄

海云茫茫春霰断,柳丝绿遍寒江岸。细网幽窗竹烟乱,山桃海棠落将半。鸟声过残雨,兰风细吹案。我思在空谷,我梦属云汉。衔璧只独照,锦衾空宵烂。飞花濛濛还坐叹, 江郎藻笔不在腕。石泉水芹泛谿馆,柳下无人待谁锻。

山楼曲傍碧山,临清潭,修篁、灌莽,蓊薆相交覆。中有小楼岑然,窗棂洞明,惲子寝其上。晨兴延眺清寥,凄烟浏风,目远心迩。隐几吟哦而自吊,意忽忽若有所思,而无其端。惝怳冥,疑有所遇,而不可究诘。纷纷袭袭,如乱丝相缪,其来惕怵,其去黯惨,气郁色换,动人之魄,摇人之精,终不知其所从。起而强名之曰"感谥",曰"怨思",皆是也而非也。乃系之以歌,讬缠绵之思于其音云尔。

空楼蔽芳树,竹叶落翠羽。瑟瑟琅玕满楼雾,青青楼上山无数。湖风吹山山作云,湿云含雨连山度。我思飘渺云中君,乃在十二峰间汉皋路。贻我瑶华双珠珮,流光洒洒空灵遇。金银台冷芙蓉衣,弱水如烟散霞圃。星飞井底海水乾,去天一角望蛇盘。手绾罗襦非合欢,雌龙怨涩冰弦弹。绡文乱染红兰珊,娇花泣露金井寒。辘轳声转烟萝坞,梦送春云过江浦。天鸡唤梦云不知,满楼湿尽山楼雨。

初冬过荆溪访潘元白便移舟西氿从南山一带看枫叶同游为天台石枚吉月陵友云元

白髯浮屠

我从兰陵来,呼友荆谿市。荆谿主人爱看山,牵船脱帽西风里。千林十月不见霜,平隄碧草浮鱼梁。芦花冥冥水浅浅,杨叶索索烟苍苍。潘子挥长笺,篷底坐焚香。四座分酡酥,倾杯无酒浆。江东步兵自行炙,邺下才子调银簧。舍棹入翠微,扶石憩山馆。石林崩滩路不同,高松无人鸟相唤。前坂穿稻畦,樵径忽下断。古藤摇寒柯,红桕落将半。榆风柽露变殷紫,杉阴桧枝翠交乱。几时饭黄精,直上铜山颠。一为鸾凤音,万壑皆泠然。日夕下兰坡,高歌齐扣舷。手拂冠缨弄鱼鸟,葭汀空影相澄鲜。渔网冲烟沙岸直,水光尽作明霞色。回看松路起昏鸦,云暗山门众山黑。

孤山远眺

振衣空翠里,怅望水天隈。百谷秋涛壮,千帆夕照来。竹深山径合,云尽海门开。 无限登临意,忧时赋《七哀》。

一峰原砥柱,今日见桑田。孤山原在江中,属泰兴,今成平陆,为骥江所有。海峤云边出,江城树杪悬。叶飞孤岸雨,雁度万家烟。吴楚苍茫里,凭高思渺然。

江城

秋风杨柳渡,马首散秋声。万雉云连水,三江雨洗兵。楼台横战垒,箫鼓动严城。 未见爰居下,波涛夜不惊。

寄范荆门

白马雕弓玉辘轳,荆门专阃握铜符。虎牙吹角翻新垒,鱼腹披云按旧图。月满三巴 歌出塞,秋高千骑猎平芜。轻裘傥过衡阳路,好遣双鸿到五湖。

柴墟怀古

金牌旧恨泣鲛绡,江岸荒祠尚寂寥。自昔河山征战地,至今风雨鬼神朝。涛翻白马东来急,天接黄龙北望遥。极目寒烟凭吊处,长虹中夜出云霄。

王颛庵太史拙修堂宴集分韵时移家还里将有远游留别娄中诸君子

花残江馆滞征缨,绿浦红潮柳岸平。芳草有心抽夜雨,东风无力转春晴。艰难抱子 还乡国,落拓浮家仗友生。只为踌躇千里别,归期临发又重更。

同李非夏湖山眺望

春愁正满落花天,不见王孙又几年。添得湖山今日泪,玉箫吹断鹧鸪烟。

旧梦湖南春雨空, 高歌无地望崆峒。囊中自有江山在, 乱采莺花入变风。

白马江潮自往还,鸱夷旧恨满吴关。可怜都作啼鹃血,红遍西湖梦里山。

天地容吾未老身,烟云不改旧时贫。西湖四月无游女,独采蘋花待故人。

海昌东门望海

海老神蛟入夜哀,观涛曾见水云开。奔雷欲散连鳌雪,一线横空白练来。

海气苍茫冷罽袍, 几看明月蜃楼高。可怜精卫当年影, 片石犹悬大海涛。

题杨柳

何处香车紫陌尘, 枝枝斜堕落花津。美人独立东风里, 半为春愁翠黛颦。

乌啼江月正昏黄,风袅残烟翠带长。最是笛中听不得,白门花落旧宫墙。

弱缕风前未送寒,和烟和雨上阑干。当年歌舞消魂地,深院沈沈独自看。

莫为春愁减带围,风前弱缕尚依依。伤心最是红桥路,宝马钿车乱后稀。

绿池花片晓来增,欲挽东风力不胜。只为送春无几日,自将烟翠染谿藤。

数点昏烟月一潭,绿阴桑火过春蚕。从今移入图中看,不必攀条忆汉南。时石谷王 山人为天涯诸同好画柳,尽宋、元诸家变体,穷工极妍,称一时胜事。

漏岸千丝定有无,隋河旧绿已全芜。抽毫细染眠烟势,兵气应难到画图。戊午秋, 江南杨柳翦伐略尽,予别有《叹柳》诗。

梦隔春云海路长,杨花飞尽莫思乡。闽南不是无青柳,海国遥闻已种桑。题闽海张郎《柳图》,故有此句。

杨宗发

杨宗发,字起文,武进人。有《白云楼诗钞》。

顾宁人曰: "起文行身甚狷,文笔甚狂,惲南田尝指其《饮酒》诸诗叹曰: '正权今 在下风矣。'"

陈其年曰: "昔人谓老杜《衡州》诗'悠悠委薄俗,郁郁回刚肠'二语甚悲,又谓韩诗'酩酊马上知为谁'用意哀怨,过于痛哭。起文《短歌行》毋乃类是!"

短歌行

有酒当歌,歌亦莫苦。来日如归,曾不俟我。牙须{髟思}々,积水生苔。苔生水枯,

使我心哀。青天为舟,日月为桨。渡我百年,他人嗣往。蜉蝣匪短,嵩岳匪长。人悲有余,我乐未央。何用为乐,与彼婴儿。仰视苍苍,生不自知。何用为乐?与彼草木。蒙蒙尔心,俾无饥渴。何用为乐?与彼山阳。朝行九州,夕不遗光。何用为乐?与彼瓦石。中无肺肠,饮食不得。何用为乐?与彼浮云。逢逢天飞,首尾无因。何用为乐?与彼流水。出入鱼腹,长生无死。生死同寄,形影俱虚。但当欢乐,终我须臾。

山中诗

寝兴绝思患, 夙昔憩夷简。闲闲系林壑, 湜湜嗜苔藓。即目穷所变, 因心去其褊。 和风芬以集, 灵鸟声相啭。暇逸通左右, 谈笑承深浅。春光既斯日, 遇物平生见。

空岩怅流目,虚壑驰超忽。物色宕烟外,予怀澹川末。闲时夜气发,静地春光接。 木石叩情性,见闻冥欣戚。青苔积鸟爱,绝径断云迹。旷览识初古,周旋任天质。神凝不我 昧,理永奚所隔。

佳兴挟晨夕,气候亦余好。春色散容与,朝光聚窈窕。新烟入女萝,宿雨出青草。 未敢测神化,殊知待林鸟。索居共樵爨,纳拙将渔篠。登涉中有源,岩崖外为兆。遇始识俱 殄,感终神与杳。

潘高

潘高,字孟升,号鹤江,金坛人。诸生。有《南村诗稿》。

野蔓

野蔓不缘树,空引枝叶长。谿谷少人民,猛虎啼河梁。虎饥不择肉,夜盗豕与羊。有客来何为,夜行多苦伤。门外追呼急,子归皆仓皇。庐舍无遗粟,赍我诸军粮。军粮几十万,朽腐委风霜。诸军何所事,戈雁以翱翔。

题秋江归棹图

枫叶潇潇柿叶稀,空江白浪拍长隄。逆风小橹愁无力,家在黄陵西更西。

漫兴

三月仓庚五月蝉,寒蛩八月复凄然。只摊残卷溪边坐,把笔题诗过一年。

秋日杂兴

明月函关路,清风华岳祠。十年身不到,一夜梦犹随。冰坼河声远,花开日色迟。 何时乘小蹇,寻我旧题诗。

门前乌桕树,树底一人行。苦爱清秋色,闲听伐木声。风吹寒雾散,日射午岚轻。 谁识悠悠者,幽居不用名。 春归

不识春从何处归,空余春酒渍人衣。墙腰日色投西下,风脚杨花带北飞。筋力自知 垂老异,欢娱偏恨故人稀。凭高望远情何极,独坐吟诗卧翠微。

卖花词

身是城边卖花叟,卖花归来即买酒。曲巷朱门声婉转,春风作伴蜂声满。家家有花花未开,春风先到我家来。劝君买花须少年,劝君莫惜买花钱。卖花老叟年年在,买花年年时时改。昨日少年今日老,君不见担上花开可常好。

赠别

養被萧条落照前,江湖飘泊又经年。云深禹穴寻山屐,雪合耶溪载酒船。醉后可遭官长骂,镜中知有故人怜。怱怱更别关门去,空对椒盘颂远天。

题秦淮晓渡图

潮上扉平水,乌啼月满街。一声桡响处,晓梦落秦淮。

杪秋漫兴

独立枫林古道旁,参差烟霭护芳塘。有时蹑屩寻幽草,一向开门背夕阳。山色青葱供竹杖,酒情缥缈记渔庄。谁人更惬沧洲兴,捩柁天南问石梁。

无题

飞燕当年事已非,汉家庭院思依依。多情只有樊通德,拥髻镫前泪湿衣。

忆得

黄鸦榖榖雨疏疏,燕麦风轻上鮆鱼。忆得往时寒食下,全家上冢泊船初。

余欲北行邻翁持酒相饯戏题一绝

轻云疏雨变新凉,白酒黄鸡饯旧庄。自笑明朝千里别,堆盘赤枣作重阳。

别庄氏女子

忆我种梅日,甲午暮春间。生尔十月后,梅花始及肩。女长梅亦大,于今二十年。 今尔别我去,梅花仍满檐。与尔簪荆钗,摘梅插花钿。凄然与母别,母痛泪如泉。拭汝纵横 泪,记我临歧言。尔在汝舅侧,实如父母前。汝姑既已无,正须赖汝贤。其余诸姑叔,和柔 实所先。苦语何可尽,绕梅空潸然。

晋陵喜闻于子遂庵归里却寄十二韵

八月风露清,林端枣红皱。喜我故人归,归与穷昏昼。离绪依僮仆,欢情隔老幼。如此二十年,思之令人瘦。似我客京华,卖文救颠仆。官长怕逢迎,溪田忆耕耨。悠悠寄征旆,披披拂归袖。及来故山边,壶榼争相就。懒说短长亭,梦惊东西堠。翻思君在远,岁月荒难究。去者松楸古,来者年齿茂。君犹住燕山,缥缈亲句读。如今事已然,志愿颇稍售。出入有儿郎,孙亦复娟秀。茗碗列前轩,炉香置几右。主客醵钱刀,亲朋罗饤饾。笑语多旧事,契阔喜新覯。时杂往来客,中有草木臭。是时江南天,烟雨寒橘柚。明当少有携,一醉为君寿。

苦雨行

泥滑泥滑傍篱落,补屋补屋呼屋角。复有菰蒲深更深,村边尽日啼姑恶。风雨无赖送春归,江北江南水半扉。黄笠青蓑乘棹去,萋萋草长没渔矶。此时合闭茅堂坐,何堪更鼓他乡柁。四月沿溜下阊门,云连山顶烟护村。东风卷浪轻帆健,过尽千峰酒一樽。及抵家山更萧索,雨亦不收风又作。何时巷陌听啼莺,一洗从前唤雨声。

绝句

杏花风起雨如丝, 人在轻寒暮阁时。杨柳毵毵春院闭, 青鸠啼上最高枝。

毛先舒

毛先舒,初名骙,字稚黄,钱塘人。有《东苑诗钞》、《思古堂集》。

宿韬光望海目

龙宫鹫岭天下奇,韬光更上升云梯。苍穹仿佛欲摩顶,石气濛濛拂衣冷。山僧邀我山中宿,乘兴扶筇踏岩谷。便因晞发卧峰头,俯听檐铃和风竹。夜深月没静群籁,隔树明河似萦带。须臾微红乍起灭,曈昽正出扶桑外。天浮海潏见俄顷,不觉此身驻西岭。谁持青镜写燕支,闪烁团圞无定影。沧波一半吹紫涛,良久不见东方高。凌风欲去更惆怅,天水茫茫两摇漾。绀殿红楼黯欲开,下方始听鸡三唱。

七夕

今夕是何夕?碧云沧海端。月华如梦醒,秋色到烟寒。帝女量河水,宫人裂扇纨。 愁心满空碧,只倚玉阑干。

秋色

秋色满吴岭,登高四望同。断虹垂木末,残雨过江东。细草还留碧,寒花也自红。 昔人高卧处,应在白云中。 祁奕远至钱塘

一水中分越岸沙,春鸿消息路偏赊。别来何处搴芳杜,相见依然感鬓华。阮籍垆边 堪避世,王尼车上便为家。对君却掩三年泪,苦竹城头起暮笳。

吴宫词

苏台月冷夜乌栖, 饮罢吴王醉似泥。别有深恩酬不得, 向君歌舞背君啼。

倪涛

倪涛,字山友,号昆渠,钱塘人。

拟白香山有木诗

有木名梧桐,栖凤临清池。朝阳承新色,碧玉拂疏枝。春风及万物,枝叶方荄滋。 别类或刺手,花发眩赪姿。浮华惜无实,讹似空参差。排云高百尺,孤立耀后时。知音傥可 待,《韶》《雅》夸天资。槃阿厉名节,澍雨敷丹墀。

有木盛湖湘,其名赋束楚。同在新蒸中,独以翘楚许。丛生浸以滋,藩触势莫阻。 话质非无用,横生未得所。偏不侪梓枌,翻忧害禾黍。或慕坚强性,相依近居处。下趋棘与 荆,当路苦徒侣。山樵不可刈,聚类快一炬。

董玚

董玚,字无休,会稽人。有《学村园稿》。

凤城客兴

迎晖山下此来游,草草逢人易唱酬。处士失时存意气,孤臣去国见风流。江湖自拟 同浮梗,身世相看恋古丘。念有对床兄弟好,花台摇落独居幽。

送同学还建业兼呈其伯兄及陈元孝

见君无几值君行,惜别因思君弟兄。五岭烟云轻载去,六朝风雅旧宗盟。香过野岸 花分候,路出江皋鸟变声。到日若逢陈大在,道余将出赵陀城。

宝月台次憨山老人梦游集韵

孤城此地几兵戈,剩水残山近若何。谁唱《满江红》一阕,斜阳低处晚霞多。

暮山万叠翠烟含,此夕登楼意渺然。兀坐四更方吐月,有人松下唤渔船。

吴屯侯

吴屯侯,字符奇,嘉定人。明季武举。入国朝为诸生。有《西亭诗》。

黄雀谣

八月黄雀生,九月黄雀飞。飞来飞去啄禾黍,禾黍欲空黄雀肥。原头网罗日相逐, 嗟汝身肥命亦速。

相逢行赠范阳李都护

昨朝相逢在狭路,死生一言不相顾。今朝相逢都市中,挥鞭掉首去若风。朱家剧孟世罕有,敦盘三物俱成空。夫君慷慨燕南客,珠袍锦带何翕赫。床头莫邪中夜鸣,睥睨泰山轻一掷。相逢不语心自知,倾盖已作千秋期。荆卿不得鲁句践,易水衣冠徒尔为。

江头哭

江头夜哭声鸣鸣,乡音仿佛越与吴。更闻醉骂哭随止,从此竟夜惟呼卢。市门早开 群妇走,白棓驱阿似雷吼。叱使沿街索酒钱,泪珠簌簌擎纤手。自言生长深闺房,谁知万里 投边疆。缠身铁械死不得,羞颜无处堪遮藏。罪人之孥尽应殪,皇恩宥减等天地。男儿屠裂 有余辜,那许蛾眉言节义。

泊舟江浒

空江微月落,不寐露沾衣。独鹳当矶立,繁萤贴水飞。客怀秋更远,身计老多违。 自愧非袁虎,高吟听者稀。

舟泊龙江

飘泊终何事,征帆日趁流。鸟飞江驿暮,人到石城秋。市火浮孤棹,渔歌出远洲。 停沽休借问,长记柳边楼。

吴门送汾阳刘明府往宣州旧治

宦迹君何滞,他乡且作归。兵荒征路险,贫病别人稀。晚驿兼云宿,秋帆带叶飞。 南陵旧山色,应待谢玄晖。

自遣

敝刺虽怀总未投,早知身世一轻沤。长贫枉说千金赋,高卧犹存百尺楼。已谢子鱼 分讲席,还嗟夷甫覆神州。绕门秋水菰蒲满,若问新盟有数鸥。

酬郭万户远寄塞下

万里关山万里风,手磨残血试彫弓。苍驼晚放吹螺甲,黄鼠朝烹灌马。谁说王嫱长

有恨,不知苏武是何功。闻君一事犹堪羡,毳帐胭脂比旧红。

漂母祠遇冯明思

寒云黯黯塞天阴,尊酒相逢见寸心。买得吴钩枉闲却,报恩原只用黄金。

送陆天祐之大梁

长淮秋冷叶纷纷,贳尽征衣酒未醺。多少梁园旧宾客,西风独上信陵坟。

陆典

陆典, 一名芳, 字敕先, 号觌庵, 常熟人。诸生。有《觌庵诗钞》。

江楼

云际长江江上楼,乾坤日夕撼中流。杯倾浊酒供怀古,笔蘸惊涛倩写愁。烽火南州 闻转战,茧丝东国动咿。凤皇黄鹤空回首,崔杜吟诗满地秋。

次和牧翁三月十六日招集娄东诸词人论文即事

麈尾清言喜入微,元亭俗客驾来稀。山光独隐乌皮几,世事双扃白板扉。寥落关河闲战垒,苍茫天地剩渔矶。春风片席高人语,千仞分明一振衣。

门馆清闲彦会新,情多正值哭残春。空山虎豹无文质,浊水蛟龙有屈伸。玉版谭禅 共调笑,朱樱荐食动酸辛。荒涂今古明明在,策足何知要路津。

次和鹤客游鹁鸽峰

山到将穷处,高崖复陡开。沁泉幽磴滑,背石冻云颓。庵僻僧难住,峰奇客每来。 自惭无济胜,空有梦徘徊。

乙卯人日风雪同黼季山中早行送东涧先生葬兼示遵王

肠断梅花发故丛,空山赴哭及曈昽。百年身世悲风里,千古文章白雪中。留谒不辞来孺子,起坟多愧葬扬雄。何人为琢寒山石,有道碑裁第二通。时未有志文。

舟中看雪用蒋文从韵

绥绥一夕洒林峦,双桨招携载酒宽。劫尽乾坤存太素,岁穷人物入高寒。禁多风雅 篇中见,借少方蓬海外看。老我无才夸白战,醉歌欲起卧袁安。

周荣起

周荣起,字仲荣,江阴人。贡生。

早春江郊探梅

不谋同趣趁闲云,到处随心寄遇欣。日暖乍烘寒玉放,风柔催发缟衣薰。竹围江港潮初涨,人到山楼磬自闻。一片氤氲香世界,大堪投老谢嚣氛。

先著

先著,字迁甫,江宁籍泸州人。

天盘岭

野田弃疲驴,七里陟修岭。负手石路间,数盘历幽靓。山椒得微亭,行者喘初定。 归樵望鸦巢,暮色失山影。转岭稍就平,缩足遵微径。苍苍寺门松,钟声不出顶。

同史千里宿蔡斋即席次史韵

萧瑟秋庭暮雨新,深宵停酒话遗民。文章何用惊时辈,肝胆惟应向故人。才已累身 心未死,老难谐世自嫌真。尊前一寸将残烛,还抱高歌动鬼神。

费密

费密,字此度,号燕峰,新繁人。有《燕峰集》。

朝天峡

一过朝天峡,巴山断入秦。大江流汉水,孤艇接残春。暮色愁过客,风光惑榜人。 明年在何处,妻子共沾巾。

沔县村居

故国不可到,春风吹闭门。云移峰顶寺,花落雨中村。事简人过少,山深褐自尊。 无书传子弟,耕凿任乾坤。

晚江

昏气满孤屿,此时途尚遥。天寒将作雪,风急欲收潮。栖鸟黄云树,归人白板桥。 酒家随意宿,明日进兰桡。

栈中

栈阁通秦道,青天未易行。尽过奇绝处,不负有平生。白马岩中出,黄牛壁上耕。 野花埋辇迹,幸蜀只空名。 同蔡冶田金游西山登秘魔崖望石壁

绝壁几人到,虚崖一望收。秋声先众木,日气射高楼。僧少不鸣鼓,帘稀只挂钩。 却愁山雨重,杼柚卷溪流。

雨

急雨占红色,遥青入望微。水寒云不絮,雁大湿能飞。早汲愁高岸,迟还畏薄衣。 潇湘何处屋,开户待人归。

高邮遇故人

相逢多难后,只此是天涯。与子躬耕处,苍生尚几家。朱门齐牧马,白骨乱开花。 耆旧何人在,行吟感暮鸦。

元夕雨中见雁

野云片片接桥西,可惜年华负柳隄。江上雨来催书暝,沙中雁起觉城低。寒边无信 传春翮,荒圃宜归理旧畦。浊酒一杯和泪洒,看镫犹记浣花溪。

王琪

王琪,字公甫,号襟崆,静宁人。有《袜线集》。

和王季安作

僻处因躭道,读书获我心。为嫌牵俗累,不厌入山深。野趣聊荒遯,才名岂陆沈。 圣朝思梦卜,终忍卧园林。

徐夜

徐夜,初名元善,字长公,更字嵇庵,又字东痴,山东新城人。诸生。有《东痴诗选》。

初夏田园

朱夏辄复变,深绿日以肥。感彼生物勤,节候曾不违。清晨荷锄出,田间人尚稀。 观物適自然,时见朝雉飞。不惜筋力疲,但恐坐食非。作劳有时息,高舂行来归。端坐抚素 琴,可以理朝饥。

东村

村鸡叫曙光,顿觉身已老。新年容易过,过去迹如扫。薄田随众耕,盈室安怀抱。

前年一再旱,愿力为颠倒。治生行问人,作力那得好。惭愧食蝗余,终岁艰一饱。今春雨复疏,闻说百里槁。天心苟如此,微躯何足祷。

雨中去湖上十五里作

下田岁不登,所利惟稻秫。居人悉地力,种十居六七。西成傲百穀,暵乾遑不恤。 莎草秋狼籍,牛豕各纷出。牧人随牧踪,夜不问庐室。中杂鸥凫乱,唱和自俦匹。我行水田中,田水溅我膝。回观所历空,顿使城郭失。远树界周遭,望尽天水毕。

季夏西山

结屋此山间,柿阴浓昼暑。云从岩际来,向我窗中伫。北上最高峰,下瞰临何许。 爱彼南涧松,去濯清泠渚。时来石上坐,月下闻樵语。风雨涧香过,石田响禾黍。

月下望南山一带

南山高几许?生此明月前。山南何所有?终古遂悠然。远村人家少,日中绝人烟。 出村向山路,幽溪屡延缘。石林当夜朴,泉壑及冬坚。人声下岭陂,一一闻前川。欲问竟何 说,冥对以忘诠。

雪后西山即目

抱暖驱坚径,声连千里白。链水缚地骨,寒落石林瘠。晴眶归众曜,远明表微僻。 冻涨冰叶散,风洲霰纹积。劲草创坚立,溪翎登岸踯。陆壑坦殊貌,群峰态转益。陡巘未云 青,潜澌结复石。淞流解屡合,风日争向夕。当险值归樵,耸肩避尘客。

西溪采幽流瞩引兴

西溪流水处,日夜声中生。岩阿发奇唱,浑沦相与清。穿林逼渐响,殊音归一鸣。 磊砢势难夷,稍此非人撄。沿林各开境,接异新常晴。奇路幻庸迹,回看来径并。蓼花媚孤 屿,憩流归清平。开心纳层澜,浮影逐虚晶。游黑过水起,流光升壁行。奔汇入别涧,倒溜 飞高明。长歌击林木,境尽白云横。

九日得顾宁人书约游黄山

故国千年恨,他乡九日心。山陵余涕泪,风雷罢登临。异县传书远,经时怨别深。 陶潜篱下意,谁复继高吟。

春日感怀

霜余烧短草还青,薪火相催更不停。除却文人消傲骨,惟应醇酒近颓龄。中年丝竹 伤何极,上日莺花醉未醒。可惜风流犹正始,更无风景在新亭。

富春山中吊谢皋羽

晞发吟成未了身,可怜无地著斯人。生为信国流离客,死结严陵寂寞邻。疑向西台 犹恸哭,思当南宋合酸辛。我来凭吊荒山曲,朱鸟魂归若有神。

王尔膂

王尔膂,字襄哉,号止庵,又号泡斋,掖县人。诸生。有《止庵诗》、《泡斋集》。

瓒甥诗至次韵答之

羡尔桐阴什,才随雁影过。承家良足韪,似舅未为多。彩笔秋垂露,灵心夜贯河。 由来风雅事,无若后生何。

有以琴命予者赋谢

雁行中断最堪悲,壁挂青桐匣贮丝。日上晴窗闲袖手,十年心事阿谁知。

谡园看红叶

不知青玉树,谁作赤霞匀。老至翻能媚,秋深欲当春。无风宵亦坠,著露晓尤新。 何事悲萧索,寒光自照人。

宿凤翀

宿凤翀,字翼之,号汶篁,掖县人。诸生。有《松石馆诗》。

登台为赤霞赵使君赋

把酒临高台,雨霁秋初爽。席地坐莓苔,歌啸复偃仰。凉风西北来,泠泠疏竹响。缥缈烟霞思,悠悠濠濮想。日入千山暗,四野气漭沆。稍焉林岫明,月出东岭上。长辞九州牧,愿作五湖长。矫矫野鹤姿,宁甘罥世网。松径夜虚寥,幽人独还往。醉里欲眠时,山童拂罗幌。

重阳前三日林元洲邀诸友过寒同山庄

高台眺望罢,缓步到柴扉。石路缘溪岸,茅亭带夕晖。桥危人怯度,林静鸟争飞。 乘兴忘归晚,沾衣草露霏。

邵长蘅

邵长蘅,一名衡,字子湘,别号青门山人,武进人。诸生,被黜,复入太学,考授 州同不就。有《青门集》。

雨后登惠山最高顶

雨歇翠微深,山光媚新霁。拄策凌清晨,松杉吐仍翳。扪萝已数盘,缘磴方屡憩。 平芜鸟去没,远浦树如荠。绝顶惊银涛,始觉具区大。雨沤浮日月,三州萦衣带。淼漭极无 垠,遥天与波逝。群峰散凫鸭,汎汎烟波际。平生怀壮观,兴惬兹游最。下方隐招提,钟声 破苍霭。

京口行

前月有人京口至,向我具说京口事。可怜十万良家子,被驱血作长江水。马首纷纷红袖啼,城中处处青磷起。玉帛子女委如山,良民痛哭官兵喜。忆昨海艘蔽江下,艅艎艨艟捷如矢。炮火朝轰建业城,烽烟夜照瓜洲市。北军病热人马疲,辽人三万一万死。岂无浙军但袖手,将军阵亡中丞走。天堑之险一苇航,区区孤城亦何有。城中食尽还出降,官吏抱印趋道傍。釜鱼假息非得已,男号女哭形苍黄。从来兵机有翻覆,龙江关头昼飞镞。佽飞材官骑若云,死国还能立战勋。婴城既有郎尚书,杀敌复用梁将军。将军突骑来酣战,虎头燕颔谁不见。腰间血洗大食刀,马上横飞仆姑箭。追奔逐北旋枯蓬,沿江报捷速飞电。此时官军却入城,苦死鸡犬无留生。讵有童男贯高槊,似闻节妇悬衣桁。呜呼此事真可吁,屠戮岂异犬与猪。上功尽拟侯王相,烈焰翻将玉石俱。杀民何锐杀贼怯,尔辈不得夸身殊。昨夜寡妪哭交衢,骨肉丧尽身羁孤。腹饥足茧但僵卧,日暮哀哀眼血枯。

送董舜民游五台山

我闻云代闲,兹山神仙窟。碑版虽茫昧,图经忆仿佛。黄河右萦缭,恒岳左嵽嵲。壑凝六月冰,岩嵌千年雪。松柏森地底,绝顶但石骨。五台五芙蓉,诡状斗奇绝。东埵古雪峰,俛视见溟渤。半夜天鸡鸣,日照蓬莱阙。西埵秘魔岩,天池神龙穴。危磴干云霄,复嶂隐日月。南埵益嵚岑,林麓互蓊蔚。仙花昼缤纷,钟声暮超忽。北埵覆宿堆,古柏枝郁屈。一气俯大荒,化城时灭没。中台万仞余,削成表崒屼。下方走雷雨,阴崖缠虹霓。湾澴太华池,窱珊瑚碧。君携绿玉杖,兹游恣探历。四月别苏门,青青坡陀麦。五月渡滹沱,褦襶触日赤。遂登清凉台,结夏住绝壁。跣脚踏层冰。山风冷心魄。余本岩栖人,颇爱谢公屐。失足辞故山,留滞京华陌。逸兴坐飞翻,送君徒掎摭。烦君语山灵,后期傥来觌。

五月十七日喜闻施愚山汪钝翁秦对岩钱宫声曹峨嵋乔石林李子德陈其年毛大可朱 竹垞汪舟次严荪友徐胜力潘次耕李渭清方渭仁周雅楫暨家戒三诸公以鸿博制科同官翰林赋 赠五十韵

泰华因培塿,涓流赴溟渤。凤翙仪高冈,麟游以时出。圣朝栋梁具,峨峨皋与卨。 更闻辟门典,搜剔遍岩穴。博学鸿词士,有诏徵诣阙。奏赋太和殿,金石殷摩戛。清越谐璆琳,镵镂讵蛣。三相验讨论,天子亲甲乙。拔尤五十人,一一枚马列。维时月在皋,既望越二日。喧喧下明诏,并命登禁闼。冢宰持故事,圣恩特超越。鸣珮翔凤池,排风羡毛质。我方客京华,枯兀类株橛。庑下新僦居,畏热脱巾袜。当食闻除书,惊喜失噢嗗。同时诸君子,与我半胶漆。故欢谐缟纻,提携愧先达。新交纫兰》茝,推挽比蛩蟩。亦有吾宗贤,飞辔偶时哲。群公既汇征,吾贱亦庨豁。此举良旷典,盛事久雍阏。科名束缚人,如骥就衔钀。奇士若挛拘,平流得津筏。嘉祐举制科,得士惟轼辙。三等占久虚,何况二与一。浩荡蒙殊恩,公等宜惕怵。比闻启史局,行绸金鐀繘。兹事诚大难,煌煌钜著述。余子何足云,晔寿颇排讦。龙门扶风后,庐陵庶顽颉。发凡及起例,郑重非琐矞。前明三百年,大事凡六七。文皇 靖难师,忠臣惨刺剟。逊国诸名贤,姓氏半磨灭。兴献议大礼,杖戍坌肉血。三案益纷拏,贤奸慎剖别。呜呼镇抚狱,清流离罗罻。阉寺内灶炀,盗贼外溃决。民穷赋敛繁,遂令国步蹶。思陵死社稷,中外多杖节。褒忠自圣朝,阐幽待特笔。此皆关治乱,件系宜缕悉。微词或隐显,义例严揃截。我学愧雕虫,我生类蠓蠛。讵能生羽毛,行当返蓬荜。东涧躬桔槔,南岨茹薇蕨。茅檐日偃仰,简编事繙阅。庶人岂敢议,草野有公骘。努力期诸公,千秋光史帙。

蓬莱阁望海

我来一蹋蓬莱阁, 溟涨高寒岛屿秋。元气苍茫日月浴, 青天出没蛟螭游。田横五百余荒砦, 徐市三千隔祖洲。缥缈神山不可见, 天风万里声飕飕。

寒食宿迁道中雨

下相城边路,春阴困马蹄。直愁泥滑滑,翻惜草萋萋。雨挟河声壮,天围野望低。故园凄绝处,荒冢湿棠梨。

慈仁寺古松歌

前年屡憩慈仁寺,古松苍翠流云气。高枝偃盖撑晴空。低枝攫拏捎厚地。青天忽诧蛟龙蟠,赤日只疑风雨至。今年重到慈仁来,苍皮惨裂枯幹摧。一株已遭斤斧伐,一株仅存神郁屈。倔强尚与夔{鬼瞿}争,爱惜或愁雷雨拔。其余四株稍葱蒨,青青翻是寻常质。我闻此松植自金元年,胡为摧折荒寒烟。摩挲三叹泪如缕,嗟尔讬根原失所。慈仁寺中大作集,寺门日日飞尘土。珠玉锦绣走黄埃,日炙风霾气凄苦。孤根不免虫蚁穴,劲骨宁能驵侩伍。君不见庐山简寂观,高松千尺飘霜霰。白鹤两两巢其巅,仙人羽客时相见。又不见天台桥畔松,作鳞之而苍虬龙。银河倒挂玉淙淙,樵斤猎火何由篷。吁嗟乎!人生位置有如此,上马出门暮山紫。

袁州谒昌黎祠

祖龙一炬灰坟丘,烛龙昼暝天帝瞀。西京老翁强解事,手笺口授牛毛稠。当涂以还 乱電紫,南岛北索如羹蜩。叶况复丘轲没已远,东西二鸟鸣嘲啁。帝忧浊世塞糠秕,遣公骑 驎下九州。钧韶九奏响阿阁,金钟大镛铿天球。二鸟缩颈万窍喑,仪凤舞兽纷夷犹。炎州汤 沭帝所赐,潮州量移仍袁州。袁阳山城仅斗大,袁山孱颜袁江流。元和去今一千载,云烟草 木荣光浮。祠屋三间古台下,丹楹粉壁龙蛇幽。丰碑倒薤缠赑屃,公神缥缈应来游。星旄腾 霄轶浮景,挟两苍螭骖素虬。十洲群仙从遨戏,阆圃绁马扶桑辀。我欲挽公敬下拜,跽陈瓣 香公许不。韩门弟子四五辈,翱湜郊籍谁其俦。天门詄荡公不来,风寒竹树声飂々。

雪后登滕王阁歌

我携铁笛罗浮回,豫章城头吹《落梅》。罗浮仙人大狡狯,蜚廉滕六供呵捻。乱洒梅花遍原隰,千峰一夜争皑皑。晓披白鹤{敝毛},独上滕王阁。九叠屏风失青翠,琼楼十二垂珠箔。长江》皛淼迷孤篷,渔舟藏浦高桅泊。团团万顷水晶盘,一片寒光幂寥廓。初疑海上浮神山,蓬壶缥缈不可攀。其物禽兽尽白色,银为宫阙虚无闲。又疑误跨玉虹入月府,玉

免抱杵冻不举。《霓裳》对对舞仙姝,清虚高处寒如许。回头雉堞堆璨瑳,檐冰拄地铎铃语。 鳞鳞万瓦湿烟浮,旋觉此身尚尘土。忽忆滕阁今千年,滕王蛱蝶随荒烟。子安退之骨已朽, 何况珠帘歌舞当时妍。惟有西山只如旧,此中楼隐多神仙。洪崖丹灶流银汞,萧史茅龙耕石 田。我欲左携葛句漏,右挽梅子真,径呼玉虬骑上天,云中缟鹤纷翩趾千。或言神仙之说竟 茫昧,且饮美酒酡朱颜。向晚江山转清绝,逸兴拏云坐超忽。夜深蹋雪还上来,挥手寒窗招 海月。

津门官舍话旧

对床通夕话,官舍一镫红。十年存没泪,并入雨声中。

董以宁

董以宁,字文友,号宛斋,武进人。诸生。有《正谊堂诗集》。

游即墨凤凰峰慧矩院

夕阴澄大海,千山翠色微。林深云自宿,峰高鸟倦飞。奇花低昂开,衣袂袭芳非。 回冈疏积石,飞泉走珠玑。烟光未尽敛,台殿相因依。寻仙杳无际,空思拜真妃。徘徊石梁 畔,日暮怛忘归。

汉江晚泊时将东归

客子行何畏,天涯一敝裘。满倾桑落酒,醉上木兰舟。暮气来千嶂,孤云薄九秋。 高堂今夜梦,应说旅人愁。

寄山阴单骏如

闻说山阴好,回樯镜里旋。万家依碧树,百道下红泉。况有高贤在,应多胜事传。 明年风雪夜,须待子猷船。

送马书升之江西

春风倦羽各差池,携手还倾酒一卮。《别赋》送将南浦去,漫游安用《北山移》? 城头月落骊歌早,江上花明雀舫迟,但慰诸生迎绛帐,欲闻长笛更何时。

朱克生

朱克生,字周桢,一字念义,号秋崖,宝应人。诸生。有《朱秋崖诗集》。

延平

建溪东下入南平,楼阁千家出郡城。密树山光分隐见。残阳云气别阴晴。江通三水 波涛疾,剑合双龙瘴雾生。破浪不惊滩黯淡,百花岩下月华明。

泛绣溪

绣溪一水两川分,绕郭晴波荡縠纹。白板桥头魂欲断,寒鸦落日小乔坟。

草堂

草堂寒易晚,朔气到柴关。落日恋高树,残云补断山。竹摇风似雨,鸦宿去仍还。 移意江天外,萧然麋鹿间。

何絜

何絜,字雍南,丹徒人。诸生。有《晴江阁集》。

大梁少年行

大梁少年似飞仙, 手刃蛟龙出深渊。腰垂明月真珠珮, 轻贻歌妓缀花钿。高呼不饮田蚡酒, 褰裳羞受邓通钱。怪底祢衡怀片刺, 纷纷鼠辈相周旋。千金结客无名姓, 挥手但指珊瑚鞭。

画松歌赠梅瞿山孝廉

瞿山瞿山才思真无比,左列丹黄右图史。诗成不让谢宣城,画就直压毕庶子。我在秦淮一遇君,终日接席细论文。偶出一幅小松画,咫尺摩空荡烟云。盘虬舞鹤多宛转,骈枝屈影更披纷。一若风雨相翳薄,又若日月为蒸曛。噫嘻此画如有神,鳞纹斑剥何嶙峋。对君棱棱好丰骨,干霄足与同轮囷。惜我独少鹅溪绢,韦家父子安足羡。从今高望敬亭山,但咏澄江静如练。

佛殿

曲磴回初地,抠衣入化城。磬中闻石语,檐外见云行。险路逢僧坦,畸情对佛平。 能寻此际乐,不必话无生。

赠蒋大鸿

几社存耆旧,飘零早白头。诗名追历下,文体法弇州。阅世才应敛,全身志未酬。 因兹余涕泪,不肯话封侯。

闻祭钟山旧陵口占一绝

恰逢故老话新亭,诏出牲牷喜荐馨。最是圣朝恩德重,孝陵无用植冬青。

赵潜

赵潜,一名炎,字双白。号莼客,漳浦人。诸生。有《冷鸥堂集》。

陈昌箕先生过访

榕社同星散,回思各黯然。客帆终月雨,江草六朝烟。骨尚崚嶒在,诗多慷慨传。 出门常自悔,欹枕剑滩船。

次酬钱子坚

年来鸡骨枕茅亭,寂寞丘园滞客星。一杖看云何处好,九山落木不堪听。梦残烽火 魂初定,头白江湖眼倍青。天末醉歌余数子,可知林竹未凋零。

魏宪

魏宪,字惟度,福清人。诸生。有《枕江堂集》。

同友宿白云洞

白云留一宿,同听海潮音。渔火空江乱,钟声隔院沈。烟光浮半榻,花气结层阴。 忽唳松间鹤,能清梦里心。

西湖春晓

十里寒塘路,烟花一半醒。晨钟催落月,宿火乱稀星。欹枕看湖白,开窗喜屿青。 笙歌方一歇,莺啭柳洲亭。

舟中早发

滩声催短梦,帆逐晓风斜。嫩绿初归柳,新红浅著花。宿烟笼水阁,残火乞渔家。 回首山城里,凄凄起暮笳。

山中夜坐有怀同学诸子

一江月色静如秋,空向云堂照独愁。隔水歌声来远艇,断桥镫火出高楼。支离瘦骨 千峰下,潦倒春心五夜头。遥忆竹林诸旧侣,梦魂曾否到沧洲。

移家建溪留别诸友

十载栖迟卧小楼,无端琴剑又东游。烟霞有主真传舍,天地为庐不系舟。行酒竹间 兼听鹤,和歌花里恐惊鸥。他时同寄相思句,浮石云间柘水秋。

无题

相逢漫自说心知,偏值云飞雨乱时。纵不伤春人亦瘦,杜鹃声在海棠枝。

李以笃

李以笃,字云田,汉阳人。贡生。有《菜根堂诗集》。

王伯敬见访

士穷不易测,薄技偶为传。握手平生尽,论心出处悬。浮家依采石,作客耐秋天。 我亦新丰倦,无能乞酒钱。

王玉质秦中才子也居华山芙蓉峰下以此颜其读书之阁顷北来与予定交困索题

王子西京秀,能谈《驷铁》风。读书居小阁,望远欲凌空。玉女烟鬟乱,金仙露掌浓。高歌下易水,不哭阮生穷。

易宏

易宏,字渭远,号秋河,新会人。有《云华阁诗略》。

登黄鹤楼

《梅花》声散笛悠悠,笛歇花残独上楼。天远树连云梦晓。月明人隔洞庭秋。千年事业英雄泪,万里烟波旅客愁。我识蓬莱今有路,好随黄鹤御风游。

登潇湘烟雨楼

潇湘合浦在零陵,千里奔流注洞庭。三户人烟迷野黑,九疑山色渡江青。云行岭上空朝暮,瑟鼓波中自窅冥。故国愁心遥有寄,好随明月照柴扃。

舟泊芜湖月夜闻江上吟云野月吊魂夜夜愁霜轮寂静远天秋谁怜独照孤臣泪洒向寒 涛万里流吟罢悄然无人盖鬼作也感赋一绝以吊之

南朝事业已全非,战罢当年染血衣。千古不消亡国恨,江涛长挟旅魂飞。

李渔

李渔,字笠翁,兰谿人。有《一家言》。

甲申纪乱

昔见杜甫诗,多纪乱离事。感怀杂悲凄。令人减幽思。窃谓言者过,岂其遂如是。 及我遭兵戎,抢攘尽奇致。犹觉杜诗略,十不及三四。请为杜拾遗,再补十之二。有诗不忍 尽,恐为仁者忌。初闻鼓鼙喧,避难若尝试。尽曰偶然尔,须臾即平治,岂知天未厌,烽火 日已炽。贼多请益兵,兵多適增厉。兵去贼复来,贼来兵不至。兵括贼所遗,贼享兵之利。 如其吝不与,肝脑悉涂地。纷纷弃家逃,只期少所累。伯道庆无儿,向平憾有嗣。国色委菜佣,黄金归溷厕。入山恐不深,愈深愈多崇。内有绿林豪,外有黄巾辈。表里俱受攻,伤腹更伤背。又虑官兵入,壶浆多所费。贼心犹易厌,兵志更难遂。乱世遇{艹佳}苻,其道利用讳。可怜山中人,刻刻友魑魅。饥寒死素封,忧愁老童稚。人生贵逢时,世瑞人即瑞。既为乱世民,蜉蝣即同类。难民徒纷纷,天道胡可避。

军兴三异歌为督师李邺园先生作

年来世事如狂澜,谭文容易谭兵难。儒臣动云娴武略,一夫攘臂心先寒。武定先生文进士,平时不喜谈戎事。立朝功业尽文章,诵读无惭酬所志。一旦宣威拥节旄,到时贼炽民啼号。八闽禹甸无留土,三浙人心若沸潮。先生单骑临危地,昼夜披坚躬执锐。车辙经过险路平,螳螂齑粉无完臂。砥柱东南杖一身,金瓯不损天难坠。试问中原亿万家,阿谁不赖屏藩蔽?我游吴越泛钱塘,纵观鱼丽瞻烽燧。所见纷纷异所闻,逢人屈指陈三异。一异危疆反太平,眼观战斗心无惊。民心恃有一人在,由他风鹤生疑兵。二异军兴不加派,鼓腹依然清世界。不似他邦物力穷,稻粱输尽余稊稗。三异焦心人不老,更比当年颜色好。轻裘叔子不知寒,善饭廉颇终日饱。问公何以得如斯?答云利害非吾知。委贽便将身许国,捐躯何待出兵时。尝胆拟将仇作馔,茹荼自觉甘如饴。壮哉此语真难得,义声流自忠肝出。天下安危系一人,公肥不虑封疆瘠。弹指仙霞入内庭,闽山荡尽无遗窟。滇黔楚蜀尽来归,不问而知功第一。但祝分茅不离兹,凭公世守江南北。千载重生郭令公,床头叠满儿孙笏。

金人瑞

金人瑞,字圣叹,吴县人。诸生。

燕子来舟中

无官只合置天涯,偏有寻人燕子斜。旧岁未成为地主,今春真累过寒家。村村社鼓 邀分肉,岸岸朱轮赴看花。谅汝从来飞不惯,滩边篷底寂无哗。

【卷三十四】

王炘

王炘, 字济似, 号晓岩, 雄县人。有《茨庵集》。

和丁大声登皆山楼之作依韵

山色侵楼重,竹阴傍涧清。绿峰群寂寂,黄鸟独声声。雾聚松枝合,樵稀石面生。 云收余峭壁,日影北林更。

七月十二日入山收稻有怀纪仲霁

两寺钟声咽,山桥夕路幽。未几新落叶,已满旧溪头。西去时将晚,东游事亦休。 秋苔新月上,杂沓使人愁。

阻雨宿方九别业

才酌东堂下,云生江外峰。咽蝉催暮柳,残雨引疏钟。夜色余归意,苔痕著客踪。 酒怀那可恃,遮莫此愁浓。

秋日同诸友登山

弗弗西风秋欲深,乱离此日共浮沉。孤城远望云栖树,野浦斜看鸟入林。烽火烟迷山律律,江流声合马骎骎。新亭孤酌堪流涕,暮雨无端送笛音。

韩畕

韩畕,字经正,号石耕,大兴人。有《天樵子集》。

雨中送春

绿草疏篱映水滨,清溪寂寂四无邻。一帘细雨仍飞燕,几日残花又送春。多病翻愁 今夜酒,伤心如别故乡人。明年客迹知何在,早向天涯慰苦辛。

九日登鸡鸣山

闻道东篱菊已黄,无因移向酒樽旁。西风忽起野烟暮,落叶乱飞山树苍。雁带寒声归渚急,江涵秋水与天长。浮云遮尽登高眼,不许愁人望故乡。

山家即事

山家就宿看山月,松际清光半未升。凉色渐生花径露,微风欲灭草堂灯。壁邻荒寺 疏钟断,檐压春星夜气澄。亦愿幽栖来此地,柴门相望几时能。

夏日登鳌柱山望海

整柱崚嶒镇越州,孤城千仞俯危楼。忽惊溟渤天垂尽,始信东南地半浮。岛屿遥连 云日险,波涛不尽古今愁。一竿且罢任公钓,更拟乘槎万里游。

经古寺

石梯经雨遍苔痕, 赭壁年深色尚存。欲向回廓寻旧迹, 藤萝无数锁山门。

傅维枟

傅维枟,字培公,号霄影,灵寿人。诸生。有《燕川渔唱》。

铜雀台

阿瞒才力雄如虎,到头却作痴儿语。卖履分香空尔为,西陵岂复知歌舞。漳南寻问铜雀台,舟人北指沙成堆。飞桥连栋今何在,拍岸寒潮朝暮来。

梦有持画卷者属余题诗醒忘其一二语因补成之

青霞片片护岩扉,中有飞泉落翠微。几折板桥深柳下,樵儿浣女一行归。

渔翁应解爱烟霞,截竹编茅野作家。雨后南溪春水涨,青帆一片出桃花。

傅燮雝

傅燮雝,字鹭来,号笠亭,灵寿人。诸生。有《笠亭诗集》。

春日感怀

日坐桃源列画图,酒酣耳热唱呜呜。名山书有三千卷,别业桑无八百株。说剑乡人 多指点,谈诗夜鬼任胡卢。穷愁不著《潜夫论》,惭愧徒生七尺躯。

马鸿勋

马鸿勋, 字雁楚, 号醉庵, 灵寿人。诸生。有《醉庵草》。

早发宁陵县

长途劳客梦,旅馆候鸣鸡。鼓角临关壮,星河傍曙低。渔镫依水见,隄柳入烟迷。 不计程多少,惟闻倦马嘶。

清明

依依杨柳近清明,禁火初烟雨乍晴。芳草侵隄时过马,梨花满树不闻莺。云封翠壁平分岫,鸟带斜阳半入城。把酒莫辜风日好,远林愁听杜鹃声。

胡孟向

胡孟向, 原名孟男, 更名长, 以字行, 威县人。诸生。有《逊谷诗》。

除夕同申凫盟集路吾徵郡宅

此生徒浪掷,对酒莫忽忽。谁识忧欢别,惟怜道谊同。君情真好客,吾党各成翁。 彩笔今才尽,题诗惜未工。

寄孙钟元徵君

危行今时见古人,每询杖履忆相亲。山中耕凿还三代,劫后年华过九旬。嗜学深心 真忘老,迎人善气自如春。啸台旧迹孙宗事,未许先生附隐沦。

周鐈

周鐈,字茗柯,南和人。诸生。有《葭里集》。

题清泉寺

踏破苍苔去,斜阳野寺中。台高留晚日,树远起秋风。设想身何处,探幽意不穷。 寒昏木叶下,天际有归鸿。

过申凫盟箕亭

一路皆烟水,真成静者庐。家贫心自远,身老世能疏。名籍《逸民传》,功留种树书。烧镫酌午夜,明月近庭除。

杨通俶

杨通俶,字圣美,济宁人。诸生。

忆白门

枫桕江南各著霜,依然秋色乱斜阳。白门柳落余残垒,朱雀潮生失旧航。牛女星遥 兼楚越,川原势尽感陈梁。板桥路接新林浦,只有澄江绕建康。

李含章

李含章,字绘先,号浮玉,乐安人。副贡。有《卢龙杂咏》、《遁山堂遗诗》。

郊居杂兴

野径苔侵户,闲阶月到廊。欣逢禾黍日,为制薜萝裳。雨霁千林碧,霜清一叶黄。 兴来吟抱膝,未肯让羲皇。

郊行

散步平郊草履轻,远心闲逐野云生。香飘小径花初落,水涨前溪雨乍晴。僻地不须延客赏,病躯还复杖藜行。临风最爱黄鹂语,宛宛枝头四五声。

邱志广

邱志广,字粟海,号洪区,又号蝶庵,诸城人。贡生,官长清训导。有《柴村诗草》。

行野

率尔携筇去,无端遍野行。晚虫喧叶急,远树入云轻。日与寒花淡,风从衰草生。 年年容色改,延眺暮秋晴。

少年游

轻风薰细草,寒夜暮春时。玉勒紫骝马,罗衣白面儿。骄行杨柳陌,喜折杏花枝。 归向青楼饮,阑珊斗柄移。

次单拙庵司成归山

梦醒今朝悟昨非,回头往事与心违。云间谒帝星初曙,花底朝天露未晞。不为从王 忧寤寐,敢将报母换轻肥。君恩已许烟霞懒,好把鱼竿问钓矶。

王乘箓

王乘箓,号钟仙,诸城人。有《钟仙遗稿》。

早春游五莲寄丁野鹤

雪尽石花合,冰消水道分。山光晴带雨,海气晚蒸云。独坐扪松树,闲行见鹿群。 地偏心与远,此际惜无君。

送人从军

系马官道旁, 沽酒石桥北。不敢再淹留, 为君壮行色。

秋闺怨

汉家新战胜,有信说平安。含泪亲刀尺,关山月正寒。

饮江上楼

画楼高起绿杨边,美酒楼中斗十千。醉倚江云看江水,晚风时过打鱼船。

王尊美

王尊美,字从斯,益都人。有《鹊岩斋诗》。

秋夜不寐偶忆故山风物率尔成篇

簇簇茅茨负夕阳,疏疏杨柳带方塘。烟浮邻舍炊菰米,霜近山园坼栗房。鸡栅牛栏 新位置,村醪野蔌小排当。田家事业知何有,尽在《豳风七月》章。

小圃疏篱整复斜,一筇随处是生涯。游丝无赖时萦客,秋草多情尚著花。日暖僧房间问偈,月明林屋自煎茶。犹嫌姓字多叨窃,号作青山处士家。

书卢沟店壁

虫声切切报新秋,月落镫昏四壁愁。残梦未成催上马,一天凉雨过卢沟。

刘宗洙

刘宗洙,字长源,襄城人。贡生。有《天佣馆诗集》

送顾文海司马

小试山城拂袖归,甘棠一树带朝晖。风流刺史留清泽,俊逸参军换野衣。五柳阴浓 凭寄傲,七纟玄韵好可忘机。江千正击苍生望,肯把勋猷老钓矶。

刘榛

刘棒,字山蔚,商丘人。诸生。有《虚直堂诗》。

三效欧阳体次苏子瞻韵

天女剪花不剪叶,散作人间一夜雪。无枝无蒂故斜横,欲前欲却嗟清绝。老屋疏棂偏觅寻,回峰断岭随曲折。狮子座成儿手皴,鹧鸪斑到客裘灭。怒发土囊扫不开垂天幕谁忽掣。三战贾勇历赤拳,十觞薄醉晕红缬。令申纵不自昔悬,妆缀原非士所屑。世上营营同此看,才有旋无只一瞥。深积妙化别堪思,拘方泥象又何说。一卷相映不畏寒,我胸长有凉如铁。

僧舍对雨柬牧仲

何物增愁绪,孤城受雨痕。草分千嶂湿,风锁一江昏。乞米劳僧饭,赊鱼佐客尊。 应知乘兴,已到戴逵门。

饯春

年年饯春归, 试问春归处。东皇笑不言, 潜逐飞花去。

春归春便归, 莫更留春住。回首五十年, 颇恼春相误。

春归春径归, 归说有馀情。还从清梦底, 唤我树头莺。

有愁不带去, 无愁何送来。倚栏痴儿女, 落月尚徘徊。

贾开宗

贾开宗,字静子,商丘人。诸生。有《溯园集》。

三陵台

三陵孤峙旧城隈,古木蒙茸一径开。乱窟深回藏虎豹,悬崖陡峭长莓苔。宋襄战后 犹遗,梁孝朝还有废台。每伴田夫寻胜事,披蓑戴笠雨中来。

侯体蒙

侯体蒙,字昆服,杞县人。有《悔庵诗稿》。

元旦次徐木公韵

无端寒疾起迟迟,那更桃符初换诗。箫鼓一城春昼永,云山百里梦魂移。难禁儿女 嗟多累,暂假壶觞慰所期。五十三春今近矣,萧萧旅馆但题诗。

胡庭

胡庭,字季子,汾阳人。有《畸人集》。

古诗

霜气流前除,照我罗衣裳。耿耿夜不寐,蹑履起徬徨。草虫亦何悲,鸣声恓以怆。 四郊一孤影,落叶飘回郎。南楼谁家子,纟玄歌宴华堂。

朔风吹玉树,叶叶起秋声。上有白鹤栖,下有蟋蟀鸣。高天鸿雁来,河汉有馀清。 念我故人子,结发事荣名。离筵一分手,千载为伤情。

拥衾起长叹,读我案头书,书中何所有,乃见太古初。巢许在箕颍,洗耳避唐虞。 揖让不屑睹,况忍谏征诛。采薇虽西山,道隆情已汗。

张文炳

张文炳, 字子潜, 阳城人。有《麋田小草》、《喜见吟》。

王屋仙灯

王屋山中有我家,也曾辟穀卧烟霞。仙灯夜半朝真宰,枯木寒岩尽放花。

徐化溥

徐化溥,字云门,阳高人。岁贡生。有《云门集》。

河梁曲

苏武与李陵,结发侍汉廷。何以风雨夕,把手话飘零。青海一雁足,河梁两黄鹄。冰雪孤臣心,血泪他乡哭。他乡血泪可若何,秋风万里渺关河。可怜别后魂相逐,生死天涯入梦多。

明妃曲

烟锁宫花鸟声寂,栏千秋月梦中泣。汉家长门老阿娇,老死深中无人识。明妃一日 别故宫,露桃入殿动春风。天子低徊先生光彩,绝胜黄金买画工。鸿雁传声嘹呖,况是蛾眉 重远国。至今高拂云寒,塞草芊芊青山色。

雷士俊

雷士俊,字伯吁,泾阳人。诸生。有《艾陵集》。

登城晚望

薄暮城头望,千墙水际停,微波风自起,落日草愈青。木盛谁持斧,泉寒莫有瓶。 空弦惊痛鸟,说乱即倾听。

从弟元长自陵至樊》义留宿不得一见而去怀不能己作诗以寄

感汝思余意,孤舟故远寻。沧江秋浪阔,丹嶂晓枫深。圃韭犹堪剪,村醪且共斟。 归帆留不得,竟夕独哀吟。

王宏度

王宏度,字文含,咸宁人。诸生。有《南塘遗稿》。

游百塔寺

谷口逶迤百塔深,望中烟树费招寻。荒冈骨闭千年迹,断碣文留一代心。僧老那知 思往事,客来犹自续高吟。凭栏舒啸情何极, 滈水苍茫隔暮阴。

曹光昇

曹光昇,字明甫,一字宾曙,号玉旸,金山人。

己未除夕与彭古晋先生及许元方金云六守岁燕邸分赋

昂藏留七尺,宁不是馀生。薄命悲长铗,羁心恋短衾。朋来还道故,赋就孰成名。 明日看华发,萧萧又几茎。

酬郁宣夏见贻

知君奇假脱菰芦,不爱儒生爱酒徒。天畔月高时倚剑,江千秋老共呼卢。技成甘效 屠龙氏,命薄还为牧奴。自昔暗投多见弃,肯将双泪落穷途。

曹炯

曹炯,字澹兮,金山人。有《西湖游草》、《友树轩稿》、《白门草》诸集。

杨白花

杨白花,春暮白如雪。飘荡逐东风,谁家怨离别。飞入深宫不见人,子规夜夜空啼血。

舟次金山

轻帆悬夕照, 鲛客叩舷来。翠壑蛟龙窟, 珠林鸟雀台。烟收吴嶂出, 云断楚天开。 便待冰轮上, 临江一举杯。

曹燕

曹燕,字子翼,金山人。诸生。有《浮香舫草》、《梅厂未删诗》。

人目小兰亭社集

腊尽江皋好放春,更逢今日是灵辰。草茅兄弟多词客,落拓乾坤一酒人。风破玉梅寒减未,话长银箭漏添频。朝来池草谁传句?且听西堂鼓吹新。

葺庐

身世本无主,居停寒暑迁。篱疏云欲补,屋小月能穿。诗意风前远,花光雨后妍。 寄言招隐者,曾足买山钱。

邵潜

邵潜,字潜夫,自号五岳外臣,江南通州人。诸生。有《邵山人集》。

仙姑洞

仙女乘云去不还,桃花流水洞门闲。朝悬明镜澄江上,画出双蛾是远出。

游惠锡园

零雨暮云歇,秋气晨益清。名园逝探历,四顾抒中情。空翠映帘幕,飞泉潆阶庭。 岩花渐凋谢,汀芷扬其馨。翔翼拂高汉,游鳞浮且沉。式觏孤征雁,载聆寒蜩鸣。眷此惬幽 赏,离忧聿已平。何当占一壑,永毕吾余生。

闲居

城市亦堪隐,春风独掩扉。狂怜生计拙,贫使故交稀。日月摧蓬鬓,烟霞老薜衣。 不须论塞马,得失总忘机。

刘以化

刘以化,字敦甫,号崇庵,宝应人。诸生。

同人集准提寺晚过渔家

城中春较迟,湖上草先绿。素友相招邀,净地联芳躅。岁月苦奔驰,昏嫁怜拘束。 觞咏惬幽情,风物寓遐瞩。纵论杂古今,遗形失荣辱。月出挂城头,照我松间屋。疏雨滴花琴,微风动林烛。烟际下渔舟,家在青溪曲。

单嘉猷

单嘉猷,字徽仲,常熟人。诸生。

新霁

积雨林薄昏,湿云漫岩屋。出门望阴晴,快睹开初旭。高峰耸螺鬟,润泽比膏沐。 池塘潋滟波,半没新生竹。草深蛙黾喜,繁响出丛绿。落花淡无言,点点洒春服。老农急磨 镰,陇上来粪熟。往矣適予情,正可骑黄犊。

吴孟坚

吴孟坚, 字子班, 贵池人。有《偶存草》。

压气培歌

压气培前奔万石,阴云莽莽黑雾塞。水号风怒激沙飞,仿佛旌旗雷电掣。我父军声堕此间,星日无光天欲折。我母颈罹刃痕七,身投层崖脑迸裂。我妹三龄弃路死,百口家人一无得。前山溪下血犹腥,将士同时皆义烈。烟飙玉碎三十秋,天地迄今为惨恻。肠断纡回忍追忆,千载空坑堪并说。呜呼千载空坑堪并说!

雁字和彭禹峰先生韵

飞来阵阵满天逋,一幅江山似墨涂。戢翼隐藏河洺数,冲天画破卦爻图。惯逢风雨惊三峡,素逞烟云驾五湖。不是龙蛇行纸上,乾坤何事为泥汗。

天空嘹唳鹤鸣皋,回雁峰前峰更高。既同江子花生梦,又忆毛生颖脱毫。片羽影随 编画幅,断肠声到振江涛。从来怕舞《霓裳曲》,冷落河山洒凤毛。

翩翩锦字向谁搓,斜抱云和月已过。身伴天娥垂玉袖,音惊越地起吴歌。珊瑚枕上传幽梦,翡翠楼中点绛罗。不逐黄鹂啼绿柳,故来人世断肠多。

去年零落被弓侵,泪湿红笺无处寻。欲绽似含无数怨,暂停疑有一声音。断霞转影 曾天际,浓雾分烟满艺林。自是淡描人不识,玲珑格调隐沈沈。

马日思

马日思,字禹公,桐城人。诸生。有《白下诗钞》。

寄里门诸兄弟

人言兄弟好,在家常不知。出门东西去,形影独相随。梦中犹晤语,醒后忽天涯。 脊令虽小鸟,比翼向高枝。男儿四方志,安得无别离。忆昔聚里巷,六人共一师。对酒青镫 夜,听歌《白苎词》。少小不及乐,老大徒相思。

夜坐示内

痛读《离骚》不放怀,鹿门携手隐堪偕。刘伶卧病犹贪醉,周泽逃禅独好斋。身冷 履霜嗟葛屦,家贫沽酒借荆钗。人生随遇须安处,方信卿言亦复佳。

怀齐稷下

葭菼苍苍水一涯,近知消息在京华。我听夜雨吟衰柳,君似春风妒落花。燕市酒徒歌当哭,并州游子客为家。何时得返东吴棹,相对清尊到日斜。

孙中凤

孙中凤,字喈公,号冰崖,桐城人。贡生。有《云溪》、《半舫》、《越游》、《闽 游》诸集。

秋日江洲有感

独眺层台上,天空起雁群。孤城淡黄叶,落日傍秋云。碪杵千家合,风烟万里分。 还山悲短发,笳笛夜深闻。

炭惑连宵灿,光芒射斗明。关河郁乡思,鼓角乱秋声。客梦三更断,羁愁千里生。 一尊对江月,无限古今情。 姚文勋

姚文勋,字集侯,号丹枫,桐城人。贡生。有《丹枫诗集》。

山居怀王明我

与君数载游,同作天涯客。山色异乡青,归情江水白。今予独处时,念子寒风夕。 秋尽犹未还,愁见庭枫赤。

秋日饮王润甫夫子山庄

聚坐松林下,遥听远浦歌。夕阳明古树,微露引疏荷。鸟噪暮山静,风生秋水波。 扬亭容问字,呼酒兴偏多。

姚文炱

姚文炱,字夏侯,桐城人。诸生。有《瑞应草》。

夕朓

望中野色变衰颜,雨后风光天水闲。一片青苔封古石,几行疏树点空山。僧归柳径 初传磬,秋入绵衣欲掩关。暂借草亭因待月,肯教夕照负人还。

姚文鳌

姚文鳌,字驾侯,号蛰存,桐城人。诸生。有《宝闲斋诗集》。

送九兄羹湖之蓼

干戈满目未休兵,负笈劳劳独远行。驿路草深官柳细,板桥露白客装轻。已怜鸿雁 三秋别,莫动鲈鱼千里情。君到蓼城应念我,屋梁有梦月华明。

李{常心}

李{常心},字长康,号古塘,桐城人。

同蒋仲一汪河发郊行见杏花初放期再赏之

圃外见红杏,高林气若霞。朝来一片雨,开到几枝花。惜此好春色,多于野老家。 偶然看不足,记取路痕斜。

天门山

双峰如凿断,绝壁对崔嵬。楚蜀千重远,东南一气开。潮声归海去,帆影出天来。 渺渺烟波际,徒深庾信哀。

赵崇礼

赵崇礼,字溪叔,泾县人。

新秋

去郭曾无远,今人不易寻。高林初叶坠,秋雨一帘深。老态惭香稻,孤怀傍素琴。 杜鹃声未歇,何可听层阴。

张客卿

张客卿,字宾王,泾县人。有《有铗草》。

泸水

一水通蛮络,沉沉不计深。蛟涎连积雨,蜃气结层阴。毒草迷苍渚,繁花暎黑浔。 武侯炎渡后,烟瘴只今澄。

清明

落落逢佳节,闲愁病里深。片云来客梦,芳草乱乡心。不尽风花泪,何堪水竹吟。 家山遗故陇,松柏意森森。

吴錂

吴錂,字若金,宣城人。诸生。有《浮筠轩集》。

久不得曾庭闻消息怅然有怀

路向西南尽,江连汉沔深。旌旗秦栈晓,橘柚楚祠阴。落日孤村戍,秋风万里碪。 黑貂应己敝,谁识曳裾心。

戴研

戴研,字导及,号蜕斋,桐城人。贡生。

舟次邗江感怀

寒云萧瑟片帆收,江草江花动客愁。瓜步涛声常带雨,广陵山色易为秋。已拚湖海 供多病,漫逐风尘故倦游。寂寞仲宣怀故里,不胜摇落赋《登楼》。 张云鹗

张云鹗,字次飞,贵溪人。有《晚香堂集》。

游水岩

数笔云林几叶丹,敢言抱卷向名山。舟从虎圈秋尘外,梦在罗浮素月间。潭静影能 将槛远,钟残韵亦比人闲。通仙幸有云情在,指点苍颜数往还。

兵远

绝壑谁堪此旦昏,可怜垂老负儿孙。兵遥已被烽烟苦,家在宁忘耕凿恩。惊鸟宿林啼夜雨,荒村留月觅余魂。天狼未殒时多难,收得郊原老泪痕。

涂斯皇

涂斯皇,字宜振,号淡庵,江西新城人。明诸生。有《花舫杂咏》。

听竹庵

修篁摇翠影,小筑迥清幽。虫语团庭绿,蝉声带水秋。寒云依石涧,独树表荒丘。 坐卧欲忘返,萧然何所求。

徐仲光先生至或见之日者肆过访不值

我思李邺侯,衡峰寄高躅。复羡贺季真,归老鉴湖曲。仙骨被霞裳,迈年粲紫玉。二公处中朝,不为名利束。卓荦徐先生,天衢骋骥足。茂龄脱尘网,傀儡视世局。宁谓宦情淡,良由忠怀笃。姑山何神秀,高隐终南续。夜起星参横,少微正炯烛。我欲从之游,邈然绝攀躅。

丁裔沆

丁裔沆,字函巨,嘉善人。诸生。有《香湖草堂集》。

石头城

君不见龙骧将军意气豪,连帆战舰明珠袍。雄师八万挂席进,角声吹断黄云高。鸾旗半卷青山里,鱼龙悲咽秋江水。自将玉篆付官家,不遣将军折一矢。赤乌事业不崇朝,尽逐东风散怒涛。横江振旅铙歌发,白发将军看宝刀。寄语横行且复休,孙郎战骨随蒿丘。当年割据山河壮,谁道降帆下石头。

湘灵怨

楚山青, 楚江永, 幽弦出水寒波动。青丝短, 别恨长, 碧潭浸月照微茫。声清切,

惊落叶, 夜半啼猿愁不歇。听悠悠, 湘水流, 苍梧缥缈黛云秋。猿声急, 丝声咽, 吹入《竹枝》转凄绝。竹烟浮, 泪未收, 寥天清怨泣渔舟。

曹伟谟

曹伟谟,字次典,号南陔,平湖籍金山人。岁贡生,候选训导。有《南陔集》。

中秋虎丘对月

虎丘今夜月,极目思悠哉。白露中宵降,清光万里开。笙歌沈鼓角,镫火出楼台。 少小经游地,曾陪杖履来。

秦淮竹枝词

秦淮春水绿迢迢,杨柳千条更万条。每过珠帘停打桨,惹他帘内罢吹箫。

戏演鱼龙夜不眠,梨园牌号阮家编。轻轻断送南朝事,一曲《春镫》《燕子笺》。

藩邸初来乐府奢,中官四出选良家。一朝马上琵琶去,井底曾无张丽华。

曹鉴徵

曹鉴徵,字徵之,嘉善人。有《白石楼》、《红药园》两集。

得魏子存舅氏蜀中书

西蜀东吴万里余,那堪薄宦久离居。舅甥忽忆三年别,乡国初逢一纸书。明月啼猿 巫峡迥,秋风落木锦江虚。何缘得贳郫筒酒,将问云安丙穴鱼。

毛正学

毛正学, 原名棴, 字羲上, 嘉善人。诸生。

九日顾迂客雷阮徒招集吴山登高用昌黎人日城南登高韵

昨夜横山堂,柔翰频自弄。诸君各健举,独如蝇被冻。诗本吾家学,才尽迄无用。 今朝吴山道,篮舆话后从。俄停陶岘舟,金尊呼客共。目瞩远近峰,一一迎而送。渔艇棹歌 回,钓车卷断葑。落日浴平湖,水势兼天纵。急管杂繁弦,终宵亦倥偬。传语谢山灵,兹游 不辞重。

叶已畦招集二弃草堂用昌黎醉赠张秘书韵

叶生我密戚,才名宿有闻。为儒号漫士,作吏称神君。十年卧丘壑,雅意在斯文。 结庐横山畔,屋角饶烟云。芙蓉围清池,篱菊初舒芬。我来草堂上,邂逅沮溺群。促坐共传 杯,丝竹鸣宵分。高踪媲猿鹤,正尔成一军。四筵歌既醉,起视各半醺。斜月在木末,清影 微氤氲。聚会此时节,诸贤意何云。窃叹风雅途,俗学方纠纷。但知逐淫哇,不解谢膻荤。相将飏华袿,无复曳缟裙。笔端出细响,有若蝇与蚊。忍令芸薤臭,竟等兰茝薰。用是怀百忧,徘徊升大坟。诗教苦荒落,久矣待勤耘。谁者起任之,艺林当铭勋。吾党尚努力,乘兹日未曛。

怀应聘

怀应骋, 字莘皋, 嘉兴人。有《高愉堂诗集》。

同万年少黄心甫晚集湖上

山色入高楼,寒云隔树流。雨来松榻黯,风动薜衣浮。瓦缶传秋醴,铜壶急夜筹。 蛩声杂垆响,偏共到床头。

钱煐

钱煐,字蔚宗,号愚谷,嘉善人。有《息深斋诗》。

过五人墓有感

一死寻常事,千秋浩气垂。须眉人有数,闾里节堪师。古树苍烟里,原田落照时。 半塘来往客,相与吊丰碑。

舣舟隄上立,未得荐溪蘋。柳绿丝成障,畦黄锦作茵。当涂多逆党,直道在斯民。 谁话兴亡事,盘觞次第陈。

濮淙

濮淙,字澹轩,桐乡人。

闻蘧玉已寓京口

容易相逢尚未逢,老年亲故喜相从。已辞野店中山酒,望断烟江北固峰。一夜梦游 千里月,五更霜落万家钟。莫嫌人远天涯近,书到楼头第几重。

翁白

翁白,字未青,福清人。有《梅庄诗集》。

乙巳春发吴门留别

归来暂共此登临,又拥莺花过武林。马首春风正月路,板桥夜雨十年心。愁删白发 还为客,悔别青山欲放吟。记得王门投笔后,五湖飘荡到而今。 中秋客萧山

小楼歌管月明时,帘卷中秋病不宜。摇落一杯还作客,艰危万里独吟诗。心知老去终多累,计欲闲来未有期。却羡向平婚嫁毕,青山赢得好生涯。

陈騄

陈騄,字昌范,号仲桓,长乐人。诸生。有《偶庵集》。

送纪伯紫之金陵

逢君倾盖好,言别大江流。意气怜杯酒,山川换驿楼。裁诗旧国梦,读史白闻秋。 独有闽南客,频看雨后舟。

别周载俅孝廉之崇安

秋到柴门静,倦镫寻梦余。山空云度鸟,浦白月归渔。抱影应同汝,劳生慨独余。 畏看河汉浅,良夜复何如。

寻春

野外寻春三月时,偶然昨夜与僧期。山多树老行人断,流水柴门午磬迟。

赵与楩

赵与楩,字楚材,龙溪人。有《珠谷剩草》。

九日杂咏

寒食吊之推,端阳悲郢客。如何重九日,不祀陶彭泽。

蒋大年

蒋大年, 字弥少, 邵阳人。诸生。

资江酬友

敢将风雨怨途泥,山色遥怜望里迷。放艇烟花同泛泛,怀人池草但萋萋。怪从北地 来鸿翮,肯为东风逐马蹄。楚泽由来悲滞客,浮云不散万峰西。

萧广昭

萧广昭,字文远,汉阳人。诸生。

鹦鹉洲

公子登楼叹未归,晴川极目掩芳菲。飘零楚客同烟树,寂寞诗魂绕鹄矶。杨孔文章 应共寿,曹刘竖子未堪依。辽东惟有孤栖凤,不向人间炫绿衣。

潘国祚

潘国祚,字燕丘,号东柳,江夏人。有《燕丘集》。

襄江道中

画舸摇摇逐晓寒,江云飞尽乱峰攒。垂杨故作千行绿,枫树谁知一夜丹。万古《风》 《骚》存泽国,五湖烟景问渔竿。好山过去休回首,留取归时对面看。

潘永祚

潘永祚,字太丘,江夏人。拔贡。有《恕庵集》。

经岳阳战场

系艇巴陵日已斜,洞庭秋色老苍葭。城经百战增新垒,路转千村少旧家。旷野碧磷 吹冻火,中宵白骨语寒沙。精魂枉入春闺梦,酹酒谁来水一涯。

刘醇骥

刘醇骥,字千里,号廓庵,广济人。岁贡生。有《芝在堂集》。

春日游灵山山在县治东三里许其上有诸精舍

幽意谷泉落,相将任往回。谁持星浪石,移近雨花台。人坐翠微笑,鸟邀春色来。 山僧有新约,曾许寺门开。

数转烟萝入,微茫山气中。阴晴半壑树,钟磬午天风。饭供行厨白,香分宝座红。 无能随远社,猿鹤偶然通。

程封

程封,字伯建,号石门,江夏人。拔贡。有《山雨堂集》。

登晴川阁

帆影高低过石头,看云合上几层楼。空江易作三春雨,古岸微同六代秋。大别山于 窗牖入,武昌城向画图收。登临不用伤怀抱,矶下何人著钓钩。

暮相思

行行燕子矶,风潮夜将发。天寒四野迷,独坐舟中月。缄情不得寄,残钟听来歇。

罗宏备

罗宏备,字我生,东湖人。拔贡。有《习静堂》、《荆门》、《山人》诸集。

再游三游洞

惠服芒鞋早办装,重来携酒兴犹狂。临风野啸随溪响,出谷春衣带草香。洞口土花 封古字,山腰人影动斜阳。扪岩姓氏谁堪语,一片寒碑白侍郎。

杜绍凯

杜绍凯,字苍略,黄冈人。

秦淮竹枝词

垂柳庄前夕照寒,早潮落尽暮潮宽。春宫小说红毡上,侬爱锺山雨后看。

征蛮夫婿贵通侯, 珠翠笼镫夜不休。为看鳌山如白画, 瓦盆争照牡丹头。

彭旋龄

彭旋龄,字天来,江夏人。

秦淮柬鲁峰

何处寻羁思,河亭春水生。柳垂三月雨,莺送六朝声。无句怜桃叶,回船过冶城。 《竹枝》歌未罢,今古一关情。

舒峻极

舒峻极,字渐鸿,广济人。有《韦园集》。

入东冲

展齿平苔藓,钟声出上方。高松啼鹳鹤,百草瘦牛羊。泉泻千溪雨,枫凋一夜霜。 五峰峰顶月,清冷照衣裳。

客路

客路饶风雨,中心几郁陶。天连黄海阔,门闭湿云高。群盗东南剧,凶年赋税劳。 故园归去梦,何日涉江涛。

陈士规

陈士规,字景之,号鹤洲,广东海阳人。有《咽珠堂集》。

夜坐亭边

幽栖躭静僻,息影隐疏林。寒塘隔野寺,镫远烟际沉。露白秋草间,百虫感何深。 潸然数行下,徒怀壮士心。烦忧结不散,流响寄鸣琴。天高银汉迥,落月欲横参.

黄进陛

黄进陛,字翼圣,澄海人。诸生。年一百余岁。

述怀

长年故纸老生涯,自此清江买钓槎。鸥鹭若非逢圣世,秋汀未许占芦花。

廖燕

廖燕,字人也,曲江人。诸生。有《二十七松堂集》。

舟过清远峡望飞来寺

山寺隔烟水,舟人指古碑。入云松影密,出峡磬声迟。台阁峰能遍,神仙事可疑。 当年来去迹,岩下老僧知。

春夜丹霞山乐说上人院坐雨

高斋添客坐,镫影隔长林。一雨催春尽,千峰落磬深。虬奔岩石火,寒逼草蛩吟。 莫厌通宵语,平生祇此心。

高俨

高俨,字望公,新会人。有《独善堂集》。

秋日雨中登楼

凉风吹骤雨,高坐称闲心。草阁水声里,山城秋色深。沧洲何处是,白日一时沈。 向夕衡门掩,烟霞绕玉琴。

送张穆之度岭

巨头为客昔人悲,况复行当此乱离。江国昔年曾失路,才名今日恐非时。只身旅食 仍依友,万里家书欲寄谁。莫向天涯重留滞,青山还有白云期。

罗宁默

罗宁默,字仲恭,顺德人。诸生。有《偶然斋集》。

二月十三夕月同李兴韬散步溪上

怜兹寒光内,犹是汉时月。笼隄竹万梢,层影漾高洁。青溪澹欲无,坐久遥烟发。 花香度平楚,人语出木末。斯时正洗心,选意别幽豁。

佘前民白衣庵置酒

入林且缘径,不知身在山。豁然上空绿,一刹如云闲。万峰次其前,樵声相往还。 折竹落霜粉,长萝垂烟鬟。故人肯相待,展席青葱间。高秋带静色,百虑早自删。我何欲为 异,临风共颓颜。

香山送万眉仙别

君又不肯住,悠悠安所之?出门菊花发,前路霜风吹。别只写江赋,秋应学宋悲。 我归期亦近,相去略参差。

朱昂

朱昂,字子眉,昆明人。有《借庵诗草》。

秋感

我行向东郊,徘徊望秋树。落日四无人,汩汩水东注。禾黍互高低,鸟雀惊迟暮。 即此怀旧山,伫立不能去。

迟友不至

古树归鸦乱,晚烟生荜门。远山看欲暮,清景易为昏。我友在何许,徒令空此樽。 徘徊夜将半,不寐谁为言。

晴

雨歇山容出,秋光远近分。疏林通晓日,绝壁走寒云。雁影高难见,泉声静却闻。 呼童移坐榻,花下拂桐君。

涂大辂

涂大辂,字玉华,号铁船,石屏人。有《蔓衍集》。

挽建水牧刘武功名僖,明末建水牧,后隐于僧。

锦江洗濯玉冰姿,早拟鸳班立凤池。万里薄游今梦幻,一生节义几心知。无家杜甫 投荒日,有恨宾王落发时。屏海云龙归去后,忠魂应复绕峨嵋。

送友还黔

到处鹃声送马蹄,君行还在夜郎西。浑忘夜雨龙津合,忍看春风鸟道迷。客舍月来 谁共酌,邮亭诗就独留题。别时更有思君处,竹里流泉间午鸡。

【卷三十五】

姚启圣

姚启圣,字熙止,号忧庵,汉军旗人。康熙癸卯举人,官至福建总督,加尚书太子少保。有《忧畏轩遗诗》。

香山闲咏

湿云愁结暮山重,水白沙明何处钟。夹岸荻芦横野色,大江风雨暗孤踪。已经去国为迁客,犹有悲歌答老农。千古无多零落恨,不须此际叹遭逢。

扁舟复渡铁城阴,见说农樵出远岑。圣主已宽边界令,逐臣未尽抚绥心。几年共尔 栖荆棘,此日怜余载鹤琴。犹幸斯民还旧业,莫教寇盗再相侵。

无数艨艟犯海波,我来守土竟如何。荒陲百事怡情少,孤岛三年战血多。献馘楼头 腾剑气,受降城下奏铙歌。弹丸若使劳臣在,未许潢池复弄戈。

地居天末海滨东,况复迁离盗贼充。千里波涛孤枕上,万家饥溺梦魂中。寒猿泣月 移高树,宿鸟惊云过别丛。莫问当年关切意,只今凭眺有余恫。

白鹤峰

传说眉山草木枯,鹅城今似《辋川图》。携来秀色开荒径,独辟新峰到海隅。万叠 云山归白鹤,两江烟雨出西湖。苍茫露冷兼风乱,渔火钟声或有无。

视师

提师渡海极沧溟,万里波涛枕上听。此际梦回银汉转,千峰明月一孤舲。

江闿

江闿,字辰六,贵阳籍江都人。康熙癸卯举人,榜姓越。己未举博学鸿词,历官解 州知州。有《河汾集》。

喜吴天章至自蒲坂

久违冰雪后,相对两萧然。有榻留徐稚,无钱与郑虔。衔杯重话旧,翦烛欲忘眠。 不识千秋后,诗篇若个传。

涉海螺山诸滩

缘谿回短棹,是境尽移情。云日从峰变,雷霆入地生。穿林通野市,隔岸见孤城。 祇为躭幽思,湍流绝不惊。

上巳吕仪部招游平山堂分赋

嫩草芊芊满径生,故宫三月未闻莺。几行绿树连东楚,万叠青山出石城。曲岸花深 歌舫慢,小桥风定酒旗明。封侯平固真潇洒,郊外流觞宴步兵。

费以矩

费以矩,字仄平,石阡人。康熙癸卯举人,官新宁知县。

送温陵张永卿都督迁官成都

無溪芳树望迢遥,酒酌骊歌送客舠。门下指挥唐彍骑,尊前谈笑汉嫖姚。龙旗晓渡 三都水,虎帐春开万里桥。想到岷峨佳气郁,筹边久待李文饶。

自平溪至沅赠州守祖玉州

摐金伐鼓放舟行,万里长空一叶轻。三楚云山遥指顾,五溪花鸟欲将迎。江流潕水 天方阔,路出龙标山渐平。此日莫愁无地主,美人洲上有香蘅。

徐崇岳

徐崇岳,字石公,保山人。康熙癸卯举人。有《造適轩集》。

南邻

一月不相见,为欢能几何?寒镫疑影共,夜雨记声多。别去人如玉,愁来啸也歌。 南邻知在眼,只是隔星河。

芜园秋兴

林木无声语夕阳,薄寒容易透衣裳。鱼梁水落三星白,菜圃霜凋九月黄。小饭欲歌 先款乃,短衫试舞莫郎当。晴空万里秋光满,好共登高话远乡。

旅邸漫成

自有权奇骨,才来金马门。九方皋不见,独立近黄昏。

下有易水风,上有太行雪。嗟尔行路人,那得肝肠热。

袁藩

袁藩,字宣四,号松篱,淄川人。康熙癸卯举人。有《敦好堂集》。

答唐济武太史用来韵

夜凉静听秋声起,篱外草虫鸣不止。挑镫坐对松影寒,明月乍出疏林里。少年华发惊时节,便欲学仙归贝阙。十载劳心思探珠,半生失计空磨铁。神仙何必厌妻子,秦楼弄玉随箫史。织女黄姑会有时,别床异被徒为尔。先生闻道何其早,红尘莫惜知音少。须从火底现莲花,肯向秋原同腐草。与君试访殷七七,至道不烦惟守一。天台有路度石桥,水流定泛桃花出。

咏镜

阿房宫中星万点, 荧荧绮户秋波滟。当年对此知何人, 香销腻玉愁云掩。照胆铸成粉黛悲, 三千宫女敛蛾眉。骊山未毕重瞳入, 咸阳三月青磷窥。自从埋照归东海, 苔封水浸寒光在。洗出窗前皎月生, 那知朝市浮云改。绛气连朝瞩太清, 一泓秋水淡空明。红颜阅历知多少, 霜鬓怜予亦有情。

过灰埠驿次施愚山先生韵

沙落随风转,秋蝉静夕亭。雨连村尽黑,山近海偏青。古木悲残照,秋光点鬓星。可能留一憩,归梦不为醒。

送韩仲常游武康

风急霜清木叶凋,江南微雪路迢迢。寒云雁度金山寺,明月舟回宝带桥。长剑雄游增气色,短歌生计悔渔樵。余英溪畔时回首,好寄音书慰寂寥。

赠张幼量先生

离忧几载黄山道,秋雨重来坐草亭。多难对看双鬓白,晚凉独眺乱峰青。半窗蕉叶 愁中老,满座松风雨后听。莫忆前游不成醉,沙溪依旧水泠泠。

蒋本生

蒋本生,字字臣,一字道生,零陵人。康熙癸卯举人。有《湘生阁诗草》。

同吴长庚太史谒柳祠次韵

萧凉不异荔蕉词,岭外文章动古思。白石断烟人醉后,小溪寒岛雁来时。寺荒雨过栖磷火,树老秋深啸夜鸱。莫读残碑询往迹,南州太史有余悲。

买小舟来往湘上有作

油壁青帘在在家,垂杨曲曲带烟斜。未酬环海三山梦,先占闲鸥半席沙。忧患余生惟中酒,蹉跎晚岁只看花。从今不管浮沈事,坐送新虹断晚霞。

田雯

田雯,字子纶,一字纶霞,号山{艹疆},晚号蒙斋,德州人。康熙甲辰进士,官至户部侍郎。有《古欢堂集》。

书沈石田诗集后

石翁不羁人,腾踔诧豪唱。阖闾佳山水,怀抱足幽旷。修竹丛一轩,湖光枕清漾。 陶谢快同游,述作劳意匠。海内走盛名,脱略睨卿相。翛然八十年,布衣得无恙。追昔仁宣 间,词场声价壮。乃知出与处,遭时乃有当。瓟葊平生交,拟之陆鲁望。

答申随叔

散吏漫郎痴可怜,长安匏系数经年。正平未解投书刺,司丛频来送酒钱。寒树栖鸦 风不定,空庭捣练月初圆。一番秋水怀人梦,又到白蘋红蓼边。

题李龙眠画卷

弇州山人谱名画,唐之摩诘宋龙眠。今观此卷叹奇绝,顾陆张吴难并肩。当其下笔风雨作,鹅溪十丈何旁薄。陂陀竹屿优昙花,苍梧洞庭生缭郭。山口一佛将欲行,蛮君鬼伯群纵横。幢璎冠玦诧变相,罗什卢女苍虬精。其后诸佛坐且立,一捋长眉一盘膝。亚松巨楂怪石伏,悟者扪腹跌者寂。天魔赤脚鼋鼍游,阳侯逆走溟渤黑。最后云气随飞龙,騞然直上蓬莱宫。万顷波涛沸欲动,前山雷雨纷来从。

嗟哉异物世罕见,金题玉躞开生面。平津邸第什袭藏,当年赐出明光殿。我闻糸元庙壁笔有神,公孙之舞势绝伦。杜老得此应大叫,嵩牛幹马徒纷纷。呜呼!妙迹千年不易遇,丰城光焰为呵护。翻愁雷电驱神丁,尽摄澄心堂纸去。

登毗卢阁

老柏铁枝盘佛阁,翠微晴色动林皋。人家远抱桑乾曲,山势斜奔碣石高。槛外天风 鸿上下,城边秋水树周遭。凭陵霄汉人声寂,独有禅镫照客袍。

千寻佛火出层云,面对西山正夕曛。老树风悬雕鹗宅,荒原草长骆驼群。秋生沙碛 寒应早,水下天津势渐分。侧耳秋城闻战鼓,登坛重起旧将军。

丙辰生日放言

我生四十有二年,忽忽不知老将至。今朝对镜出面颜,局促衰颓谁所致。世言高颡大腹儿,持粱刺肥决富贵。怪我清癯病且顽,只合入山藏薜荔。自是虞翻骨相屯,甘让蔡泽遭逢异。执戟十载但为郎,带韝一斗便成醉。通籍厕名等赘疣,投刺畏人如缩猬。作贾量无猗顿术,贪荣岂有灌夫势。黄鹞觜爪差堪怜,蠹鱼脉望究何济。负郭久荒二顷田,养身漫假五禽戏。投老空门耻钝根,爱读《南华》亦强记。四座勿喧进一觞,看我拂袖理归计。吁嗟乎!我生四十有二年,忽忽不知老将至。

暮春同于桐江汪钟如吴五崖游张氏园晚过啸公房

并蒲浪切城最苦名园少, 觅路幽寻古寺隈。扫径何曾嫌客过,入门忽漫见花开。亭 边小沼春泉响,衣上新泥燕子来。茗碗棋枰消永昼,不妨随意坐莓苔。

蓝尾酒香寒禁火,担头饧熟软胶牙。可怜前日清明雨,悔不来停下泽车。随地编篱铺石子,隔轩栽竹映窗纱。催人节物春光老,堕尽柳绵开楝花。

雨余蜡屐转溪湾,寻胜招提未拟还。花下远公须置酒,春来谢客几登山。寺藏橘刺藤梢里,人在蜂须粉间。向晚讲堂钟磬寂,一时尘念欲全删。

无赖春光三月新,马蹄不厌蹋芳尘。桃花有路寻渔父,春水无波赋丽人。为掘药苗 携仆至,少餐厨蕨恕僧贫。群鸡乱叫牛羊下,归路黄昏雨垫巾。

将归

晚菊寒丛病有花,西风料峭雁行斜。秋深时节辞官去,不待头网八饼茶。

芦沟桥

虹蜺千尺暮云屯,塞路人行驾短辕。霜下桑乾寒浪小,火烧碣石远山昏。平林叶脱 巢禽出,野寺烟深粥鼓喧。闻道张华曾有宅,苇花漠漠吊荒村。

牧牛词

日将暮,牛来归。扣角弄笛牛不饥,稚子跨背叟候扉。黄昏牛卧蝙蝠飞,雨湿牛栏生{***君}衣。老牸秃速小犊肥,八口之家凭尔为。官府催钱议卖犊,与其卖犊宁拆屋。

七月十九夜

秋夜三更尽,今宵尚在家。可怜一尊酒,明日又天涯。僮仆催行李,园林噪暮鸦。 镫前看白发,老泪数行斜。

秋日

豆架瓜棚短竹篱,菊花更有两三枝。西风乍起鲈肥日,霜信频来雁叫时。闲遣长须 邀饮客,细春新米续晨炊。前年记得江干路,树树黄橙绿橘垂。

题杏村读书图为谢员外方山

鬲津之水流潺湲,蛟龙抱珠藏黑渊。两岸杏花一万树,天风破碎生春烟。丝丝寒食秋千雨,片片波面胭脂钱。土墙茅屋插数椽,谢客读书三十年。青蒲白鸥相映带,花须蝶粉日里缠。身如蠹鱼穿其穴,龙唇檑具床头悬。何不拂袖思归田,输我山{艹疆}窗下眠。南村老人诗百篇,与君细论长河边。今见此图一流连,为此图者摹巨然。

移居诗

东野家具少于车,学打僧包何为家。一捆乱书十瓦钵,奚奴负走如奔麚。小巷偪塞 通破寺,邻人指说来官衙。自操箕帚扫土锉,糊窗吹纸西风斜。雨淋屋塌堆瓦砾,墙脚残立 山{++疆}花。日暮天寒验霜信,匝飞秃树啼老鸦。

冬日

膏肓有物苦相攻,凭借参苓与术芑。冷热那能驱疟鬼,文章谁可愈头风。闭门谢客 宜冬日,拥被贪眠是老翁。乍放梅花天欲雪,烧残榾柮地炉红。

从前万事总荒唐,不饮狂泉定不狂。遭鬼揶揄还老辣,与天执拗费商量。读书烧蜡稽孙课,扫地垂帘上佛香。自哂依然穷措大,避人如畏夜郎王。

百门泉上听雨作歌

我家住在卫泉尾,乘兴来访卫水源。辉县城北六七里,十亩一沼如瓶盆。其土肥厚水清泚,中有百窦穿石根。大珠小珠盘涡走,黏天拔地流奔浑。直向东北入海去,远从碣石通析津。撰杖到此夏五月,祖龙不动炎云屯。振衣千仞清晖阁,纳凉河朔倾洼樽。苍松古槐立斜岸,秃柳丛竹排当门。须臾天漏大雨注,空濛澒洞山无痕。四面风来葛衣冷,檐前蝙蝠飞黄昏。鹿角关连读书宅,此水亦到山{艹疆}村。今日徙倚山水窟,新诗美酒安足论。更下太行问济渎,还探黄河穷昆仑。

采石怀古

江干木末亭,中流泻清漾。泠泠新月白,横拖烟水上。独坐鸟声寂,微茫闻渔唱。 快哉临汝郎,风情何幽畅。咏史动高吟,文藻秋涛壮。讵期运租船,有客忽相访。千载素心 人,胜事不多让。花垂慈姥瞑,潮生牛渚涨。大雅岂复作,临风怀谢尚。

云梯关观黄河注海歌

章亥不到天墟遥,昆仑一窦通重霄。汉津初奔坤轴坼,冯夷沃焦纷来朝。雍州积石河之首,龙门下泻随神飙。底柱孟津绕大伾,中华沙漠连元枵。洚水迤东大陆北,地平土疏山不摇。一出一伏千万里,大曲小曲风雨飘。浊黄一斗沙居六,风轮阵马无停镳。颍亳徐宿在唇齿,曹濮单郓排脊腰。云梯古关尾闾地,榑桑沧》与谁相招。来自天上归地底,不知此水从何消。三门四折又九派,锡圭之祖乌能祧。碣石既没苦泛滥,故道不复悍且骄。白马沈后无消息,瓠子浪涌横泬寥。议筑议塞日聚讼,治河治漕群哓哓。贾让贾鲁各前席。史册言在作准标。华容武功印川子,其人罗立如斗杓。关前下马搜遗迹,天晴海面拖青瑶。洪涛光驶磹电,黑齿旗竖鼋鼍桥。始悟万物有归宿,浮生驰逐朱颜凋。精卫衔木究何益,尹公术幻真无聊。落日西风透白袷,沓连愁听番禺潮。寄语司空蚤底绩,山行乘檋泥行橇。

仪真县

松簰丝网架江头,丛绿新篁傍水楼。一片风帆三十里,买鱼煮筍到真州。

赭阳酒民歌

赭阳土风古罕有,潘水清甘酿作酒。比屋麹米各斗强,多者百缸少十瓿。糟床下注鹅子黄,味较索郎辄不丑。此风不变已千年,传来疑是杜康后。凌晨孤斟带微醺,出门醵饮呼其偶。分曹浮白鲜虚日,或三五人或八九。伯伦便埋岂为酣,王绩之乡此居首。快哉举国皆欢伯,可惜无螯空左手。以醒为醉醉为醒,孰好鼓瑟孰击缶。前年刺史来新官,眼花落井印悬肘。沈湎一临听事堂,薄书置左杯斝右。国人疾趋称兕觥,茗艼骑马舆隶走。如此真可博通侯,加以九锡赐圭卣。我亦逢车流涎者,信宿那能停大斗。漫云习俗善移人,鲁人猎较孔所取。男耕女织何未闻,愿除麹蘖戒童叟。莫教嵇康李白知,老生常谈同敝帚。软饱登途太怱怱,夕阳在山鸦鸣柳。

晚渡荆江

乾坤纳纳神禹功,岳五渎四排当中。长江浩淼渎之一,盘勃元气生洪蒙。尾闾万里 注溟澥,地乳三澨穿胁胸。嶓冢华阳自秦蜀,沱潜云梦连苍穹。熊渠大国撑砥柱,岷川矗怒 来磨砻。上牢下牢水漰泻,黄牛峡险浮巴东。南戒直与汉江合,洞庭彭蠡支流通。沙市城郭 笼蜃雾,西塞行箐藏渚宫。石尤激浪势〉虢〉虢,鼍鼓结阵声逢逢。武昌白帝纷在眼,天光 霞色摇青红。我来经过驾舴艋,垂堂弗戒行怱怱。二更泊舡虎渡口,柁楼星斗垂长空。

麻溪伏波祠

椒房何例独无君,岂谓壶头未策勋。村庙尚存香火地,五溪蛮不负将军。

飞云岩

飞云岩立翠千重,草草登临日下舂。莫信人间惟五岳,须知天末有三峰。秦灰汉垒

群仙宅,云阵花幢古佛踪。如此奇山谁领略,曾无七十二家封。

谒武乡侯庙

铜鼓峰插城南陂,渔矶百尺溪瀰瀰。蛮云作态僵不动,上有诸葛丞相祠。丞相渡沪来何速,纶羽遍历牂牁陲。祁连未出首南服,眼前雍孟如蚁蚳。九月凯还捷书上,瘴烟漠漠将军戏。遗庙三间塑泥像,旁有酋帅济火儿。缠头青布身藤甲,野花覆额连双眉。毒砮千钧矢三十,黄区月耳鸟蒙骓。当时再拜伏道左,聚粻刊路无敢辞,僰卒一队拥前后,乞怜丞相相许之。功成配飨英风在,手招群鬼摇灵旗。我瞻庙貌三叹息,为譔文字磨丰碑。水西黑罗最狡黠,尔之鼻祖何人斯。攻心为上术诚善,如公作用良可师。千载而下吊陈迹,古屋深箐藏狐狸。长涧潺湲弄寒水,似听宝瑟弹哀丝。四山寂寞秋色老,霜白枫叶红于脂。

清溪行悲瞿氏也。

万壑松鸣滕六开,旌旗风卷清溪隈。军门击鼓三通歇,番蛮一队西南来。毳幛两旁森刀戟,俯首不动如衔枚。中拥双鬟好妆束,花钿宝被黄金钗。欲前不前半遮面,一词未毕肝肠摧。雍门之琴子野笛,杜鹃啼血何悲哀。自言丈夫土酋长,身手长健多{髟不}{髟思}。岁在敦牂遘祸乱,天狗堕地声如雷。用昌黎句。须臾覆巢无完卵,吁嗟一旦成劫灰。智伯之头作饮哭,客有豫让胡为哉。窜伏僰箐经五载,遗孤那忍遭狼豺。天阍夜叫山川走,秦庭昼哭神鬼咍。叛儿莫使杀留后,孱躯蚤愿荒烟埋。使者听之三叹息,泪洒白骨生青苔。麾下甲士目眦裂,磨刀霍霍争喧豗。明日惊传仗节死,贞魂何处空徘徊。环珮月明招不得,酹以村酒倾樽罍。清溪岸上雪一尺,梅花吹落山皑皑。洞口幽禽太无赖,冲风弄响毛毰毸。我今作歌纪其事,山{艹疆}潦倒非诗才。

清凉寺双桧歌

清凉破寺古佛国,中有双桧幽可探。癸酉九月念六日,厌次老子来城南。初出城门霜信冷,沙土数尺堆峰岚。忽闻午钟蒲牢吼,山门赤脚头陀参。维摩庭院十笏地,狮子倒座罗什憨。亭亭二本东西立,西者兑女东震男。秦灰汉垒几千载,铁皮虬榦何眈眈。一如巫支锁波底,太阴黑入蛟龙潭。一如晋鄙遭朱亥,右肩偏袒毛毵毵。一则根生丑妇癭,一则枝缩瓮茧蚕。雷雨垂空磹走,脂泽伏窟豨苓甘。夕春在瓦西风起,铃铎乍响天蔚蓝。须臾淮阴拔赵帜,井陉战士旌旗酣。又如蚩尤排奇阵,鬼兵十万横长锬。下有艾纳大如掌,石床花扫飞钵昙,四溟山人何为者,诗篇曾不一咀含。我今留连不肯去,韦偃莫绘心馋贪。安得移臿山{艹疆}屋,两手一日摩挲三。乾竺先生视之笑,扪虱且与残僧谈。暮归乌尾讹楼角,寒厅弥勒眠同龛。

严我斯

严我斯,字就思,号存菴,归安人。康熙甲辰一甲一名进士,授修撰,官至礼部侍郎。有《尺五堂诗删》。

题湖上寓楼

楼前有桐树,婆娑枝叶好。雨过生凉阴,青葱媚晴昊。忆昔此楼居,弱本如指小。

荏苒二十秋,轮囷倏成抱。嗟彼树如此,我宁不速老?颓然坐南荣,忧来不可扫。双峰如故人,冠霞而衣缟。对此豁襟情,林峦足幽讨。安能逐氛埃,零落同秋草。倚桐三叹息,还山苦不早。

沧州道上

荒台斜日渺晴波,五垒城边一放歌。画角风声连渤海,片帆春色下滹沱。宵来对酒 黄云断,天际怀人白雁过。怅望南皮多胜概,故园归去未蹉跎。

李元振

李元振,字正孟,号惕园,柘城人。康熙甲辰一甲二名进士,授编修,官至工部侍郎。

忆园

得遂莼鲈兴,年来每自哦。宦同叔夜懒,诗让放翁多。岁月双游屐,烟波一钓蓑。 南园风景好,款段亦频过。

旧有读书处, 今重辟草堂。竹棂疏受月, 花榭暗飞香。竟亩新篁嫩, 盈庭绿树凉。 落花如有意, 时到砚池旁。

熊一潇

熊一潇,字汉若,南昌人。康熙甲辰进士,改庶吉士,授编修,官至工部尚书。有 《浦云堂集》。

登小孤山次梁相国壁间原韵却寄

突兀疑填石,荒唐纪断鳌。谁移华岭峭,偏障海门高。吴楚千帆月,江湖五夜涛。 滔滔任来去,一叶稳渔舠。

赵士麟

赵士麟,字麟伯,号玉峰,河阳人。康熙甲辰进士,官至吏部侍郎。有《读书堂彩衣全集》。

流寇入滇

丁亥夏六月,流寇犯我疆。兵戈起仓卒,官吏接踵降。哭声动天地,日星惨无光。 老少各逃命,道逢虎与狼。四境恣杀掠,金帛满路傍。劫我作奴仆,束缚虑逃亡。举步或稍缓,鞭笞痛莫当。箐林影昏黑,倾跌心愈慌。惟期免敲扑,那顾鸣空肠。暮夜集村坞,炙酒烹牛羊。凶锋有万状,喧呼拥平冈。醉后劓刖人,血肉溅我裳。有时刳孕妇,男女贯旗枪。求生固已矣,求死亦不遑。夜半人马寂,脱身匿丛筜。一步一惊顾,暗地呼穹苍。狐兔起蹊 隧, 荆榛长成行。踌躇奔城郭, 呼绳缒垛墙。攀援似猿猴, 四顾殊傍徨。亲戚闻我至, 城头问审详。朋友闻我至, 只手相扶将。父母向我前, 拊背慰百方。坐定复移时, 始知身未亡。努力去守陴, 安能进酒浆。但得共相保, 吾亲亦永康。

还里

妖氛此日尽驱除,将母依然里巷居。幸得怀中分陆橘,那愁花下乏潘舆。墙阴蔓草 无人薙,屋后荒畦待雨锄。圣主求贤闻若渴,季春应必聘弓车。

出门

驱车出郭门, 暧暧晨熹起。亲友诣可梁, 殷勤酌酒醴。岂不怀倚闾, 致身亲所喜。 滇南气候暄, 凌寒媚桃李。振衣上高冈, 万里从兹始。

题滇南胜境

天开胜景彩云生,金碧由来独擅名。唐代车书通诏外,汉家台沼仿昆明。四时花柳 无寒燠,万户桑麻绝战争。此去渐看萱舍远,登高陟屺不胜情。

过安庄至镇宁

带绾轻裘上偃坡,栖霞渐近郁嵯峨。名通上国由庄蹻,威播诸罗自伏波。溪谷至今 多瘴疠,人烟到处杂藤罗。为欣气候如秋杪,华盖洞名。桥西试一过。

黔阳怀古

罗施声教阻遐方,汉置牂牁达夜郎。天入炎荒时苦雨,途经冷站夜无霜。马鞍观侧藏鱼服,即建文为刘指挥书扁,避迹白云菴中。铜鼓山头祠竹王。千古犹思丞相泽,祠堂松柏自苍苍。

招屈亭

武陵名义动乾坤,招屈亭前遗庙存。目断微波悲帝子,情深芳草忆王孙。舳舻箫鼓 中流竞,涕泪山川故国繁。自古有才多不遇,临风酾酒暗销魂。

北固山

长江浩浩镇方舆,武帝巡游驻彩旗。半壁金汤资北固,六朝锁钥在南徐。千秋桥畔 风烟冷,万岁楼前草木疏。独有此山秦未凿,巍峨京岘自难如。

劳之辨

劳之辨,字书升,号介岩,浙江石门人。康熙甲辰进士,改庶吉士,历官左副都御 史。有《静观堂诗集》。

荷兰入贡

六载垂衣奠九环,梯航闽峤达燕山。周官职贡惟中土,王会披图列百蛮。鲸海何年 归凤历,鲛人此日识龙颜。炎洲万里凭风信,不似珠崖困往还。

淮阳道中

东南财赋区,江淮实渊薮。挽粟输神京,贡琛会九有。河伯效厥灵,恪如奉官守。如何神尧世,降割灾畎亩。我来经兹土,不忍重回首。四望尽洪流,莫分培与塿。鹳鹤失低巢,鼋鼍窟高阜。狼籍纷鱼虾,颠连殃鸡狗。萧萧芦荻花,其下惟井臼。茅屋或露尖,稻陇多悬罶。舟行改故道,蒲帆任风走。行旅但张目,长年亦袖手。嗟此一方民,几得耕千耦。筑塞兴大役,愁夫复愁柳。蠲赈荷皇恩,严纶戒箕斗。勖哉奉行者,人事思引咎。

兴济崇真宫明张皇后所建,旁有昌国公张峦墓。

故宫创建出椒房,当日金张久北邙。过客停桡休怅望,十三陵树总苍凉。

过蔡孝子祠孝子名顺, 其地称椹涧, 又名洗眉涧。

人生有至性,匹夫而圣贤。既非空桑子,胡为薄所天。妻子中多恋,利禄外相牵。曾闵不复作,何人风后先。炎汉运中落,新莽恣闇干。潢池纵横起,四海纷戈鋋。爰有蔡孝子,隐居不求官。汝南越乡井,行乞许西偏。采椹桑树下,辨其甜与酸。佳者留奉母,此情真可怜。以兹感群盗,赤眉洗清涟。历代修禋祀,懿行丰碑镌。多少锤鼎味,不如藿藜餐。叹息高祠下,卓哉千古传。

报国寺松歌

慈仁古寺数株松,苍然不与凡界同。二十年前松下径,飞涛谡谡生清风。前殿偃松荫数亩,纵横诘曲枝青铜。后殿高松挺千尺,夜深鸾鹤巢其中。扶疏突兀各异状,株株鳞鬣还相向。翠色凌霜总不凋,苍皮溜雨原无恙。僦居往岁我重过,风前月下长摩挲。偃松就槁高松茂,荣悴相形感叹多。别后多年思劲质,青松不比人颜色。到日还来萧寺寻,似觅生平旧相识。岂知萎谢又非初,枯者无存菀者枯。哦诗空记蟠枝影,泼墨能描直幹无。松乎松乎,尔宜植根在万仞之冈,岱顶徕峰傲寒雪。不则宁同处士老,其材支离夭矫足怡悦。不幸偏栽佛国边,树底无端作市廛。玉鱼百镒唐陵出,铜雀千金汉代镌。真松不问问赝贷,忍教灵物埋霜烟。斧斤翦伐虽无虑,生憎俗客来箕踞。一夜西山风雨声,拔根定化虬龙去。

琉璃厂行

长安游冶兼佳丽,春日春风盛鸣曳。白雀争燃莲刹镫,青蛾竞访梳台髻。正阳门外闹元宵,金犊花骢意气骄。十里香尘迷锦幛,三更烟火走虹桥。繁华更属琉璃厂,五色云中黄赤壤。装得龙楼帝子居,烧成鸳瓦冬官掌。人工天巧让皇都,赛月光侔不夜珠。琥珀枕由脂作骨,琉璃钟是玉为肤。陶中变化多奇异,娱人能惬儿童意。觱篥吹来关塞声,葫芦现出鱼龙戏。官署前头作广场,鼎彝书画布成行。子卿善相君平卜,列肆垂帘一一忙。踏歌连臂

无休歇,为趁兰镫并华月。玉漏频移纵胜游,金吾不禁因佳节。僦居两载厂门东,年去年来 叹转蓬。君不见彩胜银幡仍似昨,春寒又起落梅风。

兖州登少陵台

诗史才名第一流,高台地是古南楼。须知觐阙麻鞋叟,曾作趋庭彩服游。老去悲秋 多感慨,少时怀古独淹留。我来又是千余载,鲁殿秦碑总故丘。

王连瑛

王连瑛,字戒顽,号廉夫,永城人。康熙甲辰进士,由知县历官户科给事中。有《遗 安堂集》。

吾庄

沙田宜种柳,深处著吾庄。四望皆春色,中间一草堂。鸣琴翻旧谱,捣药试新方。车马谁相问,柴门日正长。

送高将军南征

楼船指日下江皋,年少登坛拥节旄。别酒醉看梁苑月,先声秋压广陵涛。阵开鱼丽 三山壮,部拥龙骧十队豪。斩尽鲸鲵清海浪,知君自有吕虔刀。

过鄚州故城

蓟南千里敞平畴,废堞人传古鄚州。形势遥分天北极,波涛尽赴海东流。沙通白蒋 连双树,霜满青溪下一鸥。西日渐低风自起,乡心永夜揽貂裘。

车万育

车万育,字与三,号鹤田,邵阳人。康熙甲辰进士,改庶吉士,官兵科掌印给事中。 有《怀园集唐诗》。

怀园秋兴

爱与吾庐近,开扉步即舒。傍云朝选石,趁月夜摊书。深树鸣蝉处,高楼过雨初。 悲秋人已往,痛饮说三闾。

盛符升

盛符升,字珍示,昆山人。康熙甲辰进士,历官御史。有《诚斋诗集》。

河上

久矣悲鸿燕,谁堪问麦秋。飘零随远道,涕泪入孤舟。璧马牛年事,河淮处处忧。 却怜长算少,民命倚阳侯。

冬日渡彭蠡过庐山下

几经湓浦惜幽寻,重向宫亭望远岑。云卧石门思北涧,花开莲社忆东林。三人一笑 谁宾主,五老千秋自古今。惆怅吾衰劳梦想,几人游迹未销沈。

南征

太白秋明井鬼旁,兵占早已在炎荒。养成岁月营三窟,嵎负西南擅一方。莫遣金沙留蜀汉,岂容清浪接湖湘。由来制胜资全策,铜柱依然缅水阳。

曹贞吉

曹贞吉,字迪清,一字升六,号实庵,安丘人。康熙甲辰进士,历官礼部郎中。有《实庵诗略》、《朝天》、《鸿爪》、《黄山纪游》诸诗。

文殊院观铺海歌

蓬莱阁外海作山,文殊院下山为海。神物由来不易逢,天为吾徒浇块磊。白云一片涌空濛,眼底千峰皆杳霭。只疑浑沌开穷荒,或有风雷泣真宰。澒洞得无忧怀襄,帆樯似欲歌款乃。鳌身一抹映天黑,鲸波万里连渤澥。天都直可作员峤,莲蕊莲花余蓓蕾。似宜腾掷走蛟龙,讵容细琐藏蚌蟹。过眼一洗碧琉璃,惊风猛浪嗟何在。仙人作剧太神奇,顿还旧观那足骇。

莲花峰

我闻花开十丈藕如船,太山华顶上何便娟。又闻给孤园边功德水,五色莲花世无比。两者余尝梦见之,不道莲峰奇若此。游人历历到花须,夜深多宿莲花柎。冷光朝暮相激射,餐霞饮露神仙徒。千松万松破石出,磴道高悬势矶碑。俯看莲蕊才及肩,菡萏何时与花匹。云梯百步在眼前,海门落日争新鲜。鳌鱼洞口莽昏黑,散花坞下丹枫妍。惟有天都堪并矗,诸峰鹄立皆臣仆。老人伛偻吁可笑,高撑孤髻山之足。浓翠霏霏衣袖中,排空御气如飞蓬。路人惊我白云出,老夫適谒浮丘公。

卫既齐

卫既齐,字尔锡,一字伯严,猗氏人。康熙甲辰进士,改庶吉士,授检讨,官至贵州巡抚。有《廉立堂集》。

送朱锡鬯

隋隄官柳无多路,杜牧风流正壮年。两岸酒旗临水店,半窗书卷过江船。寒潮断处 家山近,梅雨晴时客梦悬。燕市风光还忆否,雄谈清夜烛花圆。

登宣武门楼有感

白云连塞树苍苍,矫首西山揽大荒。画角宵吹城上月,羽林寒带殿前霜。柱标马援 功名薄,书著虞卿岁月长。尚忆黄金收骏骨,高台徙倚向残阳。

刘谦吉

刘谦吉,字认庵,江南山阳人。康熙甲辰进士,由中书历官山东提学道。有《讱庵诗钞》。

漫兴

世久弥安拙,时危转仗贫。青云何负汝,白眼却看人。可叹虞翻骨,应伤宋玉神。 几番城郭外,岸帻北湖滨。

晤盛珍示同年舟中辄作别因次原韵

摇落江南客,孤帆此日过。星从淮水渡,风带洞庭多。各负诗无敌,谁怜醉有歌。 相逢还欲别,极目渺烟波。

吴李芳

吴李芳, 字茂孙, 邵阳人。康熙甲辰进士, 官固原知州。

中秋夜集次郡伯李公韵

每从风雨祝新晴,兀坐城隅江水青。半壁篝镫方黯黯,平台皎月自明明。菰菱乍白蝉无语,橙橘才黄雁有声。樽酒颇堪酬永夜,湖天漠漠故人情。

方殿元

方殿元,字蒙章,号九谷,番禺人。康熙甲辰进士,官江宁知县。有《九谷集》。

六歌西南烽火, 几半天下, 余遭忧去官, 欲归不得。作歌六首, 聊以写悲。

褒斜道

褒斜道,三载烽烟令人老。嵯峨云栈四百里,其下黑龙江中水。北走三秦南走蜀,长蛇猛虎盘深谷。张良一烧不可测,顾盼从容得秦鹿。谒葛艰难数出师,大星夜落三军哭。英雄成败且有数,况乃区区一狐兔。黄尘澒洞入秦州,风雪关山劳远戍。铁马回头望陇山,断肠家过秦川路。更有子午与黄金,十里百折伤人心。悬崖削壁日月黑,使尔战魂招不得。

蜀山高

蜀山高,年年草木愁旌旄,西风凓冽心烦劳。绝壁岧峣开剑阁,栈道微茫千里窄。 哀猿昼昼向人啼,豺虎嗥号夜相索。恨雨愁风魍魉豪,自古何曾帝王宅。当年昭烈汉王孙, 羁旅风云无所讬。先起奸雄不让人,草庐权定三分策。他如窃据公孙述,只作须臾狐兔窟。 英雄步武自堂堂,险阻从来无用物。空使蛇龙作战场,孤儿弱母家相失。不见君乡昔日有望 帝,化为杜鹃一何细。日日催归归无计,倒啼血泪三春逝。

洞庭波

洞庭波,欲渡不得忧如何。岷峨六月下雪水,九江不流平如砥。朝朝日月镜中开,时时兰芷香风起。自从氛浸飞鲸鳄,白浪如山断衡霍。蛟龙一夜失窟宅,昼日冥冥风雨恶。四山阴火烧白骨,归梦无津湖水阔。夜半寒笳吹一声,哀猿尽叫丹枫脱。湘灵听之罢鼓瑟,九疑无路千峰黑。一时弹断五弦琴,惆怅南风来不得。江南日夜造楼船,澄清望断在明年。羁客穷途谁不老,何日湖边看春草。

五溪深

五溪深,鱼鳖网尽伤人心。伏波昔下槃瓠国,矍铄悲歌夜吹笛。十万征人未尽归,千年流水声凄恻。今时鼠窃是何意,幽谷深山盗名字。东南盗贼应声气,将帅旌旄横满地。官军三载住长沙,万马齐驱非地利。壁垒坚营休士卒,食尽锋摧待其毙。巴陵南畔最卑湿,瘴雨岚风四时急。画角吹残刁斗断,征人相抱旌竿泣。南天杀气操生死,雁飞未到衡阳止。欲寄音书一问家,家过衡阳几千里。

吴航头在福州,夫差乘船略地至此,故名。

吴航头,日夜滔滔使人愁。夫差当日臣于越,七闽一顾雄心发。乘船直尽大海东,回向中原事征伐。黄池会罢国已空,潮去潮来只明月。太伯子孙尚如此,何况鸿毛窃风起。未许苴茅恋不归,化作战场几千里。海上波涛何日止,欲学田横岂能比。近闻剽掠到循城,科头跣足拥旄旌。吾家去此四百里,乘流一夜能兼程。有姊孀孤弟妹弱,满地兵戈何所话。待得安澜斩鲸鳄,羁旅忧多头亦白。

五羊城

五羊城,我生之初犹太平。朱楼甲第满大道,中宵击鼓还吹笙。南隅地僻昧天意,二王赫怒来专征。城中诸将各留命,百万蒸黎一日烹。家家宛转蛾眉女,尽入王宫作歌舞。妙舞娇歌杂鬼哭,疮痍尚在重翻覆。乱后遗黎又仳离,当日哀嫠更茕独。前秋奉母辞乡里,弟妹牵衣怜我姊。日日高楼望母归,谁知魂返烽烟里。魂返烽烟不可知,灵輀倏忽滞三期。何年得度梅关去,泣血浈江向南注。

答陈元孝寄约诗邮三作兼柬梁药亭

怀人似秋色,日在碧梧枝。吾道自千古,斯文共一时。开春结幽愫,每月联新诗。 袖里芳兰乱,馨香好赠谁。 江南花色好,南海更便妍。梅风媚长至,桃日艳春前。芳思归词赋,风流入管弦。 曲江兴绝唱,和者已千年。

我辈无相识,孤音待后人。炼成千岁鼎,谢尽片时春。南郭群为吹,西施独自颦。 殷勤寄明月,一月一回新。

泊京口怀诸弟

西风初起越江头,九月寒波到润州。日落烟迷瓜步远,月高潮涌海门秋。归程客上西津渡,怀古人登北固楼。明日携家寄吴市,雁声南尽不胜愁。

狂生

独抱瑶琴上讼堂,怀山仍奏紫芝章。狂生不解看颦笑,直道何劳较短长。击柝无官 贫仕苦,折腰难去吏情伤。田园一别荒芜尽,况复连年是战场。

过浈阳峡怀陶苦子

独吟江上惜秋光,忆我同声水一方。回首青山看不尽,一帆疏雨过浈阳。

孙郁

孙郁,字右汉,号雪崖,元城人。康熙甲辰进士,官桐乡知县。

新乐道中

村远沙迷岸,桥平水抱城。长途愁马病,短日喜云晴。溪口层流浅,山腰积雪明。 晚来新月白,浊酒且同倾。

宋荔裳按察由扬州泛长江之任成都得近体却寄

剑门秋老白盐寒,叱驭休歌《蜀道难》。龙卧澄江惊急雨,猱悬古木挂飞湍。烽烟 乍息残黎少,稼穑深荒野水宽。鸿雁嗷嗷悲铩羽,何人独对月中看。

钱芳标

钱芳标,原名鼎瑞,字宝汾,一字葆馚,江南华亭人。康熙丙午举人,官内阁中书。 己未举博学鸿词。

击鲜行

吾乡城郭沧溟畔,亲故朝朝击鲜宴。乐事濠梁未足夸,嘉名丙穴无劳羡。沪渎滩平 斥卤多,主人结网胜熬波。苍茫直下冯夷窟,烟雨常闻《款乃歌》。河豚贩后芦芽出,春潮 蹴岸春云热。筐覆吴趋窖里冰,刀飞少妇厨中雪。已道鲥鱼色似银,况兼石首烂金鳞。麹米 渍成鲟枕脆, 豉羹调出箬腴新。此时鱼税充公府, 津市鸣桡复挝鼓。浅符轻舠弄水儿, 高樯巨舶开洋贾。别有泥沙困豫且, 脂膏然炬骨专车。牵鬐力费千夫蹶, 曝腊家分半载储。朅来岛屿孙卢扰, 斥堠传烽接三泖。都护旌旗只戒严, 渔郎翼罟空施巧。萧萧戍角满汀洲, 丽罶寒星炯不收。无复钓鳌陈水辖, 惟看驱马散沙鸥。海错经年不到眼, 充切临渊那供馔。一片才沾食指腥, 百鍰早破中人产。舍人顑颔滞燕台, 比目王余赋强裁。张掾秋风频怅望, 冯生弹铗未归来。挑镫与客论终夕, 语罢沧桑感畴昔。下箸谁消易水樽, 解钱且换滦河鲫。近喜波臣静不扬, 东南早晚撤边防。盘餐饱饫故园味, 醉卧溪梅野竹傍。

清明偕钟宛兄展墓有感

往事苍凉不可论,伤心絮酒拜松门。三千里外孤儿泪,二十年来国士恩。华表日斜 巢鹤返,土花春绣石麟存。殷勤幸接连枝会,漂泊天涯有弟兄。

舟行太湖

载酒横塘路,晴和破客颜。忽惊天上坐,知出具区湾。洲渚春烟渺,凫鸥夕照闲。 中流问渔者,何处是包山?

饮恒素堂赠胡其章先生

娄东谏议绝代无,英姿落落虬龙须。大叫留宾劝宾饮,红梁美酒盈玉壶。此时正值三伏时,华堂豁达生凉飔。科头赤脚摇大扇,一饮一石安足辞。吾闻昔壶公,悬壶汝南肆。又闻韩伯休,妇女知姓字。君也高义真似之,不然何为思远志?采药已逐荆蛮人,停杯偶说前朝事。忆得前朝苦征战,烽火频年逼畿甸。同时通籍十六人,承恩入对文华殿。殿头痛哭议南迁,左右群惊至尊盼。绕朝之谋虽不成,仰视中天白虹变。须臾有诏擢黄门,意气云霄谁不羡。那知荆棘蔽铜驼,不惜余生隐薜萝。白发伤心成异代,青山回首一悲歌。陶潜栗里田园在,庾信《江南》感慨多。感慨欷歔复何益,种瓜且向长安陌。有时或与高阳侣,纵博当筵呼五白。剑气宵浮牛斗寒,钓竿日对沧江碧。愧我栖迟赋《子虚》,不逢狗监意何如。五月犹然被短褐,十年羞复曳长裾。相看不尽飞扬意,愿傍浮丘读异书。

申涿煜

申涵煜,字观仲,永年人。康熙丙午举人。有《江航草》、《敏庵集》。

己亥元日

湖上逢元日,焚香乱石间。出门人事满,此地鸟声闲。客久通吴语,春来梦故山。 渐看蓬鬘改,未惜解愁颜。

九日同郑子勉陈玉笥登郡南楼饮玉笥斋

又是重阳日,登楼望落霞。与君呼绿酒,犹未见黄花。霜气分梧叶,碪声聚水涯。 一时知己在,何事惜年华。 郊晴宜晚眺,令节喜招寻。人以登高老,秋从过雁深。渺然烟外水,况值醉时心。 此际怀应远,狂歌到竹阴。

虎丘

古寺寒烟际,郊晴问短筇。船来先见塔,坐定始闻钟。黄叶连高级,朱栏间老松。 平生思胜迹,延赏惜秋容。

发丹阳暮抵阊门

三日枫桥路,高帆一日回。偶因风力好,遂使客愁开。双橹摇江月,千峰度酒杯。 夜来经虎阜,镫火照楼台。

文化远

文化远, 字又山, 呈贡人。康熙丙午举人。

秋尽

积雨重阳后,萧然客郡城。归鸦争独树,牧马恋边营。山水仍南服,风光似北平。 近冬先畏冷,始信布衣轻。

送张寅揆还蒙化

文字烟萝结习深,暂归应尔费招寻。两年猿鹤山中梦,一曲《骊驹》客里心。旧折 桂枝香尚在,新餐苜蓿病交侵。调高自有钟期赏,珍重朱弦太古琴。

虞黄昊

虞黄昊,字景明,浙江石门人。康熙丙午举人,官临安教论。

杨柳枝辞

杨花如雪扑征衣,马上征夫苦忆归。曾向曲中回首望,而今真在路旁飞。

杨岱

杨岱,字东子,彭县人。康熙丙午举人,官上杭知县。有《村山诗集》。

大慈寺

久废先朝榜,何人礼大慈。青苔荒石马,昏月宿寒鸱。不见张蠙咏,空留孟昶碑。 年年春草绿,古迹问谁知。 夜泊

夜船将泊棹歌齐, 芳草萋萋野路迷。只有断猿无宿处, 最高枝上彻明啼。

拍隄春水四无涯,吹笛楼中起暮鸦。旧寺僧残江树尽,空留残月老芦花。

贺振能

贺振能,字蓬仙,获嘉人。康熙丙午举人。有《窥园稿》。

窥园

幽林无半亩,栖讬十年还。世事愁多故,人间惜暂闲。栽花存净土,选石忆深山。 小阁陈编在,秋深且闭关。

亦园即事寄怀孙徵君锺元先生

病起秋原学闭关,转从风雨见幽闲。最怜小圃新锄后,独立空亭对远山。

张云章

张云章,字汉瞻,号朴村,嘉定人。监生。康熙初举孝廉方正,议叙知县。有《朴 村诗集》。

三士叹

嗟哉燕士左与羊,狗屠不事节义张。楚王好士声播扬,翩然二子同裹粮。楚南燕北路阻长,山深雨雪雱且凉。桃乎慷慨泪数行,势不两生以一当。推尔食,解我衣,我才差短死则宜。我能死,尔能生,生见楚王功两成。道傍十围木,虫蚁穴其腹。古之翳桑人,于焉同一哭。哀也含泪不敢弹,楚王一见尊大官。树中有友形影乾,陈词再拜王慨叹。士为我死死不棺,葬之以礼衣冠完。哀也对食忍独餐,下报我友颜不汗。人间交态多欺谩,吾于二子无讥谗。嗟乎哉!戎夷亦死鲁郭门,彼为国士友何人。

荆山

吾经荆玉山,未惬登探愿。闻说洞中石,玲珑搏雪霰。玉生固有胎,不以青黑绚。 卞和彼何人,抱璞奚必献。再刖自所取,无媒而频衒。士诈常夺真,物贵不敌贱。泣之亦何 为,毋乃剧尤怨。孰云空山猿,荆人哭佐卞。陋哉何曾言,望道信未见。

東汪蛟门主政

新篇磊落夜光多,奕奕翔鸾肯换鹅。见贻诗扇,词翰双美。蠹简漫怜金薤叶,饥肠 真饱玉山禾。长留怀袖微风发,苦忆梧桐疏雨过。君书扇时自题云:"雨过月上,庭梧如洗。 "未许委心松菊径,怡颜且得向庭柯。

书怀呈朱检讨竹垞

赠策修门马首东,伶俜已忍十年中。谷寒不转吹邹律,羽退真遭过宋风。诗以穷工 宁数我,官因名折只思公。相寻粗整轮蹄了,人去长安已觉空。

镜里霜髭镊数茎,长贫已分老诸生。敢言豹雾文章隐,肯为牛衣涕泪倾。吹彻黄钟 君子舌,遗将金错美人情。此身何事酬知己,名节如山晚或成。

观星台登眺

蜿蜒东来紫气浮,环回下瞰碧漪流。乾坤法象开双阙,星斗光华烛九州。西邸集书陈要略,南朝古庙俨垂旒。只今寂寞江山冷,犹有衣冠夜出游。

题陆氏园介白亭

一片寒潭白,中宜介此亭。朝光双浴日,夜气互涵星。树隙余霞灿,檐间叠嶂青。 只疑蓬岛近,来往集仙灵。

【卷三十六】

张英

张英,字敦复,号乐圃,桐城人。康熙丁未进士,改庶吉士,授编修,官至文华殿 大学士兼礼部尚书。谥文端,雍正初赠太子太傅。有《存诚堂诗集》。

平陵宜山堂诗

我闻宜山堂,结构平陵阳。群公争赋诗,佳咏皆琅琅。何处最宜山,奇峰出短墙。石屋一片云,黛色映筼筜。隔帘见幽壑,入户飞层冈。枯藤与古木,掩映多奇光。峰影落清泉,水面还苍苍。何时最宜山,山静觉昼长。朝霞与夕烟,树色分微茫。春明山翠浓,夏雨山风凉。明月出远岫,秋峰群相望。何人最宜山,先生称古狂。芒鞋筇竹杖,荷衣薜荔裳。看山无朝暮,一卷或一觞。手招西爽来,披襟从徜徉。斯景与斯人,是名宜山堂。

枯松行同沈康臣作。

慈仁古松树,苍老不记年。高下近十株,为态各自妍。中有双龙鳞,蟠曲香台前。 松顶近可摩,高枝才覆肩。屈彼百尺势,空阶恣蜿蜒。横侧益奇绝,影若蛟螭眠。涛声走平 地,双树撑如拳。似此苍劲质,止宜空山巅。藉以一片石,濯以清浅泉。谡谡响绝壑,垂手 招列仙。何将故山态,老却车尘边。横遭厮养辱,强索冠盖怜。冠盖那复顾,日落生寒烟。 一夕风雨过,萎黄何忽焉。众松失颜色,台殿增寂然。惜彼凌霜姿,遽随群卉迁。吾子勿复 叹,物各全其天。 郊行

性拙寡所谐, 蚤岁归田园。篮舆游近郊, 指顾农家村。暧暧茅茨接, 依依桑柘繁。 今年雨泽时, 耕获及高原。良苗怀好风, 浅碧翻波痕。叹彼耨者劳, 汗滴秋禾根。我独饱稻粱, 毕世惭君恩。

赠何匡山次梅村先生韵

蚤年逸兴在沧浪,水国移家发半苍。但有一经扬子宅,曾无千树木奴庄。清琴浊酒 莺花日,雨笠烟蓑蟹稻乡。棠荫渐高身渐隐,已将心事讬渔郎。

送钱饮光归里门

湖海人归已廿年,卜居犹待卖文钱。欲谐禽向三山约,须觅枞江二顷田。花雨红时 携锸往,荷香深处抱书眠。翦镫频话家园好,未遂沧浪意惘然。

夏浅

身逐霜蹄底事忙,吾庐高寄水云乡。旧营花坞三间屋,新购谿桥十亩庄。村绕绿畴 偏衍沃,峰围紫翠总苍茫。何缘却向风尘老,白尽髭须减尽狂。

四郊杂诗

不须桃李斗夭斜,底事芙蕖飐晚霞。最是野田芳草畔,一枝闲澹女郎花。

少小日长思隐几,冬烘头脑意难堪。一从失却青青须,始觉人间午睡甜。

星火西流节叙更,簟痕新觉蚤凉生。白杨叶上萧萧雨,已作秋宵第一声。

缪彤

缪彤,字歌起,长洲人。康熙丁未一甲一名进士,授修撰,历官侍讲。

送医士方际泰归茅山

卖药长安市,超然寄一身。摺驴偏识路,破袜不生尘。入世性情古,还乡面目真。 自惭留滞客,对尔叹劳薪。

万族罹氛祲,颙颙待此人。戍兵屯戊己,望雨急庚辛。汤火心徙切,君臣剂有神。 能将上池水,尽与济生民。

茅山称最胜,结屋傍嶙峋。白鹄常为伴,黄精得养神。松云凉梦寐,童仆使麚麕。 曾读《宋清传》,犹嫌未绝尘。

东台望海峰

层层峭石拥高台,就里藤萝百道开。身在云中天水合,更于何处见蓬莱。

张玉裁

张玉裁, 字礼存, 号退密, 丹徒人。康熙丁未一甲二名进士, 授编修。

寄题八公洞

苍崖四围合,古寺中峰凿。径窄飞鸟穿,石阴虬龙攫。蹑蹻恣野游,一步一盘错。 言寻最佳境,修竹荫幽壑。倦卧当夕阳,微风暗相薄。别来经十载,烟霭应如昨。惆怅复春深,无人自花落。

董讷

董讷,字兹重,号默庵,平原人。康熙丁未一甲三名进士,授编修,官至漕运总督。 有《柳村诗集》。

兴化道中

漭沆连沧海,风吹一叶轻。村从波际出,草逼浪痕生。地阔无山影,天空有鸟鸣。 最怜釜底处,何日奏平成。

移居清河茅舍

邑小无城郭,零星二百家。可怜同燕雀,何处种桑麻。藉火聊分照,荒檐任自斜。 往来工所近,缓步踏平沙。

梅鋗

梅鋗,字尔炽,宣城人。康熙丁未进士,由知县官至左都御史。

水西古木

老树自何年,空潭郁烟雾。虬幹插高天,低枝横仄路。话根白云崖,照影桃花渡。 孤鹤巢其巅,古藤屈相附。苍凉帝子宫,怊怅谪仙句。

纪愈

纪愈,字孟起,文安人。康熙丁未进士,历官工科掌印给事中。

茅斋春咏

西园春事早, 偶筑卜城隈。松径幽篁细, 藤溪野鸟来。停云双白板, 步月一青苔。 已悟逍遥理, 闲居赋可裁。

颜光敏

颜光敏,字逊甫,更字修来,别字乐圃,曲阜人。康熙丁未进士,历官吏部郎中。 有《乐圃集》。

郑则厚曰: "乐圃五言,原本三谢;七古在李颀、杜甫之间。近体秀逸深厚,出入 钱、刘。"

登太华山•千尺峡

青柯围翠屏,四合无嵌窦?东北穷石林,劈空悬巨霤。巉岩互喷薄,造化争一候。 天矫转蛇龙,窅冥穿鼯鼬。侧闻天籁发,旷野雷霆斗。仰井窥秋旻,浮云袅清昼。白帝觞百神,众峰为笾豆。琼台阻且长,翠葆纷何就。

登太华山•瀑布

谿回硖角转,三峰面始正。万仞青琅玕,瀑流下砰訇。天逼多烈风,飘洒无时定。 细沫随雾消,大珠如星迸。石罅昔未辟,停泓绝人径。时挹霄汉芬,遥想菡萏盛。谁使鸿濛 开,瑶宫借涵映。高罗有垂猿,登历当与并。

登太华山•犁沟

型沟划绝壁,直上无回藏。熊经复鱼贯,谁得相扶将。危柯袅撑拄,修绠垂毫芒。仰睇愁瞑眩,况乃穷八荒。昔梦逐化人,灵境空徬徨。退身渺无地,懦夫亦时强。高林绝鸟雀,万壑闻笙簧。便合此中住,弥年承玉浆。

登太华山•白云峰

三峰信灵造,巍巍司寇冠。磊砢不尽泄,蚴蟉复北盘。结空出瑶几,前对香炉寒。 大道望如发,豁然见长安。我行采山荪,葱蒨被冈峦。秋色何时来,万里霜林丹。三川富陈 迹,八水无停澜。玉女怅不顾,目断双青鸾。

登太华山•擦耳崖

振衣更南登, 诡状乃非一。蚁行缘危栈, 逡巡皆股栗。侧身常甐耳, 茹趾妨齧膝。 吹径乾松花, 滴空熟崖蜜。萧摵无人踪, 坐惜幽芳失。昔闻避世乱, 鸡犬喧云日。劫火烧咸 秦, 遥慨人代毕。遗灶尚可寻, 终当置蓬室。

登太华山•苍龙岭

纡回下平坡,削成当左冲。青霄岚彩灭,蜿蟺垂苍龙。修鳞剥石藓,高脊突剑锋。神物倏幻化,雷雨愁相从。玉京多栏楯,琪树无春冬。咫尺不可接,劳心益忡忡。危巢见炊烟,下界闻夕钟。相携戒前路,日暮崖霜浓。

登太华山•西峰

众险历已穷,千盘堕幽渺。西见青莲花,娟洁万象表。夕气收秦川,蜃市竞纷扰。 渐觉明霞昏,忽讶繁星绕。何年采芝翁,结庐出林杪。阴壑应天鸡,空阶裂寒篠。梦余念畴 昔,纤末俱了了。愿从叔卿游,自顾浮生小。

登太华山 • 南峰

侵晨望南峰, 岧峣更天半。仰凌变寒温, 俯视殊昏旦。平冈始徐立, 亭亭步鹤鹳。 游尘失秦陇, 微缕求沔汉。乱山互纠结, 豁然四奔窜。欹倾如海涛, 泱漭天为岸。驱马过华 阴, 岂谓穷壮观。徘徊俯青池,濯缨复三叹。

登太华山•东峰

东峰不可极,乃知造化尊。屹然鼎彝峙,势如虎豹蹲。松气望蔚蓝,无人践霜根。 巨灵拓太古,高掌谁能扪。晨光没河汉,似有云车痕。阴风折秋花,吹落洗头盆。蜷局念乡 国,久客伤精魂。且复望虞渊,散发晞朝暾。

游燕子矶

漾舟下澄江,安稳废轻楫。遥空指苍翠,久行渐重叠。石藓秋更荒,皋兰露犹裛。孤亭四环望,风磴遂屡蹑。盘涡凫雁惊,幽窟蛟龙怗。恐触冯夷宫,俯听常震慑。诘屈双银杏,天半垂黄叶。波涛撼危岩,栩栩乱风蝶。东西吴楚间,舳舻邈相接。铁锁沈千年,金陵气久厌。苍凉金粟堆,时时见樵猎。凤凰无遗音,嶰竹谁更叶。浩歌怀美人,褰裳不可涉。徬徨江雾消,斜日照城堞。

麦雨叹

宁逢旱魃行,莫见商羊舞。小麦黄时赛田祖,汗流肩赪何太苦。霏霏霪雨连三旬,却恨炎曦在何所。咋日飞蛾空麦头,今朝麦尾生黄牛。麦中小虫名。嘉实几日作糠秕,长饥更待凉风秋。劝农使者来省耘,麦花布野扬苾芬。岂知仓庾有灾眚,翻嗔野老多传闻。频年屡歉蒙宽假,秋来并命鞭箠下。蛾兮牛兮何为者,靦然食我仓中粟,何不往遮使君马。

戊申六月十七日齐鲁地大震歌以纪之

冥海禺强立天门,啄害下人乘夜昏。耳间青蛇双噀火,蜿蜒竞与蛟螭奔。穿穷地肺作陶复,谽谺势欲无昆仑。大噬羵羊细蝼蚁,苍生履厚徒惛惛。千雷万霆伏床下,发声直夺飞廉魂。城郭跳踔金石走,六幕八柱手可扪。威斧怒划裂平壤,幽光腾闪疑陆浑。黄泉激水立千丈,虹霓交射相并吞。踉跄裸体走旷野,摩挲大树同鸱蹲。荒鸡不鸣狗乱吠,行冲南纪犹哼哼。闾门渐返寻骨肉,眼明喜见扶桑暾。恍疑中宵现妖梦,一时庆吊忘饔殄。共言巨鳌

覆公餗,缩颈自请甘钳髡。高陵深谷瞥然改,岳渎亦失公侯尊。嗟尔东人出兵燹,版筑未就三冬温。焚巫暴尫测天意,疲氓忍使疮痏存。西方雨雹大如象,探丸篝火惊峰屯。野人习见尚云妄,监门何得彻九阍。三十年来增户口,祇愁庸调抛见孙。村头一夕遍磷火,旧鬼烦冤安足论。

送王考功西樵归里

生不愿封万户侯,但愿百岁无离忧。绕床呼卢醒复醉,瞢腾不觉清商流。向来思逐巫峡舟,时阮亭使蜀。君复垂翅归齐丘。瀛台荷花御沟柳,何时快作联镳游。忆昔神仙邈相接,紫骝并翦三花鬣。同时卿相皆雁行,天人忽堕修罗劫。回首刀碪梦犹怯,放臣意气凌荆聂。大江白浪高于山,歌笑中流掷轻楫。焦山古鼎龙鸟文,焦山有周鼎,出豪门。西樵为绘图赋诗传之,今将复往。駮荦颇类王司勋。苍松绿藓光不分,结成缥渺空中云。尘埋波滚不能没,人间再出愁絪缊。江天安可无此君,玉堂绮席何足云。一官再罢客常满,长斋绣佛矜迂诞。秋夜渐长日苦短,破除文字挥金碗。忽睨苍生肺肝热,银瓶欲上丝绳断。古来贤达皆转蓬,尼山片席何曾暖。鲛人泪迸明月珠,可怜弃掷沈泥涂。海水直下深万里,谁施铁网求珊瑚。朝来日射黄金铺,鹤盖成阴水接轸。空劳天上悬冰壶,吁嗟归休乎大夫。

柴门

柴门无暑气,清兴发今朝。山雨乍连夜,溪流初断桥。秫田争乳雀,风柳厌鸣蜩。 便拟褰裳去,轻泥涨未消。

张茅

驿树参差陇麦交,微茫一径是张茅。河流绕地浮三晋,山势连空结二崤。云外旌旗 闲古戍,洞中烟火出危巢。岩花岸草空经眼,那得他乡有乐郊。

潼关

连山觅路纵横断,粉堞当空结构牢。万里河流蒲阪动,九天秋色岳莲高。燕齐无计 挠秦帝,关陇频闻唱《董逃》。设险当年隶畿辅,庙谟亲见紫宸劳。

望华山

潼关西上见嵯峨,路入云台佳气多。万壑深松寒白日,三峰积雪照黄河。天鸡晓彻 扶桑涌,石马宵鸣翠辇过。拟向青冥销永夏,莲花玉井竟如何。

何天宠

何天宠, 字昭侯, 号素园, 宛平人。康熙丁未进士, 官吏部员外郎。有《紫来阁集》。

故园

故园殊可乐,何意任飞蓬。万壑桃花雨,千村竹箭风。玉函神禹穴,翠嶂越王宫。

登岱应回首,鸡鸣沧海红。

归义驿

岳阳路径绕烟鬟,拟见湘娥竹上斑。一曲罗江千叠嶂,云深何处九疑山。

汪懋麟

江懋麟,字季角,号蛟门,江都人。康熙丁未进士,官刑部主事。有《百尺梧桐阁 集》。

将入都留别于皇即和见送原韵兼订北游

霜风摧细菊,寒雨飒高梧。秋气方摇落,萍踪竟有无。于时惭入洛,投老羡归湖。 日下思君切,春来酒共呼。

柳敬亭说书行

田巴既没蒯通死,陆贾郦生呼不起。后人口口契舌复僵,雄辨谁能矜爪觜。吴陵有老年八十,白发数茎而已矣。两眼未暗耳未聋,犹见摇唇利牙齿。小时抵掌公相前,谭玄说鬼皆虚尔。开端抵死要惊人,听者如痴杂悲喜。盛名一时走南北,敬亭其字柳其氏。英雄盗贼传最神,形模出处真奇诡。耳边恍闻金铁声,舞槊横戈疾如矢。击节据案时一呼,霹雳迸裂空山里。激昂慷慨更周致,文章仿佛龙门史。老去流落江左间,后来谭者皆糠秕。朱门十过九为墟,开元清泪如铅水。长安客舍忽相见,龙钟一老胡来此。翦镫为我说《齐谐》,壮如击筑歌燕市。君不见原尝春陵不可作,当日纷纷夸养士。鸡鸣狗盗称上客,玳瑁为簪珠作履。此老若生战国时,游谭任侠差堪比。如今五族亦豪侈,黄金如山罗锦绮。尔有此舌足致之,况复世人皆用耳。但得饱食归故乡,柳乎柳乎谭可止。

寄栎园少司农兼送雪客归金陵

读画高楼几千尺,楼阴下枕清谿碧。面揖南朝无数山,四时云气生虚白。先生卷帘楼上头,独立看山自朝夕。平生好诗兼好画,尤爱图书与金石。购买不惜倾家赀,尽是前人好手迹。山川患难不肯离,始信先生有真癖。早年事业多恢奇,许身管葛千人辟。已树羊祜山头碑,再掌萧何府中籍。岂意青蝇飞满眼,遂教白发垂过额。匹马来看岱岳云,一官又返钟山宅。风涛宦海理有之,何用呶呶骂门客。有书可读诗可吟,万事徒劳挂胸膈。人生甲子休浪过,如此朱颜亦堪惜。世情翻覆原转环,况复长安事如弈。我别先生江水头,相逢令子燕山陌。执手问讯何所为,却道高怀胜畴昔。雄夸酒赋老益神,傲兀林泉意多適。侧耳令我发狂叫,自顾胡为苦偪窄。此身一陷泥沟间,巢鷇何能奋毛翮。君归道我语家尊,行路崎岖半蜂螫。心有甬戈气口直言,那怪腾轩遭贬斥。不如且酌春江万斛水,高筑糟丘酿仙液。好待吾徒醉百场,千秋万世名何益。

景帝废陵

懊恼南城树已荒,何人封事筑回墙。当年若肯称监国,没世应须谥让皇。一穴龙髯

终断绝,两株荆树起悲凉。我思季札真千古,惆怅陵园晚色苍。

王子玠工部招游丰台作歌

丰台芍药贱如菜,千朵万朵满车载。初出一枝犹十钱,后来一钱少人爱。强半持上歌舞筵,高低乱插铜瓶内。红英紫萼赏者谁,花入京师亦无态。前年曾入丰台游,公子招邀此其再。下马竟坐千花中,匝地锦云目茫昧。初疑一脉脂水流,又如万叠红泉溉。园官携筐莽采摘,摧折徒教发深慨。园官向余前致词,此地于今属屯塞。赏花送酒已往事,试劝游人且心耐。停杯驱马过短篱,猎犬狺狺向人吠。

题黄俞邰千顷斋书册目

羲皇本多事,横空为一画。遂为文字祖,后来纷简策。贻祸到秦焰,诗书受奇戹。 汉兴稍搜辑,残缺良可惜。作者东西京,自是竞纂释。各为一家言,牛要几千尺。历代有撰著,纯杂理须辟。胜国重淹雅,名藩富经籍。下逮学士家,典坟亦充积。所嗟时文兴,古书相扞隔。盈箱未必窥,但取耳目赫。四海莽多故,遗编毁兵革。余尝入三馆,颠倒触履迹。散乱无全书,饥鼠饱永夕。牙签悉断割,缥缃为地席。小胥间盗窃,千万无什百。余欲叫九阍,笑者颇啧啧。执卷发长喟,谁为共考覈。归来蓬户下,敝簏恣怡怿。妄想宛委山,渔猎快夙癖。但愁十指短,难探海中璧。古人目十行,一览不再绎。我读未终卷,记忆悔忙迫。聪明天所限,人事况役役。意欲专一经,守约或有益。藏书羡黄子,塞屋地苦窄。浩瀚六万卷,丹铅尽先泽。父书既善读,而且保乱逆。江山有变迁,此书无改易。黄子固多才,孝思实无射。他时购遗书,造君千顷宅。不须鼍错来,边生吐胸膈。发君四库藏,光辉照金石。

子纶员外招同诸公东河泛舟作歌

哀东东门连夹城,城上角楼颇高亢。门外长桥跨大河,转粟轰轰车万两。上桥轮蹄莽纵横,争门人畜互击撞。常时送客扛篮舆,跼步欹斜防跌踢。今秋雨霁尘不飞,田郎招客泛清涨。听事临流足松竹,行厨及午陈脯酱。翻匙一饱循河千,突兀方舟此游创。连樯结缆排米船,绣缎红氍作行障。缘隄最爱草树齐,逆浪还怜鹅鸭放。岸边亦有高下楼,朱绔青蛾出相望。客欢船重风力微,北地操舟如奡荡。长绳并逐青驴牵,短篙漫忆黄头唱。五里一闸如面墙,下版横波不肯让。闸东更有双棹迎,日映帘泉屹相向。欢情烂漫履舄交,主人大呼倒官酿。一时供张皂隶趋,吾徒顾此神色王。京朝之官人所荣,池鱼中钩徒哢吭。开元选胜成故文,妄相缗钱曲江上。况复四郊暗戎马,咄嗟此游理亦旷。人生快意须目前,车壁空捶朱雀桁。诸君恋恋思绘图,田郎推我写图状。忠恕精神虽未工,和之大意我能相。寒宵放笔试绵蕝,指点谿山呼巧匠。

钱武肃王祠

表忠观倚圣湖边,坏道阴房剧可怜。几点土花香案上,一双蝴蝶殿门前。绝无宫监 来浇酒,时有游人此系船。吴越蒙恩当战斗,太平忘却五王贤。

湖上晚归

昨日寻山下棹迟,湖亭人静夜凉时。朝来也自山中返,碧浪红阑竟懒移。

水上箫声绕翠微,晚风吹絮恋人衣。无端催促城中去,暮雨吴山独自归。

九日泛舟登平山堂同次功辰玉箫云五叔定家兄

林木经霜叶乍飞,百年难得此晴晖。休嫌止酒心全减,不怕登山力尚微。病后逢僧 怜我瘦,秋残入寺觉人稀。天南众壑青如许,却喜前时策杖归。

陈玉璂

陈玉璂, 字赓明, 号椒峰, 武进人。康熙丁未进士, 官内阁中书。

同友登京口避风馆高阁望江题壁

衮衮登楼兴,披襟坐上头。果知天地大,不尽古今愁。孤塔烟中断,诸峰波面浮。 凭栏一长啸,明月夜横秋。

落叶

木叶惊微脱,相看惜故枝。一秋今古梦,万树别离思。入水飘无定,随风下每迟。 始知天地意,摇落总无私。

张鸿仪

张鸿仪、号企麓、元城人。康熙丁未进士、官永和知县。

安阳道中次雪崖韵

野雾苍茫里,寒碪远近间。溪明秋见石,云密树连山。木叶经霜落,渔歌倚棹还。 何时倦行役,小筑自闲闲。

黄之鼎

黄之鼎, 号讷庵, 元城人。康熙丁未进士。

西园雅集

结客从莲社,携琴过竹扉。莺花春欲老,京国梦初归。槛曲迟明月,台空落远晖。 一尊堪永日,莫自羡轻肥。

李默

李默,字湖翁,泉州人。康熙丁未武进士,官至肇庆总兵。有《吹剑集》。

上谷晤林羽夫

昔年曾在蓟门游,歧路东西二十秋。握手岂期惊喜半,论交转觉别离愁。风尘老大余青眼,书剑飘零笑白头。一忆故园松菊冷,归心乡梦两悠悠。

谭吉瑄

谭吉瑄, 字左羽, 嘉兴人。康熙己酉举人, 历官礼科给事中。

吊战场

祁连山下草、寂寞少人烟。魂魄千年后,还思渡酒泉。

寄怀维扬诸子

忆昔尝北征,挂席渡扬子。铁瓮城边王气收,三山明灭海云里。一夜西风入广陵,沸天歌地动芜城。千秋万载伤心地,明月高楼酒自倾。诸君意气动南国,甘泉山畔逢颜色。为歌长铗上君堂,感君倾盖开胸臆。高堂灭烛正留宾,燕歌赵舞欢无极。翠釜晶盘金叵罗,珠帘绮阁映微波。筵前未歇莲花舞,道傍忽听《骊驹》歌。骊驹不可驻,新知渐成故。杨柳落邗沟,佳人渺天路。江水东流北固高,冲风骇浪难飞渡。男儿三十未成名,今朝白眼向谁青。萋萋碧草江南陌,两度相思空月明。

廖腾煃

廖腾煃,字占五,号莲山,将乐人。康熙己酉举人,官至户部侍郎。有《慎修堂诗集》。

报恩塔

琳宫创自报恩年,突兀浮屠势插天。万井莺花随地见,九层金碧半空悬。远波帆影 秋风里,绝顶人行晓日边。最好三更铃铎静,镫光遥接大江烟。

初入贡院行署

层楼遥望越王台,五月披襟亦快哉。万舍秋镫铃柝静,三声画角棘门开。昔同群彦 青衫至,今拥中丞赤棒来。四十四年真一梦,冰壶涤笔有新裁。

郭九会

郭九会,字绎兹,猗氏人。康熙己酉举人,官临安知县。有《存斋草》。

燕山道中

燕地秋声起, 辞家忆自春。关山云外道, 风雨梦中身。客久知金贵, 途穷觉仆亲。

微名何足恋, 悔作远游人。

即事

扫地勤童子,开关忆故人。车来花外月,诗入瓮头春。好事耽幽僻,忘机任喜嗔。 常疑青白眼,终未避嚣尘。

重九前三日

休官莫道计全疏,千载风流在遂初。但使开笼放飞鸟,不须激水活枯鱼。归程预数 三冬雪,行李新添几卷书。白发倚闾劳望眼,浮云散尽见吾庐。

潘德徵

潘德徵,字道子,贵阳人。康熙己酉举人,由学正历官武定推官署知府。有《玉树亭诗集》、《贫居集》。

三月十五日雨坐

地僻无嫌雨,幽斋景自清。万峰烟际落,一鹭蓼边明。吟苦神还逸,身闲病亦轻。 晚来云渐薄,片月报新晴。

张端亮

张端亮,字寅揆,号退庵,蒙化人。康熙己酉举人,官潍县知县。有《抚松吟集》。

赠张汉冲先生村居

白发先朝客,丹丘处士家。修筠屯古翠,浅水籀回沙。箧启留侯帙,帆收客使槎。 一从高卧稳,梦老亦松霞。

不寐

乡思浓于酒,倾来讵易乾。坐驰千里短,愁结一宵难。晚叶吟风细,秋碪捣夜寒。 不知天上月,今夜为谁圆。

瓦角村山路见奇石

娲鼎何年泼余汁,化作狰狰神虎立。风雷一啸破溟濛,山鬼野狐应夜泣。耸肩侧视几回痴,百窍玲珑琢削奇。玉裂冰纹苔绣铁,祗留皴法米家知。高呼石丈石无语,石若有情应共吐。何事空山老岁华,暮迎秋月朝秋雨。爱而不忍便弃捐,以手拍之声铿然。谁信神奇有如此,故令冷落伴荒烟。我不能谈经令汝头自点,又不能大袖纳汝避俗眼。振袍且下深深拜,从此相思知不浅。

井鎡

井鎡,字待庵,文安人。康熙己酉举人,官山海教授。有《半学山房诗钞》。

寒食舟中

春风江上柳如烟,夹岸桃花远趁船。令节再逢寒食候,滩声不断石桥边。布帆无恙 随流水,明月多情媚远天。舣棹清宵临野寺,不堪钟鼓伴愁眠。

张紫文

张紫文,字原质,号集庭,澂江人。康熙己酉举人。有《罡吹亭诗》。

晤钱鉴涛

乱世身还在, 遐方子再过。几年收涕泪, 此日话关河。黔楚三生梦, 悲欢一曲歌。 肯来昆水上, 相共老渔蓑。

张云程

张云程, 曲沃人。康熙己酉举人。

春日偕友人集坦园

老至耽春色,浮生讬醉乡。懒师嵇叔夜,痴学顾长康。风柳初垂槛,山花远映墙。 不须嗟濩落,泉石足徜徉。

曹鉴章

曹鉴章,字达夫,号適园,嘉善人。康熙己酉拔贡,官万载知县。

赠魏交让

君有鸾凤质,超逸青云中。高蹈齐彭泽,达识比林宗。闭户益著书,草玄追遗踪。雄采振大雅,高音存古风。况乃崇明德,寥寥谁与同。层岩松桧林,幽谷兰蕙丛。根幹同山川,弱植难自丰。我怀景仰志,师资良可通。

杨白花

杨白花,何不飞来却飞去。江南三月春草芳,杨花飞去落何处。

杨花去不归,春风入绛帏。含情不语日初斜,愁杀江边杨白花。

春洲曲

微波潋滟澄空碧,紫陌春风漾春色。谁家女儿出浣沙,芳洲惊起双飞翼。双飞双宿 两鸳鸯,戏啄桃花锦浪香。忽伤荡子无消息,见此踌躇泪沾臆。

送友人之山阴

客路斜阳外,征帆去不停。过江秋水白,隔岸暮山青。旅雁霜前落,哀猿月里听。 扁舟探禹穴,几日到兰亭。

李光地

李光地,字晋卿,号厚庵,又号榕村,安溪人。康熙庚戌进士,改庶吉士,授编修。 官至文渊阁大学士。谥文贞。有《榕村集》。

和京江相国西郊偕行原韵

长信晓钟稀,白露涂寒楚。百执起居罢,归蹄乱禾黍。裴公未绿野,即辰欢啸侣。 池荷明夏残,河杨结风绪。谁忝京洛行,追陪惭马吕。提拂念衾裯,倾输忘龃龉。席地醉香 醪,从庖纷菜茹。亮节当朝钦,高标暇日举。芳音难属和,循诵祇含咀。

读书有感

西土有虎贲,于越聚君子。不逾三六千,国甲岂尽此。此其腹心者,熊罴不二士。 然后亿万多,无难臂指使。我论读书方,要道亦云尔。泛滥同飘风,精熟乃根底。汉人重专 经,宋人务穷理。

榕村

卜筑三经前,落成三纪后。游宦如涉波,邈不知其久。榕树加远条,杂植颇阴黝。 涧水无消添,稍复导源首。抗榭观遥山,辟亭通四牖。前轩及南舍,皆俯鲁侯茆。为此将藏 修,不量倡士友。薄遽遂周星,行复朝北斗。匪我老未休,命有驿神守。

王掞

王掞,字藻儒,太仓人。康熙庚戌进士,改庶吉士,授编修,官至文渊阁大学士。 有《西田集》。

虹友兄斋同汉槎夜话

海内争传季子名,相逢执手喜还惊。廿年塞外空归梦,一夕镫前似隔生。铁岭风沙 销战骨,金河笳鼓驻雄兵。知君具有凌云笔,得藉陈汤返汉京。

望岱

山色周遭信马蹄,岱宗高峙绝攀跻。巃嵸未许儿孙并,崱屴浑疑星汉齐。风定天门 悬日月,雨收石角挂虹霓。他年定拟穷游屐,秦观峰头倚醉题。

张鹏翮

张鹏翮,字运青,号宽宇,遂宁籍麻城人。康熙庚戌进士,改庶吉士,由刑部主事官至武英殿大学士。赠少保,谥文端。有《张文端公集》。

海船口夜泊

灏渺东风折柳条,涛声天半别魂销。苍茫野色迷津岸,明灭鱼镫趁晚潮。半枕易惊 三峡梦,孤舟谁念一身遥。思乡滴尽千行泪,愁听哀猿倍寂寥。

居庸关早发

谁道边城景物凄,三更斜月早闻鸡。光连古戍摇河影,塞逐清霜入马蹄。龙虎台高 秋色迥,军都山晓曙云齐。天公有意怜行役,雨洗征尘路不迷。

赵申乔

赵申乔,字慎旃,号松伍,武进人。康熙庚戌进士,官至户部尚书。谥恭毅,雍正元年追赠太子太保。有《赵恭毅公剩稿》。

洪都道中立春

摇落江城愧此身,惊心岁晚又回春。穷年草土愁依旧,胜地风云景渐新。息浪乘流 轻画桨,负暄吹黍见村人。但祈大有从今始,归向溪头撷野莼。

归舟

一棹乘流下,苍茫云树边。归心朝雨后,客路夕阳前。有梦知何地,无家欲问天。 半生飘泊处,应不受人怜。

关山岂历遍,知己竟何如。轻薄嗟行路,优游忆旧庐。无心谄富贵,有意访樵渔。 寂寂城东舍,诛茅愿荷锄。

庚辰仲冬内召感赋

七载投闲感圣恩,每亲药裹掩柴门。充廷岂乏鹓行侣,下秩何当凤綍存。散弃自甘 怜病骨,驰驱无计定惊魂。小臣进退宁须数,微悃谁能吁九阍。

陆陇其

陆陇其,初名龙其,字稼书,平湖人。康熙庚戌进士,官灵寿知县,行取四川道试

监察御史。赠内阁学士,谥清献,从祀孔庙。有《三鱼堂集》。

田家行

谁云田家苦,田家亦可娱。上年虽遭水,禾黍多荒芜。今年小麦熟,妇子尽足哺。 所惧欠官钱,目下便当输。昨夜府檄下,兵饷尚未敷。里长惊相告,少缓自速辜。不怕长吏 庭,鞭挞伤肌肤。但恐上官怒,谓我县令懦。伤肤犹且可,令懦当改图。阳春变霜雪,尔悔 不迟乎。急往富家问,倍息犹胜无。田中青青麦,已是他人租。闻说朝廷上,方问民苦荼。 贡赋有常经,谁敢咨且吁。不愿议蠲免,但愿缓追呼。

赠姚亘山

丈夫志四方,此言须细详。四方虽云乐,何如在家乡。况复多变态,前途更难量。 网罗到处有,不可不慎防。所以先圣训,教人善行藏。进礼退以义,穷达视彼苍。滔滔虽皆 是,我必择康庄。人生贵知道,岂必登庙廊。君不见诗人,拳拳十亩桑。子陵老布衣,咄咄 胜侯王。尧夫安乐窝,至今仰耿光。此中有真味,难与世人商。君诚熟反覆,知吾言不狂。

蔡启僔

蔡启僔,字昆旸,号石公,德清人。康熙庚戌一甲一名进士,授修撰,历官左春坊 左庶子。有《存园草》。

登齐云洞天

壁立峰千仞,云开石径斜。树身无岁月,人影带烟霞。耳目违尘事,仙凡自一家。前踪犹可问,香饭等胡麻。

徐乾学

徐乾学,字原一,号健庵,昆山人。康熙庚戌一甲三名进士,授编修,官至刑部尚书。有《憺园集》。

公子行

翩翩佳公子,客华耀朝暾。门盛崔家戟,家传汉相尊。弟兄才调俱第一,六龙八骏何足论。哲昆射策得高第,少弟亦邀天子恩。连镳俱过上林苑,纵辔时经铜马门。铜马门前铺绣埒,五侯七贵多交结。曾从复道入南宫,还向建章过北阙。归来寒拂紫貂裘,银烛金尊销百忧。美人燕赵迎歌馆,狎客新丰上酒楼。酒楼歌馆回波舞,曲成便付梨园谱。雁柱银筝乐未央,鬘鬋姱容何嫮妩。行觞伫立久徘徊,但愿公子朱颜开。乍听金梁莺语细,还看珠履雁行来。雕轮华毂无时绝,子云笔札君卿舌。回骑多过主簿家,扫门要使监奴说。座中醉客辖偏投,堂上留髡烛已灭。鹦鹉遥遥自陇西,名花往往来南粤。鹦鹉名花何处藏,前头广榭后雕房。飞甍日丽鸳鸯瓦,绣户香消翡翠床。窦融厩室自连互,马防观阁生辉光。甲第云霞雄帝里,田宅膏腴满故乡。故乡佳丽一相忆,桂楫兰桡来往亟。伐鼓南来驿路迎,扬舲直下通津寨。甘宁锦缆弃不收,鄂君绣被欢无极。玉津园内鸟欲啼,伯通桥下人如织。更植乌椑

金谷帝,常穿曲沼芳林侧。据坐胡床时疾呼,曲韝绿帻平头奴。张翰善赋周小史,霍氏群知冯子都。横行讵畏洛阳令,争道还欺上大夫。转日回天真莫比,自言富贵长如此。未诵应璩《百一诗》,宁晓宽饶切谏语。尚冠里中鸮乱鸣,廷尉门前雀栖止。梁松得罪岂无因,张让吊丧非得已。霆雷倏忽下彤墀,远戍穷边悔已迟。东朝语不闻都尉,旧馆人皆去魏其。白发高堂犹议遣,斑衣爱子尽相随。金阙回看肠已断。玉关生入梦堪悲。陂田苑囿输公府,厮养髯奴向北陲。安国灰然那可待,子卿羝乳竟何时。从古豪华如转烛,奔车覆辙看相续。海鱼有日困泥沙,破巢之下无完族。吾慕李子坚,身是司徒儿。变名入公府,不遣同舍知。吾慕袁夏甫,国相以为父。谒吏不见通,却车更徒步。古人高踪不可求,今人龌龊难为谋。且漫垂鞭踏歌去,白云无尽香山秋。

怀汉槎在狱

吴郎才笔胜诸昆,多难方知狱吏尊。谁为解骖存国士,可怜一饭困王孙。蝉吟织室 秋声静,剑没丰城夜色昏。闻道龙沙方议谴,圣朝解网有新恩。

金谷

河阳金谷涧,涧水尚潺湲。当年开宴处,台馆不复存。缅想石卫尉,声势何燀赫。 海岱置邮符,荆扬来贾舶。苍头衣绮裘,侍婢遗朱舄。锦障烂如云,珊瑚碎不惜。造膝结贾 谧,望尘拜广成。富贵可长保,讵知祸患婴。多财信为累,三叹涕泪横。至今歌舞地,萧飒 鸺鹠鸣。吾闻伏波言,贵者可复贱。盈冲无定端,瞬息市朝变。钱币宁祸人,物聚理必散。 寄言夸毗子,豪华非所羡。

博兴

我行適青齐,秣马博兴城。城门昼常闭,亭午无人行。土室筑道周,云是锦秋亭。昔时游赏地,零落存两楹。潴泽荒蒲稗,严冬结层冰。狐狸窜荆棘,鸱鸦群悲鸣。入城问父老,叹息谓苦兵。博兴数十户,庐舍悉已倾。今兹二三载,大守多横征。府帖昨夜下,搜括诸穷氓。睅目一吼怒,如闻虓虎声。苛政不一端,有土不得耕。县令贤且惠,蹔乃安其生。不然为盗贼,死重名正轻。听此策马去,恻怆难为情。

宿迁

槲叶从风满路吹,暮秋景色更凄其。残阳城角锺吾国,细雨河边项羽祠。驻马呼童 沽浊酒,下阶携客觅残碑。浮云西北连丰沛,不尽英雄万古思。

赠友

十载江湖稳钓矶,跨鞍绝塞欲何依。草荒白帝家难问,瓜熟青门事更非。述作千秋 身未老,悲歌万里客将归。并州风劲霜如雪,送尔离亭泪满衣。

送座主孝感熊公省觐

孝感先生天人姿, 泰山岩阿长桂枝。汪汪千顷标襟期, 横经身为帝王师。九重圣德

今娲羲,时时召对铜龙墀。殿高语细人莫知,下朝双藤当户搘。焚香暝坐到日目施,学也立雪间披帷。难字进问杨亭隈,奥篇隐帙了不疑。窃喜马郑亲规随,先生正色还相诋。谓此章句胡尔为,渊源当溯洛与伊。慎勿误蹈荀卿疵,小子再拜敢自隳。拟策驽钝烦箝锤,一朝北堂劳梦思。拜表屡颔天子颐,建章日影摇罘罳。温诏暂许还南陲,锋车刻日来休迟。敕赐天厩飞龙骑,珠鞍金络光陆离。道旁观者争歔欷,更闻上林果累累。赤瑛盘为高堂遗,绯袍彩袖正相宜。臣忠子孝兼得之,古来盛事谁如斯。先生遭逢一何奇,吁嗟乎!先生遭逢一何奇,《白华》《由庚》和笙诗。

分韵赠施愚山

海内风流属钜公,青帘白舫五湖东。来寻耆旧兵戈后,遍历溪山暑暍中。猿鹤难忘 宛上宅,烟霞欲号蒋陵翁。蓬门幸得高轩至,长记琴壶一夕同。

送待御念东先生

徵书昨岁遣蒲轮,一载君恩许乞身。万里晴空余老鹤,五湖浩荡有潜鳞。同时祖饯倾名士,到处谿山访异人。却笑汉廷疏广去,赐金夸耀里闾频。

年光日宛晚客情多,白首尊前发浩歌。天上岁星知曼倩,人闲居士问维摩。久期汗 漫游溟渤,乍喜飞腾谢罻罗。疲马萧条灞陵路,任他醉尉夜相诃。

温泉十六韵

灵液流芳甸,温涛注苑墙。泽因仪凤丽,源为濯龙长。地脉烟霄上,天河日月旁。甘分九华露,润浥五云浆。仙鼎偏能沸,丹砂本自香。从官瞻豹尾,遗俗问渔阳。上善尊川后,涵虚让谷王。醴泉逾建武,神水迈咸康。黄屋山当牖,苍池石作床。碧莲开藻井,翠荇接芝房。圣母时来幸,怡颜乐未央。蠲疴功莫尚,驻老孝弥彰。调剂中和气,渟涵绀洁光。四时常补益,一节阅炎凉。本不容瑕垢,何妨示激扬。濯磨思自效,精白奉吾皇。

李振裕

李振裕,字维饶,吉水人。康熙庚戌进士,改庶吉士,授编修,官至户部尚书。有《白石山房集》。

祝映碧先生八十

圣朝求旧广蒲轮,文献千秋道自尊。花以世家仍绿野,瓜因胜国恋青门。壁中遗册秦灰后,柱下藏书鲁史存。著述等身犹未了,摩挲松老长灵根。

止宿王山史山馆

云中白鹤自高翔,有约冲寒到草堂。法物依然藏汉魏,主人自在卧羲皇。药苗入箸 霏霏白,橙子垂枝的的黄。绝似江南风味好,琴书一榻枕沧浪。 春田行

村花未放溪柳含,春田霏霏晓气酣。侧身一望浩无涘,不见田塍见湖水。远树疑摇雪浦中,轻烟恍拂银塘里。湖水明,镜面平,縠纹才没靴纹生。一行雁影掠,一片螺峰横。似水似非水,迷离澹沱移我情。村甿戴箬荷鉏立,直讶渔师看风色。可有津边问渡人,鸭头浓绿翻江国。水亦不可画,湖亦不可航。春水骀荡日渐长,四月麦花吹浪香。

汪晋徵

汪晋徵,字涵斋,休宁人。康熙庚戌进士,官至户部侍郎。有《双溪草堂诗》、《游 西山诗》。

南楼

庾公兴不浅,宾从满高城。何意南楼上,依然秋月明。清谈追往事,好客见平生。 江外风帆远,登临万里情。

耿愿鲁

耿愿鲁,字公望,号又朴,馆陶人。康熙庚戌进士,改庶吉士,授编修。有《韦斋集》。

送孔心一观察之任粤东

三月旌旄下柳塘,使君从此领炎方。双江棹接榕溪近,五岭云横梅驿长。去路秋山鸣翡翠,故人春雨梦桄榔。鲸波已息狼烟静,坐镇还看化远疆。

新莺

翠羽翩翩耀锦衣,乔林经日恋春晖。回翔自有东风便,不向花阴冷处飞。

赵文煚

赵文煛,字玉藻,号铁源,胶州人。康熙庚戌进士,改庶吉士,授编修,历官侍讲。 有《粤游草》。

舟过峡江

人家寥落尽,舟次夕阳间。一水中分峡,孤城半在山。空天闻虎啸,僻壤识民艰。 独有飞飞鸟,衔鱼过艇闲。

使还渡江而归舟中有作

大江流建业,画舫趁春归。树里青山出,洲前白鹭飞。孤城烟细细,千里雨霏霏。

咫尺皆戎马,潇湘未解围。

天气行来晚,扁舟下远汀。林深隐微火,岸阔点疏星。静夜三更冷,长江一气青。 欲寻人处泊,戍鼓乱津亭。

陈梦雷

陈梦雷,字则震,一字省斋,侯官人。康熙庚戌进士,改庶吉士,授编修。有《省 斋遗稿》。

华严岭

五岳峙方州,台峰争鼎辟。叠嶂凌空冥,苍茫烟雾隔。东麓耸华严,奇兀分主客。远望但阴翳,绕趾惮蹑屐。飘风怒崩崖,奔泉咽乱石。径转渐窈深,千寻列桧柏。杂树纷榛芜,衰草互狼籍。披荆历磊砢,天地忽迫窄。群峦相束缚,嵯峨悬峭壁。林杪逗日光,掩霭如将夕。出谷谓穷际,危峰尚如戟。其巅若可跻,萦回极盘躃。四顾寂无声,樵苏不留迹。落叶堕空山,如闻人咳唶。草树此俱枯,穷寒绝地脉。清非神明都,险实虎狼宅。仆马俱已疲,停鞍聊躅踯。俯视所历峰,点点但空碧。日昃下层冈,遥遥度阡陌。居人惊我来,相问咸跛。此山实奥阻,往来道不惜。鸷兽恣吞噬,壮夫亦裂魄。回首意悄然,雄怀为不怿。丈夫志四方,乾坤宁跼蹐。登临戒高深,步趋亦谨择。既非事王程,胡为轻自適。高堂方寸心,寒暑未安席。履坦犹多虞,闻此心魂坼。戒哉人子躯,无事慎行役。

海门行

南溟毒沫驱潜鳄,跳浪扬鬐霾漠漠。夜半星飞白羽来,腥风吹断海门钥。海门岩邑小如罂,枕山砥澜六鳌擎。五千犀铠濯龙鳞,期门万骑簇饶钲。谁柄长竿惊一蹶,钩沈饵冷逐波月。天堑不戒突艨艟,孤壁烟寒炊鼠骨。太阴压营城头流,残角无声听泣鸺。将军碧血淬吴钩,饥乌日晏栖骷髅。秋老重泉气未衄,灵旗偃偃长蛇腹。魂招不来马革枯,酸心北向啾啾哭。

华藏经堂阳雨

华藏经堂佛地尊,晴光步去倏冥昏。雷声催雨千峰暗,云气沈山万树吞。泉入急流 添暗响,崖悬新绿湿苔痕。须臾霁色饶清韵,风卷松涛出寺门。

东行口占

模被登车谢九阍,三年囚首一身存。贱同厮养孤臣分,生到边庭圣主恩。籍削寄名 归卒伍,魂销凭梦返家园。白云南向肠凄断,鹤发东风正倚门。

慷慨休歌《行路难》,安排随地圣恩宽。牛车未免烦田老,升斗依然仰大官。瘦骨可堪边塞苦,敝裘宁耐朔风寒。临歧不洒伤心泪,忧国当年泪已乾。

风尘三载羽书驰,填海曾闻精卫悲。岂意上官专草稿,翻令巷伯叹南箕。铄金祗为

招群忌,投杼何当慰母疑。行矣帝乡犹未远,还胜凝碧望阍时。

上总宪魏环极先生百韵

圣世天心眷,熙朝帝赍良。太行高萃气,恒岳远锺祥。奕叶任城裔,宗风上党昌。 经谈新疏义,乐赐旧宫商。鹤跱琅玕管,龙雕锦绣肠。书升多士庆,胪唱五云飏。委珮趋鳷 鹊,簪毫入凤凰。麟台藜火灿,鳌禁襭袍香。特简论思任,先观品节刚。紫垣封墨敕,青琐 肃蒲囊。道大容应寡,心闲隐不妨。东山聊啸傲,泌水自徜徉。家食声逾峻,畴咨典聿煌。 都人钦硕德,僚寀式清望。持斧南床重,升阶白笔庄。惠文腾鹗隼,骢马避豺狼。爰进崇班 秩,仍分秉宪行。丰裁清柏署,宠擢锡银章。课绩优三辅,分猷振八厢。军需飞羽箭,版部 急糇饣量。佐计烦区画, 纡筹问积仓。阃臣陈凯奏, 睿虑廑官常。特总乌台绶, 频萦苍佩纕。 朝端升正气,舆论凛秋霜。执法宵垂耀,荧精夜吐芒。高平称佐汉,秘监美匡唐。抑抑伊周 度,雝雝金玉相。泰阶资鼎鼐,清庙宝圭璋。爱国怀如负,怜才恐未遑。后生多奖借,谫学 荷汪洋。同志当年盛,乐群旧事芳。授书曾设帐,问字许登堂。丘垤欣山仰,驽骀附骥骧。 日归辞几席,贻赠富琳琅。楚蜀惊嵎虎,苍溟逞怒螳。罿罦悲雉触,矰缴滞莺翔。饮泣瞻宸 座,甘心赴国殇。建旗孤羽翼,遯迹讬缁黄。方寸哀徐庶,虞渊愧狄梁。蜡书途梗塞,雁足 信微茫。隐忍拘囚辱,蹉跎志节僵。既伤沈陷阱,兼痛负门墙。召伯平淮服,高宗靖鬼方。 披云欣觏日,席藁愿衣桁。旷典怜凝碧,殊恩宥夜郎。感深怀更切,遇蹙志难忘。太傅词多 激,监门绘欲将。九阍非易达,尺幅乞垂详。南国阗钲鼓,西陲缺斧斨。当机迷胜算,纵敌 费张皇。险弃鱼凫地,防疏鸟鼠乡。茭刍糜七泽,弩矢钝三湘。痈养滇黔害,烽连岭峤创。 楼船稽扫荡, 鲛鳄恣披猖。棨戟韬钤短, {艹佳}苻啸聚强。最怜中泽雁, 重作尾赪鲂。牧守 纷渔猎,闾阎竭篚筐。兜鍪罗馈饩,孥息啜糟糠。以此薪延火,堪嗟肉补疮。玺书宽越尉, 铁券虑怀光。逸兕犹奔柙,飞鸮岂食桑。拔稂防引蔓,削毒制余疡。蕃甲徵回纥,金城护氐 羌。驼鞍驱翠珥,毳帐拥红妆。祗可金缯结,宁堪子女偿。桀骜虞肘腋,狡狯隐膏肓。宵旰 边庭患,空虚内地戕。茧丝穷蔀屋,璧马殚宣房。饕餮崇方岳,鹰鹯布畛疆。但闻增户口, 谁念赈流亡。塞下赀郎滥,洛中贿道彰。难言釐簠簋,应自长蟊蝗。人困疑情涣,时安幸岁 穰。即今歌《硕鼠》,深恐叹牂羊。寒谷瞻朝旭,穷荒企帝阊。铎犹悬广殿,赋少讽长杨。 博陆舆台耀,平津邸阁张。封章仗马寂,车骑濯龙忙。薰灌愁城社,吹嘘叹灶炀。杞人应有 恨,漆女自多伤。砥柱资元老,擎天藉栋梁。近传思渐疏,共喜股肱匡。丹陛心方注,苍生 望未央。绣衣看赫奕,豸角倍铿锵。本正末斯举,源清流自长。持筹袪蠹急,攘外抚中康。 砥俗先廉耻,端原始庙廊。明聪开圣霁,果断振乾网。次第修封事,从容补衮裳。绛驺威石 室、彩凤哕朝阳。胆落方州镇、楼泥戚畹庄。清风瀰宇宙、化日扫欃枪。谔谔真章奏、桓桓 大赞襄。人伦翘领袖,国是壮金汤。冀效刍尧献,因忘草野狂。风谣陈记室,掇拾备青箱。 仁晋丝纶席, 行纾经纬藏。万邦歌保定, 六合架梯航。殿陛辉干羽, 要荒入享王。 鲰儒欣景 运,鼓枻咏《沧浪》。

戊午春入都请罪施介平又韩追送江干诗以谢之

葩卉谢椿林,幽篁挺清阴。不历寒暑节,焉知君子心。握手少年交,相期各忠厚。 嘘沫幸相濡,意气复何有。遘会不可常,意气自可长。共济涉波险,咫尺不相将。波险幸共 越,同舟亦未覆。手足不相藉,忠信亦可睦。夭夭桃李花,荣落无久妍。疏者各飞扬,亲者 强周旋。周旋一何苦,色态一何诩。恩深恐累深,此道孰终古。交君兄弟晚,乃在乱离后。 堂上有贫交,入门多素友。与君结识时,心口无侈词。平淡终久要,今昔未参差。春风吹江 水,客子心万里。追送江之干,贻赠馨如芷。贻赠匪所珍,所珍人意深。君亲师友恩,念之 涕淫淫。明发隔云山,相思日辽阔。游子念高堂,藉尔问饥渴。

登清源山和蔡虚斋先生韵

揽胜同登万仞颠,凌风遥望海门天。千家村郭群峰绕,一片飞云远树牵。古寺僧还除藓径,空山客到觅清泉。东南战气今应息,诗酒何妨庆有年。

赠山阴将陈中准

铜柱天南喜奏功,承恩飞将出云中。却移浙水平潮弩,重试燕山饮羽弓。画角晓催 龙首月,牙旗秋卷雁门风。黄花岭外烽长静,缓带轻裘好射熊。

林麟焻

林麟焻,字石来,莆田人。康熙庚戌进士,历官礼部郎中。有《玉岩集》。 琉球竹枝词

手持龙节渡沧溟,璀灿宸章护百灵。清比胡威臣所切,观风先到却金亭。徐福当年采药余,传闻岛上子孙居。每逢卉服兰阁问,欲乞嬴秦未火书。日斜沙市趁墟多,村妇青奁藉绿莎。莫惜筹花无酒盏,人归买得小红螺。三十六峰瀛海环,怒潮日夜响潺湲。楼西一抹青林里,露出烟萝马齿山。射猎山头望海云,割鲜挏酒醉斜曛。纸钱挂道松楸老,知是欢斯部落坟。庙门斜映虹桥路,海鸟高巢古柏枝。自是岛夷知向学,三间瓦屋祀宣尼。王居山第兔园开,松枥棕花倚石栽。多少从官思授简,不知若个是邹枚。奉神门内列鹓行,乞把天书镇大荒。唤取金縢开旧诏,侏亻离感泣说先皇。閟宫甍桷压山原,将享今看几叶孙。二十七王禋祀在,釐圭锡卣见君恩。译章曾记莋都夷,槃木白狼归汉时。何似岛王怀圣德,工歌三拜《鹿鸣》诗。宗臣清俊好儿郎,学画宫眉十样妆。翘袖招要《小垂手》,簪花砑帽舞山香。望仙楼阁倚崔嵬,日看银山十二回。笙鹤彩云飞咫尺,不教弱水隔蓬莱。

纤腰马上侧乘骑,草圈银钗折柳枝。连臂哀歌上灵曲,月明齐赛女君祠。

久稽异域岁将徂,自笑流连似贾胡。三老亦知归意速,时时风色相桐乌。

塔山观牡丹

催放鼠姑花信风, 锦茵银烛照鞓红。何当澹月蒸恩寺, 传遍新词到六宫。

品题国色总寻常,姚魏争夸压众芳。不是宣和翻旧谱,何人解赏女真黄。

曾华盖

曾华盖,字乃人,号喟莪,广东海阳人。康熙庚戌进士,由知县历官吏部员外郎。 有《鸿迹》、《猿声》、《楚游》、《征车》诸集。

河口晚望

渡口堪晴望,闲行踏软莎。夕阳鸦背满,秋意雁声多。野树然红叶,村篱蔓碧萝。 晚来清吹发,渔笛起沧波。

南安楼寓

陌上杏花残,楼头春色阑。愁随芳草遍,梦入雨声寒。作客风波苦,依人啼笑难。 自怜双鬓影,三月滞南安。

吴瑾

吴瑾,字开士,一字璞怀,孝感人。康熙庚戌进士,历官刑部员外郎。有《紫石山 房诗集》。

客舟

一自辞微禄,蹉跎又四年。客舟无故旧,跋涉有山川。树色斜阳外,溪光倒影边。 楚山望不极,樽酒向江天。

黄任

黄任,字志伊,号逊庵,元城人。康熙庚戌进士,历官刑部主事。有《坦斋诗钞》。

单父

不见宓子贱,空登单父台。玉琴已绝响,鸿雁有余哀。杼轴南人困,河渠东国灾。 春风催解冻,处处尚蒿莱。

人目寄杜少汗朱

微风晴影散花砖,社鼓傩歌动野烟。春到柳边才七日,人怀河上已经年。伾山芳草 堪怜后,瓠水桃花未发前。好著一鞭来草舍,莫教愁对絮漫天。

移枕

落红飞絮满绳床,移枕清阴背草堂。向午梦回山鸟乱,隔墙风送菜花香。

王士祜

王士祜,字叔子,一字子侧,别字东亭,山东新城人。康熙庚戌进士。有《古钵山 人集选》。

同舍弟和李退庵侍郎读水经注忆洞庭之作

相思何处折芳馨,望断黄陵旧日亭。秋水依稀闻落叶,楚天仿佛见扬灵。洲边子戍三春绿,楼外君山一带青。太息云中君在否,不堪重问道元经。

赋得扬州早雁

隋隄烟柳尚参差,目送寒芜见雁时。浦树惊秋零暮雨,江楼横笛起凉飔。为辞霜雪轻千里,此去潇湘近九疑。回首故人经岁别,楚天摇落重相思。

阁上坐雨望敬亭

楼外青山碧四围,荡胸云气欲沾衣。愁中碧草侵阶长,望里春禽接翅归。闲倚枯藤 清兴极,漫倾浊酒赏心违。苍松翠筿空如画,怊怅烟岚屐齿稀。

早过奔牛

枫叶萧萧露气清,菰蒲猎猎早潮生。扁舟跂脚闻风水,便有长江万里情。

郭琇

郭琇,字瑞卿,号华野,即墨人。康熙庚戌进士,由知县官至湖广总督。

大行太皇太后挽辞

弥留鸾驭日, 遏密万方齐。地惨冰封树, 天寒雪作泥。凤归缑岭北, 月落蓟城西。 天子居庐久, 烟迷柳外隄。

枢星不复见,犹自恋慈帷。抚有河山胜,长含风木悲。璇宫香未散,珍膳视无期。 依旧春光遍,青芝发九枝。

邵嗣尧

邵嗣尧,字子毗,猗氏人。康熙庚戌进士,由知县历官参议道。

谷口观云

万壑晨云白, 联翩出岫扶。不知为雨后, 还到故山无。

王无忝

王无忝, 字夙夜, 孟津人。康熙庚戌进士, 由行人历官金华知府。

秋日游龙潭寺

习静寻山寺, 息心戒浪游。云藏嵩岳树, 水泛孟津舟。听梵来龙母, 鸣钟静石楼。 佛奴好相伴, 来往入高秋。

陈见智

陈见智,字体元,号力庵,曲阜人。康熙庚戌进士,历官金华知府。

虎牢关

百战成皋地,中原第一关。大河回九曲,少室互重山。风雨崤函外,人烟巩洛间。 往来凭眺处,回首已苍颜。

叶燮

叶燮、字星期、号横山、嘉善人。康熙庚戌进士、官宝应知县。有《己畦集》。

题平湖沈客子燕京春咏后

京洛何妨拥鼻游,欺他富骆斗银镂。景龙新敞鸾台署,底事云卿衣故裘。

残杯忽忆帝城春, 曾逐轻蹄十九人。淮上黄芦江上雪, 凭君说是赏花辰。

送王阮亭宫詹祭海还朝

使节天边转,韩碑读罢还。挹泉酬主眷,探袖出民艰。帆没依依树,装轻个个山。 南枝留不住,高咏过重关。

瘗璧恭成事,祠坛异碧鸡。蛮方流雅乐,玉陛返桓圭。激水从天上,扶桑向使西。 圣朝严俎豆,到日拜封题。

从万杉寺循麓迤逦而东过开先寺始见瀑布注为龙潭入山第一大观也

崖倾松风奔,石黝苔花湿。迎我一片云,瞻前已后失。珠宫束丛峦,交倚竞铩植。 万株千尺松,阳乌畏其逼。阴森雨忽飞,出林仍杲日。震霆云木间,举首惊电疾。闪烁九日落,界空无阶级。疑投玉女壶,将无天汉溢。噌吰万石钟,笙竽声并一。一一旋湿云,大珠小珠逸。忽折堕阴崖,澎湃漱巨厔。蛟龙鬼神来,视听爪发栗。何来乡里儿,大书石上刻。 陈陈污岩窦,山林遭辱墨。愧无酬名山,惟有长太息。

登五老峰自一峰二峰至中峰最高处

长江万里岷蜀来,彭蠡派汇天南回。巨川交叉東宇宙,庐山握纽真雄哉。左揽江流蜿蜒如鞶带,右衔湖影滟潋如螺杯。揽带衔杯昂钜首,俯视古今王侯将相,无异蜉蝣与尘埃。昔年我登日观峰,秦皇汉武如梦中。往者又登天子鄣,轩辕炼丹无乃妄。又曾一登太室颠,北邙漠漠迷林泉。无如此老蟠踞襟带互天下,我今直上睥睨目欲无全天。初登一峰峰犹迩,十步九折举堪趾。二峰初登峰削成,老猿却步狙公惊。中峰才上见全楚,九点齐烟何处所。谢朓惊人不足夸,灵均欲问将无语。君不见千牙万戟蹲舞跪立群少年,拥卫老人支颐兀坐历瞬黄农虞夏忽没焉。入海空闻不死药,山头一息长绵绵。云衣千族绚异彩,流泉百道华池在。乌兔长供无尽镫,举头把臂苍苍宰。庐山面目是耶非,百转千回非所思。纵饶笔底庐山句,不是当前面目诗。山半有老人峰。

答林西仲

著作穷愁寄此生,风波悟得死生情。西仲在闽,濒死者数。也知李广功名薄,不为 虞翻骨相清。绣岭斜阳伤立马,断桥斗酒怅闻莺。明朝解缆遥天际,别馆琼花好听筝。西仲 别去往扬州。

京口作

朔风动地大江鸣,犹说南徐北府兵。铁锁几人筹异代,布衣终古悔成名。江山无限 渔樵计,木叶频惊关塞情。试上高楼凭四望,不禁泪下愧平生。

杨花

小蛮腰瘦不胜情, 断粉飘云殢舞裀。莫便漫天飞不住, 楼中尚有未归人。

循北山历虎跑登南高峰

壁峭悟径穷,岩开忘蹊转。杂篁修涧鸣,幽葩石栈展。逶迤不知疲,曲折互迎遣。 啾啾鹍鸡音,呦呦麏麚纂。朝曦跃重湖,晶光凌绝巘。谷窅响易哀,林委指靡显。迅瀑激木 末,笙镛互流衍。穷瀛揽带间,悬象措掌辨。轻举谅爽期,沈忧藉暂免。知音贻同怀,良贶 岂云浅。

春日泛湖登孤山

晓策遵兰渚, 挈侣扬方舟。舟行溯晨凫, 偕我翔中洲。轻阴散浮屿, 澄漪碎孤丘。

幽怀戛世虑,冥契惓前修。褰衣度石濑,摄袂凭山楼。荒祠临回波,磴道折渟流。绪风摇丛绿,薄阳感鸣鸠。遥渚蒲渐生,周涂兰已稠。携我言怀侣,景昔抗志俦。女罗穆修风,梁木 邈难求。喟焉理归榜,去矣心迟留。

同德清徐方虎钱塘张步青东阳赵湛卿登永嘉江心寺浮屠

鹫宫兀突扪银河,界破青冥一雁过。名士登高双泪下,故人回首万峰多。新传蜃海 销兵甲,若个渔矶卧薜萝。尺五去天知不远,凭君才调问如何。

卢道悦

卢道悦,字喜臣,号梦山,德州人。康熙庚戌进士,官偃师知县。有《公余漫草》、《清福堂遗稿》。

相国寺旧石

一官七载余,三来相国寺。入门孤石存,慷慨笑相视。叹此磊落材,沈埋清净地。抑郁归僧房,精灵入梦寐。修髯伟丈夫,长揖就客位。气象既轩昂,言词复清利。感君见爱深,为君说遭际。家本大江东,来自宣和岁。维时久太平,君王尚游戏。园囿象山林,穷工极点缀。西北献苍鹰,东南贡翡翠。徵求及闾阎,草木皆为累。乃随花石纲,挺身入大内。重瞳顾之喜,声价迈俦类。曾下米颠拜,遂入清流队。王蔡势烜赫,莫能相招致。承恩曾几时,沧桑出不意。童贯开边衅,灭辽失长计。金人遂渡河,长驱无所忌。二帝继蒙尘,邦昌窃神器。恐被伪命污,空门暂逃避。初非爱金仙,迹与心相背。谓我事浮图,贤者苦责备。悠悠五百年,永为世人弃。所望有心人,破格相磨砺。载归上苑中,依然堪位置。斯言感余心,顿下穷途泪。方图倾所怀,梵钟惊午睡。

樊初荀

樊初荀,字佚,沁水人。康熙庚戌进士。

龙泉寺

龙泉岩上寺,杏谷日边霞。夜瀑晴峦雨,春镫白雪花。磬浮松月小,关掩岭云赊。 仄径穿林细,轻烟拂树斜。东风迟暗草,暝色滞飞鸦。慧远溪前路,樵苏数十家。

王庭诏

王庭诏,字宣子,夹江人。康熙庚戌进士。有《耕余集》。

寄家书

一函游子泪痕封,寄去云山几万重。君到鹤洲江上望,数椽茅屋几株松。

葛元福

葛元福,字响五,号谦斋,德平人。举人,官当涂知县。有《种花主人稿》。

秋日东郊

霜飞九月楚江清,闲眺溪山别有情。鸥鹭几行依浦岸,松杉一片送秋声。寒烟漠漠 疏林碧,微雨涓涓落叶轻。日暮归来荒径曲,石田回望野云平。

晓起

起看庭前花,渐欲舒红萼。不嫌缓缓开,但愿迟迟落。

【卷三十七】

顾贞观

顾贞观,字华峰,一字梁汾,无锡人。康熙壬子举人,官内阁中书。有《纑塘集》、 《积书岩集》。

专诸塔

倚胸交戟事谁怜,埋骨犹临大道边。结束新春儿女队,苍凉古巷姓名传。浮图旧俗还仍汉,匕首遗谋意误燕。细饱炙鱼三月味,只应身寄太湖船。

浒溪行

溪口白云晴不归,溪边红雨沾人衣。老渔收罾坐钓矶,人家卖酒开双扉。槎头鳊老鳜鱼肥,短蓑藉草相因依。欲醉不醉烟霏微,去与乱鸦投落晖。

雨止纑塘书舍抵暮无一人过桥上者

山浅雨亦深,烟光暮如积。窅然清池上,蹔与尘土隔。倚杖玩浮沤,凭阑数归翼。 无生复奚灭,有动随所息。磬响时一来,怀哉岩岫客。愿言依此境,共对香镫夕。

春夜大雪念储氾云宿舟中诗成黯然兼寄应云皆人兄弟

百里非远涉,忽嗟行路难。篷窗半夜冻,积雪摧樯竿。念子拥衾坐,知余抚枕叹。 吴中文翰侣,公宴方极欢。暖响迷玉漏,晶辉莹珠盘。谁持一尊酒,慰此孤舟寒。前路逢二 谢,客秋应少宽。平生倦水宿,历历惊风湍。

开先漱玉亭

壁立双芙蓉,正临无底谷。谁挥修月斧,尽削银河曲。倒洒万斛珠,翻飞千寻玉。 有龙蟠其下,喧极眠更熟。纵横题石字,但见莓苔绿。洗钵注军持,余生此焉足。

灌园

不自量筋力,求为人灌园。意惟营一食,迹若避群喧。谁遗五色芝,服之诧腾骞。 奈非尘埃种,移莳安得蕃。还将理菜畦,膏泽资泉源。黾勉试操作,编篱复插援。早非和露 茁,晚菘凌霜翻。但从采掇便,未觉烹饪烦。心形诚苦疲,既饱亦轩轩。向读神农书,近闻 老圃言。

夜闻梵音

一镫山牖出,隔竹露光泫。坐听香台人,《法华》中夜转。清泉漱寒玉,细入吴音软。嚼蜡况横陈,凡襟何时遣。

秋晓登沧浪亭呈宋中丞

初日上东南,林亭空宿翳。草香珠露重,的皪侵衣袂。唱杳曲池菱,吟余小山桂。 犹闻遗翰墨,但惜沈碑碣。望古情已深,怀贤感亦系。由来澹荡人,别作流传计。翕赩贱原 尝,虚徐狎庄惠。谁陪飞盖游,属和高文丽。

曹鉴平

曹鉴平,字掌公,号桐旸,嘉善人。康熙壬子举人,官内阁中书。

长干行

妾冢旧住古长干,荡子风涛十八滩。一逐江潮去不返,年年江上孤帆远。正是离人 肠断时,湓城月出浔阳晚。

长安上巳篇

二月驱车到燕市,又见春光逢上已。氤氲细雨度轻风,吹遍郊原桃与李。桃李芳菲三月时,千门烟锁绿杨枝。夹道朱楼回绣毂,良辰祓禊泛金卮。金卮绣毂青油幕,层城日出歌钟作。象管银筝不暂停,驼峰翠釜纷相错。多少游人策紫骝,芳郊十里暖烟浮。蹀躞锦鞯垂匼匝,葳蕤步障擘箜篌。兰皋迤逦花如霰,乳燕呢喃散青甸。迟迟晴日丽西山,翦翦春风临上苑。西山上苑盛繁华,碧草芋绵罩落霞。卫霍争持百宝扇,金张竞拥六萌车。人生富贵何能测,及时行乐谁人识。当歌对酒不尽欢,屈首蓬蒿亦何益。此日风光政艳阳,此时游冶政徜徉。钗拖赤凤盘乌髻,裙染鹅黄堕马妆。只恐韶华不久待,如云车骑一朝改。日斜难返鲁阳戈,万古惟留明月在。明月依然照绮筵,酣歌谁似永和年。欲采芳兰隔江水,越树燕云各一天。朅来潦倒长安陌,矫首君门迷咫尺。平津阁上每辞宾,楼船帐中无揖客。匹马行将去帝京,漫天飞絮送归程。计到江南春色尽,满庭新绿乱啼莺。

吴江晚泊

系艇松陵道,天空候雁过。晚山云影薄,秋水月明多。客路凭舟楫,人烟近薜萝。 苍茫芦荻外,鸥鹭满晴莎。

舟次天津

春月辞家出,津门入夏过。从知燕市近,还见海云多。万堞临高阜,千帆荡浊河。 几回哀雁度,乡思更如何。

稚宾客江阴诗以怀之

杨柳临风两岸斜,思君春暮尚天涯。几人江上同为客,何处樽前不忆家。季札残碑 沦蔓草,春申浊浪走平沙。旗亭早贳兰陵酒,莫使归程滞落花。

送季冲之任郁林

擔帷百粵拥鸣驺,四十专城是壮游。驿路梅花初破腊,炎方木叶少逢秋。山萦峻岭 千盘出,水落沧江万里流。此去日南天欲尽,春风先到郁林州。

李先复

李先复,字曲江,南部人。康熙壬子举人,官至工部尚书。

断臂烈妇行烈妇郑氏,长沟民何献图妻。少事孀姑至孝,会吴逆作叛,夫负饷随征,姑亦出,妇独居。突有武弁张某腾入,挑亡则詈,诱以金,愈詈;再胁以刃,乃大骂。张连砍其头颅,遂断在臂,中夜死。邻人鸣官,迹其状,见满室血,断臂在户右,刀插户侧,妇遍体伤,下衣碎裂。露尸四月,颜如生。噫!威武不屈,此谓大丈夫,女子云乎哉!爰纪其烈,以俟采风者。

长沟之山山矗矗,长沟之水水曲曲。苍崖松老风谡谡,村妇衣单形影独。织无机丝春无粟,荆钗蓬鬓颜如玉。良人长征翳可怜,从军输挽秦师前。阿婆牧犊柴桑外,日斜长望望不还。红轮未暝青山紫,马啼足戚蹈黄尘起。轻装宝剑羽林郎,下马斜窥颜色喜。入门偎倚饵甘言,正气刚肠森发指。孤身匿迹恨无门,事到艰难惟一死。凶徒怒起刃交加,血花泪花落红雨。中庭电掣雷霆吼,神龙只抱骊珠走。烈妇守身誓拌身,身甘百碎何惜手。手既断,心如铁,血千行,肠百结。君不见汉代明妃马上娇,铜雀空劳锁二乔。红颜白骨埋荒草,姓氏谁将烈女标。吁嗟乎!别夫不于室,拜姑不于堂,慷慨赴义何忙忙。千载而下仰清风,于高山之崔巍兮,与流水之汪洋。

方峨

方峨,字嵋雪,一字玉岩,大兴人。康熙壬子举人,官新建知县。有《嵋雪集》。

赠倪永清

九峰山色高嵯峨,川原平远堆青螺。刘夏村南泗水镇,片帆我亦曾经过。此时我年方二十,乍见老成尚羞涩。客邸惟拈诗与书,日键芸窗足不出。少年情性好交游,一时怀刺干名流。卢文子,张洮侯,朝朝约放龙潭舟。松江有白龙潭。鲈脍莼羹罗满座,玉箫金管吹清秋。此中有人数诗伯,开言便及虬髯客。清誉真应千古传,彩笔争夸万人敌。近来作吏来西昌,寥寥风雅推平章。即或有人弄笔墨,譬如无腔牧笛横山庄。永清倪子来日昨,顿使洪都风雅作。绛帐旋开徐稚亭,赤幢久树滕王阁。兴酣搦管发大呼,十三大郡都惊愕。门外频停问字车,云中又见衔书鹤。骤然相见即相怜,须识神交已有年。把臂发狂话宿昔,恍若置身黄浦青溪边。过我讼堂一交接,便觉胸中有冰雪。太白刘伶共醉醒,许由巢父同高洁。即席还当赠片言,文中雄长诗中杰。猗嗟乎!君才磊落非等伦,得君如得金千钧。他时归遇云间客,道我为官鬓似银。

雪过渔亭

村市溪头雪里经,人烟寒处认邮亭。沿流竹艇排银汉,劈面云峰插玉屏。秀绝山川浑一色,空怜鱼罶见三星。寻梅放鹤饶幽赏,争似兵厨醉不醒。

姚升

姚升,字扶东,永年人。康熙壬子举人,官开化知县。有《东岩草》。

西山晚眺

不识桃源路,依稀访旧林。揽衣穿仄径,蹑屐上高岑。树影归云暗,泉声落涧深。 山川老我辈,愧此一登临。

张鸿佑

张鸿佑,字右君,号念麓,元城人。康熙壬子举人。

雨中登北固

北固临江峙,层峦接碧霄。楼吞京口月,钟落海门潮。带雨拾山果,披云采药苗。 石磐逢老衲,指点说金焦。

雨后过海潮庵

泊舟来野寺,香阁昼氤氲。雨过千林湿,门开一磬闻。登楼瞻海气,扫石卧江云。 不识支公社,容随野鹿群。

黄美中归自西湖

半年离思隔江天,河朔初归访戴船。孤杖曾探天柱月,轻装应带海门烟。隄边杨柳怀坡老,井底丹砂忆稚川。闻道客途诗兴好,高吟莫惜向人传。

西园雅集喜秋水自广陵至

西园樽酒罄交欢,雨过高城竹气寒。六月故人江上至,十年白发客中看。池边涨水通花径,树杪归云度石栏。倚杖深松悬暮色,苍苍落日下烟峦。

范璐

范璐, 富顺人。康熙壬子举人。

巴江柳

之子莫相送,依依人可怜。多年芳草路,几日艳阳天。隄上风吹笛,江边月系船。 马蹄随记取,踏破少城烟。

越珃

越珃,字山公,贵阳人。康熙壬子举人。有《澹峙轩集》。

秋日游凭虚洞

一龛藏古洞,陟磴为寻幽。云气忽然合,天风吹不休。水争三峡险,山使五丁愁。 览胜真清绝,新凉况入秋。

余学益

余学益,字胜友,黄梅人。康熙壬子武举。有《半山藏稿》。

游多云山

云中樵斧声,偶杂樵夫语。拨云寻径曲,邈焉少伴侣。登高一俯视,离离荡禾黍。 白云无定时,青山自千古。

郭宏岐

郭宏岐, 字文克, 益阳人。康熙壬子武举。

见岳楼

崚嶒高阁倚天边,授简阎公愧少年。一片江声流槛外,万峰云影到窗前。消除白昼 还凭酒,检点青山不用钱。北望长安思旧侣,月明回雁数行连。

柯崇朴

柯崇朴,字敬一,号寓匏,嘉善人。康熙壬子副贡,官中书。己未举博学鸿词。有

《振雅堂集》。

自云门步至平阳作

昨夜宿云门,晨兴事清盥。萦纡出松径,犹见明星烂。顷时岚雾收,旭日乃始旦。 岩峦迫回合,苍翠正凌乱。前瞻化鹿峰,隐约钓台畔。溪明鱼自跃,篠密猴相唤。谷口闻鸣 钟,林端辨烟爨。今为祇树林,旧是平阳观。盛衰固有由,兴废何足叹。

宿云栖庵

远公遗迹在,古寺暮云封。磴转苍苔合,岩回碧树重。香台时下鸟,阴壑暗藏龙。 坐久心忘寂,沈沈听夜钟。

登莫釐峰

莫釐之峰何嵯峨,下有冲激之洪波。波光浩渺天一色,渔舟几处扬清歌。云散烟空风乍息,湖上诸峰开历历。小者如拳大若箕,遥遥空翠俱堪摘。支硎穹窿作列屏,层峦复嶂何青青。道场卞山遥拱峙,波中点点同流萍。孤峰独向湖中辟,倒影入湖湖尽碧。可怜万顷堆琉璃,落日沈波摇琥珀。俯视千家粉堞雄,连甍接翼自相通。橘实垂时金错落,绮窗开处玉玲珑。此时旷望乐何极,杳然如在丹青中。来朝归去入城郭,空羡矶头一钓翁。

汝南道中

驱马汝南道,行人愁路难。群山连削壁,急涧乱飞湍。虎啸青林密,猿啼白日寒。 前瞻郧子国,尚有几回盘。

过武胜关

作客由燕赵, 今朝入楚来。岩城临翠壁, 荒磴没苍苔。山鸟一声寂, 飞泉百道开。 潇湘云正远, 征骑几时回。

汉上赠查韬荒

我从蓟北千山至,君自滇南万里来。乡思尚悲吴苑隔,客愁且向汉江开。薰风到处 迷芳草,玉笛吹残怨落梅。漫道相逢始倾盖,十年早识子云才。

程尹起

程尹起,号莘园,莆田人。康熙壬子副贡,由教谕历官嘉定知县。

解组书怀

自笑操刀拙,经年客梦长。乡心传雁字,宦辙险羊肠。老去花朝露,归来菊晚霜。 莫荒畔畔秫,寄语旧高阳。 明发疁城招王子翌思小饮

谢却折腰米,开尝瓮面春。隔篱呼共醉,明日是行人。

安致远

安致远,字静子,号拙石,寿光人。康熙壬子拔贡。有《纪城诗稿》。

过鄚州

古戍苍茫朔气横,黄尘扑面野云生。人传燕赵悲歌地,水咽荆高变徵声。百战河山 余废堞,清时烽燧尚孤城。萧萧落日催征骑,愁听荒笳到耳鸣。

当涂将归留别葛谦斋

残春南寺客,日日计归程。旅梦松阴满,乡思艾叶生。莺花催客恨,风雨壮溪声。 莫作江南客,从来多旅情。

登青州北城楼

广固雄图揽胜过,万峰飞瀑泻长河。时清鼓角秋全静,地近烟岚雨易多。石柱鳌吞翻地轴,铁幢龙怒起盘涡。千家市逐浮槎尽,祇有西风吹逝波。

刘鼎

刘鼎,字禹铸,平乡人。康熙壬子拔贡。有《南游草》、《淇澳草》、《匪鱼草》。

怀家兄黄铸及舍弟文振

最是春风大被宽,东山别后始知寒。池塘绿草长遥梦,桃李芳园不共看。路远裁书 逢使少,家贫负米事亲难。天涯雾露须珍重,记得丁宁滏水干。

徐元梦

徐元梦,字善长,号蝶园,满洲旗人。康熙癸丑进士,改庶吉士,授主事,官至户 部尚书、协办大学士,以事罢,复起礼部侍郎。赠太子太傅,谥文定。

怨别离

思君恨夜长,寂寞空床宿。思君恨日短,白头一何速。长短空自知,思君无尽期。 登楼时一望,杨柳夹隄垂。黄鸟鸣其上,喈喈有余悲。听之动中怀,罗袖春风吹。春风忽已 换,阔别恩情断。织锦寄远人,远人隔河汉。

送友人出使塞外

许国年方少,看君绝塞行。一身凭虎节,匹马出长城。月色侵裘冷,霜花拂剑明。 燕然山畔石,到日好题名。

秋日郊行有感

偶因寻客去,骑马出青门。落日衔千树,寒流抱一村。田家收黍稷,场圃散鸡豚。 父老惊心目,将军猎骑繁。

送随羲文出塞

两出居庸地,怜君常苦辛。风沙随去马,雨雪滞行人。地阔军民少,天寒部落贫。 须知柔远意,率土尽王臣。

登三屯镇城楼

雉堞连山起,登临亦壮哉。一声南雁去,万里北风来。苔没前朝碣,云寒上将台。 兴亡无限意,尚想济时才。

寄施愚山

才名久已动中原,归卧东山道更尊。座上何人争刻烛,花间无日不开尊。春阴叠嶂 云生户,水满双谿舫到门。谢氏芝兰今正发,鸾书应自下江村。

韩菼

韩菼,字元少,别字慕庐,长洲人。康熙癸丑一甲一名进士,授修撰,官至礼部尚书。谥文懿。有《有怀堂集》。

寓直书怀

丁丁莲漏出花迟,紫禁清宵寄一枝。仙掌相如应减渴,玉桃方朔讶长饥。揽衣渐觉 缁尘积,握椠多惭藜火窥。梦断疏钟长乐外,一声声与白云期。

和东坡馈岁别岁诗

《木瓜》知苞苴,厚意聊以佐。滥觞自古人,后来乃以货。如闻暮夜间,取印如斗大。岂知幽栖者,岁晚只高卧。狼藉惟琴书,芳尘凝满座。借问腐儒餐,无乃出马磨。敢波及父老,简略诚吾过。清风傥可赠,于喁请君和。

冉冉年复尽,跳丸不肯迟。出宿饮醆者,俯仰安可追。行行重行行,去者天一涯。 君自此远矣,劳苦问归时。岁去寻当来,决无食言肥。行看春女思,复见秋士悲。花开即花落,衔杯不须辞。醉乡无日月,或忘吾久衰。 日月不我与,守者添画蛇。人生虮虱耳,譬若裈中遮。鲁儒爱尺璧,椟毁可奈何。 或者起挥戈,跳去寂无哗。聊为烈士吟,复击渔阳挝。黄鸡才晓唱,白驹又飞斜。君看彭与 殇,修短俱蹉跎。不如秉烛游,达者及足夸。

顾子元臣同侍御行并赠

君家才子称痴绝,今日输君才更神。百页蛮笺磨墨汁,三升浊酒岸纟册巾。江头螺 女常酬客,洞口榴花不避人。肯信薄游无稇载,锦囊赢得贮清新。

汶河桥

石梁互长虹,水流声活活。野色旷蒙山,荦确露山骨。及此爱清涟,复乃得奇石。 瞰流势欲奔,连脉断若划。层层落芙蓉,片片碎云叶。倒卧九叠屏,喷激百道雪。嵌空劣容 杯,平铺多得月。缅昔汶阳田,二三劳争割。我今坐盘桓,谁予复谁夺。

上巳宴集碧山堂

暮春犹是永和初,花正开时柳乍舒。白社已荒三仕外,碧山重禊十年余。故人落落 新来雨,澹月纤纤小摘蔬。我乃酒狂狂不得,漏声催箭整冠裾。

送姜友棠孝廉南还酬次来韵

三山风送谪来仙,入洛才名籍籍传。几束牛腰驱笔下,六朝麈尾话尊前。暂同石鼎分联句,休向江蓠苦问天。两剑双环真不易,春令孤影一潸然。伤西溟。

王鸿绪

王鸿绪,初名度心,字季友,号俨斋,又号横云山人,娄县籍华亭人。康熙癸丑一 甲二名进士,授编修,官至户部尚书。有《横云山人集》。

西园

每爱西园好,清樽到竹亭。石潭流霁月,崖木杂秋星。兄弟同晨夕,乾坤任醉醒。 寥寥无识者,空著《太玄经》。

归来

长铗归来日,貂裘欲敝时。吾亲怜久客,扶杖喜相持。款款谈征路,依依问旧知。 自朝还至暮,尽室慰离思。

吾母倚闾久,风尘望早归。惊看游子面,为浣去时衣。岩筍经冬出,慈乌向晚飞。 《白华》堪志养,不必羡甘肥。 半载京华客,归来意若何。早凋三径菊,空废《五噫》歌。开帙蟫鱼落,褰帷蛛网 多。草堂须检校,从此卧山阿。

晓发羊流店

暮宿荒村听断鸿,晓驱行李入空濛。徂徕北绕千林合,太岳中盘万岭雄。天作冻云方酿雪,马思霜草半嘶风。人生出处缘何事,得失应须付塞翁。

过平原饮董默菴前辈宅

疲苶万山间,路险天地窄。昨朝出崖谷,豁达平原陌。有使前致辞,邀我话畴昔。 策马入城闉,爰访晏相宅。公闻足音喜,早已途中逆。升堂拜未毕,樽俎罗几席。虽感故情 深,毋乃不速客。却念十载余,云山两暌隔。今晨快把臂,敢辞露肝鬲。忆昔钩党兴,何处 无弹射。我公天人姿,迅举凌风翮。鲰生愧燕雀,翻飞不盈尺。几遭一网尽,那复逃掎摭。 时公秉斧钺,察余户扫迹。朗朗明月辉,回照寻山屐。嗟哉彼谮人,阴凝毒雾积。仰荷皇天 鉴,涣汗别黑白。抚躬增内省,感激弥跼蹐。欲酬幈幪德,踵顶难塞责。《九章》发楚哀, 三宥蒙尧泽。吾侪幸无恙,此岂由人画。翳惟至圣仁,始得收魂魄。于公本同患,所以相剖 析。当筵聊一歌,往事等驹隙。共倒杯中物,转为别离惜。

戒坛

狮子岩头十八转,两崖相峙路如线。青峦碧涧绕珠林,丹壁雕阑耸禅院。禅院峨峨苍松寒,连柯接叶捎云端。蹁跹有似翠蛾舞,天矫时作蛟龙盘。立者倚者各有态,或疏或密何珊珊。黛色参天凌汉柏,浓枝避雨胜秦官。我来婆娑至日暮,耳边萧飒流青湍。不知植根几千载,霜皮百尺雄斋坛。忆昔少游慈仁寺,殿角双松交古翠。童童如盖映芳樽,未饮先教心已醉。可惜花宫作贾廛,枯株零落充炊烟。岂若兹松居尘外,丰神舄奕层崖巅。乃知市朝摧折易,衰朽山林岑寂多长年。呜呼山林岑寂多辰年,北窗我欲耽高眠。

雾中由戒坛度罗睺岭稍霁至潭柘

既瞻戒坛松,言观潭柘树。山僧劝我且莫行,白额秋来乱林坞。我闻斯言大吁怪,欲行不行日亭午。此生到处被物厄。不信山游复有虎。携朋大笑出寺门,樵子前驱荷干橹。 联镳兀兀云雾中,羊肠鸟道愁花骢。十步九折凌绝壁,仰面直欲摩苍穹。但觉千山万岭同一 气,举世高下归鸿濛。我仆马蹇滞岩底,招呼不辨西与东。兹山猛兽固客在,耳边作吼惟松 风。须臾度岭四天豁,西崦已堕铜轮红。忽见九峰开锦帐,朱霞一抹青芙蓉。红楼金殿耸天 际,秋林杳霭闻清钟。我策我马入幽谷,苾刍相引岩之麓。绀宇辉煌绕玉阑,禅房窈窕摇修 竹。古柘千章无复存,妙严双趾今谁续。日斜不及访龙泉,仰睹峰头乱红绿。对景行厨泻酒 醅,临风万里酣高台。我且歌,君莫哀,元规朝市多尘埃,城外名山谁看来。

送顾侠君南归

黄金台下骅骝去,尘世谁知相马经。击筑痛浮燕市白,钓竿归指莫釐青。凤毛共许 传灵运,龙尾何妨属管宁。应有珠玑干气象,选楼高傍少微星。

徐秉义

徐秉义,初名与仪,字彦和,号果亭,昆山人。康熙癸丑一甲三名进士,授编修,官至吏部侍郎。有《耘圃培林堂代言集》。

秋日送黄仙裳南归

长安松下读书人,皂帽萧然迥出尘。暂傍香台寻胜侣,却乘秋水问归津。诗传摩诘 真如画,豪拟元龙未觉贫。犹记高楼吟啸处,十年迢递海陵春。

徐倬

徐倬,字方虎,德清人。康熙癸丑进士,改庶吉士,授编修,官至礼部侍郎。有《应制集》、《薲村集》。

闻蛩

乡国三千里,寒蛩总一声。遥知闺阁内,共此别离情。响入秋碪细,愁先朔雁鸣。 银镫何太苦,起坐到天明。

舟中杂感

雀啄黄花满眼蒿,雁连云影下空壕。投人自贱隋明月,无褐空思秦复陶。碣石寒碪 催玉露,广陵秋树接银涛。应知雨雪前途盛,岁暮谁知左伯桃。

湖上酬夏卤韵

青丝一骑出长安,明圣湖头把钓竿。花柳坐催名士老,湖山约与酒人看。好凭酬唱东西屋,莫妒声名大小冠。昨夜新诗欺白雪,雪儿歌罢不胜寒。

泇河道中

峄山湖畔峭帆飞, 菰蒋菖蒲满钓矶。犍犊群来知近市, 野凫浴久觉船稀。摊书客倦 乌皮几, 听雨凉生白夹衣。此去江淮行不远, 黄鱼正美雪鲥肥。

坐段桥

寒虫暖出游,我亦负暄至。缓足沿河隄,十步九回憩。黄叶树如妆,秋山云愈媚。 游鱼聚空潭,归骑骋逸辔。群类各有依,孤客心何寄。怅焉成独坐,石梁对空翠。

舟中戏题

雪后微风卷浪迟,缓摇柔橹怕鸥知。舟中倦客闲凭几,不见舟移见岸移。

李基和

李基和,字协万,号梅崖,汉军旗人。康熙癸丑进士,改庶吉士,授知县,官至江 西巡抚。有《梅崖山房诗》。

春日遣怀

春日迟迟春未阑,愁怀欲放又难宽。弃余久已如鸡肋,知味何须食马肝。庭树两年根较固,笼禽数语韵多酸。涧阿有约谁归去,寤寐无忘为考槃。

寿安寺读王北山给谏诗怆然有感因步原韵

人去山无恙,秋深气更清。新诗余败壁,古屋倚衰楹。日暮云归岫,峰环树作城。 苍凉今昔梦,挥涕欲沾缨。

中秋旅夜

故乡何日到,今夕是中秋。落落空庭月,高高客夜楼。野烟当树暝,旅雁入云愁。 遥忆诸兄弟,相欢在润州。

宫梦仁

宫梦仁,字宗衮,号定山,静海籍泰州人。康熙癸丑进士,官至福建巡抚。有《齐鲁诗》。

八达岭

八达传天险,征涂迥未经。童山当昼白,绝涧入秋青。马首穿云盖,人声转石屏。 侧身高处望,潇洒意常醒。

清江送张友鸿之滇中司理并寄讯藩臬诸公

箫鼓中流杂棹歌,仙郎拥传下牂牁。百年词赋题金马,万里风烟阻石螺。蛮俗古来 多健讼,主恩天外待鸣珂。昆明战伐今何似,寄语加餐老伏波。

周士皇

周士皇,字伟臣,号静庵,武昌人。康熙癸丑进士,历官通政使。

西山怀古

月照残崖鸟乱鸣,乡州井里尚榛荆。寒流犹绕吴王垒,暮雨空催白帝城。古木有阴 堪避暑,荒山无地可谋耕。逢人若道英雄事,惟有江流不断声。 颜光猷

颜光猷,字秩宗,号澹园,曲阜人。康熙癸丑进士,历官河东盐运使。有《水明楼诗》。

宿蟠龙山法海寺

山势蟠龙敞一门,天花历历蹑云根。秋高露湿双松白,夜静镫寒一殿昏。石景山前还系马,秘魔崖上更啼猿。何当同鼓西山屐,粮尽今朝且莫论。

去安顺

苗女蛮童且自亲,家乡万里可怜身。黄堂自笑衷肠软,五载何曾毙一人。

山高地僻景荒残,白发黄堂去习安。漫说三年金十万,何人留得一钱看。

汪鹤孙

汪鹤孙, 字雯远, 钱塘人。康熙癸丑进士, 改庶吉士。有《延芬堂集》。

酬刘铁庵次张笨山韵

骏马长鸣日,蛾眉只索居。玉禾惊岁晚,团扇及秋疏。荷锸宜耽酒,然藜莫校书。 幽栖能结伴,选胜到精庐。

广游仙寺

瑶岛灵踪未易寻,古来名籍却森森。悬知易贵非仙骨,要识难穷是道心。

尽日风波思不惊,绿蓑青笠最清真。吾师合是元真子,紫绶朱轓岂足荣。

割肉携归洵足豪,细君畅好共持醪。汉廷枚马皆厮品,不及东方待诏高。

高阁通天讵降真,沈檀扰扰祇埃尘。蓬山吾辈须争座,不作持幢捣药人。

幽忧最是人间累,放旷元为学道先。可爱当年王子晋,吹笙未了便登仙。

谢简捷

谢简捷,字子茅,广东海阳人。康熙癸丑进士,官内阁中书。有《戒心》、《旅吟》、《南还杂咏》等集。

戊申北上同人饯别南湖即席赋诗

红蓼滩头青雀开,金尊玉管坐徘徊。锦塘荷气因风散,高树蝉声带雨来。十里云山 愁送客,百年朋旧几登台。河梁分手情何限,一曲骊歌首重回。

黄伸

黄伸,字美中,元城人。康熙癸丑进士。

送别赵秋水兼寄申凫盟观仲兄弟

七月西风吹井梧,池荷渐老庭葵疏。鸣虫唧唧夜色徂,羁客徘徊临前除。送君尚记与君别,黄金台下无颜色。还家忽忽音书绝,君去并州我適越。洎我归来卧旧丘,闻君又买广陵舟。同在天涯不相值,江山怅望生离愁。两年不见增白发,相逢遗我诗盈箧。三伏炎蒸金石流,展卷洒洒飘冰雪。河朔快饮五陵豪,留君不住心烦劳。匣琴罢酌坐深宵,玉露无声银汉高。悠悠此意无终极,说向世人应不识。归见荆园两弟兄,为道别后长相忆。

过丹阳晤九逵

大江何浩渺,数载间情亲。别梦西泠月,愁心北固春。山川争待我,衣食尚随人。 不尽班荆意,相看各怆神。

柯维桢

柯维桢,字翰周,嘉善人。康熙乙卯举人,己未举博学鸿词。有《澄烟阁集》。

夜发吴江

枫叶晚秋红,平江驿路通。夕阳余野渡,衰草战凉风。鸟落寒山外,镫明古寺中。 扁舟一樽酒,邀月与谁同。

春暮送周青士

入春春半百花开,良友乘春放棹来。花为春归偏早落,人当春去却同回。三千远道 他时梦,九十韶光此日哀。把酒送春兼送别,劝君且尽故人杯。

望仙亭和韵

峻岭落天风,遥凝碧汉通。钟鸣高树杪,人语乱山中。雨过奔泉白,云开射日红。 从怜巢鹤去,丹灶久应空。

途中杂咏

山开隆虑容驰马,路入韩陵好射雕。满饮酡酥人不醉,邺城东望正萧条。

李来章

李来章,初名灼然,以字行,号礼山,襄城人。康熙乙卯举人,由知县历官兵部主事。有《礼山园集》。

暮春忆图南伯氏

独遇山川眼倍明, 迩来诗酒是同盟。欲将《骚》赋追平子, 肯放春杯让步兵。树密层阴藏野鸟, 花稠香雾上棋枰。双柑斗酒长松下, 芳草流莺唤晓晴。

邵瑸

邵瑸, 字柯亭, 大兴人。康熙乙卯举人, 官昌邑知县。

春日杂兴

春风不媚俗,一例到闲门。新树移邻圃,青衫染酒痕。世情浮宦拙,吾道布衣尊。 尽日仇书卷,藜床坐觉温。

王作肃

王作肃,字敬一,吴桥人。康熙乙卯举人,官南宫教谕。有《复初斋诗草》。

秋夜

徙倚霜天晚,清吟到夜分。高楼先得月,寒水欲生云。木叶当阶落,碪声隔院闻。 秋空风正急,飞雁不成群。

彭定求

彭定求,字勤止,又字访濂,晚号止庵,学者称南畇先生,长洲人。康熙丙辰一甲一名进士,授修撰,历官侍讲。有《南畇诗稿》。

文选楼怀古

县圃风流翰墨场,客心凭吊剧苍凉。掞文已撷江山丽,主器应扶社稷长。委巷年深 尘刹暗,虚檐昼掩草庭荒。不知慧业归天上,可得神游近戴匡。

邵二泉先生闲居四戒诗卷书后

昔闻廉公言,曾受孔子戒。讵惟莲社徒,严净超尘界。洗心密以藏,义阐羲皇卦。参之在性天,睹闻所未届。凛兹入德门,室欲慎一介。上士敦躬修,力障隄防坏。伟哉邵夫子,道南衍宗派。正学人伦师,警惕恒匪懈。矢此闲居箴,砭俗寓深喟。哀彼夸毗子,纵度恣娱快。躁进而苟得,侈淫乃交害。四者实循环,酿毒甚蜂虿。覆辙盍鉴诸,沈疴须急瘥。置身廉让间,食色捐业债。皇皇澡浴勤,寸丝原不挂。粹然复天真,微阴去夬夬。精金汰沙

砾,嘉穀弃荑稗。敬聆木铎鸣,底事徇膜拜。三复祇腹膺,心神顿潇洒。未敢缀卮词,牵延 等菅蒯。

秋丁日补送文文肃姚文毅陈文庄三公神位入长洲学乡贤祠敬识

名教久沦替,榛蔓沿黉宫。乡祀古所重,论定百年中。庶几光俎豆,足与震鼓钟。云何僣且滥,势利纷交讧。沮丧诗书气,彫残礼乐容。遂令贤杰辈,避地羞雷同。近者更侈炫,郡邑淆所从。典司罔稽覆,名籍滋混蒙。峨峨三钜公,茂苑挺英踪。齐鸣朝阳凤,并跃云津龙。末运丁板荡,屹如鼎足重。丘山既合响,至今阙瞽宗。小子仰典型,桑梓维敬恭。清议永不磨,地以人斯崇。颓波存砥柱,后起当闻风。

胡会恩

胡会恩,字孟纶,号苕山,德清人。康熙丙辰一甲二名进士,授编修,官至刑部尚书。有《清芬堂存稿》。

沈归愚曰: "司寇不以诗名, 然含宫咀商, 天然明丽, 其品自贵。"

岁暮杂感

踯躅尘深处,淹留岁晏时。未工《西第》颂,难免《北门》诗。箫鼓邻家宴,羔豚腊夜祠。故乡长望远,幽梦发南枝。

昨岁征鞍上,冰霜阅岁华。汴河惊柳叶,燕市殢椒花。蜗角真成误,蓬心转自嗟。 籝金人共羡,无复一经夸。

寂寞西清客,输他画省郎。抱书寒署月,驱马掖门霜。过眼脂韦态,惊心角逐场。 不逢詹尹卜,何处决行藏。

小孤山

斗绝中流一柱尊,天留拳石峙江门。回风巨壑蛟鼍徙,背日阴崖鹳雀屯。绝顶倒垂 飞阁影,孤根全齧怒涛痕。女郎祠庙何年事,遂有灵旗月下翻。

张榕端

张榕端,字朴园,磁州人。康熙丙辰进士,官至礼部侍郎。有《兰樵河上稿》、《归 田稿》。

庚辰重午阎百诗徵君招饮楚州城西之湖因有学士湖之目且举太白沔州诗为起句赋 诗见赠余愧不能承也辄成二十韵奉答

即官爱此水,因号郎官湖。吾来客楚州,迹与曩哲殊。三年历传舍,炎雪劳驰驱。 瓜期偶息影,偷闲亦须臾。主人敬爱客,放棹携百壶。绣幕漾云水,牙樯狎鸥凫。纷纷角黍 筵,画舫凌虚无。灵均日已远,节物留欢娱。欢娱亦何有,清赏在吾徒。谈笑惬素心,至乐非笙竽。主人今谪仙,胸有骊龙珠。乃援沔州例,标此名胜区。我名以湖传,佳境恐厚诬。虽为香案吏,本是山泽臞。家园滏水阳,三径行就芜。中宵剧归梦,猿鹤勤招呼。身随彩丝系,病藉艾草苏。笑此朱夏天,清霜点鬓须。虚名重刻画,丽句重操觚。君诗勿传播,冯夷定揶揄。

上巳用石虹韵

行藏久已任邅迍,客里浑忘上巳辰。祓禊纵能临曲水,脂车无计转方轮。几番风雨催花信,剩得烟霞媚野人。感荷君恩容浪迹,懒随渔父问河滨。

旅次洛阳

渡河寻古迹,遥羡洛阳名。硖折疑无路,林开忽有城。夕阳落处大,归鸟去边明。 莫厌村沽薄,诗从半醉成。

李应廌

李应廌,字谏臣,一字柱三,号愚菴,日照人。康熙丙辰进士,改庶吉士,授编修,历官内阁学士兼礼部侍郎衔。有《宁拙堂诗稿》。

保安卫道中

居庸西下尽烟峦,夏木翻风料峭寒。沙碛马嘶边草短,山椒云破驿楼单。天连雁塞 高横岫,水落洋河浅见滩。自笑书生乘传出,白头羞戴进贤冠。

高层云

高层云,字谡苑,江南华亭人。康熙丙辰进士,历官太常寺卿。有《改虫斋诗》。

送周紫海游华岳

巨灵擘连山,洪河乃东落。崚嶒豁双华,高天擢莲萼。千峰列儿孙,拱伏类卑弱。少昊扬金精,元气郁磅礴。古来避世士,长啸此岩壑。济时心孔殷,神化特假话。我观陈图南,壮志小廖廓。苍生本无与,何为堕驴噱。龙蜕邈千祀,继者仍寂寞。青齐得周子,有道耽藜藿。不谓犹龙姿,养晦同屈蠖。长风吹孤云,飘然向京洛。揽秋啸俦侣,携手城南郭。言将寻玉井,侧帽裹芒屩。到日想跻攀,翠栈飞猱玃。箭括通一门,烟霞任挥霍。仰首问寥天,愿偕玉女博。凌空笑退之,尔何有余愕。

瞿唐

连山接巴东, 地险势复壮。谁辟鸿濛开, 插天列青嶂。滟滪立江门, 突兀献奇状。 摩挲两铁柱, 越历几兴丧。惊涛奔紫崖, 鱼龙不敢傍。众山自回合, 前行欲何向。初疑水际 穷, 忽转天心旷。恍如出甑底, 沸釜掀层浪。赤甲与白盐, 开阖似屏障。丹黄苍翠间, 日色 相摩荡。割据慨当年,雄长不相让。流览卧龙图,英姿迥堪尚。探奇自兹始,弥觉心神王。

冯云骕

冯云骕,字懿生,代州人。康熙丙辰进士,历官礼科给事中。有《翠滴楼诗集》。

题画

轻云漠漠暮烟飞,树色冥濛暗翠微。遥见汀洲最深处,一江风雨钓船归。

上元

击柝边城树影疏,萧条镫火月明初。上元自昔春如海,谁奏监门郑侠书。

王奂曾

王奂曾,字元亮,别字思显,号诚轩,山西太平人。康熙丙辰进士,历官湖广道监察御史。有《旭华堂集》。

铅山河口即目

一重芳草一重沙,几缕新烟几片霞。雨后篷窗关不得,村村屋角有梨花。

嫩绿初生树斩新,滩头春涨正粼粼。一群白鹭谁惊起,有个残阳唤渡人。

谈九乾

谈九乾,字震方,号未庵,德清人。康熙丙辰进士,历官吏部郎中。有《淮浦诗》。

渡江

黑云如幄罩江口,狂风怒卷潜蛟吼。垂垂天阔孤鸟断,腾腾浪掀万马蹂。岸东岸西好山色,一时惨淡渺何有。人见青山江上蹲,不知江挟群山走。江中之人狎于江,拽帆捩柁夸能手。只怕盘涡一道斜,溜若沸汤势更陡。归船急渡岂得已,平生忠信殊不苟。建州小饼沦中泠,且呼山童展茶臼。

送许旸谷

子从虞山来,衣带虞山雨。山色近如何,苍烟横碧缕。苔斑封剑石,绿阴滴桐乳。胡为忽抛却,郁郁首欲俯。黄金台已空,易水风犹古。旧时屠狗人,晨星朗三五。此行定有合,未必无小补。而我不自聊,生乃与哙伍。去程无计留,回期可预数。岂不怀高堂,亦将念眉怃。故山枫叶红,归作秋树主。旸谷轩名秋树。

霅川钱子怀白以黔西近诗见示读竟感赋

依旧鸥庄葺敝庐,蛮乡蕉鹿梦何如?天为李燮终开网,人似虞卿只著书。已觉浮生 无处著,偏怜故态未全除。蹉跎我亦瓜园老,衰发星星不耐梳。

得还初服亦君恩,寸舌犹留且莫扪。鸷鸟仅堪吓腐鼠,郊牺翻欲悔孤豚。红尘蓟北 遥千里,黄叶江南自一村。为约蘋花最深处,鱼竿秋水恰当门。

叶舒崇

叶舒崇,字元礼,号宗山,吴江人。康熙丙辰进士,官内阁中书。有《宗山集》。

荷兰国进千里马歌

皇帝御宇之六载,负扆致政归彤墀。大开明堂治六服,万国会同车马驰。海波不扬 通远道,纷纷重译来京畿。九州之外荷兰国,人物窈停言兜离。一朝稽颡表忱悃,骅骝作贡 称珍奇。雄姿逸态世罕有,奔腾千里犹嫌迟。骄嘶自许邀宠眷,不惮跋涉经险巇。牵来独立 玉阶下,遂令凡马皆惊疑。姬王讵必重八骏,汉帝安用遣贰师。那知至尊方偃武,端拱南面 垂裳衣。诏谓圉人归厩下,予以衔勒聊鞿羁。鸾旗在前属车后,朕乘此马将安之。圣朝岂复 畜奇兽,留兹用慰遐方思。

秋日杂感

北风千里痛离觞,一去长沙自古伤。幸有文章能报主,何妨魑魅喜投荒。惊心白璧 三年泪,回首黄金五月霜。闻道吴江佳句在,上书今已赦邹阳。

金陵有感

狂来不减步兵愁,行尽清溪古渡头。极目群山还绕郭,感时双鬓怯登楼。桓伊邀笛 人谁在,谢傅围棋野尚留。俯仰只言天堑险,白鸥红蓼满汀洲。

纳兰性德

纳兰性德,原名成德,字容若,满洲旗人。康熙丙辰进士,官侍卫。有《通志堂集》。

拟古

客从东方来,叩之非常流。自云发扶桑,期到海西头。白日当中天,浩荡三山秋。 回风忽不见,去逐灵光游。烛龙莫掩照,使我胸中愁。

天门詄荡开, 翕赩罗星躔。白日瞩微躬, 假翼令飞骞。平昔紫霞心, 翻然向凌烟。 双吹凤笙歇, 宛转辞群仙。越影{***尔}浮云, 横出天驷前。玉绳耿中夜, 斗杓何时旋。

予生未三十,忧愁居其半。心事如落花,春风吹已断。行当適远道,作计殊汗漫。 寒食百草青,薄暮烟冥冥。山桃一夜雨,茵箔随飘零,愿餐玉红草,一醉不复醒。 白云本无心,卷舒南山颠。遥峰如梦中,孤影吹能还。忽然间高霞,霏霏欲成烟。 风花落不已,流辉转可怜。皎洁自多愁,况复对下弦。高楼夜已半,惜此不成眠。

世运倏代谢,风节弃已久。磬折投朱门,高谈尽畎亩。言行清浊间,术工乃愈丑。 人生若草露,营营苦奔走。为问身后名,何如一杯酒。行当向酒泉,竹林呼某某。时有西风来,吹香满罂缶。不问今何时,仰天但搔首。

宛马精权奇, 数从西极来。蹴蹋不动尘, 但见烟云开。天闲十万匹, 对此皆凡材。 倾都看龙种, 选日登燕台。却瞻横门道, 心与浮云灰。但受伏枥恩, 何以异驽骀。

魏阙有浮云,荫兹白日暮。返景下铜台,歌声发纨素。流辉如有情,千载照长路。 漳河不西还,百川尽东赴。时哉不可失,谠言思所悟。雨后望西陵,蔓草萦古墓。安得为飘 风, 永吹莲枝树。

朔风吹古柳,时序忽代续。庭草萎已尽,顾视白日速。吾本落拓人,无为自拘束。 倜傥寄天地,樊笼非所欲。嗟哉华亭鹤,荣名反以辱。有客叹二毛,操觚序金谷。酒空人尽去,聚散伤局促。揽衣起长歌,明月皎如玉。

又赠马云翎

岧峣最高山,山气蒸为云。物本相感生,相感乃相亲。吁嗟人生不可拟,君南我北三千里。一朝倾盖便相欢,两人心事如江水。君身似是秋风客,身轻欲奋凌霄翮。语君无限伤心事,终古长江江月白。世事纷纷等飞絮,我今潦倒随所寓。惟愿饮酒读君诗,花前醉卧梦君去。

送荪友

人生何如不相识,君劳江南我燕北。何如相逢不相合,更无别恨横胸臆。留君不住 我心苦,横门骊歌泪如雨。君行四月草萋萋,柳花桃花半委泥。江流浩淼江月堕,此时君亦 应思我。我今落拓何所止,一事无成已如此。荆江日落阵云低,横戈跃马今何时。忽忆去年 风雨夜,与君展卷论王霸。君今偃仰九龙间,吾欲从兹事耕稼。芙蓉湖上芙蓉花,秋风未落 如朝霞。君如载酒须尽醉,醉来不复思天涯。

塞外示同行者

西风千万骑,飒沓向阴山。为问传书雁,孤飞几日还。负霜怜戍卒,乘月望乡关。 王事兼程促,休嗟客鬓斑。

景山

雪里瑶华岛,云端白玉京。削成千仞势,高出九重城。绣陌回环绕,红楼宛转迎。 近天多雨露,草木每先荣。

蕉园

见说斋坛閟,前朝太乙祠。莺边花树树,燕外柳丝丝。宫御人稀到,辞臣例许窥。 今朝陪豹尾,新长万年枝。

秋日送徐健庵座主归江南

江枫千里送浮飔,玉佩朝天此暂辞。黄菊承杯频自覆,青林系马试教骑。朝端事业 留他日,天下文章重往时。闻道至尊还侧席,柏梁高宴待题诗。

山海关

雄关翘首戴灵鳌,控制卢龙驾虎牢。山界万重横翠黛,海当三面涌银涛。哀笳带月传声切,早雁迎秋席影高。旧是六师开险处,待陪巡幸扈星旄。

古北口

乱山如戟拥孤城,一线人争鸟道行。地险东西分障塞,云开南北望神京。新图已入 三关志,往事休论十万兵。都护近来长不调,年年烽火报升平。

秣陵怀古

山色江声共寂寥,十三陵树晚萧萧。中原事业如江左,芳草何须怨六朝。

西苑杂咏和荪友

太液东头散直迟,一双水鸟掠杨枝。从臣献罢平滇赋,坐听中涓报午时。

黄幄临池白鸟飞,金盘初进鲙鱼肥。太平时节多欢赏,花萼诸王半醉归。

香引轻飔散玉除,下帘声彻退朝初。马前此日承恩数,也逐清班许钓鱼。

讲帷迟日记花砖,下直归来一惘然。有梦不离香案侧,侍臣那得日高眠。

记征人语

列幕平沙夜寂寥,楚云燕月两迢迢。征人自是无归梦,却忱兜鍪卧听潮。

柳枝词

池上闲房碧树围,帘纹如縠上斜晖。生憎飞絮吹难定,一出红窗便不归。

李瑞徵

李瑞徵,字吉占,又字中峰,容城人。康熙丙辰进士,授荔浦知县。己未举博学鸿词,历官户部主事。有《簏余草》。

秋夜读书

古人竟何之?见此秦时月。落照青简端,冠履若飘忽。澹对不相闻,秋风天籁发。欹枕研至精,凛冽砭吾骨。鬼神能害名,漏泄受天伐。蒲柳畏先零,燕石守金阙。何用此营营,华簪宠短发。

辛酉冬泽州署中柬王仲昭

伊昔家大阮, 买楫浙江潮。南中多伟人, 齿馨惟仲昭。曾探帐中秘, 开卷走风涛。缅怀二十载, 车弓同见招。而我拙巷遇, 一笑各分镳。只今向潞泽, 行橐挂酒瓢。闻君莲花幕, 抗情在云霄。投刺而按剑, 寒镫坐寂寥。慷慨赋归与, 马鸣风萧萧。

古意

桃李好颜色,不如松柏心。况结平生欢,谱之兰与金。弃绝果何意,含情自沈吟。 愿借明月光,展君绿绮琴。抱月弹流水,哀怨激商音。焉得秦楼镜,涣然开素襟。

季骐光

季骐光,字圣昭,号蓉洲,无锡人。康熙丙辰进士,官诸罗知县。有《蓉洲诗稿》。

视事诸罗

西风轻拂使臣车,谕蜀相如旧有书。细译番音诚异域,喜看野俗尚皇初。自来穷海 无飞雁,从此荒村有市鱼。漫向空天长倚望,黄云晚日接扶余。

腊月同友寻梅道山登天秀岩和薛中丞叶太傅刻石原韵

此日闲寻最上峰,几盘苍藓隐芙蓉。呼僧细读云边字,忏佛重陈海外踪。当岭夕阳 千树合,匝城烟火万家封。自怜尘迹多潦倒,消息江梅已早逢。

由来胜迹重名公,山水文章自不同。近接凌霄惟片石,遥窥苍海只长虹。暮烟多处 层峦好,寒叶疏时落照空。少保祠前云历历,松声不逐怒潮东。

李聘

李聘,字莘起,号伊蕃,长垣人。康熙丙辰进士,官陵水知县。有《余存集》。

自东流挽舟上建德

道出东流下, 轻帆带雨过。水从吴地转, 山入楚天多。竹鼠藏深树, 江豚戏晚波。

南方风景异,藉此慰蹉跎。

登岸

犬吠孤村近,人烟障几重。斜门三面水,古屋万年松。苦菜当春种,香粳趁月春。 无庸惊小队,我已遂归农。

初莅陵水

漫道来何暮,荒城一望愁。墙垣多竖木,官吏半乘牛。赋少增榔税,差烦逮女流。 伤心诸父老,何事忍诛求。

己历山川险,还看物候殊。古墙生蛤蚧,官阁伴{鼠生}鼯。落日玄猿啸,空城白鹿趋。炎威难就寝,兀坐话妻孥。

马子骧

马子骧,字右白,灵寿人。康熙戊午举人,官乐平知县。有《午梦堂诗稿》。

春暮

昨夜轻黄上柳枝, 东风吹出一丝丝。明知春色留难住, 不解流莺恰怨谁。

征人曲

日暮边城画角哀,千群铁骑猎初回。辽阳不是衡阳郡,一纸曾无雁寄来。

黄之裳

黄之裳,字坤五,元城人。康熙戊午举人,官锦州教授。

怀家兄客五狼

飒飒秋风凉,飘飘吹我衣。所思在海隅,惆怅别经时。千里远为客,地僻音信稀。 忆尔羁旅单,又恐所愿违。仰视河汉改,君今归未归。

游灵岩

雨后灵岩路,霜枫落马蹄。峰回山寺近,树接野天低。孤塔横云断,层峦割雾齐。 坐看江色暮,乱木鸟争栖。

申颋

申颋,字敬立,永年人。康熙戊午副贡,官唐县教谕。有《耐俗轩诗集》。

大鹏咏

蒙庄赋《逍遥》,北溟生胸臆。奇气化为鹏,扶遥渺八极。寰中小世界,谁睹垂云翼。我欲乘其背,不使六月息。回翔与天处,俯仰周万亿。戏掷一羽坠,尽屈人间力。庶几服愚顽,永绝戈与弋。气嘘阴阳转,雨旸无愆忒。翅簸山海平,天下无倾仄。两爪握双曜,岁序无催逼。我乃驱之游,逍遥玩物色。浩荡无古今,曾何辨畛域。

凤凰咏

凤凰不出世,徘徊念九州。必逢舜与文,始肯一来游。寥寥三代后,无足当其求。 抱瑞层霄上,下悯江河流。孔子老删述,麒麟掩荒丘。何关凤德衰,祇为天地忧。

箕亭坐月

月满沙溪白,流光摇竹树。遥遥晚钟鸣,声落幽吟处。尚有耦耕人,烟中闻笑语。

纪殷仲泓事四十韵

鸡泽有诸生,殷渊字仲泓。其父镇兴安,是为大陆公。战守兼惠养,颇足慰兵凶。嗣昌出视师,剥削以自丰。三日军无食,群怒集贪□。借公灭众口,竟以军法从。渊乃大悲愤,叩阍渎宸聪。帝怒挠军机,欲诛怜幼冲。赦归益自奋,誓洞仇人胸。乃与其兄岳,晦迹混樵农。及闻嗣昌死,瞋目叱苍穹。贼不膏我刃,没齿恨难终。渊力猛如虎,渊才矫如龙。痛父复怀国,恨世无英雄。破产集义勇,移檄会诸戎。当时称大帅,蟒玉荷恩隆。养贼以自固,愚怯羞儿童。遂使失天险,长驱太行东。腥气遍畿辅,千里烟氛红。闻有鼎湖泣,奋袂思遗弓。挥岳将母去,避乱狮子峰。渊乃倡大义,哭庙会黉宫。遂此擒伪官,鼓进讨元凶。有犬突牵衣,长嚎凄以恫。渊时亦心动,众志何忽忽。是时肘腋间,咸与贼众通。当渊哭庙时,贼骑已环攻。从人皆奔散,只身撄其锋。双锷纵莫当,斩刈如蒿蓬。苦战无声援,围合复数重。仰呼天亡我,谁收再造功。身被十余创,日昏叹力穷。遂为贼所获,弃尸泮池中。犬乃逐鸟鸢,僵死卫其躬。乱定收遗骸,兼为义犬封。余每闻岳言,慷慨仰英风。求死孝不得,乃竟死以忠。捐躯在布衣,姓字谁见崇。美新徒有扬,长乐徒有冯。请看义士犬,能不惭仪容。

遣意

日入群动息,日出群动作。劳人失其常,作息每逾格。扰扰千万端,暂梦还错愕。 劳人好为劳,不劳意不乐。伏思上古时,人生熙熙若。无得恶乎失,无善恶乎恶。谁令知识 开,乾坤归雕凿。制作日益繁,风俗日益薄。无论义与利,同陷此束缚。里巷递悲歌,后先 总萧索。平生满腹愿,毕命奚所话。蹉跎我何为,黾勉学酬酢。志屈气不伸,人犹讥简略。 逢世终难工,徒使朱颜削。思出天地外,放形同云鹤。挥手谢人群,俯仰何其廓。

武安至涉县作

涉县倚出隅, 群山相拱向。峰峦森角戢々, 环诡不可状。古木互纠纷, 白云自逸宕。

土人不知名,行旅谁眺望。我欲穷幽险,天晚妨游杖。因思北士雄,山川多奇状。妙理藏深寂,孤高默自况。吴越多雕锼,位置堪盆盎。标题分名目,反使山真丧。巃嵸此大观,自然任天放。斯世无真赏,多为词人诳。冥心契山灵,寥寥谁同尚。投宿隔深林,沽酒酬青嶂。

高秋霜气轻,爱兹山日暖,攀援不辞劳,取路快迂缓。我仆犹深谷,我身已绝巘。往往数武间,相失隔回转。人声谷响传,云散岩姿展。平冈耀丹葩,乱石翳苍藓。细泉行履舄,肃籁鸣丝管。山深日易昏,投林鸟能返。吾亦寻所依,云际辨鸡犬。山家少茅茨,凿崖开客馆。供食无兼味,民淳风俗俭。饭罢呼主人,挑镫话款款。

黎城至潞城作

昨夜山风急,吹叶惊客馆。晨起闻雨声,未觉妨游览。荷笠出孤村,行行雨渐缓。 山峰与云峰,出没浑不辨。夙爱岩谷奇,今喜道路坦。高吟兴悠然,委辔任山蹇。原野遍氤 氲,旭日遥峰展。空濛隔疏雨,众壑殊晦显。山鸟高下鸣,倏见晴光满。雨气蒸为霞,赤焰 横绝巘。恨无良友俱,妙赏谁余道。

落花感怀

未花望花开,兴在未花前。花开旋复落,恻恻春风前。人情淡所无,既有绝念难。 谁能齐得丧,复作未有观。

同陈宗文寓叔宽高斋赋赠

吾党贤豪士,君诚未易过。肝肠历霜雪,身世入风波。道大文章细,心孤感慨多。 何时同卜筑,朝夕话烟萝。

赠张明远

小巷门常掩,窗阴竹几层。贫怜养志子,老作在家僧。苦行逢人笑,问心转自憎。 挥杯时劝影,明月是高朋。

草阁

草阁著书罢,长林秋色闲。尘喧不到处,庭户若空山。片雨随风过,残云带鸟还。 萧然无所事,双手纳怀闲。

赠胡逊谷

少频遭患难,老讨乐间身。半掩茅庭竹,高吟驴背春。不文焉用隐,惟德始能贫。 薄俗徜徉里,谁知异众人。

元夕招同人赏镫寄怀路庶常元升表弟

黄昏歌鼓集比邻, 雪雾朱栏月倍新。千里华镫同此夕, 一庭芳草又生春。诗才辇下

今谁好,友道天涯我辈真。未审故人怀故否,相思不敢寄书频。

【卷三十八】

顾八代

顾八代,字文起,满洲旗人。荫生,官至礼部尚书。谥文端。有《顾文端诗钞》。

白鹤楼观敌

俯槛西楼望,凭高索敌情。两江虚减灶,一郡伏奇兵。多算方为策,擒王岂在争。 待劳原以逸,入阵自纵横。

苍梧江亭月夜有感

亭畔云屯骠骑营,苍梧日落数峰青。水分万壑翻增怒,月映千江未减明。军帐此时 多算胜,滇池何日始承平。兵机贵速师休老,寄语将军早下城。

师行讨逆已经六载将士各有怀归之思因跻苍梧三合山有感而作

四望山河感夕晖,南州久陷虎狼围。版图玷缺思全复,寇盗猖狂笑彼威。铜柱功勋 应早建,碧鸡将士莫怀归。来朝入阵还堪试,参赞无须著铁衣。

明珠

明珠,字端范,满洲旗人。由内务府郎中官至武英殿大学士。

汤泉应制

御天来凤辇,浴日启龙池。淑景黄图早,朝晖紫幄披。落花萦采仗,初柳拂珠旗。野回纡皇览,銮停拥地祇。翠岩深{穴叫}窱,琼构郁参差。萝磴时留跸,松门不翦茨。方塘含皎镜,文甃净涟漪。却望陵园近,弥深弓剑思。山川开丽瞩,草木得华滋。豫悦千秋洽,阳和庶物宜。每勤长乐养,独奏广微诗。溜暖春频驻,波暄律罢吹。逾涯涵帝泽,曲逮被臣私。并命观温渚,相将陟涧湄。气凝浆五色,味绝露三危。凛节何由度,恩光实在斯。赤鳞游自异,锦雁饰奚为。瑞已徵灵液,祥应颂玉芝。远侔尧德俭,只法禹宫卑。孝理能驯鹿,仁风遂化鸱。抚躬多窃幸,好爵久相縻。喜共清泉挹,如从丹洞窥。濯磨欣有赐,调燮愧无奇。愿讬潺湲水,年年奉圣慈。

朱昌祚

朱昌祚,字懋功,号云门,汉军旗人。由启心郎官至直隶总督。谥勤愍。

冬猎篇

晓霜光里寒凝木,牙旗闪闪前山麓。锦臂雕弓美少年,半醉流霞红映目。朔云惨惨风{风刘}々,呵指敲冰饮紫骝。盘马弯弓好身手,壮气真欲拏蛟虬。前有啼犭戎后猛虎,从容一发千钧弩。叠双命中不单杀,毛旋如风血作雨。或击或刺或空拳,健儿有鹿鹿满肩。草中狐兔敢窃发,宋鹊突起韩卢前。传箭罢围先数获,谁往南山射雪额。碗酒光摇玛瑙红,当筵又舞神亭戟。

桂山堂为平湖陆侍御作

清溪曲曲森丛桂,山人寄迹非忘世。得归盘谷且逍遥,似到淮南成小憩。立朝面冷如生铁,百炼之钢不可折。对仗令人心胆寒,归田同我头颅雪。我来正值落花时,红英片片浮春卮。秋色桂林应更好,山中猿鹤毋相疑。

王登联

王登联,字捷轩,汉军旗人官至保定巡抚,加工部尚书。谥悫愍。

次新乐

晓发恒阳道,逶迤此北征。霜风吹木老,河水向冬平。几处余烟火,长途复送迎。 嗷嗷何日靖,饥溺倍关情。

定州塔

塔势陵太清,荒烟入望平。诸天依净业,一磬散秋声。游客无今古,高松见性情。 谁能亿劫外,独证法王城。

王新命

王新命,字纯嘏,汉军旗人。官至河道总督。有《东山集》。

别江右

昔来南浦日,此地只孤城。黾勉行吾拙,艰难任世情。有心筹国用,无力赡民生。 赢得清风去,飘然两袖轻。

才见烽烟靖,灾荒又叠闻。按图稽户口,旷野少耕耘。下诏怜余子,蠲租出圣君。 不才惭贾傅,宵旦独殷勤。

已知民力竭,仰屋强持筹。到处分铜虎,谁能运木牛。檄书频夜至,飞挽几时休。 幸荷皇天佑,无贻覆餗忧。

张勇

张勇,字非熊,咸宁人。明官副将,入国朝,官至靖逆将军,管甘肃提督事,封一等侯。赠少师,谥襄壮。

过崆峒

蚩尤战后久销兵, 此处犹存访道名。万里山河尘不起, 松风常带凤鸾声。

周昌

周昌,字培公,荆门人。官山东登莱道参政。

梦友

老去辞家事远游,经年何故久淹留。燕关秦塞长为客,露竹风蝉早报秋。半壁镫昏 人破梦,一声鸡唱月当楼。此时离思添多少,不见归鞍到郢州。

崔岱齐

崔岱齐,字青峙,平山人。贡生,历官长沙知府。有《坐啸轩琐言》。

送侯屏山怀山归闽

木兰坡上草离离,秀影依稀映墨池。顾恺山川宜写照,王维兄弟尽能诗。客中归思 同云远,江畔孤帆带月移。一片隋隄杨柳色,那堪又折向南枝。

隋隄步月

隋苑繁华半已非,隋隄烟月自清晖。紫箫团扇曾同照,锦缆牙樯何处归。水浸一天 星影动,风摇两岸荻花肥。堪怜廿四桥边柳,惟有惊乌向夜飞。

移榻

移榻中庭趁晚凉,微风轻送野花香。萧然高卧浑忘暑,多少流萤绕画廊。

韩章

韩章,字可贞,号桐庵,汉阳人。拔贡历官南宁知府。有《文起堂诗集》。

过祭风台

尽瘁匡王业,山河指顾中。吞吴虽有日,破魏岂因风。欲借驱除力,期收虫矞蚌功。 全身谋早定,眼底小群雄。 刘中柱

刘中柱,字砥澜,号雨峰,宝应人。历官其定知府。有《兼隐斋诗钞》。

赠朱锡鬯

海鹤从东来,翛然冰雪姿。徘徊不肯下,戢羽何所之。飞凌青汉上,栖止苍松枝。 渴饮蓬瀛水,饥啄商山芝。取意贵適性,唳发生清飔。俯视笼中鸟,跼蹐深堪悲。虞人空叹羡,矰缴将安施。

赠杜于皇

名士天涯盛,襄阳耆旧稀。风尘双鬓短,心事十年违。酒对深镫酌,垆当冻雪围。 无端悲喜集,明日送君归。

夜发江心驿

怀归眠不得, 荒驿五更寒。路曲听鸡转, 林昏立马看。霜花迎面落, 月影照身残。 犹有牵衣者, 殷勤泪暗弹。

送毛大可检讨假归

玉河桥畔柳疏疏,最是离情不自如。同调十年怀旧雨,归装一束只残书。镫红酒绿围炉后,花落莺啼拨棹初。回首上林人衮衮,马头尘起拂金鱼。

陈宏范

陈宏范,字迺锡,一字伯子,长沙人。荐授偏沅副将,未就。有《东祝堂诗草》。

旅夜露坐和高羽可

非是辞卮酒,今知惜醉狂。空天人一影,远道月孤凉。见我同梅瘦,为谁教菊黄。 博来清梦熟,不卧祖家床。

刘献廷

刘献廷,字君贤,号继庄,大兴人。

怀古

古之兵皆农,农富兵亦强。古之士皆农,农朴士亦良。兵农一以分,甲胄无余粮。士农一以分,耒耜无文章。分之则两伤,合之则一理。请语当途人,治乱实此始。

题晖草斋

谁将堂上春,得比春日晖。日入光更出,亲老无重归。谁将人子心,得比庭前草。 春风日日吹,草色年年好。

水仙操

天行海运旋宫音,万象回薄由人心。移情易性琴非琴,刺舟而去留深林。海水汩没 鸟哀吟,余心悲兮无古今。援琴而歌泪淫淫。

留别张鸿伯兼怀张非文和韵

舟檝吾将老,诗书世所轻。谁知天下士,漂泊亦无成。放眼空今古,虚怀向友生。 北归心已足,不复悔南征。

赠行西上人

铁骑穿云旧拓边,大江归去浪连天。五更梦醒荒祠下,百战人酣绣佛前。风急雁行排远岫,秋高雕影落寒烟。与君共望中原路,衰草离离倍黯然。

卧病

风尘泉石两蹉跎,岁月催人委逝波。万事无成心力少,一生有几别离多。梦回弟妹 依然失,病久交游谁更过。剩把新诗消永日,空床独坐强吟哦。

幽居

王孙学赋小山招,意气崚嶒耿未消。燕市酒酣闻击筑,吴关人去忆吹箫。功名梦醒玄驹国,卜筑门临白马潮。回首故园千里外,江乡随地老渔樵。

赠向语可

天半峨嵋落照边,汉川东与蜀江连。万金散尽犹存骨,一剑长留岂学仙。秋水欣逢 东海若,马蹄难遇九方歅。穷途我自怜空手,洒泪相看大别前。

王昭君

六奇已出陈平计, 五饵曾闻贾谊言。敢惜妾身归异国, 汉家长策在和番。

汉主曾闻杀画师,画师何足定妍嗤。宫中多少如花女,不嫁单于君不知。

王洁

王洁,字汲公,号洧槃,大兴人。有《幽居山房稿》。

金山

七级凌峰顶,虚窗总不扃。层岚开紫翠,急浪走雷霆。斯世方多故,高天果独醒。 茫茫看尺五,敢欲问青冥。

明月生东岭,波光一鉴开。欲寻甘露寺,更上妙高台。黄鹤千峰去,苍云万里来。 无端吹觱篥,唤起洞龙哀。

田蘭芳

田兰芒,字梁紫,又字伍众,号篑山,睢州人。诸生。有《逸德轩诗》。

责竹

我闻昔人言,不可居无竹。一日少此君,顿使面貌俗。绕舍长儿孙,汉书亦省读。常思一亩宫,辟向渭川曲。今夏假馆处,横窗饶寒玉。谓可浣尘襟,切磋比淇澳。而乃出入间,多见异标目。烟敛失潇洒,月来伤局促。无实致丹山,有音殊嶰谷。似畏淇园伐,如睹湘江哭。疑余非德邻,坐令形神辱。不见芝兰生,无人亦芬馥。松柏挺苍翠,曾不移寒燠。君子秉贞操,所贵在幽独。因物有加损,怪尔终碌碌。

住孔楼三年矣别去一叹

东风回首怅天涯,此地曾经阅岁华。旧舍乍离应入梦,新居更卜未还家。飘风燕子依人怯,背日柴荆任意斜。物理推移浑莫定,青衫何用湿琵琶。

颜鼎受

颜鼎受, 字孝嘉, 一字初阳, 桐乡人。有《峄山堂半乐亭诗》。

楚山歌自郴州还桂阳作

楚山高复高, 楚水深复深。悠悠行路难,每伤游子心。游子越险阻,往来桂与郴。郴江鸣湍急,桂岭秋夕阴。西涉雉鸡冈,东眺龙虎岑。缥缈白云峰,萧疏黄叶林。俯瞰金牛潭,泠泠泻寒音。草木渐摇落,猿鸟多悲吟。纵观豁高目,长啸开幽襟。欲招苏耽鹤,且携宗炳琴。严城照霜月,四围鸣杵碪。酌酒聊自劝,慨然思难禁。

秋怀

迤逦秋山落日明,路从深箐入蛮阬。新田芋熟栾巴郡,石室蒿深义帝城。四塞风烟如一色,五溪言语不同声。苍凉每有穷途泣,此日猖狂似步兵。

甲寅四月十五日值余生辰久客思归困于兵革因诗赋感

首夏清和绿野平,乡心愁听鹧鸪声。十年结客黄金尽,一夜摧人白发生。出处应知

吾道重,安危不系此身轻。差惭马齿徒加长,自顾难为伏枥鸣。

杨宾

杨宾,字可师,号大瓢山人,浙江山阴人。

换车行

冰冻马蹄行不止,历尽千山复千水。边门未出已难堪,况出边门二千里。沈阳城外换柴车,柴车换得无人使。坡陀木石相枝撑,谷口泥淖多呀坑。日日辕摧与毂折,翻云覆雨如人情。人情翻覆乌可识,出门步步行荆棘。涕泪沾巾向北风,但见庭闱死亦得。

至宁古塔

望望吉林峰,白云绕其下。登顿及今朝,亦得依亲舍。父母骤相逢,注视还相讶。 别时发覆眉,胡乃成老大。邻舍争慰劳,应接苦不暇。姓氏未及知,空言聊慰藉。日暮细挑 镫,恍若梦中夜。喜极乃更悲,不觉泪如泻。

上书不得达,生男亦胡为。四十始省亲,问心良可悲。戏彩愧老子,挽须同小儿。 西山日已薄,乡国归何时。叹息谓季弟,尔独无分离。承欢廿八载,此乐人谁知。

寻广泉寺

古寺寻何处,穿云上碧空。泉飞阴洞口,僧老乱山中。废殿残碑在,禅房曲径通。 可知全盛日,人在蕊珠宫。

自寿安山晚归

不觉众山暮,扶筇趁落晖。醉同樵共唱,行逐鸟俱飞。树色凝烟紫,秋声入夜微。 欲知投宿处,前路一僧归。

九山登香山绝顶

香山绝顶路崔嵬,万古何人坐石苔。落叶满林围白塔,西风匝地起黄埃。浊醪不惜 随时醉,野菊偏能向客开。极目正从乡国望,断鸿飞过雁门来。

寿安寺

祭星台北秋风路,曲折高低送薄寒。夹道苍松犹错落,当门白塔半摧残。荒山是处 生祇树,古佛何因卧石澶。莫恐世人多误认,黄粱枕上梦邯郸。

隆教寺

天半烟霞窟, 秋风作伴游。泉声当树落, 云气隔山浮。小鸟移丛竹, 残香入画楼。

寺多桂窗前堆柿叶, 知为学书收。

来青轩远眺

薄醉坐层轩,无弦琴独抚。仰首忽狂叫,久之不能俯。霜叶斗春花,松涛卷秋雨。 悠悠绝壑云,近风自吞吐。东北豁一隅,肯借他山补。天宇净无尘,庶几见远浦。贝阙与珠宫,丹碧讵能数。——恣幽探,宁复论今古。

梅文鼎

梅文鼎,字定九,号勿庵,宣城人。有《绩学斋集》。

复柬方位伯方子精西学,愚病西儒排古算数,著《方程论》,谓虽利氏,无以难,故欲质之方子。

象数岂绝学,因人成古今。创始良独难,踵事生其新。测量变西儒,已知无昔人。 便欲废筹策,三率归同文。宁知九数理,灼灼二支分。句股测体线,隐杂恃方程。安得以比例,尽遗古法精。勿庵有病夫,闲居发疑倩。展转重思维,忽似窥其根。和较有实用,正负非强名。始信学者过,沿古殊失真。辟彼车与骑,用之各有神。篆籀夫岂拙,弩啄日以亲。 援笔注所见,卷帙遂相仍。念子学有宗,何当细与论。

江上望九华山慨焉有感

曾闻九子山,险怪类西岳。攒簇金芙蓉,峥嵘发华萼。我来江上看,烟光喜澄廓。 奇峰缥缈间,一一青如削。百里势不绝,蜿蜒相回薄。扁舟不可停,所见乍前却。参差互出 没,灵异难遥度。振衣思高颠,攀跻一何乐。长歌入杳冥,凌风瞰大壑。身轻生羽翼,虚无 行碧落。平生慕至道,幽探性所话。于役曾未休,天游攘六凿。福地傥依栖,旷然解尘缚。 敢忘夙昔心,敬与山灵约。

雪中家从叔瞿山过饮山居

青山闭户孤居惯,书卷时开逸兴多。觅句每于闲处得,逢君何意雪中过。寒花万树 看图画,浊酒盈尊起和歌。泥滑只今愁去马,荒村莫惜醉颜酡。

送姜学在归吴门

午桥雨过杜鹃啼,归客扁舟发宛溪。下濑薰风吹去棹,到家绿树遍长隄。伯兄稚子 经年别,画舸名园几处题。难忘敬亭山下路,清秋迟尔共扶藜。

喜晤彭躬庵先生即送归冠石先生别号树庐,有《冬心诗》一卷。

曾向冬心见树庐,人间万事一编书。相看此际天难问,却喜耆年鬓未疏。浩荡秋空 涵日月,清泠江水辨龙鱼。布帆风满君归去,万里行云自卷舒。

柏枧山顶望仙人台同观湖先生

峨峨方石台,千尺凌晨烟。昔闻山中叟,曾此逢飞仙。棋局观未终,倏忽更岁年。 樵斤寘丛条,木皮合且坚。崖树既摧朽,无人能攀缘。我来陟岭半,俛视兹台颠。再寻蛟路 登,所见惟青天。琼宫在何许,便欲乘风旋。下界溺埃尘,安能久迁延。何当封马鬛,非敢 冀牛眠。庶同五岳游,免此情内牵。云车策风马,愿言长执鞭。

题赠宛津庵澹生上人

小刹对山城,溪桥一水横。披帷来野色,傍郭有经声。高树虚窗入,遥峰隔岸明。 此中逢惠远,真觉道心生。

喜半公归自新都柬寄索画

病起看山山更奇,溪桥酒醒一题诗。相思白岳人归处,正是苍崖雪霁时。路转层云峰出没,水澌古磵石逶迤。心闲好景供图画,肯寄荒斋慰别离。

张实居

张实居,字宾公,一字萧亭,邹平人。有《萧亭诗选》。

感遇

吁嗟问苍天,苍天何沕穆。生生与化化,总之属疑独。青女散霜雪,万物悉蛰伏。 达人志功名,下士冀寸禄。大哉千载猷,巧迟宁拙速。轗轲忆生平,使我思毣々。尝言徂远征,貂裘袭文縠。骏马比騄耳,宝刀号青犊。往来射平坂,驰驱猎林麓。鹰鹘多所获,皆是凤凰族。烽烟连四塞,中原正逐鹿。强众暴弱寡,荒陬□□□。我亦流离人,中怀旷若谷。前临大江边,波涛怒如覆。鲈鱼此处美,菰老莼丝熟。倚马眺金焦,凌空势矗矗。天堑南北分,峨舸发连舳。为咏横槊诗,流连而三复。洒泪望新亭,帆轻云龙逐。行行入石城,停留未信宿。夜半楚歌起,重围惊如簇。将军弃雕戈,士卒脱弓韣。须臾内变生,谈笑肆诛剧。辕门已系颈,仅尔免彝戮。丈夫气沮消,归途来仆仆。堕露饮木兰,残英餐秋菊。惆怅故乡秋,西风破茅屋。蓬蒿满阶除,凄怆城下竹。存亡已相半,去者无竿牍。楼头狐昼鸣,墙外鬼夜哭。有园成瓦砾,松声犹谡谡。断木栖野鹤,残荷伴孤鹜。掩卷泣蓼莪,回首悲风木。架上藏父书,手泽不能读,日夜事桑麻,莨莠胜佳榖。凉风已届候,草木皆肃肃。为曰检衣裳,御寒无旨蓄。小时固庸庸,长大复碌碌。

雨后

雨歇山欲暝,夕阳在鸟背。孤亭淡清秋,花木有余态。凉风四面吹,长空荡残霭。 更望西南风,窈窕秀如黛。山树互幽映,流泉舂云碓。独坐酌芳卮,明月来相对。

王烟客先生长白山图歌

泰山东北址,副岳惟肃然。茂陵刘郎封禅处,金枝玉叶尝绵绵。太常兴到山图出,

千峰万壑相钩连。黑气淋漓走风雨,笔痕缥缈生云烟。会仙崔嵬三千仞,峰峦剑立树倒悬。 大谷两嶂更奇绝,或如狮吼或象眠。源源不断绣江水,黛溪百折清且涟。展卷恍入翠微里, 伏生范老同周旋。我家小山临黄谷,负耒独耕谷口田。闲上摩诃采芝草,却临黉堂酌醴泉。 手握绿文蝌蚪字,寻真日日踏层巅。昔有人于伏生墓得古书一编,字皆蝌蝌。闻有仙人号白兔,倒骑白兔凌青天。仙人不知何处去,柴门流水今依然。

会仙山

峻极中峰此独幽,天低日见白云浮。西来岳色孤烟秀,东望沧波一勺流。金简坛迷虚夜月,山即古肃然,为汉武禅处。赤松迹杳凛高秋。不知山顶何年辟,流水柴门胜概留。

桃花谷

小径穿深树,临崖四五家。泉声天半落,满涧溅桃花。

清明

桃花乍放柳初生,叶底春禽送好声。人在四围山翠里,斜风细雨度清明。

朱缃

朱缃,字子青,号橡村,历城人。官主事。有《橡村集》。

无棣

斜日下城角,炎风一骑驰。野花全白后,山果半红时。小袖攀桑妇,方垆卖饼师。 我来偶摊饭,树影正离披。

燕子词

翩翩燕子隔花宇,黑翦红襟向花舞。去年将子入高楼,主人爱惜垂帘钩。拂尔毛羽护尔巢,殷勤结纳同良交。岁寒飏去不回首,无需于君从君嘲。今年重来少颜色,巢空泥冷生荆棘。任尔呢喃语纷纷,主人高卧如弗闻。

赠别李公晋归恩州

经旬亲杖履,游与喜同君。新水鸭王浦,空山扁鹊坟。谈丛推雅量,酒阵策奇勋。 挥手来朝别,春风隔暮云。

周纶

周纶,字鹰垂,江南华亭人。贡生,官国子监学正。有《芝石山堂稿》、《环山堂 集》。 由冯公岭抵括苍作

云气昼冥冥,山深虎豹扃。岚光疑晓雾,猎火乱寒星。地自飞泉白,天由密树青。 穷荒开郡国,次第入郊坰。

徐立斋太史枉过

六载与君别,翩然过我庐。每憎西向笑,多愧北来书。贫贱论交外,风尘历世余。 不才甘自废,且莫问盐车。

郯城

春秋郯子国, 瓦砾尚孤城。吏事昏鸦集, 人烟返照横。乱流豗地脉, 遗戍护农耕。 衮衮看前席, 凭谁一寄声。

陈奕禧

陈奕禧,字子文,又字六谦,号香泉,海宁人。贡生,历官南安知府。有《春霭堂 集》。

祁州道上

榆柳清阴覆井床,南风五月叫蜩螗。我行真为村农喜,绿树中间麦尽黄。

往通州途中漫成

两载川衡转运功,今朝又挂布帆东。鹭凫野岸瀰瀰水,禾黍秋原淅淅风。高鸟独归 残照外,晚山半入乱云中。淡然心事凭谁识,一笑吟成意未穷。

卢舜徒太守送余至天津留别

谁信黔西去,相随泛海云。明知终欲别,只为惜难分。老泪不空洒,此情倾向君。 桃花潭水意,岂独古人闻。

平山道上

暖日晴风弄远晖,好山嘉树绿成围。唤回僧梦蒲牢响,点破溪烟属玉飞。麦陇近秋垂穗熟,鱼梁向晚撼流民屋,荒草春迷叛将碑。"皆有奇到稀。

由冯公岭抵括

云气昼冥冥,丛篁绕翠微。蹴花双燕下,带雨一僧归。吟兴消长昼,春寒上夹衣。 朋俦尽何在,行处颇邙机。

易隆寓夜

对客衔杯睡已迟,夜凉欲到被先知。暗风将雨窗前过,正是驿楼酒醒时。

赵善庆

赵善庆、字怡斋、德州人。历官金华知府。有《重知堂诗》。

荆卿歌

燕丹日夜思报秦,好客不减平原君。朝游燕市伴屠狗,夕入东宫为上宾。感君意气惟君使,函关西向轻生死。片言立杀樊将军,日暮悲歌临易水。易水萧萧疾风雨,渐离击筑声何苦。道旁送者涕纵横,壮士驱车不复顾。图尽须臾见匕首,惊起秦王环柱走。只今犹恨夏无且,英雄功败提囊手。擿王不中置锟铻,事后论人剑术疏。当时谁入虎狼国,自是昂藏一丈夫。

给假东归留别子未

抱病人偏忆故园, 东归萧索不堪论。张融陆处宁非屋, 贾岛穷居尚有村。击筑悲歌醉燕市, 敝裘羸马出都门。两年诗酒留连地, 回首茫茫欲断魂。

醉题

苦吟镇日爱风骚,醉后偏矜意气豪。宁诵相如《大人赋》,不弹摩诘《郁轮袍》。 矮窗残日排书卷,老屋青春压酒槽。栗里归来耻腰折,凉州那得换葡萄。

朱载震

朱载震,字悔人,潜江人。诸生,官石泉知县。有《和山堂诗集》、《东渚诗钞》。

牧仲见贻方竹杖赋谢

明日别公庐山去,赠我竹杖随行縢。体方节坚色滑净,一条碧玉锋棱棱。侧闻分宁 邃岩谷,狼虎部曲蒙茸藤。截致颇难形甚古,大朴不雕囊以缯。世闻圆柔易为好,直方谁解 堪依凭。我老懒拙无一可,舍藏信宜行未能。大布一领书一簏,漫游得此真良朋。匡君旧识 不我弃,招手高峰穿崚嶒。扶携万仞观天地,大笑齐物无鹍鹏。拜公嘉锡感公意,知己名言 永服膺。何当杖头书岁月,幽寻衡岱嵩华恒。

和杨侍御筠湄秋怀

薄醉江楼怀暂开,家园迢递首重回。淡香红叶霜前径,细蕊黄花雨后苔。汉祖频年 思猛士,燕昭何日筑金台。不才自合烟霞老,未许天边鸥鹭猜。

同石城公牛潜子秋日汉上

澄陂秋柳带明霞,茅屋参差野老家。江转危矶奔骇浪,村邻小市缀疏花。河鱼入馔 偏堪饱,浊酒能酣不用赊。赢得山公清兴在,停骖闲数后栖鸦。

夏过北兰寺

寺通野阜转清幽, 压户藤梢带叶抽。最好江洲浮远绿, 孤悬塔影漾中流。

短栅逶迤曳履行,晚飔摇飏葛衣轻。老僧送客烟江外,一鸟啼残落照明。

宗元鼎

宗元鼎,字定九,号梅岑,江都人。有《芙蓉斋》、《新柳堂》等集。

早秋

我行初出郭,新月似蛾眉。几夕望舒圆,今复蟾兔亏。匪独此朝夕,百岁亦如斯。 怀情不能寐,徘徊向中墀。侧闻草虫鸣,仰望繁星垂。人言秋漏长,已觉衡汉移。千念未夜 息,万感与朝期。长卿恒有疾,子云终何为。引领还踯躅,泪湿衣裳缁。

题郊居

茶灶声清响竹廊,小亭新构面横塘。渔夫晚唱烟生浦,桑妇迟归月满筐。一岭山花烧杜宇,满池春雨浴鸳鸯。篱边犬吠何人过,不是诗僧是酒狂。

冬日过甘泉驿

记得当年来古驿,马鞭带雪系楼前。双柑香溅佳人手,半臂寒添酒客肩。忽见荒隄 摧暮草,空伤衰榭没寒烟。风尘满目深惆怅,却望谁家寄醉眠。

过山中

东风吹雨度香芸,远近烟岚晓未分。一径浓桑沈碧影,半溪流水荡轻纹。来逢莺语诗从作,去被人留酒重醺。莫道十年名计苦,输农几度说耕耘。

登吴陵城楼

城外村梅映酒旗,故园花落重相思。愁肠已向春来断,况值轻寒醉醒时。

独倚层阑欲望休,江南烟月动春愁。青山碧水无穷尽,卷入吴云去不收。

炀帝冢

帝业兴衰世几重,风流犹自惜遗踪。但求死看扬州月,不愿生归驾六龙。

扬子江

帆去天涯势不回,龙笳何惜渡江来。香车若到长干路,后主荒宫花又开。

甘露寺北轩追和杜牧之韵

独步回廊绕槛行,鸟啼花谢正关情。感深落月前朝笛,愁绝垂杨故国笙。帆影东南 连水气,梵音朝暮杂潮声。重来十载题诗客,依旧人间浪有名。

百尺楼

素袜翩翩月一钩,凌云风致想高楼。江南歌舞寻常事,便遣曹彬下蒋州。

雨中留邹丽农

新开兰蕙正芳菲,初到鲥鱼入馔肥。正是风光好三月,如何抛却渡江归。

吴音曲

璧月庭花夜夜重,隋兵已断曲阿冲。丽华膝上能多记,偏忘床前告急封。

洪升

洪升,字昉思,钱塘人。有《稗村集》。

石门

先贤逝已久,予亦宿石门。天寒鸟自归,林表斜阳昏。吏隐计难得,讵知忧世屯。 栖栖终短褐,此意向谁言。

征途晓发

夜发蓟丘道,马蹄踏霜华。月照千里白,不辨冰与沙。行行三十里,始闻啼曙鸦。 朔风起何处,隐隐鸣悲笳。徒侣惨不乐,从者咸咨嗟。扬鞭强笑语,前村有酒家。

送吴位三归宣城

宋家丞相后,乔木到如今。之子独古处,对人无俗心。偶来京洛道,旋反敬亭阴。 芳草白云外,春山深复深。

雪望

寒色孤村暮, 悲风四野闻。溪深难受雪, 山冻不流云。鸥鹭飞难辨, 汀沙望莫分。

野桥梅几树,并是白纷纷。

蒙山道中

乱石绕东蒙,崎岖古道通。一身千里外,匹马万山中。密树遥遮日,轻花细逐风。 望云双泪落,岂是为途穷。

寒食

七度逢寒食,何曾扫墓田。他乡长儿女,故国隔山川。明月飞乌鹊,空山叫杜鹃。 高堂添白发,朝夕泪如泉。

柬李东琪

闻君昨日到长安,驿路风尘乍解鞍。古寺楼台高避暑,晴天松柏昼生寒。亲知把臂 他乡少,贫贱论交此地难。我自飘零归未得,秋江劝尔弄渔竿。

衢州杂感

巑岏岭势矗仙霞,阻遏妖氛建虎牙。障日丛篁劣容骑,连云列戟不通鸦。居人乱后惟荒垒,巢燕归来止数家。一片夕阳横白骨,江枫红作战场花。

将游大梁

匹马嘶荒野, 群山拥乱云。迢迢二千里, 去哭信陵君。

安{***真}

安竺真,字青士,寿光人。贡生。有《五亩园集》、《绮树阁诗稿》、《南阳咏稿》。

丁丑春日过巨昧水将之郡城

耿侯遗迹在,怀古溯潺湲。春浪沙纹浅,耕花战血斑。鞭丝垂夕照,马首向青山。 眼底千峰出,朝来好共攀。

戊寅正月六日再至朐城

去岁归时雪没腰,重来残雪未全消。东风委粟城边路,春水溶溶上板桥。

过杏山岭

板桥回渚岸,寒水自潺潺。暮雪三家市,孤城四面山。地仍伯氏邑,险控穆陵关。 匹马行吟到,千峰万壑间。

寒食即事

风吹淡荡酒颜消,斜日迟迟上柳条。薄暖园林芳草地,杏花影里坐吹箫。

张履庆

张履庆, 字视旋, 号顾斋, 淄川人。诸生。有《食蔗堂诗》。

醴泉归途口号

曲曲溪流草木新,朝云暗淡静无尘。回头重有别离色,望里青山似故人。

道中望长白

野绿夕阳横,高峰望长白。秀色一何深,杳与暮云碧。根腰围远树,苍翠半已隔。 颇怀卜居情,尘鞅苦莫释。不知空谷中,几见幽人迹。

张增庆

张增庆,字川如,号损斋,又号缄庵,淄川人。诸生。有《独树庵诗》。

长信词

天街雨过草萋萋,长信宫中乱鸟啼。莫向秋风泣纨扇,昭阳人在画楼西。

溪上

轻阴带斜日, 杳霭前山夕。双鹭忽飞来, 点破一溪碧。

王戩

王戬,字孟榖,汉阳人。诸生。有《突星阁诗钞》。

寄云田先生

菜根堂外竹松曛,霜压平空木叶闻。应有一寒怜范叔,尚能多病爱文君。江边风雨晴川合,树杪人家鄂渚分。欲伴谪仙黄鹤饮,湘波天限白鸥群。

邢州咏怀次少陵自京赴奉先韵

我生天壤间,赋性苦迂拙。清时慕王贡,讵敢说稷契。一编抱膝吟,辄拟向空阔。 倦起出户牖,寓目江天豁。速化讵无术,妄念颇执热。窃谓科名中,亦可奋伟烈。每望通籍 者,如星欲附月。棘闱一逐队,誓与性命诀。蹉跎竟无成,资身百凡缺。彼苍何荼毒,更尔 衣食夺。老亲丘壑志,胡为遭斗穴。祸机发强弩,凶波翻溟渤。相依颂系来,难辞公卿谒。 恶名幸逃免,奔走双骭没。五载一敝裘,脱落类旄节。厚颜对时辈,戒门或被绝。驱车身万里,饮泣肠寸裂。因归蓬荜内,息影咏明发。华发映青袍,长年共愁结。篮舆病可御,仙潜山名。指嵽嵲。倾耳谷鸟幽,徐步石径滑。菽水尽欢欣,歌声殷击戛。北窗隔戎马,恍游怀与葛。木叶落洞庭,寒风吹裋褐。饥驱不暇懒,岁暮且复出。箧间世务书,欲上苍龙阙。举家挥泪送,尚冀涸辙活。割爱就畏途,所遇无故物。烟尘汝阳道,有情皆懔栗。村落春不生,鬼瞷悬罄室。夜眠进新炊,蔬齑杂死质。十日抱杞忧,中原怕萧瑟。万人饱草木,安望千头橘。汉廷免租诏,霈泽到白骨。劝籴并发粟,新恩口争述。除夕渡大河,气象回异辙。试临广武望,巨灵跖突兀。太行亘长云,华彝无断折。淇澳森呼汹,漳流搅勃窣。停骖问邢州,代马翻恋越。邑宰有行役,泥涂耻谁雪。公子蒙招邀,慰我思若渴。自古患难交,圣贤贵有卒。未知主人意,背客潜悲咽。整衣盼京洛,未往心屡折。待诏满金门,兹行戒仓卒。崇高卵易压,羁旅檀可伐。思倚数钜公,清言霏玉屑。欲嫁惜娉婷,不见厕养卒。南国愧妇女,芣苡闲采掇。

将自都门赴山左承都宪徐健庵先生过阮亭家叔寓中见存每念戩为故人之子感赋长句

当年膝下王文度,此日风尘京雒游。长伴塞鸿归碣石,欲观海蜃到之罘。双藤倚户惊垂讯,千佛名经讵见收。只是凄凉怜葛帔,高情须向古人求。

长沙赠刘青岑明府

迢递湘江道,维舟指驿亭。草生两岸绿,天近数峰青。夜雨连云梦,微风过洞庭。 舆人诵新政,倾耳若为听。

江南初买棹,乘暇复登临。斜日明沅水,春云接桂林。相过卑湿地,未废短长吟。 夙昔猗兰操,愿言聆玉琴。君山东人。

壁间画松歌

苍松几株高蜿蜒,黑云玄雾争飞翻。谁将一片雪色壁,泼来墨沈如倾盆。松鬣尽作猬毛磔,松鳞直把蛇皮扪。怪石石果礌状伏虎,莓苔包裹穿长根。茯苓琥珀疑可断,霹雳魍魉愁崩奔。石间巨瀑波沄沄,雷辊电掣银涛喷。水流激击松影动,之而挈攫森无痕。步櫚潋滟夜月出,南荣晃荡朝日暾。长夏科头坐其下,应有偓佺商皓相过存。我昨山行句曲百里内,小松夹道琐细如儿孙。前年栖霞纵登陟,六朝松石留祇园。我知妙笔能寻源,移置此地雄且尊。吴生画工敛巨手,摩诘诗老清吟魂。五月清风买无价,岁寒心事堪重论。

送人出居庸

塞外烽烟莽泬寥,寒冰满地竞扬镳。风吹大漠黄羊过,天亘长城白草彫。百二关河 悲故垒,十三陵寝识前朝。寄言玉碗金凫道,更有樵人晚唱遥。

许节妇诗节妇屠,为孝廉斯立之女。年十七归文学许德基,十八生子岳牧,十九而寡。后岳牧娶妇,生孙同癸,不数月,父子相继殒,屠苦节数十年。青青孤生竹,苦节贞以坚。幽崖闷阳景,气候惨不温。眼中箨龙儿,宛宛抱厥孙。秋风瘁其枝,严霜殄其根。根

死心不死,血泪迸湘沅。凤皇逝莫留,寡鹄长悲辛。百年会有尽,大义矢勿谖。有天讵须问, 皎月当空悬。想当归全日,欢笑迎重泉。谁为写楚词,清光照无垠。

阁夜

寺钟初动来天风,枯林宿鸟归飞中。欲行不行贾胡子,得过且过寒号虫。日望长江 流浩浩,夜听更鼓声逢逢。明发扁舟泊沙嘴,潇湘南去愁烟空。

吴殳

吴殳,字修龄,昆山人。有《好山诗》。

秦

质子妖姬尽可居,六王犹在已丘墟。鞭桥东去无灵药,骖乘西归有鲍鱼。黄犬泪中 惭废立,白蛇醉里报驱除。当时好为秦非计,牧地为封食有余。

洛神

心不随身葬寂陵,却乘金缕一游陈。旧愁黯黯因杨祖,新恨涓涓属灌均。射鹿未消 漳阙泪,惊鸿犹赋洛川尘。君王八斗今余几,肠断无由更感甄。

蜀汉

季世唐虞只此时,泗亭天坏哲人违。三交城下波声急,五丈原韵日色微。西国无烟 生火井,东邻有女落蟂矶。不关锺邓能缘险,黄皓谯周尽识几。

苏台怀古

秋风槭槭雨潇潇,追叹先王气正骄。壮士短箫吴市乞,美人雄剑越溪邀。三更姓馆 樽前蜡,千载胥江月下潮。只有忠祠今尚在,行人指点过皋桥。

笛

胡床数弄渺难踪,只有清疏景物同。几片晓梅江岸月,一行秋雁墅楼风。却愁猿骨侵人籁,更叹《龟兹》误国工。那得中郎来仰卧,会稽千亩正丛丛。

蒲松龄

蒲松龄,字留仙,又字剑臣,号柳泉,淄川人。诸生。有《聊斋集》。

青石关

身在瓮盎中,仰看飞鸟度。南山北山云,千株万株树。但见山中人,不见山中路。

樵者指以柯, 扪萝自兹去。句曲上层霄, 马蹄无稳步。忽然闻犬吠, 烟火数家聚。挽辔眺来 处。茫茫积翠雾。

渡河

归途过黄河,一叶大如掌。飕飗西南风,饱帆荡双桨。船小堕帆侧,高低任俛仰。 舟如瓢水盈,闪闪浮瓮盎。激水雪崩腾,珠花迸衣上。驶急穿横流,汹汹作怒响。回首过来 处,低云接沆漭。

九日望日怀张历友

临风惆怅一登台,台下黄花次第开。名士由来能痛饮,世人元不解怜才。蕉窗酒醒 闻疏雨,石径云深长绿苔。摇落寒山秋树冷,啼乌犹带月明来。

戚玾

戚玾,字后升,号筦尔,泗州人。优贡,官知县。有《笑门诗集》。

饮九弟斋同宿

空城澹寒雾,落叶凄庭阴。萧条岁苦饥,里巷谁招寻。拨泥过我弟,暮雨衣淋淋。 百钱杖头解,斗酒时共斟。入耳声不殊,闻者各有心。何以写吾忧,挥毫同苦吟。虫螀半壁 静,镫火孤窗深。醉拥姜被眠,不知天古今。

赠九烟先生

钟山黄公高绝俗,彩笔当年映天禄。徙海吹山十六秋,吊影吞声卧江曲。栖迟南岳 复西湖,万里青山一担书。岩松犯雪神愈王,野鹤冲云兴自孤。今岁移家来泗上,马队谭经 笑函丈。生徒落落讲堂空,满帘春草风吹帐。予从往籍旧知名,但见文章未见人。踌躇怀刺 久未决,迟迟乃敢登其门。相逢一揖平生见,道气须眉时隐现。布衣箬笠古人风,光瞳瘦骨 高僧面。萧疏促膝片时间,苛礼余文已尽删。乃知古处存今日,往来交接能相安。此后相招 对杯酒,一蔬一豆盘何有。题诗日夜几挥毫,高谭古人时充口。具言往事难重陈,不问人间 汉与秦。志游四海遍五岳,妻孥束缚犹逡巡。更思百年今半矣,天下曾无一知己。寸心摇落 我何言,万事荒疏天不理。眼前膝下未得男,依依弱女黄金看。前者乞灵向淮渎,回波晚棹 辞龟山。惊涛忽起飞神鱮,泼剌投船船客惧。苍苍有意不言迟,小引长歌聊自叙。忧儿忧友 复忧游,百感茫茫未暇愁。渡江僮仆尽辞去,只今沽酒无苍头。子能知我为予构,不取才能 取淳厚。我闻语语出性情,颜热眉开心已受。贱子生平耻杂交,闭门风雨深蓬蒿。岂知相见 如逢故,一我形魂慰寂寥。笑门如斗读书处,绿烟高卷芭蕉树。相看斗酒愧提携,扪虱挑镫 尽朝暮。指画须开北牖窗,窗开柳浪入风凉。题曰烟环志所命,使我高卧游义皇。闲寻古塔 登台话,烟光城阙如图画。感慨中来不自由,一见斜阳泪双下。击水垂云心事违,榆枋笑受 鸴鸠议。孤高平淡违时好,今人绝少古人稀。我得先生交已足,但愧知君非鲍叔。徘徊海岳 放身游,远近相从负行襆。

寒食过友人夜饮

寒食生多感,谈诗觅旧盟。积花充鸟饿,删竹让窗明。湖水春帆乱,山坟野祭晴。 累累孤客意,浇酒亦难平。

八弟自南村过问

野处兄兼弟,遥寻到草堂。菜羹存土性,镫气见春光。小隐时名去,深贫世务忘。 流连因手足,不独在壶觞。

同绥岩明府饮盱山拥碧楼题恒止上人壁

痛饮酬明月,天涯共此楼。客狂能受酒,山浅不藏秋。好叶当人落,迂泉让石流。 更阑吟各就,醉墨为僧留。

王启涑

王启涑,字清远,山东新城人。官茌平教谕。有《西城别墅诗》、《茌山诗存》、 《因继集》、《闻诗堂小稿》、《读书堂近草》。

忆樊川

胜概曾闻白鹿原, 邵平往事感青门。何如韦杜春三月, 花发城南第五村。

同萧亭舅氏晚坐石帆亭听瀑

葱翠满西城,园林媚光景。女墙斜照明,春空霭云影。竹啸与松吟,众妙独心领。 喷薄匹练飞,洞澈毛发冷。相对涤烦襟,如遇谷帘境。乐此遂忘机,陶然万虑屏。

振衣华子冈,飞花散芬馥。流泉百道鸣,激荡声喧蹙。栖鸟惊高枝,微风戛深竹。 池上新月明,万绿如膏沐。缱绻渭阳情,清言惬幽独。参横夜凉生,且共茅亭宿。

周肇

周肇,字子俶,太仓人。有《东冈集》。

赠陆翼王

君是左徒门下士,揭来相对哭途穷。遗孤袁粲累囚日,亡命王成赁保中。书馆三余淹夜雨,客颜一瘦怯秋风。结交世上黄金满,四海何曾识此公。翼王为黄陶庵高弟,当日有保全遗孤事,故专及之。

病中元夕有感

梦入京华怪独醒,孤舟病客鬓星星。逢年漫愧天人策,涉世宁谙长短经。秃笔卖文

差可活, 庸医乞药总无灵。上元镫火萧条甚, 才说宣和已泪零。

许旭

许旭,字九日,太仓人。有《秋水集》。

送宝知上人之江州

十载相看不定身,辞家重作渡江人。白门柳色千条雨,皖口山形二月春。虎去暮天 樵径失,鹤归荒屿讲堂新。浔阳旧日经过地,双屐行随客路尘。

游天界寺

法字巍峨耸碧躔,珠宫宝刹故依然。平分白下山川胜,暗忆金陵创建年。名德到今 传几辈,藏经犹自护诸天。江山尺寸归新主,尚有穹碑记赐田。

淮云寺

石径斜开路几层,扶筇携屐共攀登。花逢九日思兄弟,病阻文园念友朋。南渡白云 悲古寺,西风黄叶哭昭陵。三年遥触伤心泪,欲讯沧洲愧未能。

过废园有感

落日苍茫满客心,无端兴废愧登临。到公死后空存石,谢傅亡来久废琴。一代词人 归蔓草,百年名苑化祇林。芙蓉金粟知何处,野水瀰瀰自古今。

王抃

王抃,字怿民,太仓人。

送友还蜀

山塘绿酒浮芳菲,杨花作团如雪飞。花前沽酒送君别,别泪簌簌沾我衣。兰桡欲发鼍鼓急,感君握手须臾立。把盏长歌曲未终,月光如水须眉湿。君今掉头万里行,萦纡蜀道多不平。石镜铜梁连剑阁,况复江山阻甲兵。愿君努力长途去,旧住岷江发源处。岷山雪消岷水清,望见锦官城里树。锦城花落更愁人,杜宇啼残滟滪春。武侯庙下苔如绣,先主祠前草似茵。君不见辽东华表归来鹤,城郭人民尽非昨。回首江南千万重,梦里寒鸡村月落。

杨州次梅村师韵

牙门置酒宴公卿,锦纛雕鞍命北征。缚袴健儿谁转战,借筹策士总虚名。百年洛蜀 关时运,六代烟花兆甲兵。击楫中流无限恨,夜阑欹枕听江声。

王摅

王摅,字虹友,太仓人。有《芦中集》。

黄海歌

我所居兮在海滨,未登高丘望远海。行入深山尽是山,银台金阙瞻安在。昨投汤院雨翻盆,电激雷轰众壑奔。兹山雨后当铺海,旋因观海登天门。天门削成去天尺,历尽危梯上绝壁。弥勒龛中一宿留,晓起白云千里积。非烟非雾铺虚空,时为车盖时为龙。诸峰没趾渐及顶,初由肤寸弥寰中。天吴仿佛舞其下,万里无际连苍穹。是时罡风吹蓬蓬,听如击鼓冯夷宫。更疑射蛟海水赤,一轮照曜扶桑东。须臾解驳浪纹静,玉池开放千芙蓉。人间万事皆桑田,惟斯亘古无变迁。尘寰跼蹐真可怜,胡弗蹈海如鲁连。三山驱走置眼前,对之欲往心悠然。长愿采药山中眠,朝朝来往蓬莱巅。帝乡未遂平生志,从此浮槎天汉边。

闻汉槎谪戍宁古塔

欲叩君门万里赊,惊闻远戍度龙沙。文章只道金难铄,谣诼翻成玉有瑕。减死蔡邕 方出塞,哀时庾信未还家。可怜交橐归来日,岂有明珠载一车。

怀许九日

闻君才上摘星楼,又到濡须坞口游。胜地山川曾百战,故人烟雨只孤舟。苍苍楚水 蒹葭晚,漠漠江田粳稻秋。应有陈蕃悬榻待,兔悲王粲滞荆州。

吕城病归

挂席西风桂桨轻,扁舟又次吕蒙城。身如枯叶方愁落,心似残潮未肯平。宿雨河桥 横酒旆,晚烟村店聚鸡声。故园归去无多路,每念劳劳重怆情。

张文献公祠

祠堂突兀倚江开,瞻拜空余海燕哀。只道主由金镜致,岂知兵为玉环来。文章自昔 传徐碣,香火常新傍舜台。风度依然凭想像,停舟一荐渚蘋回。

王曜升

王曜升, 字次谷, 太仓人。

登北固山

雄峰高枕瓮城斜,有客登临送晚霞。水气暗吞山顶寺,江云遥护海门沙。天低雁鹜 来千里,地迥星河落万家。指点旧朝形胜在,吹愁何处起悲笳。

端午先忌

余生十载恨蹉跎,令节闲门掩薜萝。剩有蛟龙蟠大泽,空闻箫鼓发层波。三闾怨在 余香草,九地恩深废蓼莪。惭愧王修能罢社,葛衣检点泪痕多。

顾湄

顾湄,字伊人,太仓人。有《水乡集》。

寄唐在兹湖村

带水湖南路,故人来往稀。暗蛩鸣雨急,宿雁入烟微。千卷只茅屋,一身仍布衣。 深居戎马外,知尔亦忘机。

寄灵隐白谷载一两公

交游多半在禅丛,为忆巾瓶事远公。一棹钟声残照里,六桥山色暮寒中。遥天落木 风尘老,旧国平芜烟水空。相送虎溪成久别,比来吟兴复谁同。

感怀

石城笳鼓不堪听,烈士天涯散晓星。伏阙陈东还痛哭,登楼王粲独飘零。奔涛夜立 鱼龙怒,战血春回草木腥。莫说长江限南北,建康原是小朝廷。

阅江楼

万里长江一望收,高皇亲建阅江楼。云开蓬岛星河曙,月出卢龙天地秋。碧草自生宫寝路,青山仍绕帝王州。凭君莫问当年事,禾黍同归六代愁。

田登

田登,字梅岑,江都人。有《埋照集》。

寄怀俨若江右

战后山逾静,花飞戍亦空。人间无客路,天上有归鸿。芳草愁眉外,春江野哭中。 相思似潮汐,日到小孤东。

送潘雪帆祝发天寿山

自悔披缁晚,低回别母难。独寻天寿路,莫上寝园看。禾黍春山遍,牛羊夕照宽。 劫灰飞不到,只有化城安。

行拈方竹杖,爱尔不忽忙。磵路微风动,松花一笠香。到山魂梦稳,持钵水云长。 凄绝乌啼夜,沈吟辇路傍。 乱中晤故乡周子

旧路新亭那可过,神州翻不似滹沱。地经战后人逢少,江入秋声夜听多。白首对君心更热,青萍避客舞还歌。三年消息空惆怅,独立南楼倒晓河。

丁卯客都门值予初度示姚叶二子

百战乾坤剩此身,今宵重对启祯人。白头红烛千行泪,重向尊前话甲申。

天寿山

十里春山入杳冥,残碑断瓦杂苔青。江南漠北浑如此,指孝陵。不信当年石马灵。

只今辇路上牛车, 旧是君王驻翠华。春荐不来寒食候, 夕阳一片野梨花。

【卷三十九】

吴之振

吴之振,字孟举,号橙斋,又号黄叶村农,浙江石门人。官中书科中书。有《黄叶村庄集》。

过东庄看梅

迤逦东庄路,春风黑板桥。前溪通竹树,比户足渔樵。谷口风犹在,南阳兴未遥。 青鞋从此办,不独为花朝。

啸傲梅花里, 今朝定有诗。软香春暖候, 冷艳月黄时。坐久浑无意, 风来每自疑。 游蜂莫相恼, 付与出墙枝。

北户新除径,相随偩竹登。周遭莺语滑,荡漾水痕增。过雨移茶种,添流间麦塍。 无心阶下草,散发任鬅鬙。

同用晦东庄看梅

隔岁心情似死灰,梅花堆里蹔眉开。吹将王冕横枝下,炼得林逋断句回。已分色香 难品第,不烦桃李作重台。落英和雪团成片,研入春醪饮一杯。

晓泊青县

墓树丛鸦闹晓更,周遭小市簇孤城。倒流水激鱼儿上,过渡人稀艇子横。归去诗情 殊跌宕,春来酒量亦峥嵘。个中便得江山助,可是工夫次第成。 同朱老步郭外人家留饭西畴草堂

西畴诗老话幽居,一笑扶筇兴未疏。村市经过残劫后,草堂重醉落镫初。定知鱼乐能千里,已办农忙共一锄。底用榜门坚谢客,霜寒谁肯问籧篨。

树排青嶂绕溪迎,稻撼黄云照眼明。路杂难寻官道合,桥欹不碍小船行。社神香火 尊于帝,村学规条亦有程。笑我尘颜谁举似,隔离花豹两三声。

哭王西樵吏部

话别梁园笑语温,海沙清浅已无痕。十三世向邹阳算,五百年从鲁叟论。阿母追随 差不恶,平生检点更何言。荒唐莫诧骑鲸事,紫府仙曹在杏园。

抛官东海隐修鳞,越尾讹传信未真。赤牍几翻惊入手,寝门一恸竟无因。香奁词赋 尘蛛网,壁垒郊原泣暗磷。遥想夜台沽酒伴,也应宋玉在东邻。

同舜江黄晦木宁都曾止山饮西园次晦木留别韵

长昼摊书转木阴,揭来好友共登临。不将名字依刘表,合有溪山著庆禽。卖屦织帘 高士传,绿樽明月故人心。何年踏浪追潮汐,一梦江头柳十寻。

雨效东野体

雨声无新书,空阶历古今。亦作琴筑响,亦作钲鼓音。如何羁旅士,披衣起长吟。 一点不到地,点点刺人心。遂令千古雨,此夜愁独深。

西畴诗老贻白鱼一双七叠手字韵谢之

黄犊长子孙,放浪谿山久。江南千石鱼,利较力田厚。蓑笠乞网师,笭箵结溪友。相逢菰芦间,不复问谁某。女阳西郭西,古城上培塿。一卷冰雪诗,得自钱䥽手。未许掩瑕瑜,底用饰疵垢。贻我双白鱼,柔条贯柽柳。君弗厌贪饕,伴榼须斗酒。

送少逸

几载不相见,相看倍黯然。人情怜旧雨,天气入新年。白发残镫里,清樽古驿前。 计程翻日记,重为老夫传。

介山游洞庭归过橙斋叠还字韵见赠即席奉答

十载邮筒记往还,今朝杖履得跻攀。人来万壑千岩里,诗在三唐两宋间。数遍藏书推拂水,偶思快友话横山。澜翻几换输赢局,神手应夸我辈闲。

次韵送心壁归庐山

女阳亭子北,把袂送将归。计及投莲社,行当换葛衣。经函鱼茧滑,诗板墨花飞。 赠语藏吾拙,呼儿诵《采薇》。

略约依兰若,钟声话旧游。临流思濯足,望远一登楼。粳稻三年计,芙蓉万顷秋。 天涯双屐齿,莫忘草堂幽。

次韵答墨林上人

不解参禅不学仙,把锄种菜自年年。休将葛岭三生石,错认齐州九点烟。菰蒋萦回 行药去,筼筜刻画有诗传。西林安稳齑盐饭,吼彻鲸鱼丙夜悬。

书研背

万山木落风凛冽,欲堕未堕寒蟾灭。东方太白光睒睒,残星半点衔嵒缺。破屋老儒手皲裂,麻沙净本钞不辍。诗书发冢冀食报,轩车驷马高门闑。白头如雪何所求,仰天大笑冠缨绝。

吕留良

吕留良,初名光轮,字庄生,后字晚村,浙江石门人。诸生。有《东庄诗存》。

东庄杂咏

山水各宗支,结构分百脉。向背意态殊,风土因之隔。于人何亲疏,適意成主客。 昔我避乱初,小筑公山侧。百家饮一泉,邻果任饱吃。人面或万状,性情无两格。古姓聚为 村,樵采名叔伯。午后始开门,槐花深一尺。

跛者命在杖,渡者命在舟。人生依万物,得失不自由。有愁何以消,客或进一篘。 谓客酒可忘,吾愁非真愁。痛饮虽至醉,不入伶籍俦。此酒有时醒,此愁无时休。

微寒尽余威,园林纳新意。品类纷有名,皆从上古至。我生与万族,衣食各生智。 凤皇啄琅玕,鸱鼠甘粪利。当其经营中,了不异人意。苟为易地谋,两两相唾弃。郁郁成都 桑,劳劳有深义。自非天下才,此事良不易。常恐时数来,便令负斯志。妻织儿胜锄,悠然 足高睡。

见钓者

老渔倚桨黄芦根,细香和饵丝作纶。无边春水杳何处,日暮烟生知有人。持竿终日 无所得,白鹭衔鱼隔江食。风扫杨枝入钓船,满溪愁煞桃花色。我来行吟一问之,太息老渔 不解诗。我向君身觅佳句,君坐诗中自不知。

过仲兄村居

弃置旧池阁,来从茅舍居。命奴收落叶,课子理残书。官岂朝廷罢,身犹死丧余。 杖藜还叹世,那敢赋归与。

两子光成长,能文粗足观。预思渠辈事,遥当太平看。乱后乾坤窄,愁牵日月宽。 不知村路里,何以慰荒寒。

小径泥封竹,虚堂石挂萝。病愁宾客满,贫觉子孙多。丘壑聊如此,兵戈奈尔何。 平生几种意,今日慎风波。

次韵寄怀黄晦木

驿马别一朝,阁上话三夜。最恨箬篷船,柔橹当艄架。相思比日车,昼夜转无罅。 岂谓经半载,过秋不待夏。馅饼废堆盘,醇醪罢洗斝。年年为友朋,三江历九坝。每云经此 涂,如罪流不赦。母老令弟丧,今宁即离舍。道路有高五,駏蛩昔倚藉。渠今复南上,君岂 能北下。念此令人痛,泪迸檐溜泻。又闻抱微疴,应坐愁不化。人生老头甜,或同倒啖蔗。 莫添红炉炭,肝肺怕薰炙。饥冻过毒矢,日日当心射。家翁做不堪,痴聋术可谢。

研墨作君书,踟蹰过半夜。踟蹰欲何为,窥盎复视架。想君卧破屋,镫火穿壁罅。岂无木绵衣,未冬先典夏。但用江西窑,莫求哥定斝。但搭日行船,不怕长安坝。姜桂性不移,物理渐轻赦。曾约石榴红,襆被到寒舍。忽忽篱豆黄,梧桐叶相藉。吾亦苦痁鬼,中虚变暴下。至今两颊窊,时时复洞泻。内伤脾胃病,饮食颇难化。五心一烦热,便忆冰与蔗。引领黄昏汤,来起此番炙。泥水绝高名,读书兼猎射。从来霜雪姿,不向北风谢。

次韵答钟静远

身似春江乱石矶,风波砥尽势相违。纵横妙手千年误,检点从头万事非。记得名园 镫照失,重来古路草痕微。可怜杜宇殷勤意,曾唤游魂几个归。

登真如塔

难寻平地荡胸云,试上岧峣借夕曛。洞磴盘旋人不见,阑干笑语远偏闻。春从浦草 青边长,水到湖楼绿处分。乍暖僧房梅气发,四方八面水沈薰。

舟次看武康山谿

霸先国破孟郊死,寂莫篷船到武康。峰黛未消千载绿,柳丝犹带六朝黄。英雄不出 溪山静,风雅无归草树荒。叫起古人杯酒在,夕阳岭畔话兴亡。

再游蠡山语徐方虎

山灵拍手笑重来,断壁阴湫特地开。波底神龙终自合,尘间凡马尽教回。村名附会 凭僧撰,碑记荒唐费客猜。消得英雄归道院,陶朱遥对计然台。

游慈相寺

乾沙细雨不成泥,春水初生试小溪。得得山围松径合,离离人坐石桥低。阴碑出火 牛磨角,壤壁生香麝脱脐。最是客游难久往,杜鹃花落杜鹃啼。

同考夫商隐寅升登云岫

翠列青攒尽处尊,怒涛喷薄插孤根。年年合璧无消息,夜夜寒潮入梦魂。鹰上秋风 争雁路,龙随冷雨伏蛟门。山僧不识人间恨,犹记圆沙涨旧痕。

至珮璁隐居次韵

书藏农车菊满庭,夜分客语壁镫青。疏棂直射非时电,破瓦深窥失次星。垂老童心成结习,良朋苦口胜闻经。低头长得随东野,莫惜晨钟答寸莛。

集饮黄俞邰竹斋次徐州来韵

不遇云将过,洪濛且自东。牵连《高士传》,收拾故都风。素壁争残照,新篁恋旧丛。话深争逸兴,消得老颜红。

吾巢寒獭似,君架蠹鱼然。此外无多地,其中别有天。两瓻千卷破,四座一人眠。 明月将军报,门前促和篇。

胡山眉瘗天木于家山同午祁过访感赠

昔友称君不厌频,喜君果不负斯人。墓田马鬛穷交冢,寒食鸡豚袝祭宾。一事必传 成独行,三生重话转伤神。秋风野笛苔溪路,石语荒林万古情。

题张午祁杨园竹屋

初月横斜玉一弓,轩辕屈曲络墙东。卷帘林影三更变,依枕溪声四面同。风过笛凄 椽眼裂,雷当琴吼柱心空。尽将渭北湘南意,收拾圆沙结构中。

九月二日同马允彭篯侯董采载臣陈鏦大始严鸿逵赓臣查枢左旋大儿葆中从子至忠放舟东游

老病感触多,细碎气上逆。知非养生理,微动悔已积。诸子悯我衰,扶携事游历。 泽国久雨后,浦溆水充斥。村艇宛转通,野彴高低格。日出云物高,露光百草滴。木叶声萧 然,未露憔悴迹。谁抱不彫姿,霜雪行相益。举酒共斟酌,长幼以次及。揖让见古欢,脱略 非真率。对此意欣然,不觉夙疢释。洵知守舍翁,不如远游客。

陈訏

陈訏,字言扬,号宋斋,海宁人。贡生,官淳安教谕。有《时用集》。

落叶和查夏重

霜风摵庭柯,败叶琤然下。秋声树间歇,策策鸣渐哑。萧条辞故枝,捷疾飘屋瓦。 月明乌栖惊,柳秃鸦藏寡。冉冉岁序迁,荣落如斯者。

美荫宜炎夏,冬来爱负曦。朔风知我意,日夜相芟夷。去翳延暾温,排阴引晨熹。 凝寒布煦燠,萧索生融滋。寄语当涂子,慎勿戕生机。

春花妆园林,众叶颜色好。俄然绿成幄,丹黄忽云老。飘萧阶除间,呼童且弗扫。 叹此薿薿姿,摇落竟谁道。岂知造物意,繁华出枯槁。推陈使其新,本根以为宝。

灼灼春树花,离离秋根叶。萧萧林间风,谡谡枝头荚。纷纷委坑堑,累累堕垣堞。 红如园坠英,白拟丛穿蝶。岂不故枝恋,霜重尖风猎。花时还扶持,相赏期阔蹑。

江潭莫凄怆,摇落莫悲咽。菀枯循环耳,宁较荄与茁。而我况无恋,森梢喜挺列。 庭前两好树,几见更枿蘖。荣悴均造化,萌芽发霜雪。人心感骤多,妄自生区别。树若知人 意,粲然笑应咥。

昙花亭雨中看瀑布

雨阻昙花且看山,跳珠溅沫媚烟鬟。耳根异响心逾静,眼界奇忙意转闲。遍岭云蒸 苍狗幻,层霄涧跃白虹弯。莫愁暂滞羁行屩,留客天缘或未慳。

双涧飞来两玉龙,石梁俯首落千峰。雨中鳞甲空濛态,世外烟波淡荡容。万斛雾珠 随喷唾,四围水石日撞舂。若非缰锁真堪老,破衲何时此策筇。

黄云

黄云,字仙裳,泰州人。有《悠然堂集》。

江村春日

门前芳草路,春到有谁过。曙鸟喧寒樾,条风动绿波。性迂求世少,亲健得天多。 莫讶将强仕,犹然隐涧阿。

经落帆亭是癸巳春与陈澹仙先生别处

故交十载散浮萍, 槜李风烟此再经。今日独赍磨镜具, 当时相送落帆亭。东门蚁酒春犹绿, 南浦丝杨晚更青。只有寝园生宿草, 鹧鸪啼处不堪听。

娄东修复前观察冯留仙先生祠宇

忆昔惊心丙子年,谁将只手独扶天。举朝半醉乌程酒,名士拌沈白马渊。党祸清时 公又死,好谋用后鼎俱迁。宁知宗社丘城日,庙食东南肃几筵。 前溪

诸滩汇前溪,奔腾下岩壑。二月落山花,随流到南郭。

陆无文示姑熟山水图画为萧尺木笔

翰墨风流自足传,几人窥灶少晨烟。何当也学萧公子,漫写青山换酒钱。

高佑釲

高佑釲,字念祖,秀水人。贡生,考授州判。有《怀寓堂集》。

同沈留侯陈淡持汤千里饮报国寺松下

慈仁怪松枝如铁,年深鳞甲欲飞裂。拏云抉石龙虎形,见者惊喜叹奇绝。我曾三度 至燕都,酷爱此松天下无。安得写以韦偃笔,使吾坐卧对此图。每返鸳湖远相忆,梦魂长在 苍松侧。今来结伴绩前游,未午拍浮到日昃。尝闻豫章乔木栋梁材,工师远取江之隈。何如 此松磥砢抱奇质,五百年来尚在哉。

落帆亭别诸弟

六月经长路,孤舟问去津。自怜垂钓者,忽作远游人。门户凭诸弟,关山忆老亲。 平生慷慨意,到此一沾巾。

沙张白

沙张白,原名一卿,字介臣,号定峰,江阴人。诸生。有《定峰诗选》。

桑弘羊

弘羊好聚敛, 讟谤迄终古。平准虽锱铢, 所困在商贾。论功次士安, 计罪薄介甫。 安得生斯人, 暂息闾阎苦。

秦桧

武穆真圣贤,秦桧亦豪杰。渡江二百年,赵氏绵血食。逢恶术最工,忌功计已拙。 当时九重心,怀古师蒯辙。

逸民诗

天地一邮传,百岁亦过客。踯躅古与今,劳劳事行役。生忧在富贵,死忧在竹帛。 于中有逸民,遗世而独立。抱名逃空山,不愿入载籍。斯人苟不存,天地削颜色。 元气礴千古,消否任小智。我观南亩农,人人尽高士。力耕办赋税,养亲竭甘旨。 知为职分宜,不识忠孝字。三教皆可收,五伦独肫挚。与榖同没升,无从考姓氏。高躅愧难 跻,日夕勤企跂。

鲍山管鲍分金处

彭生豕立雄狐摧,瓜熟不遣连称回。夷吾此日正穷饿,谁信若人天下才。盛年难得八口饱,白首更建三归台。知我之恩等生我,鲍山屹屹高千古。赠金独向三北时,此道今人弃如土。漫云鲍叔不怜才,眼中之人谁仲父。

盖公堂

盖公秦末老黔首,饱谙汤火出涂炭。无扰一言教相君,小福三齐大福汉。从来继乱 道不同,纷纷变制徒倥偬。与时休息贵清净,愚者诧为黄老功。安得麒麟图画日,尽遣曹参 师盖公。

淮阴市

报辱犹官尉,酬恩忍见疑。区区酬报意,或冀汉皇知。

韩信城

项氏犹全族, 韩侯竟灭门。可怜带砺誓, 不及属镂恩。

虞城

杞城才过又虞城,宾恪犹存旧日名。一样六朝称禅受,几曾白马到西京。

王隼

王隼,字蒲衣,番禺人。有《大枟堂诗集》。

西山杂咏

孤云如美人,窈窕远山角。残月出其中,镜影渐如削。弹琴娱清夜,寒光不可掠。 露华湿横塘,芙蓉何姌袅。忆君南浦时,翠带纷若若。佩我同心环,绾我合欢索。佳期难久 留,两地相思各。圆缺自有时,离忧岂能却。

山行入芳林,破寺孤猿坐。阴风殿角吹,门倾拾古锁。金像剥须眉,画檐蛛网大。 坏灶穴飞鼯,废井落残果。房暗青磷生,墙缺翠萝补。断碑卧草间,字画苍苔裹。猎人带禽归,入拨冷炉火。沈吟感盛衰,冉冉日西堕。

仲冬陪尹澜柱铨部陈元孝林叔吾入羚羊峡怀梁药亭先生

睛云散暮霞,落日万山赤。寒风峡中来,吹我江上楫。峰势截长江,倒影竦双壁。 溪声瘦老松,微波荡怪石。俯疑坤轴崩,仰觉河汉窄。危磴人似猿,绝岸舟如叶。叠巘结寒 姿,岩断孤烟接。密林崖寺古,萝径垂石发。枉渚鼋鼍骄,澹濧蛟龙沫。显昧理或然,神物 含溟漠。把酒对山公,探幽怀谢客。暌隔未移旬,寸心若积雪。矧乃览山川,狂歌谁与发。 欲寄山阿人,霜花岂堪折。

咏怀

镜里惊新鬓,蹉跎愧此身。无才宁畏贱,失计岂辞贫。白鹤存知己,青山寄古人。 有情溪月影,竹屋夜相亲。

不独嗟离乱,飘零未有涯。客愁连雁影,乡梦落镫花。晓月宁留夜,孤云何处家。 茫茫隔烟水,秋色上蒹葭。

封山

平生病骨将何讬,一见青山便惘然。醒耳鹤声岩月外,浸心松影岳云边。听钟乳鹿 窥僧定,摘果猕猴语烧烟。尚有匡庐茅屋在,阿谁同去漱寒泉。

送人游洞庭

携琴欲共楚人游,因忆前年过岳州。野渡载僧冲雪下,落枫随雁破星流。天连浪影围渔火,月逐潮声上酒楼。休更临风歌帝子,一听瑶瑟满湖秋。

梁无技

梁无技,字王顾,南海人。贡生。有《南樵集》。

秋日病起斋中偶作

病因饮酒得,病愈酒难忘。故人知我癖,贻我书八行。劝我申酒戒,毋为狂药伤。 当此秋清夜,明月白露光。白露沾我衣,明月照我床。焚香不能寐,怀人天一方。虫声正聒耳,修夜殊未央。此际若不饮,余生何用长。

斗鹌鹑歌

秋风一夜山桑落,雨雀晴鸠飞绰绰。鹌鹑飞不越藩篱,弋人山半张罗幕。得鹑贵雄不贵雌,铁喙金眸知善攫。携笼下山索价高,少年争市出东郭。少年买鹑不惜钱,要与王孙赛金橐。手把金笼夜不眠,啖以粒粟频跳跃。鹌鹑养就处囊中,放之即出争剥啄。氍毹铺向华堂间,无端贵贱纷相搏。鹌鹑斗死人心平,不惜千金酬一诺。鹌鹑负,少年呼,鹌鹑胜,少年乐。鹌鹑兴阑,少年寂寞。少年不治家人产,平生生计鹌鹑话。吁嗟风俗争效尤,孔孟诗书如败箨。子衿佻达满城隅,鹭羽飘零散西泽。君不见斗鸡走狗五陵儿,姓名岂上凌烟阁。

陶窳

陶窳,字苦子,顺德人。

古镜

先秦遗篆在,想像出深宫。明月不生处,清光时与同。有形随自应,无相本来空。 白尽人间发,全归一照中。

冬草

三径经冬掩,飘零对汝时。未充君子珮,徒结美人思。世态看蓬转,孤心感鬓丝。 平生抱微尚,不与众芳期。

望零丁洋寄怀友人

两年九月此经过,极目苍茫感逝波。穷岛汉槎无限路,秋风禾黍自成歌。忠臣泪带 寒潮长,楚客悲逢落叶多。欲寄相思凭去雁,故人归梦杳星河。

秋望

数声离雁下寒汀,世事相看散野萍。入水苦匏思共济,望秋蒲柳感先零。忧心满似 将圆月,旅鬓疏同避晓星。独洁糈粻候槎影,美人空自隔沧溟。

梅磊

梅磊,字杓司,号响山,宣城人。有《响山初稿》、《七日稿》、《珍髢集》、《芜江草》、《放情编》。

春日寻李研斋杜苍略

酒病不可支,佳会复难爽。踌躇减米钱,为买肩舆往。道旁双古松,飒飒送清响。 到门寻杜生,与之偕幽赏。李侯志节人,山水情浩荡。闲庭呼酒尊,芹筍杂鱼鯗。围棋互胜 负,古今共抵掌。努力重斟酌,无复尘世想。归途片月生,梨花白苍莽。

韩圣秋舍人见过响山草堂即事

旷览世故多,毕志力南亩。矧耽山水幽,卜筑遂云久。朝耕暮垂纶,草木甘同朽。 讵谓名姓存,空谷来吾友。怀旧古道稀,兹意君何厚。感德情倍殷,拮据启户牖。山鸡去屋 啼,竹鼯隔篱走。入室简盘餐,藨客一何有。僮仆采樵归,邻家贳新酒。昔贤气谊真,定交 在杵臼。炊饮忘主宾,至今美庞叟。君怀原古人,此义良有取。

是时八月交,炎蒸酷于暑。徙席向深林,凉风浩如许。新瓜间梨枣,次第给园圃。 开襟重斟酌,纵谈无今古。酿蜜蜂从王,戏水凫傍母。感念物类生,一一得其所。翻愧人世 间,丧乱多辛苦。 秋日谈长益方尔止见访同家弟昆白赋答

粳稻朝初获,荷花晚更香。萤飞将草乱,牛饭就松凉。斯世多充隐,吾徒或醒狂。 秋林携小谢,吟咏可相当。

黄池晤陈伯玑即别

薄暮闻君至,沿途问客船。残虹明驿树,归鸟破江烟。立语殊无序,孤征极可怜。 柳桥分手处,新月正娟娟。

寄刘伯宗兼问次尾诸孤

九子山头草木悲,五年江上雁鸿迟。吹箫食拟从人乞,吞炭声还畏友知。吾道荆榛 空岁序,中原战斗几须眉。只今才彦看将尽,爱尔冰霜独自持。

黄云晻嗳凤凰台,六代烟花一草莱。覆瓮少虚皇甫誉,伯宗尝为余序《青溪偶业》。 衔杯老忆谪仙才。春风蜡屐游应数,夜月然藜阁好开。回首楼山次尾堂名。堂上客,遗书孤 子重堪哀。

奉答李叔则明府招同张稚恭汤君谟晚集

汪边荒草欲黄昏,好客烦开永夜樽。杨柳月明栖海燕,桃花水涨上河豚。乱离词赋 才将尽,故旧穷愁伴几存。此夕高堂丝管发,狂歌难禁醉中喧。

秋日龚芝麓总宪招集孝侯台

寻秋日爱城南路,吊古周侯况有台。廿载乱离为客过,半生怀抱见山开。松寒翠色 侵衣履,菊老风香到酒杯。向晚凭高更搔首,一声霜雁月中来。

春日杂咏

云度千峰日渐低,柴门深闭响山西。东风不识人愁思,水长花开鸟乱啼。

梁份

梁份,字质人,南丰人。有《怀葛堂集》。

送人

相逢言未了,意气倍相亲。君欲成何事,余惭负此身。赁舂仍避汉,蹈海不知秦。 耻作桃源客,春风坐误人。

送杨而上还剑上

最愁浮汉沔,晚泊向寒汀。山夹天垂幕,舟轻水建瓴。家从云外望,猿到夜分听。 却爱乡园树,苍茫到眼青。

送梅定九北上

曾期南国共苔岑,班马萧萧泪满襟。北去沙尘千里暗,西来风雨九秋深。匡时争重 天人学,作客难忘水石心。寄语白云休怅望,燕台非羡筑黄金。

陆次云

陆次云,字云士,钱塘人。官江阴知县。有《澄江集》。

泛洞庭湖

大浸数五湖,莫大于洞庭。时当春夏交,雪融水气蒸。仰视但有天,与波同一青。 茫茫六合中,不见大块形。三老弄洪涛,澎湃意所轻。至此乃敬慎,风正始扬舲。同舟色俱 静,半帆容与行。此中有楠木,千载成英灵。出没每不时,异响令人惊。舟妇散纸钱,徐徐 乃就平。死生呼吸间,宴坐犹兢兢。吁嗟缥缈中,难测鬼神情。或问传书事,心知不敢应。

登岱

得过三观下,因上岱宗巅。海吸长河远,天包大地圆。五更先见日,九点半升烟。 孰谓方隅广,回环睥睨前。

白沟河

道出白沟河,沈吟唤奈何。古今陵谷变,高下战场多。厉鬼依残骨,耕人拾断戈。 烽烟嗟又甚,搔首一悲歌。

咏史

儒冠儒服委丘墟,文采风流化土苴。尚有陆生坑不尽,留他马上说诗书。

题荆山石壁

寄语山灵听啸歌,连城再刖叹如何。人间碧眼应难遇,莫产琼瑶误卞和。

赠芷江隐者

十二峰回十八滩,渔舟欲上问津难。山亭春尽无人过,开遍桃花只自看。

钮琇

钮琇, 原名泌, 字书城, 号玉樵, 吴江人。贡生, 官高明知县。有《临野堂集》。

题方石居赠忍公用吴愧庵韵

方庭修竹绿如围,琴榻书床识静机。紫术夜春供客饭,白云秋制入山衣。落花径曲 呼童扫,斜日林空放鹤归。最喜远公宽酒戒,虎溪乘月叩禅扉。

感事

秋日病寓江城丰翠园

绿阴孤阁晚来登,极目风烟望几层。万堞暮云寒戍鼓,一江秋雨暗渔镫。思归菊已 荒彭泽,病渴人还卧茂陵。欲向君平问出处,浮沈身世总难凭。

戴廷栻

戴廷栻,字枫仲,一字维吉,号补岩,一号符公,祁县人。贡生,官曲沃教谕。有《半可集》。

拟古诗•行行重行行

行行重行行,裹粮戴吾笠。修途日以荒,所在生荆棘。犹豫立道傍,徘徊以叹息。 所苦非别离,浩荡无所適。深谷暮烟平,长河明月飞。孤云藐旷覼,转蓬何时归。忠信不可 话,廉介多见欺。惆怅返故乡,且复掩柴扉。

拟古诗•青青陵上柏

青青陵上柏,不生培塿间。琐琐矜名士,谁能共往还。驱车出国门,游戏上西山。 草木多淑气,云霞怡我颜。擘脯酌载酒,哀筝独自弹。

拟古诗•今日良宴会

今日良宴会,宾客相追逐。四座列氍毹,帘下奏丝竹。金樽倾美酒,玉盘盛粱肉。 众人皆醉饱,贱夫愈局促。群居无高论,不如处幽独。归来炊寒灶,脱粟煮薄粥。

拟古诗•涉江采芙蓉

涉江采芙蓉,花叶皆茂好。所赠不合意,一夕颜色槁。人生感知己,此意向谁道。 荡舟越江归,寂寞向芳草。

拟古诗•庭前有奇树

庭前有奇树,日夕抚碧梧。墙墉自峻绝,盘桓以为娱。盈盈环堵绿,亭亭百尺孤。 息荫无佳人,所辱甚泥涂。凤凰虽不来,安能共狂夫。

拟古诗•西北有高楼

西北有高楼, 徙倚聊淹留。平原千余里, 远道何悠悠。日夕回风起, 河水散乱流。 相思杳难讬, 登高翻更愁。

拟古诗•青青河畔草

青青河畔草,离离路旁柳。悠悠送行人,泛泛举杯酒。终鲜素心人,何许同携手。 归来掩柴荆,无语自垂首。

拟古诗•人生不满百

人生不满百, 达人固知之。情重性命轻, 况当离乱时。所见不合意, 退避了无辞。 怀抱不可遣, 付之于酒卮。

即事感怀赠友

云谊贵公子,风流及老狂。由来多意气,不仅妙文章。青取江南雨,寒消塞北霜。 搴云见朗月,此意在君旁。

吴历

吴历,字渔山,号墨井道人,常熟人。有《墨井诗钞》、《三巴集》。

秋日同许青屿侍郎过尧峰

尧峰钟磬里,一径入云林。黄叶诗人兴,空山老衲心。茶桑秋坞静,鸳鹭水天阴。 谢屐都忘险,烟霞此地深。

吊孙太初处士墓

行到归云高隐地,孤猿野鹤尚哀鸣。晴溪绿满侵难尽,秋叶红稀踏未平。垄上只今惟虎迹,堂前何处有瓢声。持竿白首烟波里,寂寞无人问姓名。

题画

陌头柳色暗毵毵,欲写离情忍泪缄。春雁可怜齐向北,那堪游子在江南。

雨歇遥天水气腥,树连僧屋雁连汀。松风谡谡行人少,云白山青冷画屏。

春风阡陌草初平,远岫烟浮细雨晴。白屋门前乌桕树,夕阳高下鹧鸪声。

梦回西望碧山微,一水斜阳鸟不飞。欲采青黄莲子叶,寄君先制卧云衣。

绿摆杨枝生白烟,茅堂深掩半溪边。二年踏雪燕台畔,辜负梅花月影眠。

杨白花飞楚水东,竹林西转竹桥通。扁舟载酒冲烟去,一路潇湘泼墨中。

谷口闲闲云气收,松杉高下自成丘。草堂且喜终南外,東帛无劳任白头。

萧疏竹木倚江滨, 石脚披莎拂浪新。一带远山衔落日, 草亭秋影澹无人。

王骠

王骠,字安节,江宁人。

题画

湖干路僻无车马, 葭菼苍苍凉到天。长日接 慵不著, 草堂闲对鹭鸶眠。

顾有孝

顾有孝, 字茂伦, 吴江人。诸生。

寄赠沈留侯偕小阮北上

春风杨柳拂行舟,有美联翩共远游。入洛陆机新作赋,依刘王粲故多愁。旧京珠履 三千客,荒冢冬青一十秋。湖上好山无恙在,独持卮酒对群鸥。

锺渊映

锺渊映,字广汉,嘉兴人。

送罗比部暂归西川

白帝孤城落照悬,乡愁迢递武功天。将归故国无鸿雁,行过空山有杜鹃。剑阁风云 开五丈,筇关烽火隔三川。明年巫峡生春水,好上东吴万里船。

陆嘉淑

陆嘉淑, 字冰修, 号辛斋, 海宁人。有《辛斋遗稿》。

和阮亭绿雪诗

岕山纱帽顶, 歙溪松萝岩。蒸炒与烘焙, 其妙苦不兼。虎丘日铸价, 欲敌气味儳。银瓶署细字, 绿雪谁所缄。烹泉手亲泼, 一啜意已忺。燕中泽泻卤, 吐漱常恨咸。昨来一夜雨, 白液浮岩嵌。欣然接新句, 上有红印箝。渔洋竟同好, 清韵流霜帘。诗翁字山白, 初卸南来帆。不惜手露芽, 分贻压贫奁。犀液泛翠瓯,蟾香透重襜。顿轸昔所珍, 时俗定可砭。何须怀莼羹, 千里炊豉盐。

同旦中坐梅花书屋

三间书屋昼常扃,好客偏能浃夕停。但数旧人如落叶,即看我辈亦晨星。药炉烟覆花阴合,竹牖云衔海气青。虬幹亭亭两梅老,待留冰雪吐芳馨。

查容

查容,字韬荒,海宁人。

送武曾之宣府

由拳城头月华白,张镫置酒宴征客。由拳城外柳条青,平明相送出津亭。羡君意气真无比,此去幽州几千里。揽辔遥看冀北云,挂帆径渡淮南水。太行山高日欲斜,边风飒飒飞尘沙。候骑千屯吹觱篥,明驼一队奏琵琶。上谷使者与君厚,辕门揖客论故旧。伐鼓鸣笳部曲前,锦筵红烛军麾后。觥筹交错坐忘疲,玉缸泻酒醉难辞。壮士横刀看草檄,美人挟瑟请题诗。丈夫三十犹未遇,走马穷边那复顾。野狐岭下白草枯,卧龙冈上黄云暮。客中行乐不知年,但看月出几回圆。沙场忽听思归曲,应使乡关望眼穿。

朱尔迈

朱尔迈,字人远,号日观,海宁人。有《扶桑阁集》、《日观集》。

碧云寺后山

曲径自然好,不知山已深。苍苍石潭上,了无人世心。境幽思转寂,秋气加萧森。 回身蹑高岫,忽焉逾百寻。横阜展右臂,谷湖荡前襟。下视所历径,云壑弥沈沈。寄声谢热 客,此地饶清阴。

夜上云岫庵

青山愜所怀,一步一延伫。不觉夜色来,苍苍没平楚。失道径转纡,陟历忘峻阻。忽然身已高,舄下闻人语。欲辨已微茫,东西无处所。疏竹逗镫光,始知隔岩户。奋策争先登,却怪来风雨。住足问徐徐,潮声走远浦。

戎州杂诗

匹马登城暮,苍凉极望间。青衣天半水,乌撒瘴余山。风激边笳裂,霜危峡草斑。 独携雄剑在,长啸拂金环。

俯江亭秋眺

金鸡岭接汶江滨,曾说当时物色新。花下醉归珠勒马,月中歌送玉楼人。荔枝香熟 蛮方雨,橦布温生汉殿春。回首那堪兵甲后,白荆黄葛乱青磷。

北风一夜度沧洲,龙马江光抱日流。北引荒荒蛮树直,东连淰淰楚云浮。几年壁垒分天堑,万国舟车阻上游。草野无人收战骨,黄沙不散铁衣秋。

马思赞

马思赞,字仲安,号寒中,一号南楼,海宁人。有《寒中诗》。

插花山居诗同弟寒将作

未必桃源便弗如,此乡洵美是吾居。衣冠俗俭风犹古,耕凿人多力有余。绕屋定栽 千个竹,几家同种一池鱼。近来长算村翁富,卖与山田得买书。

浓云暖雨互悠悠,寒食前头社后头。两月筍膏充肉味,一年茶事算春收。鸟当久坐 声逾美,花到无名种最幽。料理茶炉兼酒榼,独寻萱草对忘忧。

最爱西风换夹衣,一番秋色到柴扉。不除衰草留虫语,但扫空阶候叶飞。带角未妨 菱稍贵,然萁或恐豆旋稀。直愁恼乱比邻意,珍重儿童唤鸭归。

大尖山下最佳处

林泉何处养疏慵,准拟移家占一峰。木未饱霜浓过夏,水初收潦净于冬。山阴白昼 疑天雨,潮响黄昏杂寺钟。一事病夫犹当意,茯苓根护万年松。

沈进

沈进,字山子,号蓝村,嘉兴人。诸生。有《东园诗》、《蓝村稿》、《半巢居稿》、 《退曳行吟》。

横山蛟潭同朱十彝尊赋

积铁立千仞,行人堕苍黑。危风动山根,侧见雷雨人。阴崖闭长廊,鬼火白日出。 视听惊心魂,峰峦俯突兀。微涓滴松枝,清响久寂历。爱兹丛薄深,栖迟慰晨夕。庶不孤愿 言,超然慕畴昔。

渡浙江别陆处士圻。

凄恻临歧路,苍黄对远天。春风官舍柳,暮雨石林烟。樯燕来还去,山云断复连。 今宵何处泊,愁坐扣离舷。 鹤洲看梅同李人表

地近裴休宅,人称太守园。主人李葵石曾守贵阳。风烟湖上郡,橘柚水边村。细路 垂藤碍,欹沙带雨浑。梅花飞不尽,香雪满庭垣。

沈岸登

沈岸登,字覃九,号南渟,平湖人。有《黑蜨斋诗钞》。

忆湘湖

菱叶初肥稻叶黄,茅椽八九在中央。日斜驱犊笆篱外,水落叉鱼略彴旁。云阵半浮山面白,竹风时作雨声凉。秋来更有牵情处,紫蟹黄鸡恣意尝。

秋暝

木叶落未歇,秋村欲暝时。荻花闱细艇,鸟影定寒枝。野色茫无际,离居有所思。 百端于此集,不是为秋悲。

沈用济

沈用济,字方舟,钱塘人。有《荆花集》。

昭平道中

滩势奔腾下,舟行次第高。瀑流争一石,人力尽千篙。壁峭奔雷雨,林深聚羽毛。 江乡归未得,梦寐亦风涛。

望西岳

五千仞削势崔巍,西镇坤维玉作台。海日夜从金掌出,莲花春向石盆开。宫临白帝 三峰立,城绕黄河九折来。欲跨茅龙问酒母,芝田堪种乏仙才。

孙默

孙默,字无方,休宁人。

登大观楼

一望天无际,凭高俯大荒。马驰烽火径,人在水云乡。短棹迷春草,疏钟送夕阳。 百年车笠意,对此倍难忘。

将归黄山留别诸同学

伯皋应下谢朝春,回首淮南遍夕烽。客到空城余蔓草,身随孤剑冷芙蓉。秋深始买 江边棹,古寺还听天外钟。黄海只愁迷旧路,仙人丹灶白云封。

孔尚任

孔尚任,字季重,号东塘,又号云亭山人,曲阜人。历官户部员外郎。有《湖海集》。 丁廉使名名炜。

康熙二十七年夏,中外升平登禾稼。岂有失所一军民,楚中猝变真可讶。我巡海日烟雾深,纷纷耳传信不真。或言乱贼立首领,官兵气靡都降身。湖风湖水路渺茫,万姓夜走看北辰。或言三日把关隘,选将搜粮侵邻界。霍霍磨刀逼官降,忍辱齐向辕门拜。独有一官旧豸衣,强项能使渠魁怪。后来渔船稍稍说,芦中人声夜呜咽。点火照见好须眉,三日绝食唇焦裂。义不受官善哉逃,弃家无乃肠如铁。天兵忽下贼兵死,围城无恙旧妻子。假威骑马坐衙人,相逢羞见丁廉使。丁公丁公今日归,城郭人民无是非。天下诗格属公好,如此风节世又稀。天子召公公去急,丹枫白苇拂征衣。父老争看归来鹤,诗人面上有光辉。

送驾至淮上恭赋

淮烟淮水万民迎,飞放兰桡夜不惊。天马逍遥官路大,黄河恬静御桥平。公然衮冕 看花立,竟许渔樵近仗行。最是光辉人坠里,龙颜喜顾唤臣名。

拜明孝陵

宋寝齐陵尽野莎,英雄有恨欲如何。宝城石坏狐巢大,龙座金消蝠粪多。瞻像犹惊神猛气,禁樵浑仗帝恩波。萧条异代微臣泪,无故秋风洒玉河。

赠樊会公

叉头挑出古云烟,混入时流乞画钱。内府收藏君总在,标题半是启祯年。

郑谷口隶书歌

鲁中汉碑存十一,任城有三阙里七。郑固墓铭峙东平,苔蚀榛荒亦未失。汉碑结癖谷口翁,渡江搜访辨真实。碑亭凉雨取枕眠,抉神剔髓叹唧唧。惝怳拱揖汉代贤,梦中传授点画毕。蝉翼响拓携满囊,晓风吹须策驴疾。归来检付高手工,蜜香侧理装成帙。碑额碑穿碑阴完,《集中录》中无缺逸。文檀为函玉为签,琳琅金薤照晴日。谷口危坐四壁观,何殊蠹简蝌蚪漆。以指画腹昼夜思,久久古人精神出。纵横能为径丈书,小者针虿皆绵密。横飞直牵力千钧,盛年已入中郎室。如今垂老不轻挥,瘦臂撑拄肩崒嵂。镫下为我摹数番,古劲如镵金石质。汉后隶书谁登峰,学问无如谷口笔。珍重藏之胜藏碑,赞服作歌美非溢。

白云庵访张瑶星道士

淙淙历冷泉,乱石路频转。久之见白云,云中吠黄犬。篱门呼始开,此时主人膳。 我入拜其床,倒屣意颇善。著书充屋梁,欲读从何展。数语发精微,所得已不浅。先生忧世 肠,意不在经典。埋名深山巅,穷饿极淹蹇。每夜哭风雷,鬼出神为显。说向有心人,涕泪 胡能免。

凌名柯先生遗骸久暴吴薗次知湖州始为卜葬口述其事因纪之

铮铮凌廷尉,殉节何其壮。赤血已化碧,白骨无山葬。年年樵牧儿,来往敲柩唱。 吴公高义人,闻之神凄怆。醵钱重治棺,劚石坚其圹。一旦马鬛增,松楸郁在望。忠魂欣有 栖,孤寡来灌鬯。再拜贤大夫,喜极哭相向。大夫答何言,泪滴马鞍上。

宋祖昱

宋祖昱,字斌贻,号西洲,会稽人。诸生。有《西洲类稿》。

西洋狮子歌

九重天子垂衣裳,异物远致由遐荒。自昔康熙几戊午,狻猊入贡来西洋。大句胪唱千官入,两阶干羽如山立。舞蹈争看回鹘装,梯航倏至波斯客。崔巍铁柱双铜环,玉除丹陛蹲狮蛮。猛气潜消殿庭内,甝声犹撼云霄间。据地回身时一吼,白象摧藏老熊走。俄惊瓦震昆阳城,复睹风驰土囊口。锯牙钩爪见分明,曾向乌丸识旧名。小苑银墙高置砦,上林金锁怒攀楹。从来此物称难得,万里追风犹咫尺。条支海上夜观兵,榆叶关头晓驰驿。重译朝时不计程,月支使者忆随行。盛来巨槛千人护,携出雕笼百兽惊。皇仁不绝殊方畜,莫遣山林更驰逐。玉辇时从虎圈游,庖人日给官厨肉。羽猎长杨事有无,从禽往往鲜欢娱。谠言早已旌家令,廷论何曾重啬夫。圣明留意安区夏,奇祥异瑞升闻寡。绝域宁须献白狼,新声无复歌天马。鼓罢《南薰》雅乐成,遥瞻《率舞》在虞廷。重瞳御世康民物,一奏《箫韶》咏太平。

洗象行

宣武门边尘十丈,御河六月观洗象。长槐高柳碧森森,駊騀如山屹相向。传闻贡自西南夷,横纹皴扫苍藓皮。庞躯巨颡秀眉目,银钩才出收疮痍。一入天门守环卫,三品官阶护军贵。刍秣长支月俸钱,驰驱每就公朝位。先朝遗制开象坊,豹房虎圈纷周防。天生神物独驯谨,南薰伏日游沧浪。涴涴金沟水涓洁,灌木阴中少炎热。跋足堪惊鸥鹭群,投身已荡鼋鼍窟。俯仰看成岛屿浮,沿回漫数潭渊阔。千寻碧嶂闻奔雷,万里高空溅晴雪。须臾不动浮中央,河干漠漠生微凉。极浦冥濛过疏雨,层城一面当斜阳。紫髯奚奴挟双帚,祓濯频加不离手。回澜一洗尘垢清,复向波中自群友。吾闻香象曾渡河,旃檀林下时婆娑。六牙齐现宝华坠,诸天缨络金盘陀。壮观千人眼中见,一幅澄光净文练。象教休驮竺国经,军声久息昆阳战。日色山龙映衮衣,香烟翟羽交宫扇。赤罽珠鞍按队过,他时对立含元殿。从来驯象致昆明,滇地铙吹扶南城。圣朝不贵殊方物,洱海秋风笑独行。

包山歌

山中有人别东越,千丈悬愁绿玉发。朝披笠泽云,夜卧松陵月。吴江净如匹练明,

一片桃花卷春雪。飘飖白鹤氅,独立包山阳。具区三万六千顷,微风不动青茫茫。缥缈峰头 日初出,洞庭金光穿石室。楼台照耀烟霏开,玉字金书总相失。微闻山隐居,窃往探灵墟。 天地大文实磊砢,非时持此将焉如。西施蛾眉难效颦,年年歌舞吴宫春。鸱夷一舸载之去, 五湖烟波愁杀人。

青琳堂歌赠韩无我

君不见周人掘鼠强称璞,郑贾来观本非玉。又不见宋人得石梧台巅,囊中什袭凡几 年。世间真伪宁有定,一经好事供流传。韩侯堂中有尺璧,太古精英绿沈色。瑚琏比贵玉比 贞,除是青琳总非匹。主人抱璧居此堂,文窗曲槛分周行。坐揽图书挹清润,行看琴筑含辉 光。堂中宾客俱回首,异事经时在人口。自来贻赠重英瑶,长遣诗篇赋琼玖。闻道今皇御极 年,欲穷山海蹑风烟。试探河源遣都实,莫辞博望封张骞。汉代通侯有遗裔,凿空远作乘槎 使。织女黄姑定有无,蒟酱邛枝竞罗致。昆仑山头石气青,海波如乳翻春星。层城十二此间 是,雕镌白玉成山屏。屏风嵯峨高十丈,琪花瑶草纷相向。蹑足犹临霄汉旁,置身已在风云 上。俯视朝阳半岭余,金轮迸跃行空虚。目迷五色灿沙砾,紫球金薤红砗磲。瑶光一颗偶然 坠, 化作琼瑶落尘内。雅青水碧相荡摩, 百尺琅玕误椎碎。一时拾掇悬马头, 王母珍惜仙娥 愁。阆风奇宝难久閟,遥随使节来中州。镇日摩挲看不足,远胜流黄并结绿。自探灵境到瑶 池,不枉名山号群玉。韩侯爱宝兼好奇,致斋三日方携归。国工袖手不敢凿,一朝径释旁人 疑。登堂作记叙畴昔,持示名流诩难得。入席衣沾积翠寒,卷帘帽点空青湿。宾朋满座酒满 樽,绿萝丹荔环重门。春山婉娈出几案,晴螺拂遍无纤痕。意气何妨共终古,肯使琳琅杂碔 **玞。拟求仙术种蓝田,忆得灵根植元玄。吾闻往昔明盛时,白环远致流沙西。遐方异物时入** 贡,或繙玉册函龙泥。圭璋特达期有用,岂合随人资玩弄。抵鹊方同一叶轻,藉茅顿较千金 重。韩侯妙鉴称入神,他年识者能传真。好将赵氏连城价,问取荆山泣玉人。

故明宫人杨氏度曲歌

大明湖水年年绿,旁有佳人在空谷。沦落泥涂五十年,白发犹歌太平曲。当时少小 住山东,为选娥眉入后宫。初见黄门频指鹿,俄看朱邸倏飞龙。真人御极安区夏,金瓯端拱 无纤罅。复旦赓来拜手余,《南薰》鼓就垂裳暇。宴坐朝元一事无,偶当承值奉欢娱。流传 乐府翻《河满》,检点新声逐《念奴》。玉熙宫里曾开宴,咬春燕九从游遍。郢雪流风拂彩 衣,梁尘映烛飘纨扇。曲好频移绣柱筝,歌成屡赐黄金钏。也识朝廷久晏安,偕赏风光共流 转。忽报潢池起弄兵,西来豺虎正纵横。那期大内弹琴罢,博得中原战鼓惊。从此宸衷惨不 乐, 遏绝声音止弦索。过锦工师出教坊, 投壶玉女闲官阁。凤纸停呼菊部头, 龙楼辍奏梨园 乐。《水调》余音渐失亡,《霓裳》散序多零落。今春樵悴复明春,扫殿焚香作散人。长睹 君王忧赤子,谁令宫阙乱黄巾。煤山夜半何仓卒,海棠落尽风萧瑟。阿监同时捧寿宫,千官 不见朝温室。无数红妆殉御沟,正拟相随复相失。太液沧波鹄下来,上阳花片莺衔出。黄紽 潜易内家妆,张掖门开急走藏。抛掷绮罗逃劫掠,迁延道路转寻常。径别燕京適齐鲁,漂泊 仍归故乡土。织布沤麻结比邻,采薪汲水支门户。叠在衣箱不计年,深宫剩得当时谱。点拍 依微宇画讹, 宫商约略歌声苦。错将天上紫云回, 翻作人间《绿幺序》。不惜尊前发曼声, 一曲将终泪如雨。往昔繁华等逝川,尚余选侍在民间。三朝彤史谁能纪,一代红颜绝可怜。 老妇今年总迟暮,短艳长趋回非故。耳目神明久未衰,伶伦节奏迟偏误。属和难教楚客闻, 寻声漫遣周郎顾。夜雨凋残玉树花,浮云隔断苍梧路。冬青枝上杜鹃啼,送堕胭脂不知数。 我听清歌倍惨伤,白头宫女话兴亡。天荒地老无穷恨,莫唱开元旧乐章。

刘伶台

一片长淮水,刘伶醉酒台。帆随江树转,城压海云开。萧飒天门啸,飘零沛国才。 二豪长侍侧,此意亦雄哉。

巢陵城

孝武河西渡,移民事可徵。云沙埋魏郡,风雨暗巢陵。汩没空三版,漂摇减百层。 犹闻原野外,春荐几沾膺。

立秋前一日齐河晓发

海右经过地,河干夙昔游。晨光催月坠,暝色带星流。车马烦犹数,关山老自愁。 客心如落叶,明日又经秋。

题光岳楼

缥缈层楼拂太清,上窥天宇下神京。横分闲气三千客,回落晴光七十城。日荡沧溟 遥见影,云连清济去无声。金泥玉检何年禅,为告中原久治平。

高阳氏陵

东郡余灵寝,高阳有閟宫。承云留雅乐,若水著神功。佐帝钦殊烈,乘乾识令终。 九黎消乱德,八凯袭遗风。星宿苍龙历,天人白虎通。可知埋玉地,犹在顿丘东。

【卷四十】

姜安节

姜字节,字勉中,莱阳人。有《永思堂诗钞》。

泊宝应

河伯由来悍,秋霖势更张。屋沈余井灶,树灭辨微茫。万里湖天阔,千村稼穑荒。 农家无住处,草舍架官塘。

姜实节

姜实节,字学在,号鹤涧,一号仲子,莱阳人。有《焚余草》。

芮玉权招饮同章颖叔诸子即席分赋

选石支茶灶,留宾启竹关。绕篱双涧水,对酒一楼山。屋小疑僧住,林空羡鸟还。 买田吾有意,终傍二溪间。

江山游览诗同长兄勉中赋

北固横天堑,登高杖短筇。马嘶残梦月,鸦避落帆风。草木春城外,江山战垒中。 孙刘饶往迹,流览意无穷。

题黄鹤山樵听雨楼卷

湖天过雨水冥冥,吹绿东风草一汀。绝似铜坑桥上望,远山如发向人青。

题画筍

箨龙新长满前汀, 想见枝生叶更青。便拟与君同侧耳, 秋声齐向画中听。

虎丘

寺门归路柳隄东,十月繁霜唳早鸿。好是日斜人去后,一天红叶下西风。

程汝谐移居虎丘

斟酌桥边市,花园巷里居。石墙低见屋,山溜暗通渠。有客携诗卷,从亲奉板舆。此中多胜境,应不羡华裾。

姜节

姜 节,字奉世,莱阳人。有《白云集》。

程非梦移馆题赠

十年流寓旧都亭,餬口还凭子墨灵。深巷停车门挂席,闲阶没草案横经。桃花浪卷 千层碧,杨柳风飘一向青。握手故人长太息,城南尚有少微星。

魏允楠

魏允楠,字交让,嘉善人。有《维风集》。

暨阳

烽燧遥天接大荒,高城凭眺晓苍苍。薜萝乍长新官舍,磷火宵明古战场。秋雨远来 江气合,夕阳斜堕澥云黄。三吴事业残碑在,矫首云台思渺茫。

题法螺精舍

绝顶峰开祇树林,翠微俯瞰碧沈沈。数声清磬落山下,门外日斜春草深。

魏允札

魏允札,字州来,更名少野。号东斋,嘉善人。诸生。有《东斋集》。

苦雪

日影亦欲出,云阴不知让。炯炯天之晴,乃为其所障。因而致风雪,自朔渐抵望。 有时或狂飞,有时或轻飏。舞空长漫漫,前后非一状。城中千百家,何必皆挟纩。平地冻杀 雀,合向人腹葬。我如老阿先,卧起幸无恙。独恨无大裘,遍覆逮幽旷。计维抉重云,庶令 红日放。

闲居

傍忠泉剩旧茅庐,白拂青藤伴起居。不愿后身仍识字,祇祈当代再焚书。家风久矣 宗三类,世事终然付六如。可奈学徒常错认,转将滓秽作清虚。

忆弟

听残宵雨半瞢腾,淅淅虚窗淡淡镫。系缆江亭等潮上,梦君野泊在西兴。

东园弟招同冯又三集翛然阁感赋

频年故鬼唱秋风,几处离人叹转蓬。身到武陵应识得,小桃虽在是衰红。

王分攵

王分攵,字曷功,衡阳人。

桐林铺望梅龙雨霁

梅雨行不息,因之思碧山。片青忽迎目,悠然清心颜。峰树无改色,涤涤整绿鬟。 飞雨复何来,遽欲掠其间。幻化岂有根,微心终自闲。

王敔

王敔,字虎止,衡阳人。诸生。有《蕉畦存稿》、《笈云草》。

秋初游邵阳城西酒阑有作

青山不可尽,古郡环资川。暑气息连雨,山容澹轻烟。良辰策芳屐,旧好相追旋。 长吟西门曲,回首城南天。天容秋始澄,覆釜幢碧圆。舒襟惬所赏,纵论忘蹄筌。徙倚曰藏 松,友云归可遄。置君桑落酒,理我桐上弦。鸣弦有希音,酒酣无俗譞。適志御清风,泠然 谢拘挛。

二月山中即事

万壑递层阴,光分一径深。草丛留宿雨,云破见归禽。奇石呈幽赏,鸣泉怀好音。 林端清籁发,適伴越人吟。

待友

小立闲阶外,凝眸日已酉。稻苗深一尺,中有水禽啼。

别储六雅

久向镜中怜白发, 初从月下倒清尊。他年暇日容相念, 樗栎湘西绿树村。

孙宝仍

孙宝仍,字孝堪,又字孟滋,号恕斋,益都人。官光禄寺署正。有《恕隐斋诗》。

北上留别祖道诸公

相送高台上,川原渺若何。渐辞青嶂远,转觉白云多。名士荣簪笏,幽人爱薜萝。 临歧千种意,惆怅付骊歌。

孙宝仁

孙宝仁,字伯纯,益都人。诸生。有《禹石楼集》。

即事

野浦山溪一径通,柴门茅屋绕丹枫。朝看雁鹜清波里,夕下牛羊落叶中。

归舟

燕子矶头风浪生,晋王塔顶晚霞明。扁舟东下邗沟急,坐失南徐铁瓮城。

秋日杂诗

花宫香霭敞青螺,方外招寻九日过。两岸云山秋色迥,一川鸥鹭夕阳多。陶公入社 频倾酒,小阮从游独和歌。禅室依然人已往,可怜新塔倚岩阿。

费锡琮

费锡琮,字厚蕃,号树栖,新繁人。有《阶庭偕咏集》、《白鹤楼集》。

滁州道中

策骑入长林,村幽耐客寻。秋晴红叶润,山远暮烟深。江馆寒潮断,河桥蔓草侵。 古人残迹在,空使候虫吟。

黄河

灵脉来天上,浑流昼夜奔。纵横穿套口,曲折下龙门。地入荥阴断,山临华岳尊。 何须逢汉使,便拟溯昆仑。

登北固山

绝岭横江岸,登楼望渺然。潮来徐福岛,山出寄奴泉。境界分吴楚,波涛混海天。 千秋争战地,今喜靖烽烟。

费锡璜

费锡璜,字滋衡,新繁人。有《掣鲸堂诗集》。

泛舟红桥因至观音阁

绣桨荡晨波,春城千柳影。水窗三十六,卷帘落红粉。佛阁绛仙宫,胭脂沈废井。 鬼唱念家山,桃花泪如绠。

送闵山长入都

江浦柳堪折,故人初入燕。春风衣上软,寒日马头圆。雨合清林色,晴分绿嶂烟。 不忘尘外侣,应指海云边。

村夜

村夜百机息,桑榆辨渺茫。犬声一巷月,人语满船霜。秋远荞花静,宵深橘叶香。 幽怀无与晤,独立咏沧浪。

京口夜泊

淮海孤镫暝,关河一雁秋。霜催两鬓改,潮裹众星流。铁瓮熊罴守,金山神鬼愁。 勿矜天下险,王濬下中流。

黄湓阻雨

白鸟低飞树影摇,春愁如病酒难销。雨声寒入何朝寺,杀气收为半夜潮。世事听来

成往劫,惊风定后拔新蕉。凭君莫指黄巢垒,今日孤舟梦六朝。

相逢

歧路不相识,一言倾寸心。赠君腰下剑,不在直千金。

边辞

四月春风不度辽,边城气候迥萧条。黄金台上花都落,长白山头雪未消。

狭袂轻衣别样妆,美人酌酒劝君尝。琵琶一样清商曲,弹到《凉州》便断肠。

旌旗惨淡照黄云,细柳营空背夕曛。谁使射雕人入塞,朝廷自杀李将军。

万斯年

万斯年,字祖绳,号澹岩,鄞县人。

废处山中友人沈哲先以诗见询依韵奉酬

与子精神治,时形梦寐间。赏音若流水,回首独青山。云卧随时过,鹏飞计日还。 锺期幸谋面,高辙许同攀。

万斯选

万斯选,字公择,鄞县人。有《白云集》。

题钱清溪少参遗册

清溪钱先生,年少登仕籍。上陈八事疏,嘉谟尽硕画。毁撤魏监祠,书院开讲席。 从游南皋子,正学重名节。历官之所至,义声夺人魄。衡文斋鲁邦,多士手加额。至今朝宇 间,彩凤奋逸翮。虽然遭疑谤,微云掩曦赫。至诚能动人,贤者腕为益。风驰云影过,天清 日复白。义熙有全人,奄然归窀穸。人亡四十年,流芳动九陌。遗文金玉伦,含辉光四射。 抚卷诵琳琅。声色雅可摘。其人邈千古,其心通一脉。我生在后时,丰采未亲炙。苍茫潦水 尽,坐见寒潭碧。

万斯大

万斯大,字充宗,鄞县人。

姚江李聃孙石梁图歌示八弟

十日画水五日石,王宰始肯留真迹。自从少陵为此言,词人诵之常啧啧。吾观李老《石梁图》,挥毫落纸成顷刻。意酣兴尽何淋漓,笔墨萧闲殊自得。乃知论画当论人,不在

从容与促迫。其人读书风流士,下笔自饶烟霞色。假使胸藏一点尘,终年操笔亦何益?吾尝持此论画师,不意于今乃得之。石梁挂在秋天上,万仞危峰积一丝。偏袒衲子何为者,却向梁间足倒垂。山边石溜胸前泻,日畔秋云顶上飞。自怜赤城足未到,何缘此日登其崖。松风谡谡竦毛发,涧水泠泠清心脾。八郎劝我珍此画,世间奇物原无价。月下风前试一看,泉声石色几惊诧。我诗汗漫不足存,今时画师谁喜闻。山间泽畔有知己,留待他年子细论。

万斯备

万斯备,字允诚,鄞县人。有《深省堂集》。

溪上

夜雨青枫路,秋风白豆家。醉眠三户酒,吟谢一篱花。山客云为服,溪渔宅是沙。 人生贫亦適,所惜鬓空华。

香溪送酒

可念招提客,眉攒欲遽回。一尊连雨至,双屐破云来。游策镫前计,新诗醉后裁。 海棠殊解事,早放数枝开。

万斯同

万斯同,字季野,鄞县人。有《石园集》。

寄五兄公择

食饮不求精,冠裳不求好。但求免饥寒,骨肉常相保。微愿竟难遂,分飞各远道。 欣欣向荣木,唶唶投林鸟。我乃不如斯,喟焉伤怀抱。

陶令常乞食,颜公亦求米。古来贤达人,所遇犹若此。况我与时违,冻馁固其理。 且当守故居,量力营菽水。得食暂安眠,聚庐亦可喜。君胡事远游,经旬去乡里。未得一钱 看,反受三春馁。伊优复伊优,运命固如是。不见张长公,白首田园里。

述旧

我昔九龄时,慈母中道弃。此时赤日颓,风尘匝地沸。艰难营一殡,辛苦且逃避。昼行岩壑间,夜宿虎豺际。弱儿可怜人,性命讬足弟。穴居逾三年,脱粟常不继。重返西皋居,遂作灌园计。田圃久成芜,桑麻亦已废。再葺耕耨基,复理桔槔器。时或从父兄,荷锄畦边憩。渐成田舍儿,颇谙村居味。谓当谢俗氛,终事田家利。不谓志难谐,复迫居城内。念兹释耕耘,欲识诗书字。父意怜少儿,亲为解章义。晨夕寒松斋,呼儿捧箧笥。或时使应门,间亦执巾屣。穷愁寥泬中,父怀每欣慰。久侍少谴责,亦自多欢睡。饥寒相逼迫,父往游岭外。日夕望还期,中秋果返辔。途次九江滨,奄忽一夕逝。寄信至江乡,恸绝中肠碎。易篑在何时,盖棺在何地。含殓儿不亲,汤药儿不侍。天长日月久,此恨终吾世。返柩江西滨,结庐西山次。迄今已三年,魂魄犹飞坠。叹息我生涯,忧患何遭备。

周在浚

周在浚,字雪客,祥符人。有《梨庄》、《遗谷》诸集。

秦淮竹枝词

布幔朱阑饰彩舟,少年箕踞放中流。三弦拨动《凉州》调,故老听来尽白头。

端阳节近说青溪,芳草门前踏作泥。到得秋来人寂寞,月明衰柳夜乌啼。

北人才得解征鞍,也学吴侬事事酸。金碗银盘都不用,素磁月下试龙团。

紫骝马

爱妾不辞换,金鞭且莫挥。踏花公子醉,射猎故侯归。蹀躞嘶芳草,骄腾乱夕晖。 道人重神骏,何必透重围。

送倪闇公游晋阳

唐殿隋宫满白蒿,汾河千古尚滔滔。当年客里驱羸马,此日樽前赠佩刀。极目彤云沙塞远,荒城落日太行高。晋祠过我留题处,难老泉头罄浊醪。

寄怀冯青门次陇客弟韵

传家清白有渊源,百卷残书拥一轩。论少绝交讥到溉,世无知己叹虞翻。英雄埋没 归黄土,壮士萧条掩席门。万事无如杯酒好,桔槔亭畔自鉏园。

周在延

周在延,字陇客,祥符人。有《摄山园诗集》。

登大梁城楼

秋草平隄旧战场,城隅满目尽垂杨。雁声带影经嵩少,山色连云认太行。乐府新词 声寂寞,西亭残卷事悲凉。《梦华录》续肠堪断,依旧金梁月似霜。

周在建

周在建,字榕客,号西田,祥符人。历官淮安知府。有《近思堂诗》。

牛首次黄自先别驾壁上韵

何处登临胜,清秋天阙间。半林黄叶路,一带夕阳山。帆过江仍静,云归衲更闲。

此中宜对月, 梯好不须攀。

同湘灵苍略远度集饮瑶星松风阁

江远轩窗静,登楼逸兴同。高歌惊鹤梦,落日醉松风。白社人还聚,青山意不穷。 笑看鸦影乱,城市晚烟笼。

汪文桂

汪文桂,字周士,一字鸥亭,桐乡人。贡生,官内阁中书。有《鸥亭漫稿》。

禾中感旧

白头无复古人存,清昼萧然静掩门。锄菜径迷新草色,垒巢梁涴旧泥痕。数椽差足 遮风雪,千载曾经长子孙。回忆家园好风景,饧香粥白与谁论。

汪森

汪森,字晋贤,号碧巢,桐乡籍休宁人。贡生,历官户部郎中。有《小方壶存稿》。

寄屈翁山

皇舆产万物,维南聚珍奇。彨珠或径寸,出浦光陆离。珊瑚八九尺,铁网笼其枝。 象犀与翡翠,玳瑁兼玻璃。由来贡尚方,筐篚不少遗。宝气之所锺,自然萃文词。屈子间世 出,抱才实不羁。乃知三闾后,根源浩难闚。八极恣挥■,摩霄翅高垂。苍茫洞庭野,寂默 闻咸池。跻岳攀云松,浮湘咏江蓠。自楚投建业,扬帆快风吹。纵览故宫阙,顿兴《黍离》 悲。复过淮阴市,吊古抵下邳。心输漂母饭,勇惜博浪椎。英雄事已矣,千载若可追。放荡 齐鲁郊,扬鞭路逶迤。直穷岱宗顶,瞰海腾晨曦。曩迹搜层崖,遍读封禅碑。性豪任所往, 身轻无一斋。犯雪度雁门,白草连边陲。飞扬逐射猎,箭叫如饿鸱。獐鹿佐柈馔,筝琶列蛾 眉。饮酣横槊歌,慷慨惊健川。孤踪转西北,过秦车载脂。河工仍壮观,襟带思昔时。空寻 渭川竹,浪采商颜芝。感彼帝王业,陵墓飒以衰。客久习土俗,荏苒岁月移。欲藏韦布名, 转使卿相知。招延到上国,翰墨纷淋漓。天子方右文,荐贤在皋夔。脱身竟不顾,肯被好爵 縻。鼓枻东入吴,潇洒开襟期。春风亦媚容,花秾闹黄鹂。一上姑苏台,便辞震泽湄。累月 留槜李,结友倾肝脾。谓竹垞筜谷。宝剑脱相赠,典裘劝金卮。谈锋各雄骜,如车驾騧骊。 挥戈动压垒,搴旗辄登陴。同调罢相斗,望尘徒盱睢。倾心廿余载,几易裘与絺。吾党奈索 莫,抱华无由摛。最惜庚申间,邓尉梅纷披。闻欲访荜门,怱怱值临歧。郭子皋旭为余言。 欣逢铁桥叟,张丈穆之。下榻曾淹迟。每尝羡学殖,屈指无肩随。奄有汉魏作,摇毫洗浮靡。 继获兰谿邮,忽枉璆琳贻。祝翁子坚转寄诗外刻集。开缄炫众目,词藻何葳蕤。鲍谢许力敌, 贾董为气劘。巨壑扬波澜,罔敢测一蠡。迄今栖罗浮,身隐誉益驰。凿泉通丹嵒,扩地增新 榱。奉母洁修滫〉随,余力视东菑。阖户拥万卷,此乐应忘疲。余从高凉还,重切倚闾思。 满衣鸰原泪,家孟兄任高凉,殁于官署。洒向天之涯。浩叹当兹辰,廉吏不可为。读书贵立 德,恤民宽以慈。邦人颇怀惠,无由愬彤墀。尚冀一言重,惄焉若调饥。乘间愿握手,舣棹 枳树篱。释此风尘色,挹君熊豹姿。雄谈溯上古,窔奥穷轩羲。再聆瑶琴韵,宫商发朱丝。 鄙怀蓄已久, 儗共吐嵚崎。不尔入山林, 恐贻达士嗤。

光孝寺

招提郡西北,旧是虞翻苑。祝发来南能,禅林契深眷。兹维风与幡,心动随所转。 见道发高言,宗风垂一线。我来趁媛凉,徙倚石栏遍。池荷已萧索,倒影开镜面。东为菩提 坛,夭矫虬龙见。遗植传齐梁,修条郁葱蒨。霜皮经雨缁,露叶迎风颤。想当结子时,累累 若珠串。闲登卧佛楼,梯级绝攀援。为感法门衰,津梁岂应倦。岿然铁浮图,千像孰锻炼。 舍利知有无,恒人罕流眄。藏经在一室,贝叶堆千卷。缅怀唐相授,莫睹滩哥砚。日永钟磬 闲,深林坠花片。暑气不侵人,临流撤纨扇。尘事苦忽迫,佳游谢谈宴。渐觉暝烟生,徘徊 有余恋。

香槎歌

香槎千岁搜空岩,一枝沈水同湖嵌。奇珍磊砢不易致,海南贾船驰风帆。星槎贯月海波漱,石骨并藉昆刀劖。斫成酒器注酎酣,筵前好当金杯衔。层崖叠嶂堆几案,苍翠郁积高巉巉。周遭向背似飞动,疑有林麓罗松杉。云埋雪冻虎豹睡,黄精可掘劳长镵。中含巨壑浸潭洞,倾银注泻声沨沨。天生巨制供快饮,神工鬼斧真不凡。长虹吸川鲸掣海,一饮数斗何嫌馋。荷筩竹根最琐细,爵斝觥觯都应芟。此杯远至路万里,蛮烟蜑雨留封函。忆当岭表事跋涉,鸰原老泪凝征衫。恍榔树底剖椰实,炎洲紫燕鸣呢喃。镫前回首话畴昔,捧杯玉指谁掺掺。人生行乐畅胸臆,对酒那计忧讥谗。奇材识赏有同嗜,顾我岂独殊酸咸。作歌与尔共倾倒,新诗肯寄双鱼缄。

访赠龚半千

幽人门径别,知在治城西。適我来相访,逢君出杖藜。图书髹几列,花草石阑齐。 款语曾无几,峰阴日已低。

似子成高隐,无惭处士名。换鹅将乞米,手写代躬耕。迹已稀城市,交还重友生。风尘余未谢,肯许订鸥盟。

次和过浮谿馆见绿阴之作

春红别树动成旬,池面圆荷贴水新。自分药栏兼竹穊,一生长作浣花人。

斜日疏帘碎影铺, 卑枝接叶坐莺雏。醉余客散闲吟久, 翠滴蕉衫独据梧。

观打鱼歌

漕溪东入大江水,倏忽波涛走千里。蛟龙移窟风雨过,濈濈遂多鲂与鲤。结庐一向临溪津,溪明日映开青蘋。四园集网如墙列,渔家三五为比邻。以我远来累晨夕,为引烹鲜话畴昔。黄头奴子手提网,布网势若千斤掷。网沈波底初无声,举网忽闻泼剌鸣。银刀霜剑纵横出,水族奔骇波涛惊。须臾后网有牵动,收来颇较前时重。竭泽而渔安可常,为命黄头且多纵。网外脱漏仍扬鬐,网中倔强安能施。饔人操刀向碪几,剁葱屑姜鲜羹宜。吁嗟好生天地德,饕餮斯须亦何益!君不闻既饱欢娱萧瑟同,杜老当时为叹息。

草堂春尽独坐寡营偶检东坡集见百步洪诗喜而次其韵

媽红姹紫随逝波,春光一去如飞梭。嗒然隐几亦何事,强将诗酒空消磨。舍傍隙地将一亩,乱石点缀差成坡。别有小池才数武,透泥出水浮新荷。小僮汲绠煎茗熟,沸腾铛内翻千涡。方床梦后起消渴,满啜有同鼠饮河。昨者薰风生薄暑,已寻刀尺裁轻罗。新栽花竹绕窗户,灌溉每思郭橐驼。药栏藓砌多位置,蚁封蚓径殊委蛇。篱边一犬自眠路,梁间双燕犹营窠。物情意态俱可適,兴到觅句能几何。书堂幽悄静如水,不闻邻曲夹呼呵。

魏叔子过草堂旋即言别次和原韵

闻到吴阊久,相期匪浃旬。病扶黄叶路,秋老翠微人。乱后情多感,宵分话更亲。 如何剧回棹,怅望出烟津。

汪文柏

汪文柏,字季青,号柯庭,桐乡人。官北城兵马司正指挥。有《柯庭余习》。

翠微峰

肩與望翠微,缥缈如灵鹫。云端出一头,俯领众峰秀。缓步从山腰,身轻一筇瘦。 林峦曲折移,青紫频舒皱。香多不辨花,韵细知鸣溜。怪石脱云胎,杰阁依山构。心清圣感僧,晏坐松林茂。宫阙在东南,疏甍成彩绣。壮哉九重深,宛转千门透。日丽远烟清,气澄 新雨后。可怜大道间,马寸人如豆。

杏子口

舟藏丘壑深,冈掩林峦集。一径杏花交,探奇从此入。憩息得精蓝,坦步多原隰。 红云深浅间,隐见畸人笠。花迷紫燕飞,果任白猿拾。榦老绣苔侵,根润芳泉湿。来瞻大医 王,岂授董奉业。到此不知津,徘徊空步屟。

过崇效寺访雪坞上人

墟里绽寒烟,平林扶秋霁。眷兹了心人,苦吟为活计。夙披霞上篇,未觏心先契。 漱茗粲周旋,剧谈忘久憩。泛览《大藏》书,深研百千偈。性海慕《华严》,从师探密谛。 藤叶飏轻幡,黄花补金砌。屋角枣垂红,素令偏新丽。静对茁清思,启轩延远睇。复恐俗物 来,预戒禅关闭。

刺梅园老松行

刺梅园中老松树,三载相思今始遇。果然奇绝不虚誉,起伏犹龙令我惧。长身宛蜒走当路,猛爪攫拏如欲捕。鳞甲浑身不知数,狰狞头角作吞吐。嘘气为云喷为雾,奋鬣直往苍穹诉。谁敢攀髯触其怒,任彼登天复回顾。山魈木客安能附,空中定有雷霆护。慈仁虚名落诗赋,欲补十景惟君助。蒲轮徵辟未必赴,傥逢尊者无恐怖。引杖降之归钵去,是龙是松

辨其故, 具眼人看方不误。

北墅

停舟寻北墅,缓步绕回廊。粉羽撩秋草,酲风拾霁阳。佛香通小阁,人影倒寒塘。 坦腹思幽榭,苔花满石床。

宿洪光寺

携琴来绝壑,脱网又披缁。已悦听钟宿,翻怜待漏时。露晞花气集,山峻旭光迟。 搔首临清涧,松阴染鬓丝。

盛泽

矮屋环湫市,洄流界叠塍。夜镫千匹练,秋雨半湖菱。击榜吴娃捷,评珠贾客能。 辛勤终岁力,犹未足催徵。

登烟雨楼

十度凭栏九度晴,今朝烟雨一舟横。雁飞难辨空中字,橹过惟闻暗里声。软浪成花吹寺壁,冷云如墨滚轩楹。举觞放眼吟长句,始信高楼不负名。

菊影

丘园高蹈识芳名,入室忘形夜气清。数武淡香分对榻,一窗生意出孤檠。多情彭泽 诗偏少,没骨僧繇画未成。梦断枕屏留傲态,缸花开尽月添明。

籌镫斜照粉墙间,枝叶分明似可攀。竟夜不移香不染,晚年相对意相关。解衣泼墨临偏反,扣户邀人数往还。嫩蕊酿成光色好,更宜杯底见南山。

李绳沅

李绳远,字斯年,号樵岚山人,又号补黄村农,嘉兴人。诸生。有《寻壑外言》。

出浔阳郭由东城陂入庐山

始离浔阳郭,言向名山行。逶迤陟泉坂,潦越瞰江城。匡庐望犹远,四山已纵横。 顾指心目豁,披拂襟袖清。岩长密林亘,天肃高霞晴。阳崖翠叶暗,阴壑丹树明。绝石路始转,入谷身已轻。奔涧互流响,栖禽挟鸣声。幽趣昔所惬,放旷从此生。宿痾真可捐,俗累 岂我撄。誓当卜田舍,将毋来玉京。游岳挈禽庆,敕家疑向平,踟蹰待婚嫁,岂非儿女情。

黄鹤楼望汉阳歌寄查三

客行秋江水,黄州见黄花。洄沿武昌岸,山城啼乱鸦。伊昔西征违故乡,遥登黄鹤

悲路长。我归一年滞吴越,值尔携家上汉阳。此时相闻不相见,江鱼塞雁空怀羡。天末谁题锦字书,桃花洞锁沌阳县。县外花飞催客还,绿萝芳草遍江湾。转眼三春棹初发,看君双桨到家山。与我相从卧丘壑,纵饮高吟恣行乐。两醉春阳欢宴多,那知挥手仍离索。汝作新词送我游,堪嗟来去尽江流。蒹葭弥岸凄凄思,览旧重寻黄鹤楼。楼边回首风烟夕,隔岸台池迥千尺。只有晴川万古深,巴巫上下堪头白。渡口连船夹浦沙,涢河回合汉河斜。佳人云端望不得,会难别易愁天涯。旅店客眠残月早,长年一曲《沧浪》好。杯酒难留夏口城,片帆再渡巴陵道。巴陵岸倚洞庭波,便入湘南吊汨罗。《怀沙》《鹏鸟》空词赋,满目烟涛奈若何。岳州楼馆相思路,落日苍茫对云树。转见岷江接汉江,大别山头忆君住。君住君归经几年,江波连郭复连天。轻飙欲借东流楫,一夜吹回及汝前。

蒙阴道中

细草黄沙路,清泉白石村。周遭群岭出,摇落几家存。枣树春成巷,梨花昼掩门。 谁邀驱马客,投馆及黄昏。

客夜有怀乌程吴右公明府董芑章参谋两表兄

一送滇池草,重行楚岸花。故人俱远宦,遥夕倍思家。沙暗三秋雁,河明八月槎。 天风洞庭叶,萧飒坠霜华。

泊长沙

湖外沙晴昨夜星,晓风吹断榜人停。城回岳麓峰前树,帆下湘西渡口亭。山气北来横紫翠,江声东转泻清泠。荆南十月烟花暮,怅望寒云起洞庭。

寄缙云蒋丹崖广文

郑虔游览不如君,苍岭元都兴绝群。天际烟花来夕雨,仙家鸡犬在春云。朱门高第 今成市,绛帐双鬟尽解文。吏隐千秋思往迹,道书珍秘想难闻。

武夷吟酬别彭尔仁入山

武夷之山周百里,三十六峰云外起。九曲洄潆水浸山,洞天虽众应难比。汉祀秦坛 共杳冥,升真历历有仙灵。珠裾戏水澄空镜,玉袖回峰转画屏。吾闻篯铿在初古,尧封彭城 号彭祖。兹山坐隐七百春,次子篯夷长篯武。以此山名万古尊,彭城遗裔传清门。侯官彭郎 好骨相,此中疑是真曾孙。当年彩屋空梁宴,笙管凄哀偶然恋。世人不记幔亭歌,何由得与 真仙见。彭郎结交天下希,武夷同好旧相依。高吟一曲河梁别,往日歌师今是非。邀余并访 真人阙,可怜归客鸣榔发。醉里遥寻玉女花,梦中解看天壶月。信是名才不可求,天宫咫尺 汝应留。寒梅仙掌春堪折,远寄西陵雪夜舟。

李符

李符,原名符远,字分虎,号耕客,又号桃乡,嘉兴人。有《香草居集》。

寄沈山子

自课童耕十亩田,古桥村落结庐偏。邻共过屋捎吟袖,畬水成溪活钓船。屐响柴门 诗弟子,坛开竹墅酒神仙。缫丝径里踟蹰别,惆怅西风又飒然。

句容

雨黯孤城外,遥峰翠霭沈。马疲愁日晚,雁少觉春深。江苇樵人担,山花汲妇簪。 茅山祠在眼,徒有茹芝心。

滁州

南北谯形壮,东西路势连。河流烟树外,山绕郭门前。过市求风栉,逢人问酿泉。 空携诗屐在,一宿又笼鞭。

村居书怀

欲采梅花酿麹尘,闭门日日醉青春。中怀挟策偏违俗,右臂佣书不救贫。解事园丁 教种树,能言笼鸟报来宾。买山未定何山好,村屋年年记此身。

曹钊

曹钊,字靖远,丰润人。贡生。有《鹤龛集》。

翻书

闭门却尘虑,翻书觅韵题。晚云斜挂树,秋雨乱鸣溪。得失应无碍,穷通未可齐。 竹鸡何所慕,恰恰向人啼。

指月庵

地偏少迹少,屋对乱峰开。月放千岩雪,松喧万壑雷。诵经驯虎至,洗钵豢龙来。 引兴随高衲,长歌日几回。

霜华

霜华历历下庭柯,坐久幽窗暗薜萝。风雨惯能欺客枕,烟霞端不负渔蓑。间情赋罢 人思酒,短札裁成雁渡河。满目征尘何日息,邯郸道上塞云多。

曹鈖

曹鈖,字宾及,号癭庵,丰润人。贡生,官内阁中书。有《癭庵集》。

舟中

晴日动林皋,渔人荡轻橹。扁舟随意放,岩花齐欲吐。村疏烟火稀,山深树石古。 远望列群峰,一一青可数。

渔阳道中

平原空怅望,故国已荒丘。猎犬穿林出,滩声抱石流。月明燕岭暮,霜结蓟门秋。尚欲停车问,悲笳动戍楼。

归怀

指顾平原忆旧游,偶然乘兴一登楼。萧疏短鬓三年梦,寂寞长江万古愁。看世拟逢 青眼客,移封愿得醉乡侯。西风萧飒吹黄叶,摇落寒林树树秋。

再游黄山

三入黄山今又来,诸峰偏向故人开。林深夏带高秋气,瀑泻晴喧巨壑雷。烟雨半沈 舂药井,云霞全护炼丹台。莫言竟日无多路,选步应知为惜苔。

水自回环径自分,看山岂惜往来勤。烟鬟黯淡将梳雨,石齿崚嶒欲齧云。曲邃若非 亲阅历,幽奇端不付传闻。峰峰千仞堆寒玉,初辟何人运斧斤。

曹鋡

曹鋡,字冲谷,丰润人。官理藩院知事。有《雪窗诗集》。

雨中对瀑复观龙潭水涨

骤雨划然至,烟雾失长空。千峰荡微影,飞瀑垂玲珑。深潭忽怒沸,疑是蛟龙宫。响声振林樾,雪浪生寒风。蹑足心欲动,举首摇双瞳。下触石骨碎,上与银河通。谁为开凿力,吾将问洪濛。

伏日同伯兄眉庵松茨消暑

何处携尊酒, 东皋旧草堂。雨残沙路细, 风软药苗香。巢燕非时出, 山蜂底事忙。 老亲怜弱稚, 欢喜故相将。

入山晓行

竹舆随径转, 萝薜挂烟霄。石险偏横树, 溪回屡渡桥。雾收方见日, 云聚即成潮。 潇洒红尘外,青山认寂寥。

入紫翠林

人多穿洞出,路狭碍枯藤。怪石如迎客,山猿不避僧。疏林飞瀑落,绝壑乱云蒸。 素有登临兴,梯霞上百层。

坐响雪亭

山涌涛千尺,晴堆雪一溪。雨随云去住,烟接树高低。路尽疑天逼,峰尊与日齐。 扫苔聊独憩,摩壁好留题。

登文殊院

嵯岈开线路,杖履莫辞难。岚气千岩雨,山风六月寒。石欹防客过,松古学龙蟠。 纵目遐荒外,方知天地宽。

曹钤

曹钤,字孝符,号啬庵,丰润人。贡生,候选训导。

游披霞山

落日红云带鸟飞, 重来登眺坐松扉。秋林寒渚千村晚, 山寺无人月送归。

马敬思

马敬思,字一公,桐城人。诸生。有《虎岑集》。

题陈隐士山居

羡尔深山静,连宵不掩扉。秋潭鹤影瘦,霜草鹿胎肥。岁酒先储瓮,园丝半在机。 此中多隐者,相识姓名稀。

祝山如席上同钱饮光先生夜话

熟读《离骚》夜雨残,床头《周易》共盘桓。鹃从蜀破犹称帝,松自秦亡懒署官。 钵冷瞿昙归后讬,诗工摩诘晚年看。草堂幽处梅花发,偏与人间斗岁寒。

野衲云山隐自招,高僧列传党人谣。书中甲子题三径,袖里春秋纪六朝。路觅西来 传梵铎,禅安东渡挂诗瓢。心灰久已同枯井,不逐风波似汐潮。

得方尔止先生书

三载移家桃叶春,钓船烟雨芰荷身。他乡白发惊新长,故国青山似旧贫。座上曾逢周铁虎,车前犹泣汉铜人。南朝多少尊官冢,冷落高低卧石麟。

宿僧房即事

老僧留我西窗宿,夜劈松薪煮新竹。起来云薄晓山青,几处疏烟出茅屋。

怀尔升师

先生真隐逸,家室未居城。世说卿惭长,人称姓不名。燕巢茅屋暖,鹤啄芡湖清。 鱼汊今年好,方舟荡桨行。

官城即事

宜城三万户,十载半凋零。画阁移蔬圃,朱门换荻屏。烟波当晚碧,汀草出寒青。 独上江亭望,渔镫乱客星。

马孝思

马孝思,字永公,号玉峰,桐城人。诸生。有《覆瓿集》、《屏山诗草》。

龙眠山

龙眠宜是逃名地,忆昔公麟隐此闲。尽有壶觞追北海,不贪仕宦惜南山。桃梅逐路 争开落,麋鹿亲人共往还。春色定知游客遍,风尘怜我滞江关。

游龙眠

少保幽栖处,谿边曲径开。涧茶留客坐,蔬饭待僧来。引水穷泉脉,当山垒月台。阶前松柏古,犹望后人培。

赠田琢如

四郊鸡犬是秦余,淳朴还推水竹居。地僻肯从游子借,径荒先命野人锄。瓶封菊蕊 冬藏酒,馔入谿头早市鱼。天半逢君能爱客,不妨高枕当吾庐。

马方思

马方思,字江公,桐城人。有《寒桧轩集》。

读史

青鸟西飞汉集灵,柏梁台是望仙亭。空劳海上求方士,笑杀金门一岁星。

赠医者

小隐山中采药行,向平五岳未忘情。此生不入长安市,女子何从问姓名。

寄张山人

伊人高卧白云阿,衣制芙蓉带女萝。老去自伤《别鹄操》,贫来懒逐《饭牛歌》。 秋前黄发同衰叶,雨后青山守烂柯。试问鹿门庞隐士,何如采药市中过。

答王吉人

小隐无由问起居,仲春始得故人书。暂归白社开新径,久羡青山葺旧庐。芝草欲成 黄绮志,桃花不禁武陵渔。相期过从清秋后,词赋奚烦问子虚。

马国志

马国志,字勋公,桐城人。有《怀亭集存》。

怀舍弟执公山中

送君山中居, 忆君山下路。此夕独徘徊, 凉风起烟树。

南郊饮陈氏精舍

水田十亩山人宅,茅屋三间处士家。留客共餐篱下筍,呼儿频煮雨前茶。绿摇荷盖添新涨,红掩柴门带晚霞。自识南塘村外路,莫嫌乘兴就黄花。

晓发寄姚彦昭

酒酣月初堕,梦回天欲曙。解缆及秋晴,挂帆向江路。揽衣起徬徨,已失维舟处。 潺潺胥浦流,霭霭吴门树。举目得清旷,无言自来去。独有索居情,空水隔烟雾。

宿白云庵

不觉看山倦,招提远近探。偶寻黄叶路,忽到白云庵。拄杖倚寒石,临风对春岚。 铺床置羹饭,竟夕老僧谈。

曹

曹 , 字舒光, 号冷民, 晚号清风居士, 金山人。有《钝留斋集》。

集次典寿香亭对菊限韵

雅会杂山农,风流羡仲容。秋光成五色,寒影见千重。日晚开高阁,村深闻远钟。 杖头吾未办,率尔一相从。

曹煊

曹煊,字天生,号仑山,娄县籍金山人。诸生。有《钓滩诗草》。

郊居

旷野风尘隔,柴扉昼不开。荷香浮碧水,竹影漾苍苔。径有渔樵至,门无车马来。 悠然情自得,鸥鹭与徘徊。

张道源

张道源,字云溪,铜山人。官江西盐驿道。有《玉燕堂集》。

佛手柑

金色曾传授记年,好从清苦味真诠。如何有手多相似,不及天龙一指禅。

张道深

张道深,字竹坡,铜山人。有《十一草》。

虎阜遣兴

四月江南晒麦天,日长无事莫高眠。好将诗思消愁思,省却山塘买醉钱。

千秋霸气已沈浮, 银虎何年卧此丘。凭吊有时心耳热, 云根拨土觅吴钩。

盛镜

盛镜,字于民,武宁人。有《寄轩诗钞》。

春日

春日天气佳,好鸟林外鸣。即事都无虑,幽居心自清。日入农务静,披衣步前楹。 野老来相过,有酒时一倾。遂此生前乐,无为身后名。

盛大谟

盛大谟,字于野,武宁人。有《字云巢诗钞》。

龙潭石

十月风烟尽,寒潭清我神。淋漓蝌蚪字,剥落核桃皴。日月劳宾主,溪山递故新。 渔歌方款乃,万石自嶙峋。

盛乐

盛乐,字水宾,武宁人。有《剑山诗钞》。

宿驿南

停骖问古驿,山色入樵歌。惟有客愁远,不堪秋雁过。天低云气老,野阔北风多。 此去柴桑近,东篱今若何。

上韩侯钧台以诗投淮水吊之

平台风散晚烟痕,往事悲凉落日昏。意气已随飞鸟尽,功名但有钓鱼存。汉家草草夷人族,淮水沄沄荡古魂。浪迹若非逢漂母,今来何处吊王孙。

曹尔垣

曹尔垣, 字彦师, 号中郎, 嘉善人。诸生。

送林武宣之楚

金风秋气肃,霜林翳远道。游子辞故乡,登途展遐眺。寒烟横苍莽,积翠迷深窅。 扬帆千里去,云山一何杳。江声日夜闻,清猿伤客抱。抑郁念伊人,抗情寄物表。俯仰今昔 间,爰披江蓠草。相思秋水清,相见春风杪。同心蕙与兰,两地参与昴。侧身云梦泽,离怀 空缭绕。申章讬缱绻,意气良自宝。

曹尔垓

曹尔垓,字锡九,嘉善人。有《石竹山房稿》。

己酉九日墨林小集

杖策将登高,高冈隔烟雾。风急塞雁哀,骤雨当窗度。邀宾水上亭,披襟探毫素。 图成山吐云,绘出花垂露。良辰足欢娱,肯为穷愁误。作赋临清流,衔杯对高树。红叶影苍茫,黄菊悲迟暮。卷帘夜色昏,水田下白鹭。未尽茱萸觞,客迷东郭路。舟子遥相招,濯锦江头渡。

浒墅关晓行

吴关迷曙色,已挂一帆风。淡月临清霭,平波映碧空。鸡鸣茅屋里,人语画船中。 极目长天望,朝云绕树红。

曹尔埏

曹尔埏,字彦博,号博庵,江南华亭籍金山人。诸生。有《岭云集》、《道迩堂集》。

苏门访孙夏峰先生不值

大雅久沈沦,老成俱寂寞。当代仰哲人,此地宗伊洛。弱冠扬骏声,幽奥穷坟索。 文藻丽班扬,风流迈李郭。德辉固冲融,高怀复磅礴。素履难具陈,古人恨不作。岁晚慕隐 沦,散发卧丘壑。变化叹犹龙,腾骞迅孤鹤。讵意动华时,未遂颍箕乐。远谢苏门隈,燕蓟 暂栖泊。山水失主人,孤云将焉讬。遥望子云亭,松花自开落。

曹尔埴

曹尔埴,字彦范,一字季子,号范庵。江南华亭籍金山人。贡生,官桃源教谕。有《绿野春深堂类稿》。

折杨柳

去年折杨柳,还与君同陌。今年折杨柳,关山千里隔。思君不可见,攀条长叹息。 遥遥玉笛吹,总是伤行役。

毗陵道中

两岸暮潮平,风帆一叶轻。人烟随日暝,渔火傍沙明。纤月流高树,悲笳接废营。 乡关情更切,回首望孤城。

冒与晋

冒与晋,字晋卿,号旸谷,如皋人。诸生。有《蜉蝣集》。

乌衣巷

门掩斜阳户网尘,乌衣巷改尚逡巡。旧时燕子飞还到,莫向堂前认主人。

冒嘉穗

冒嘉穗,字穀梁,号珠山,如皋人。诸生,考授主簿。有《寒碧堂集》。

上巳修禊水绘庵分赋

和风荡林樾,霁色摇春岑。入门洒飞泉,映水啼幽禽。花竹日淡沱,烟景何清深。 节序一以佳,矧遘瑶华音。握兰正婉娩,折柳嗟侵寻。且漱溪边石,一听丘中琴。

冒丹书

冒丹书,字青若,号卯君,如皋人。诸生,考授州同。有《枕烟堂集》。

赠柳敬亭并题左宁南军中说剑图

玉帐登坛夜论兵,将军出塞气纵横。可怜多少衔恩客,写向丹青只柳生。

同其年看池荷

几折沿隄路,相携坐此中。天连千顷碧,花涨一池红。欲去已将没,看来意不穷。 江南有愁客,对此忆吴宫。

冒车书

冒车书,字富五,号砚癖,如皋人。

秋兴

几缕秋烟一抹霞,空阶凉雨似山家。常忧来日不相得,讵是我生真有涯。径绕林皋 封落叶,宅连雉堞乱归鸦。候虫也似知迟暮,鸣过墙阴稨豆花。

山介山数叶且留余,犹记成童佩韘初。王谢弟兄过络绎,崔卢儿女笑轩渠。蓼花水 齧中丞墓,柿叶声寒开府墟。先中丞抚秦军,后家于海陵,遂葬焉。吏部遗书亦寥落,先吏 部藏书存什一于千百而己。我姑饱贪到华胥。

冒汉书

冒汉书,字七峦,号小山,如皋人。

春日病起

久病卧茅屋,阶前芳草生。客多相惜意,鸟作可怜声。柳意迟新雨,花心动晓晴。 江乡烟景好,三载总关情。

冒禹书

冒禹书,字玉简,如皋人。诸生,候选训导。有《倩石居遗草》。

秋来

忽忽年华伤暮迟,秋来怀抱最相宜。感时实下江州泪,触目空多宋玉悲。萧瑟荒庭鸣蟋蟀,苍茫远水下鸬鹚。寥寥天地吾何讬,几度临风有所思。

冒殷书

冒殷书,字文足,号借庐,如皋人。诸生。有《梨雨堂集》、《春浮集》、《何文 居集》、《万卷楼》初、二集。

己卯上巳过顾大念哉

比来才觉负年华,马齿惊心暗暗加。百舌尽情啼上巳,东风著力落桃花。管弦不结 文人社,诗酒聊寻处士家。穷日追欢还卜夜,严城何必鼓频挝。

冒福书

冒福书,字箕畴,如皋人。诸生。有《桐蕉书屋集》、《韪斋纪年诗》。

浔阳得文足家兄书赋答

相思谁似弟兄真,书到浔阳滞四旬。枫叶雨寒前浦雁,芦花风老隔江莼。遥传筑墅名丁卯,近说编诗首戊辰。入夜尚能斗酒否,好缘双鲤问精神。